

近代中國史料叢刊續編第八十八輯
沈雲龍主編

皇朝政典類纂
沈席裕徐福輯

漕運

文海出版社有限公司印行

皇朝政典類纂

皇朝政典類纂卷四十八

漕運一

漕制職掌 轉運事例一 羅按疏濬運道見水利河工門

漕於京師凡八道其運由江達淮截河徑泲泗泚汶之水沿衛沂潞以抵於通壩凡糧有正兌有改兌有改徵有折徵有撥運皆隨以漕耗漕費其色稻稷粟麥豆各因其所產而供之白糧則惟蘇松浙江供焉凡運船視其江河之宜而別其製以時修繕運丁則僉於衛所官給以資以屯田所入為津貼焉凡船皆分以幫各定其水次以配運凡兌有冬兌有春兌區以路之遠近既兌則開行凡督運押運領運總運官各分其責慎其風火備其起撥詰其姦隱凡南漕過淮關則盤查旗丁例帶土宜得免稅焉會典

順治初年定設漕運總督一人駐劄淮安會典事例

順治元年兵部右侍郎金之俊奏臣家世江南曾任督糧道于漕事身親目擊有慨于中敢竭其愚為 皇上

陳之一曰運糧官卒宜講也查前朝運有十二總領衛一百四十用旂軍十二萬六千八百人令衛所須更則必另設運官以任之非都守等弁之有才略兼有身家者不可也旂軍不用則必另募漕卒以代之非沿河一帶習知舟楫水性之丁壯不可也約每船用卒十二人卽以頭舵二人為隊長管束十人每弁統卒五百人約領運船四十隻行舟一如行師庶有以相維相助也 一曰船隻措備宜講也查前朝糧船約萬隻近年凍損及燒燬甚多浙直江廣所在雇募民船為費不貲而又重累商民苦莫勝言為今之計除搜整舊船外江南投順各將兵船處多擇其堅完者改作糧艘不足再議造可也 一曰節級轉運宜講也明季

督漕 功令甚嚴卒未能挽遲為速良由軍船一半載糧一半載貨重滯易於淺閣又沿途貿易尤多遲遲
臣以為須做屬臣裴耀卿劉晏董漕故事緣水置倉節級轉運如江船不入汴汴船不入河河船不入漕之
說今日江南之船止須抵濟而返由濟運至津通另造剝船又作一節轉運其船窠底平倉闊多不過載米
二百石受水六掣而足以四五人牽輓便可日行百里必無凍阻露積之虞且大船不入濟則回空甚早又
不誤新運此至便計也 一曰蠲除苛耗宜講也明初正米一石止加耗五升尋增至七升浸假而加增無
已又有臨尖踢斛拋剝漫籌等諸弊近年每石且加耗至二三斗緣衛官索旂軍常例而恣其勒增不肖有
司又受衛官餽送而一任科歛節節相剝民何以堪今 興朝嘉興更始當循明初舊例倘運弁運卒及州
縣官有仍蹈故轍者重罪不赦則無名之耗自除而萬姓更甦矣 一曰裁汰冗員宜講也漕糧耗多亦半
因官多縣有糧衛府有糧廳皆囊糧之官並非催糧之官臣以為征收宜專責正印不得復委糧衛催押宜
專責刑廳不得復委通判領運既各有專官且有糧道提衡於上亦不必復設運總名色冗員既除則蠹蝕
少而耗增自減矣 一曰剝運盤驗宜講也各直省糧道俱自水次押到京漕道駐劄瓜州候各糧道到
齊始尾後押幫不過拱手受成而已臣以為漕道徑當移駐濟寧專管剝運一事各糧道至濟親督領運官
交米過剝即押回空而南料理新運仍聽漕道盤驗有無足額一面報總巡二漕一面報內外部與倉部濟而
下糧道任之濟而上漕道任之則責成專而奏效速矣 一曰漕額出入宜講也除前朝新漕遼練等米應
蠲 恩與與新餉並蠲外原額入數若干諸若京營捕營四衛營錦衣衛七十八衛所光祿寺廚役各項等
及各鋪邊糧共出數若干今 興朝減去冗員冗役各鎮冗兵止應出數若干通盤打算須入數若干較舊

額盈餘若干臣以爲餘數徑行改折隨漕征解則朝廷省運價百姓省加耗公私兩利矣一曰官卒廩餉及造辦工料宜講也查前朝官軍除加兌外仍支給坐行二糧約運米一石不實費二三石儘足贖餉之需各直省又有過江過湖席板等銀及一六二六三六之隨糧輕齎輕齎卽是餘耗折色照地里遠近爲多寡如江浙湖最遠則耗四折三故曰三大直隸江南北次遠則耗四折二故曰二六山東河南較近則耗二折一故曰一六此項原資運費以之濟造辦工料真一勞而永逸也以上數條倘有可採伏乞勅下廷議參求至當爲萬年長久之計至于今年糧運南庾之漕白以接濟京儲尤爲目前要務此在漕臣自有措置無俟微臣再贅矣金文通集

七年裁巡漕御史會典事例

又奏准重運漕船抵通交卸例聽巡漕御史督押回南今巡漕御史已裁應自通州起卽將原來運糧起卸船交明密雲道押到天津交割明白仍前督押出境自此而南武德東昌各道照前督押直至濟寧呈報總河給發牌票責成沿河各道逐程督押出境至淮安呈報總漕至江寧呈報江南總督至杭州呈報閩浙總督各照前責成各道逐程督押交割該管衙門接濟新運如有短少及攬載遲滯將原領官旗查明治罪督押各道一併議處會典事例

十年題准各省糧道職掌漕務別衙門不得干與有勢要把持及不服鈐束者指實參奏會典事例

十二年題准漕運錢糧悉歸糧道專管其他省協運官軍各該管官將支給行月雇募等項造冊移送彙報總

漕送部察覈會典事例

十二年奉 上諭漕運至為重務年來拖欠稽遲弊非一端漕司因宜盡心督撫亦宜分任責成除湖廣漕船暫留充餉外江南江北江西浙江等處漕糧著該督撫督率所屬各糧道州縣衛所等官恪遵漕規冬兌春開務依限到淮其到淮以後漕督察驗催遣抵通交納河南山東漕糧該督撫督率所屬各官徵兌開行知會漕督察催北上係何地方遲誤者自督撫以至州縣衛所等官應擬何罪通攷

十六年復准糧道專司漕務督押通淮盤驗後即令回任料理新漕除山東河南糧道照舊押運抵通外餘省令總漕巡撫於本省管糧通判中遴選一人督押抵通會典事例

康熙二十二年諭漕運總督管理船糧是其專責過淮及回空時令漕督親身往來催遣不致貽誤會典事例
又河南漕糧改折裁糧道官會典事例

二十九年河南漕糧仍徵本色以開歸鹽驛道兼理會典事例

雍正二年諭江南總督查嗣經漕運總督張大有署理江蘇巡撫何天培朕惟漕運所經河道因以通國廩之輓輸亦以便商民之利涉旗丁與商民自應一視同仁無容偏護而偏累也去年因秋冬雨少河流淤淺而旗丁人等不顧漕運維艱任意攬載客貨致船重難行聞今春丹陽常州等處地方及沿途淺濘擊商船起剽且借名需索貪暴公行得賄者雖空船亦行釋放不遂其欲者勒令當差有將貨物行李拋棄河干紛紛露積或為風雨所損傷或為盜賊所窺伺該管漕運文武官弁漫無約束毫不經心小民營販資生何以堪此擾害爾等係地方大吏皆當實心體恤稽察周詳奉諭之後或有起剽之事當各嚴飭所屬官弁申明約束不得仍蹈前轍並出示遍諭軍民人等使知朕一體軫恤之至意至張大有身任總漕糧艘往來乃其專責尤宜整

肅綱紀惡奸去弊靡明馭下毋使玩法犯科乃往往固執己見袒護下屬任其沿河盜賣漕糧兼倚勢藐法貽累地方甚屬不合今除已往不深究外嗣後若仍不加意約束屬員有心縱容及失於覺察再經朕訪聞定行嚴加議處其欽承毋忽雍正內閣 上諭

又 諭太僕寺少卿兼巡視河道監察御史須洲爾奉差巡視河道理宜悉心經理凡事公平勿執己見方於漕運有益據奏有裝載芝蔴船十隻持令箭過關開官放行以致漕船攔阻七日將開官參劾前來夫運河之設未嘗禁商船之往來但水小則加意管束先儘糧船前行水大時則聽商船任便行走京師百貨俱取給於東南之商販今將芝蔴船嚴禁若此則各種商船必然一槩阻滯百貨安能流通於民生日用均屬未便爾從前署理藩司印務與巡撫不協今管理河道諸事記憶往往見小尙氣甚負朕委用之意嗣後當平情和衷盡去偏私膠固之習方有裨於公事雍正內閣 上諭

七年諭朕聞糧船過淮所費陋規甚多嗣後著御史二人前往淮安稽察不許官更人等向運軍額外需索以致擾累其糧艘中攜帶物件除照例許帶外如運軍有夾帶私鹽及違禁等物者亦著該御史稽察但不得過於嚴刻吹求以致糧運遲滯至糧船抵通之時其該管衙門官吏及經紀車戶人等恐有向運軍額外需索陋規者亦著差御史二人前往稽察淮安於二月初差往通州於三四月內差往不必拘定滿漢各一人著都察院按期開列請旨會典事例

十二年題准嗣後巡察南漕御史令於漕船過淮出臨清之後隨漕沿途稽察直抵天津如有運河水道石塊木橋該管官查看不實起除不淨以致抵觸漕船及官弁需索稽留等弊卽行參奏會典事例

乾隆二年題准巡漕御史四人以一人駐劄淮安巡察江南江口起至山東交境止一人駐劄通州巡察天津止一人駐劄濟寧巡察山東臺莊起至北直交境止一人駐劄天津巡察至山東交境止各按所巡地方巡遊訪察剔除諸弊會典事例

四年題准鐵算博糧之法其間伸縮盈虛易滋弊竇嗣後鐵量盤查著漕運總督親率善算之人赴船細數如有勾引滋弊者立即嚴拿究處會典事例

二十四年諭前聞楊村一帶路過客船悉被封禁客商貨物中途搬卸以致轉運維艱該處新設巡漕御史二員本為稽查漕船河道起見若因此而滋擾累殊非設官本意其楊村駐劄巡漕御史之處著停止會典事例

三十七年奏准糧道一官以漕務為專責當糧船開行務須親身督押到淮不得藉地方差務委丞倅代押如有經辦軍需緊要事件必先詳明督撫漕臣方許委員代押會典事例

三十八年諭糧船在途特派御史巡漕驗閱風瞭並查察偷竄耗米等弊凡屬漕規運務均當一體稽查歷來巡漕各員惟以督催之事具文塞責餘皆置之不問豈派員巡察本意嗣後巡漕事宜著各巡漕御史一體實力嚴查毋稍因循懈忽會典事例

又議准漕運總督總理糧務凡倉運運弁修造漕船派撥全單兌運開幫過淮盤掣催趨重運查驗回空駁勘漂流督追漕欠諸務均屬專理所有漕運各項錢糧尤宜徹底清覈汰浮剔蠹毋許所司朦混隱沒直隸山東

河南江南江西浙江湖廣七省文武官員經理漕務者咸歸管轄如有官吏折乾盜賣及胥吏需官丁索並漕

倉棍把持分運事務與沿途文武官員催撥不力違誤漕務者即行分別糾參會典事例

四十一年議准糧道總理通省糧儲統轄有司軍衛遊委領運隨督各官責令各府清軍官會同運弁倉運運軍成造新船修葺舊艘督催州縣開徵漕白二糧隨糧經銷磨木行月庫工耗賄等經費錢糧查驗米色嚴禁倉棍把持糧囊包攬攙和糠粃等弊並管束運丁在次不得折乾及需索私貼苛勒耗賄兌竣之日依限開行督催漕欠諸務一切漕運錢糧盡歸糧道專管各司府道不得分督混淆督撫亦不得別行委用致誤職守會典事例

四十八年議准浙江湖廣江西等省令該糧道一體督押過淮直抵臨清始行回任其自臨清抵通概令山東糧道嚴查催兌俾漕督總押尾幫抵臨清後再行回任至各該糧道內或因路途遙遠任內遇有要件難以分身及陞遷事故離任令於各該省道府大員內揀派一員或道府乏人再改委同知押運會典事例

又議准江西糧道經管漕項銀米愈丁迭運事務若令督押抵臨約於九十月間始能回任嗣後於押運抵淮盤驗後即回任辦事臨期酌量於通省知府同知內委派一員督押抵臨會典事例

五十三年諭各省糧道每年押運抵淮不過於各糧道中輪派一員押幫前進漕艘為數較多一人耳目難周照料難期妥協宜何省糧船令該糧道押送抵通更為有益其酌定章程妥議具奏欽此遵旨議定山東河南令該二省糧道管押抵通江南於江安蘇松二糧道內輪派一員直押抵通浙江令糧道押運抵通後速即回任辦理新運汀西湖南湖北三糧道押抵臨清後即行回任其自臨清至通州既有本幫丞倅即可押運抵通併交山東糧道就近催糧會典事例

嘉慶十二年諭內閣給事中嚴烜條陳漕運事宜一摺朕閱所奏各款內如淮安盤驗宜加派道一缺

漕御史俱在瓜儀一帶督催漕船此外遇徒陽挑挖運河間須過江查勘並無須該御史往蘇州一帶迎提漕船之例近年來該御史等往往以迎提漕船為名越境遠行實多騷擾嗣後著查照定例毋許違涉所有江蘇及浙江各幫卽照該給事中所奏責成江蘇巡撫就近嚴催其南漕御史應於幫船到淮之時會同漕運總督迅速盤驗以免渡黃稽緩 聖訓

十四年奏准巡視漕御史有稽查坐糧廳之責不得仍用坐糧廳書役應由通永道衙門酌派會典事例又奏准江安糧道管轄四十九幫蘇松糧道所屬五幫每年僅派一員輪押抵通非慎重漕儲之意嗣後每年首進幫船委江安糧道專押抵通二進幫船委蘇松糧道專押抵通江安慶慶等八幫如能趕緊開兌自應列入首進或二進幫內儻江湖風汛靡常不能趕入二進責成浙江糧道督察催辦會典事例

又諭內閣漕儲為天庾正供每歲徵收七省漕糧運樞轉運自漕運總督以下分設多官專司其事經由大江河湖運道遇有汛漲淺阻多方疏導需費帑金不下數十百萬誠以京師王公百官祿糈及八旗官兵俸餉胥仰給於此且舟行附載南省百貨若遇行走迅速貨物流通商賈居民咸資其利倘值糧艘中途阻滯則商船均不得越渡京師百貨亦因以昂貴每年自春徂秋申誠漕臣疆吏經營催趲不遺餘力是漕糧為國家重大之務勞費孔繁乃運運如此其難而自抵壩貯倉以後該倉場侍郎以及監督等官均不知慎重職守歷任相沿因循廢弛怠忽疲玩遂至攙和抵竊百弊叢生前因上年所運北倉米石潮濕蒸變將辦理不善之倉場侍郎達慶蔣子補等懲並將坐糧廳監督等分別降革著賠旋因清理倉儲特派大臣侍衛等分班盤驗查出虧缺數目其從前短收浮出重項偷竊等弊均由此破案歷任倉場侍郎總司積貯毫無整頓咎無可辭其中難

間有一二素稱明察留心防範者亦總未能查出積弊及早剔除亦不過虛有其名毫無實蹟皆屬誤國負恩
必應懲治今奸胥蠹役種種贓私全行敗露自應將歷任倉場侍郎按照年月久暫及失察弊重輕分別懲
處現就該花戶甲斗等供明舞弊年分扣算特令自嘉慶三年以後將歷任各侍郎職名查明開單進呈除宜
與傅森劉秉恂均已病故違屢蔣予瀟先已黜革懲治外鄒炳泰廣音托津在任較久著交部嚴加議處薩彬
圖德文吳璣李鈞簡任內均有黑糧重領米石之事失察較重亦俱著交部嚴加議處賈楚克扎布吉綸額勒
布在任均止數月著交部議處和寧到任在一月以上那彥寶不及一月著交部察議其該倉監督著交部詳
查在任年月另行奏明分別懲處

聖訓

道光八年諭內閣御史孫善寶奏風聞近日兌漕情形幫丁重在索費並不著意米色頻年以來逐漸加增著
責成該糧道嚴行禁革除舊定限制外絲毫不得多取並將徵漕不善之州縣挨次查辦儻該道辦理不能得
力該督撫不妨於所屬道員中酌量相宜之人奏明對調以資整飭其監兌押運等差該督撫務須遴委妥員
期收指臂之效不得濫行差委取滋弊混

聖訓

十五年諭內閣陶澍等奏籌議趕辦新漕各事宜一摺新漕開兌著責成糧道臨倉親驗並委各屬總運廳員
逐廠察看一經驗定米色幫丁即不得混挑妄竄少一分挾制即早一日開行各幫旗丁仍著加意體恤毋令

致負重累

聖訓

咸豐二年諭著宗漢奏參貽誤漕運之前任糧道一摺前任浙江糧道胡元博於回空糧船迎提已遲迨新糧
監兌之後並不迅速催趕復屢次回省節節就延以致在後各幫至霜降後尙未具報開行並訪聞未開各幫

尚有銀米短絀情事實屬玩誤胡元博著卽革職由漕運總督委員押令回浙將未報開行之在後四幫銀米
勒限清釐備查有別項情弊著卽嚴參東華續錄

四年諭軍機大臣等寄諭漕運總督邵燦漕運爲漕督專責本年蘇省海運僅止白糧六萬餘石全漕不能起
運若年復一年於天庾正供大有關係且東南連歲豐稔小民豈不樂於輸將聞蘇省有漕州縣舊習相沿仍
事浮收勒折刁生劣監與胥吏因緣爲奸率致抗糧釀禍大吏因循畏事遂致漕務日壞著該漕督破除情面
認真督催儻地方官催科不力或有藉口農民抗玩意存侵蝕等弊卽著從嚴參辦務期來歲新漕實力徵收
開春後迅籌起運不致仍前貽誤庶蘇省漕務可望起色而浙省亦不致有效尤之患 聖訓

十年諭內閣前據御史薛書堂侍郎宋晉御史福寬等奏請裁汰河員並改設漕運總督簡員駐守宿遷各摺
片當交御前大臣軍機大臣會同該部議奏茲據載垣等奏遵議裁汰河工文武官員酌改操防營伍各事宜
開單呈覽江南河道總督統轄三道二十廳文武員弁數百員操防修防各兵數千名原以防河險而利漕行
自河流改道黃河一帶本無應辦之工官多闕冗兵皆疲惰虛費餉需莫此爲甚所有江南河道總督一缺
著卽裁撤其淮揚淮海道兩缺亦卽裁撤准徐道著改爲淮徐揚海兵備道仍駐徐州所有淮揚淮海兩道應
管地方河工各事宜統歸該道管轄廳官二十員內豐北蕭南銅沛宿南宿北桃南桃北外南外北海防海阜
海安山安十三廳均係管理黃河現在無工又管理洪湖之中河裏河運河高堰山盱揚河江運七廳現在工
程較少均著一併裁撤惟中河等七廳有分司濬蓄宣洩事宜所有裁撤之運河中河二廳事務著改設徐州
府同知一員兼管裁撤之高堰山盱二廳著改設淮安府同知一員兼管裁撤之裏河廳著改歸淮安府督捕

通判兼管裁撤之揚河江運二總著改歸揚州府清軍總捕同知兼管至裁撤黃河無工十三廳原轄各工段
汛地卽著落各該管州縣官管轄不得互相推諉各廳所屬之管河佐雜人員除揚莊等廳官十員專司啟關
毋庸裁撤外其宿州等管河州同五缺高郵州等管河州判三缺東台等管河州丞十九缺高良湖等管河主
簿二十一缺阜甯等管河巡檢十六缺均著一併裁撤清江地方緊要著添設總兵一員作為淮揚鎮總兵駐
劄該處俟軍務平靖再行改駐揚州原設河標中營副將一員著卽裁撤改為鎮標中軍遊擊駐劄蔣壩其淮
徐遊擊一員駐劄宿遷所有鎮標中營員弁並右營廟灣洪湖佃湖等五營遊擊以下官五十四員馬步守兵
共二千五百餘名原屬操防悉仍其舊至蕭楊等營所屬修防兵六千九百餘名著一律改為操防將二十四
營改設蔣壩宿遷蕭縣豐沛桃源安東山阜高郵葦蕩左右等十營除酌留遊擊以下八十一員外其餘六十
七員悉行裁撤以上各營官兵均歸新設淮揚鎮總兵統轄著卽裁汰老弱簡選精壯認真操練以資戰守現
在江南軍務未竣該省督撫勢難兼顧所有江北鎮道以下各員均著歸漕運總督暫行節制

專訓

同治七年諭內閣鍾岳宋晉奏請飭抽查漕糧御史認眞抽掣嚴防積弊等語漕糧爲天庾正供理宜嚴杜偷
漏之弊近來各倉虧短疊繁輒藉掣欠一項爲謬卸之地若不力加整頓何以除積弊而重倉儲著抽查漕糧
御史於大通橋抽掣時按照奏定章程認眞稽覈務得掣欠實在數目不得視爲具文稍涉疏忽其由橋至倉
卽責成各該監督詳細抽掣以昭覈實所稱倉場衙門差委乏人卽著戶部將記名監督咨送數員以備差委

光緒四年諭文彬奏籌復河運請飭江安糧道移紮江北等語糧道移紮江北於漕運事務尙相宜惟有無

稟礙之處必須詳加籌度即著沈葆楨悉心酌議據實具奏郵鈔

五年兩江總督沈葆楨奏竊臣承准軍機大臣字寄光緒四年十二月十九日奉 上諭文彬奏籌復河運請

飭江安糧道移紮江北等語即著沈葆楨悉心酌議據實具奏等因欽此查文彬原奏所陳規復河運各節意在率由舊章臣敢不共體時艱悉心籌辦惟河運之廢興以河道之通塞為轉移運河艱阻莫甚於濟甯迤北戴村壩八里廟一帶其病源在於他黃淤運多借一次即多淤一次若不嚴設隄防大加修濬使黃運各得其職不至奪流則數十百里之停淤年甚一年河運其名陸行其實糧道駐紮江甯固無可代謀即使移紮淮安亦無從措手該道統轄上下江十府上江居其七每年各州縣應徵漕折銀兩解至江甯省城係屬適中之地若使移紮江北惟淮徐稱便江甯府已覺紆折而安徽七府均相隔遠督催運解在在需運似舊制駐紮江甯本係折衷至當未便遽議更張且查各省糧道如江西山東河南陝西湖北雲貴等處無不駐紮省城良以糧道應辦各事均與藩司相附麗近在同城彼此可以互商分居兩處諸事必多扞格糧道所能自主者已雇船口兌米河運承裝之船大半招自上游本以江甯為便至兌米向在汜水一帶挑運米色趕早開兌無論駐紮何處均屬力能為之近年河運逾期祇有水涸而稽延從無兌遲而耽誤似糧道之移紮與否於河運並無出入如果有益於河運在該糧道固不敢憚遷地之勞在臣亦斷不存櫛柱之見漕臣文彬於運務係屬專責目觀河道艱難力籌變通良策臣惟有督飭該糧道趕緊兌米從速馳赴清江聽候漕臣指示調度俾得早達通倉以仰副 聖天子慎重倉儲之至意沈文肅公政書

錢寶琛漕運論曰天下之弊莫患乎上下相蒙奸猾得以中飽而上與下交受其困今漕弊甚矣有司若

重費矣然恐不足以應弁丁之取求而益多取民上官議減費矣然恐有司不足以應弁丁之取求而重累則聽其益多取民而不之禁夫費有數耳有名耳其可言者費也其不可言者可裁者也試卽開行以後計之淮以南無所爲費也費自開壩始有添關之費有啟板之費有漕委供給之費一皆取足於夫頭夫頭浮其數以責之伍長伍長益浮其數以科之散丁至起駁交兌皆然散丁之愿者竭蹶以應其請者貧無賴者有借帑已耳有漕糧已耳有揭債已耳問其所借者曰新運抵補也所通者曰發南追北也所揭者曰隨幫守取也而其前所恣意取求於有司者散丁什不得一二也利盡歸於伍長而伍長中又止一二人爲專其利此一二人者視爲僦來解衣怒馬酒樓歌館舉百萬金錢蕩而化爲灰燼蓋什而八九也其勢不日撤一日不止故總漕之大要有三曰汰冗員除役蠹慎委運汰冗員之目有三減催糧省隨從申約束除役蠹之目有三曰覈關纜禁需索絕餽送慎委運之目有三曰重更調戒遞署恩奔競糧道之大要有三曰稽幫弁察運丁嚴水手稽幫弁之目有三曰黜貪劣去奢華退老疾察運丁之目有三曰杜虧缺謹風水節淫用嚴水手之目有三曰斥游幫遏爭鬻責保結 朝廷擇清嚴望重之大臣而畀之總漕總漕擇監司之廉能精敏者而任之糧道糧道擇幫弁之勤謹練達者委之漕運運丁之老成明幹者派之水次而俱秉成於總漕上下一心協力不苟異同行之一年而不少效者未之有也然後總覈其出入之數以定次年之漕費彼有司所出既少而不輕減其賦以紓倒懸之赤子者亦未之有也若夫楊村之駁運通壩之免收俱視南漕爲輕重奪其所可欲而臨之以嚴威其亦可以次第而受治也夫存素

堂集

右職掌

押運山東通判一人河南通判一人江南通判七人浙江通判三人江西通判二人湖北通判一人湖南通判

一人會典事例

一各省每年出運糧船數目運丁姓名糧道於幫船起運時卽造冊送巡撫衙門於題報開幫日期案內揭

送戶部戶科倉場倉場衙門俟船糧到通投驗全單後按冊稽查糧道仍另造一冊送總漕衙門備案

一各省水次交兌漕糧州縣將樣米送糧道驗看各船每艙兌米一石裝於布袋鈐印加封仍放原艙到淮

日總漕拆驗加封抵通總督倉場帶領坐糧廳對驗其樣米仍作正起卸如有攙和糠粃等弊照例題參繳

東三省黑豆照此查驗

一漕船過境沿途催漕文武各員當察看風色水勢情形豈爲催攬如遇大江風帆難以駕駛暫令停泊港

汊守候不可過於促迫致令涉險失事亦不得在其逗遛逾定限

一空重漕船總河總漕督令沿河文武各官催攬前進漕船一入境汛文武各官率領兵役親往催攬出境

毋許停留生事如遇守候風水卽將守候日期申報該管上司並總漕衙門於入境出境冊內註明倘有不

顧風色水勢催攬前進致有疎虞及捏稱風色未便停泊逗遛者將地方官弁及押運官弁分別議處

一押運漕糧過淮總漕將各幫米數過淮日期及押運官職名預咨倉場並巡漕御史查考押運官將過淮

進口進開津門一帶路程出境日期某官催攬計日開報與天津南北沿河官揭報互相磨對如時日

不符停泊盜賣指名題參將押運官停泊時日虧欠分數核計分別議處領運官丁治罪督催各官亦查

參議處

一山東省關外船糧委丞倅一員先行管押抵通外關內船糧俟兌竣後令糧道督押抵通河南省船糧令糧道押運抵通後即回本任辦理督銷鹽引等事宜並於監兌內另委總運一員隨幫管押抵通兼令催備回空船隻歸次浙江省令糧道督押抵通後速即回任辦理新運江南省於江安蘇松二糧道內每年輪派一員督押抵通江西湖北湖南三省令各該糧道督押抵臨清後再行回任辦理新運如遇給咨送部引見仍令親身督押抵通其自臨清至通州即令本幫丞倅管押并交山東糧道就近上下催備俟總漕督押尾幫北上准其回任

一江南省蘇州松江常州鎮江太倉五府州船糧浙江省杭州嘉興湖州三府船糧俱令監兌官兼司押運抵通安徽湖廣江西山東河南等幫另行委員押運其米色有無攙雜短缺令監兌押運各官於水次眼同面交以專責成

一松江常州鎮江三府屬監兌廳員俱令各押本府屬糧船運通蘇州太倉總運廳二員一管押長洲元和吳縣常熟昭文吳江震澤等七縣糧船一管押太倉鎮洋嘉定寶山崑山新陽等六州縣糧船自水次至通一切兌運事宜責令一手經理以專責成

一起運漕糧到通交卸完竣後即將米批呈送部科查驗如有遲延查取職名送部核議以上並戶部則例順治七年題准官丁兌米入船即將所載米數懸於船口聽糧道不時查驗以杜盜竄會典事例九年題准漕船到次隨到隨兌隨兌隨開不許久懸水次不得守候全幫藉端遲延會典事例

十一年漕運總督蔡士英奏臣蒙 皇上洪恩畀以漕務重寄受事以來晝夜行催各省糧道徵米登厥無誤開兌今據各屬呈報應兌之米已盡儲水次而受兌無船夫米與船均爲並亟之務使有米無船憑何輸輓臣輟轉無計窮極思通惟有罷長運法以復轉運之一法長運罷而刁軍之積弊可剔疲丁之困苦可蘇轉運復而遲滯之阻害不滋掛欠之迫呼不擾誠欲輓遲爲速杜欠爲完計無有過於此者伏乞 勅下計部及諸大臣會議備有可採使行之有當則數百年積弊之漕政一旦而有起色臣請先言長運之害次晰轉運之利更詳條所以經理轉運之目爲 皇上陳之一曰長運久困之害攷明朝之漕運法經五變始也海陸兼運繼而軍民遞運又繼而爲改兌軍始獨任其長運矣從來經國者之論曰漕法莫善於轉盤莫不善於直達若今之長運卽所謂直達也在明朝際承平之後衛所軍丁旣不用之荷戈故專用於輪輓初謂寬民力習之旣久遂若非此輩別無可以供任使者孰知困敝至於此也自我 朝定鼎無一人不被其澤獨此運丁未蒙雨露蓋今日之運丁愈非昔比其業半侵於豪強久不可問矣夫以身無尺土立錐之人驟之領運蹈江涉河經歷寒暑終年不得休息已屬堪憫至於造船尤爲苦累每見遇一僉報避之不啻湯火及拘拿承受而所給官銀又不足打船之費不得不先爲重利借債惟計領糧以抵償之是未兌之日而卽爲盜竄折乾之計矣未已也起漕盤剝種種勒迫至抵通復苦積棍蠹役需索百端窮丁豈有點金之術莫不起足於糴米額糧安得而不掛欠此長運之一大害也且先時運弁皆土著世官與旗軍素相熟悉凡選旂造船其間孰爲堪運孰爲不堪運得以預知去取今則部推守千領運矣平時漫無所知止憑積蠹書識上下其手富者索其重賄貧者困以力役邇年以來衛丁富者益貧而貧者日守職此之故止餘奸軍劣

舟楫運代領以恣侵肥之計漕事安得不至於壞此長運之又一大害也前時依期開兌米一征齊卽催船先集故冬兌春開運重回空得無阻滯近來米已登厥片帆不至比及到次正當水漲之時江河疾流風濤迅怒重運多遭漂溺其間過淮過洪盤查放關耽延時日未及抵通而早已霜降而水合矣阻凍阻淺勢所必至更何術使其飛渡乎此又長運之一大害也 一曰轉運當行之利夫長運所以致於敝者因江南浙江江西湖廣之地近者不下三四千里遠者至六七千里一往一還之間幾於萬數千里矣非窮年累月不能竣運夫道路遠則風濤之驚險與夫沙石之淺滯途次所必經歲月久則米穀之糜爛與夫盜竄之藏奸稽察所不及催督雖有文移不能與天時地利爭也鈎距雖有巧智不能爲僻地暮夜防也曰遲曰欠弊自難搜耳今一易爲轉運倣唐時劉晏之遺意江船不踰淮淮船不踰濟濟船不踰衛衛船直抵於京通達者不過千餘里近者止六七百里月月經行之地程途皆所諳習自江發者識險阻自河行者避淤塞而遭風阻淺之患可無虞也爲程既近遞爲催輓彌月之間足以竣事水脉未達不先時而與之爭百川灌河不後時而待其涸蔽冰守凍之苦可無虞也此固不期速而自速是則轉運之一大利也且運次既分時日有限沿途催押者迫不容其停泊盜竄何自而滋奸乎况未及數旬又復交盤驗數使有升合不足彼接運者斷不肯代人賠償掛欠更何自而積弊乎若此之程程有稽考節節有防閑固不杜欠而自無欠是則轉運之一大利也凡淮以南各水次江運之船每歲以三四運爲率冬底受兌便可開幫不致苦於凍淺計正月內外頭運卽能到淮由是而再運三四運不過六七月而歲運可畢矣淮以北接兌短運之船二月河開以後舟楫可通內河可用牽挽每歲以四運爲率計兩月以往還亦不過九月十月而額糧可盡抵於通矣一

歲之間尙有數月餘閒以爲修船休暇之地法似無善於此者此法行則漕運速而倉督不必有疾聲之呼天庾充而殘丁可免勾追之厄轉運足以通行爲永利者此也 一曰經理轉運之法臣通盤打算原額漕糧四百萬石除湖廣運粵本色二十一萬二千二百六十五石三斗作運粵軍糧亦各處蠲荒改折共二十九萬八千九百二十七石三斗零此係不起運者也卽山東河南與江南之徐州額運六十五萬三千二百二十九石零原不過淮亦無阻滯仍照舊徑解通倉外臣今所區畫者惟浙江江西江南三省過淮糧米二百七十三萬五千五百七十八石二斗零弊端百生遲欠最甚臣今爲酌其途次遠近適中之處分建淮濟德三處倉廩轉貯遞漕盡去長運之衝弁衛丁一歸之於官交官運令江西浙江之米途次甚遠歲限三番運淮江南之安池蘇松四府次較稍遠歲限四番運淮由淮倉用淮船短運至濟由濟而德而抵通皆可歲限三番也其江南江寧廣德等處九府一州之米途次稍近今歲限三番運濟而其中鳳淮揚三府途次又稍近今歲限四番運濟用濟船短運至德抵通歲限亦皆可四番遞運也前者催發後者踵至兌畢卽開交畢卽回如環無端十舟爲紀十紀爲綱十綱爲總若珠之相貫若鴈之相序遇淺則合一紀之力助之遇關則合一綱之力輓之遇警則合一總之力禦之斷無險阻之虞並前後失幫之弊矣其應用船隻也各水次受兌江運之船仍用原衝所漕艘擇其中堅大者以充用彼淺底輕便者分泊內河如式改造以充短運或有未敷將現在各廠衝給發輕齊打造者補濤而分派之自無不足也其舵工水手則官爲雇募給以工食就中用費亦於諸衝所減去不運之屯丁取其行月二月二糧以抵給之而更加通融裏益可於舊短運行則舊時長運額船可各減去三分之一船減而運丁亦減丁減而行月二糧亦減摺彼注茲固皆可取之

以資短運更不必作無船無餉之慮也但行月二糧舊時本少折多抑且折價每石不過三四五錢不等以致各處官丁常有偏枯之控近奉 詔旨令臣衙門確酌本折均平查照歲支行月舊額酌議本折各半除本色照徵外折色議照漕欠每石折銀一兩四錢相應 題明著爲書一定例若監運督押仍令各郡管糧同知主之而以佐貳中之正途出身者領之俸祿可不必別湊矣歲運周則紀錄再周則薦獎三周則優擢不職者參處革究庶幾賞罰明事功勸懲爲江淮轉使凡委任必用士人卽此意也其造船之式每舟載不得過四百石十舟分爲十艙每艙較定石數不使有餘不足兌訖卽令監兌官印緘押運官局鎖仍不時啟封驗印顆粒豈得有滲漏乎舟制定則所載僅足容其所兌夾帶包攬之弊可以盡革弊革而受載必輕載輕而蝕水必淺凡攔淺盤剝之費又皆可免也或又有疑者造船建廠不無借動輕齋用費然目今各水次無船勢不得不動輕齋雇募今歲未畢明歲復需 朝廷之金錢浪擲而無有已時莫若猛爲更新雖目前少借動公帑然一勞永逸從此東南之糧運歲歲不缺不特可免每年之雇募兼可杜將來之滯欠且轉運行據駕交兌一歸於官則十三都司與各衛所守千等弁及衛經歷等衙門官役皆在可裁運丁旣已不用則衛所之屯田俱當履畝清稽均照民田一例起科加增國課罷十數萬之屯田使盡歸隴畝又何莫非 朝廷之生息也 皇清奏議

順治十六年覆准浙江漕運令總漕會同該巡撫於督糧通判內每省遴委一人專司督押管束運軍嚴加防範以杜沿途侵盜攪和等弊會典事例

康熙十一年定漕船抵通限期山東河南限三月初一日江北限四月初一日江南限五月初一日江西浙江

湖廣限六月初一日到通均限三月內完糧如違限不完押運等官計違限不及一月至二月以上者各降罰
有差通考

二十九年議准押運官不得攜帶侍妾優人及多帶童僕其餽送積弊盡行革除管押幫船自開行日期計程
嚴督催糧會典事例

五十一年議准監兌官務令坐守水次將米逐船兌足同糧道親押到淮盤驗如有短少審明題參仍留運軍
子弟或兄弟之子一人交與監兌官購補足數僱船趕幫取具押運等官甘結呈報總漕查駁會典事例

雍正元年戶部奏蘇松等處漕船過淮違限各官請處奉 諭年來因雨澤歉少河內水淺以致運白漕船過
淮違限運官等從寬免革職著該部現將議內有類此事者亦以免議具奏雍正內閣 上諭

又 諭倉場侍郎糧運關係國儲必須進行無阻始得及早抵通自揚村至通州河道多有淤淺糧船起剝每
至耽延以致回空凍阻并誤新漕著該督嚴飭坐糧廳查看河道有淤淺處作速挑濬深通毋使阻滯并知會
天津總兵官用心催趕且天津一帶地方向有販賣私鹽等弊糧船不許停泊火速趕行直抵通州至抵通後
速行起卸交倉毋得需索抑勒苦累軍丁朕去年親自閱倉知漕糧過場一晝夜可五萬袋可見交卸甚易爾
等加意督催務使空船早得回南新漕亦可無誤漕運一事朕親身閱歷纖悉洞知爾等倘不盡心料理或因
勒索致有遲延實無所諉雍正內閣 上諭

又覆准河南開歸等府辦買漕米十有五萬餘石由衛輝至小灘經滑內黃大名四縣分地分船米多之
地多撥受兌船米少之地少撥受兌船各衛幫船到所撥之處交兌會典事例

二年兵部侍郎李紱奏臣奉 旨催漕留心體訪數年以來因漕船回空凍阻旗丁每歲多費銀數百兩
破產不足益以兒女苦累難言深可憫恤且丁既困憊或誤漕運關係 國家甚大考古來轉運之善推
唐臣劉晏爲之法淮汴河渭水次各立倉廩以次遞運每歲漕粟數百萬石而民不困蓋長運之勞不
如遞運之逸舟行於本河則險阻俱習民役於本境則時日無多所爲法良而意美也 國家漕法因元
明之舊自南至北並用長運然自淮安以至濟寧自濟寧以至天津爲時尙早長運可行惟天津至通州
溯流而上時日又遲而北方之河秋冬水涸江南浙江地近船小八月以前或能抵通若江西湖廣並有
長江之險湖南與江西并有彭蠡洞庭大湖阻隔地遙舟重抵通常在深秋以遠地重船溯枯竭之流三
百餘里動需逾月回空凍阻勢所必然臣愚以爲今雖未能全用晏法而自津抵通似可仿其意而行之
國家蓄於天津建南北二大倉雖不爲遞運而設而修而廣之足爲遞運之用且北河起剝自昔爲然
從前通州武清等五州縣因地畝派剝設洪剝船六百艘專爲剝淺之用每米百石旗丁止給飯米五斗
後因洪剝船軍盜米州縣憚於比追題請革除其地畝銀兩並解坐糧廳發給旗丁自僱剝船每丁止給
銀一二兩或將此銀扣作茶果起欠之費今六百名洪剝軍坐享安逸而旗丁僱剝苦累無窮不肯吏胥
通同民船齊幫勒索每米百石勒銀五六兩又勒飯米二石耗米二石約費銀九兩餘查自津抵通商民
裝載貨物每百石止用銀四五兩而旗丁剝糧費乃加培一經凍阻須次年冬月始歸又加費數倍明年
新運僱募民船又加費數倍若打造艚船則加費五六倍查北河起剝每船十剝其九與遞運無殊而無
窮之累獨歸旗丁勢所難支法宜稍變請將湖南江西尾後十數幫分遣監督數人暫就天津露囤收貯

仍復立洪剝船陸續運至京通各倉仍令原監督自行收兌一面建倉以備春來雨水至洪剝船久廢應令旗丁照商民脚費每米百石出銀五兩交官給洪剝軍買備船隻貧不能出者官庫代給仍於旗丁明年行糧照數扣除如謂船隻急難造買則浙江江西理有打造之舩船及湖廣僱募之民船並堪轉買其修建倉廩費無所出則現有每船茶果銀十兩雖屬無名陋規今歲暫取爲建倉之用亦旗丁所樂輸將來每歲修理爲費無多卽此項亦可以次減除貯米有其地運米有其人 國家無絲毫之費而漕法有無窮之利遠地重船不至凍阻近地民船無從勒索明年新運不憂遲誤寓遞運於長運之中臣以爲亟宜通融者也今臣所僱漕船尾幫已過靜海距天津止一百里而北河水淺起剝遲緩前船頂幫首尾相銜無可僱備尾後十數幫必仍凍阻年復一年漕法終非盡善欽惟 皇上聖明諄諄以回空凍阻爲憂

臣忝奉 命催漕輒敢冒昧陳奏倘可施行伏祈 睿鑒勅部速行議覆 穆堂集

三年定漕白糧船抵通日期及起卸回空船糧各數並石壩外河水深淺令倉場侍郎五日一次具奏通考

四年諭押運同知通判抵通之日著總督倉場侍郎送部引見會典事例

五年諭向來催糧艘各官祇圖船隻速出汛地往往不顧風色順逆及水勢大小催迫前進糧船致有疎虞嗣後糧艘經過之地若遇風水未便應與運官公同計議不得趨行以卸已責倘有疎虞之處應將運官及地方官一同議處其如何定例之處著九卿詳議具奏雍正內閣 上諭

又 諭糧船抵通若限期緊迫勢難依限全到運官俱被參處稍覺可憫著九卿會同倉場侍郎定議酌寬限期但不得有誤回空則於公私均便雍正內閣 上諭

七年諭據河東總督田文鏡奏稱豫省漕糧已於十月二十一日起運北上又據總河裕曾筠摺奏豫省漕糧於十月二十六日全數出境等語前李紱條奏欲將豫省漕糧改爲夏運且言若照舊冬運則出境抵通之期必致遲誤言之甚力是年豫省漕糧奏報於正月出境朕詢問李紱伊稱此乃偶然之事不可以爲常在朕前任意強辯乃自李紱妄奏以來豫省漕糧年年早運並不爽期尙得以爲偶然之事乎今年出境又較往年更早皆由田文鏡辦理妥協而李紱懷挾私心遇事卽欲借端阻撓傾陷而置國計民生於度外著大學士九卿等將田文鏡本章與李紱看並傳旨詢問令伊明白回奏雍正內閣 上諭

十年題准湖北安陸府屬荊門今改直隸州沔陽天門潛江四州縣漕糧向例運省水次交兌計程六七百里挽運維艱盤駁多費其黃州府屬之黃岡等六州縣每年有解交荆倉兵糧計程千數百里挽運尤難應令彼此抵兌以省上下運駁繁費約抵兌米二萬一千一百餘石共節省水脚銀千七百餘兩解司充公至於給軍截貼解荆耗米修倉等費令各州縣自行給發會典事例

十三年題准山東臨清關外之船照定例冬兌冬開關內之船定於次年二月兌開仍依定限抵通會典事例

右轉運事例

皇朝政典類纂卷四十九

漕運二

漕制轉運事例二

乾隆元年題准江南向設押運官五人江西向設押運官一人船多人少前後遙隔未便稽察應於江西增委一人江南增委二人該督撫遴選委用沿途稽察議敘議處悉照定例會典事例

二年題准山東漕糧於泰安武定曹州三府同知通判內遴委管押凡關外先進糧船開內抵通回空糧船以及輪押蘆糧並監兌等事與濟南兗州東昌三府管糧通判一同辦理會典事例

三年議准押運官引見後部內給與限單趕幫督同前進到淮逾限卽行叅處會典事例

六年題准山東東昌府上河通判向係專理運河河道工程兼管聊城等十四州縣糧務該員事務紛繁難以兼顧應將聊城等十四州縣糧務改歸東昌府清軍理事同知管理會典事例

七年題准重運過淮之時令淮安府糧捕通判協同漕糧營將秉公籤驗儻籤驗不實有兵丁營役舞弊營私該督卽行題叅會典事例

又定山東漕船不由漕運總督給發限單受兌之後卽呈報河道總督及巡漕御史稽察催行通致

九年題准籤盤漕糧營衛互用於籤盤之日拈籤勻分著爲定例總漕及巡漕御史照此稽察如有改易成規卽行叅奏會典事例

十年咨准蘇太二府州所屬之長洲元和吳縣吳江震澤五縣糧船令監兌之管糧通判管押抵通其常熟昭

文崑山新陽太倉鎮洋嘉定寶山等八州縣及鎮江府屬船糧將應委增設押運官二人先期委一人豫赴常昭等處水次一人豫赴濱屬各縣水次稽察船糧催督開行趨押抵通其米色行月上船等件仍責監兌經理兌齊開行之時將各官管押幫船數目造冊報部會典事例

十二年奏准湖北糧船無多不需多官料理於六府通判內裁減三人會典事例

十九年奏准抵通米石驗無霉變惟質嫩受潮間或色暗未能一律純潔暫令收貯先行搭放將糧道及押運員并交部照例議處會典事例

二十九年議准糧船開行後弁丁等不留心照料勤看水艙時加風暎致有潮濕霉變者將押運領運官弁悉處立限賠補會典事例

四十五年議准蘇松常鎮太五府州屬漕糧向係蘇松常鎮四糧廳監兌押運因船多員少不敷照料將太倉州一屬添派丞倅一員監兌押運以重漕務而專責成會典事例

五十一年諭凡事不求根本止務枝葉斷無實效條奏漕糧一事者止以途間耽閣開兌遲悞陳奏其漕船稽遲根原從無一人言及朕南巡數次河道漕運知之甚悉如上江漕船皆入儀徵河口下江漕船皆入瓜州河口因大江船泊不便而四千餘艘彼此相爭入口灣泊必俟到齊始挨次開行則守候之間甚至遲悞若凡一幫全到在先不必等各幫隨令起行過淮其續到者亦照此勿令守候止以船到即令起行則前幫得以早行後幫慮其隔絕自然奮勉追行如此則重運回空斷不敢遲悞下部議行通政

又定給漕船限單漕船受兌開幫巡撫給以限單填註開行日期飭令沿河州縣挨注入境出境時日抵淮將

單呈繳漕運總督察驗過淮後漕督亦給以限單將經過州縣原定限日刊入單內飭令沿河州縣注明入境出境日期俟抵通將單申繳倉場侍郎察驗回空倉場侍郎刊發限單沿河州縣填注亦如之至淮申繳漕運總督察驗漕督別給抵次限單沿途填注亦如之抵次之限不得過十一月既抵次將單申繳巡撫察驗過次五十八年諭近年以來各省催趨漕船已復冬兌冬開例限回空船隻自應趕緊抵次受兌但沿途催漕文武各員總當察看風色水勢情形量為催趨如遇大江風帆難以駕駛亦宜令其停泊港汊暫時守候若惟知促迫為事勢必冒險開行軍船漂沒未必不由於此且回空船隻該管運員及運丁等皆未免意存怠玩或者情雇價將熟習水手散遣祇留不諳駕船水手數人遇有緩急全不足恃而押運員弁甚或因思家念切先行回署並不在船督率以致有船隻失風之事著通諭各該督撫嗣後漕船過境務須飭令沿途各員酌量情形催趨不可過於急迫致令涉險失事亦不得因有此旨在其逗遛以致遲逾定限其押送回空船隻運員軍丁人等如有前項情弊即應嚴行參辦庶漕運不致遲延而行走亦昭慎重會典事例

嘉慶元年先是戶部議覆倉場侍郎宜興奏江浙白糧改運京倉據浙江糧道詳稱旗丁情願貼給餘米三升六合交經紀起運並蘇常二幫一體辦理嗣漕運總督覆稱恐旗丁等藉口虧入倉正耗或借動回空食米難以照行經戶部行知以總漕既不願交耗米經紀難為交納嗣後即令旗丁自行交倉伏思旗丁自行交倉盤撥五閘復須水運輾轉四五十里勢難照料更恐花戶等藉端需索且致遲誤歸次仍當責令經紀等轉運事屬兩便向來旗丁於交倉正耗外多備餘米三升八合前所稱貼給餘米即在此數之內並非額外加增應仍准其交給經紀代為轉運等因查白糧運京已屆二年均係如此辦理旗丁等相安無事應如所請得旨此事

辦理已經兩年均稱便易乃管幹貞率稱白糧各幫耗米不便貼交經紀復行咨改轉使旗丁等守候需時幾致誤運殊屬有意沽名管幹貞著交部嚴加議處至是議上管幹貞應降二級調用從之東華續錄

四年諭重運漕船北上雖應迅速趨行然催趨過急即遇風狂浪急之時亦皆冒險開行殊非慎重之道本年江南漕船到通屢據戶部奏報較上年早到四十日至三十日不等可見重運船隻俱未免過速似此每年因有比較總早數十日則將何所底止且旗丁各有例帶貨物沿途原准售賣若晝夜趨行竟無銷貨之暇於旗丁生計亦有關係嗣後各幫漕船固不可任其脫幫停泊而遇有險要河道務須察看風水行走與其欲速致有漂失之患何如略為停待以昭慎重所有渡黃及到通日期祇須較例限略早數日交糧回空已無誤冬兌冬開之限不必過為催趨會典事例

五年諭糧船為天庾正供自宜迅速挽運不可稍令稽遲其織造辦物船隻裝載上用物件固關緊要然較之重運幫船行走究可稍緩至於銅鉛船隻及木排等項亦非漕船可比乃往往於運河內肆意橫行不特令商民船隻避讓甚至糧艘北上亦恃強攔阻押解之員漫無約束此等惡習朕所深知嗣後著責成巡漕御史轉飭沿途文武員弁將重運漕船催趨先行其餘船排等項令其尾隨在後挨次前進以期無誤正供備該船排等不遵彈壓恃強爭先一經查明即將押解之委員嚴行叅辦以示懲儆會典事例

十年諭各省押運道員均著該督撫照丞倅押運糧船咨部引見之例出具考語給咨送部如果沿途催趨認真並無過失到通交糧完竣後准其由倉場侍郎查明送部引見會典事例

十一年諭各省押運道員前經降旨令該督撫出具考語給咨送部俟抵通交糧完竣即由倉場侍郎查明移

咨吏部帶領引見茲湖北省道員押運向止趨抵臨濟關口移交東省接值前進其所履程站比之豫東江浙等省勞逸雜均自應一體示以獎勵嗣後湖北省及湖南江西兩省糧道押運已屆三次如果催趨認真並無過失即著該督撫出具考語給咨由倉場侍郎查明送部引見此外豫東江浙等省糧道直押抵通者亦著俟押運三次後送部引見以歸畫一 會典事例

十三年諭內閣據巡漕給事中韓克均奏請定豫東漕船行走次序一摺所奏尙具豫省漕船向例皆冬兌冬開而東漕則須俟今春始行兌竣開運乃歷來辦理拘泥豫漕於行抵德州後必須守候東省之德州正幫開行始將豫省之通天二幫跟接前進而該二省隨後各幫又須彼此參錯行走動輒停留守候未免耽延時日以致該漕丁等多有賠累自應變通辦理嗣後督漕臣等轉轄各員弁所有豫東兩省幫船不必拘定德正通天四字名色排列先後行走惟當隨時察看無論何省何幫晚運在先均聽隨到隨行挨次前進毋任稍有停滯以利漕運 聖訓

十四年江蘇巡撫蔣攸銛奏竊照江蘇首以漕務爲急而漕糧尤以米色爲重自嘉慶四年仰蒙 皇上洞矚積弊三令五申並荷 聖慈屢經設法調劑漕丁自應日有起色乃民間仍以浮勒上控州縣官又以刁抗爲患往往視收漕爲長途究之各執一詞皆非虛捏蓋緣丁力久疲所領行贈錢糧本有扣款而長途挽運必須多雇人夫以及提溜打閘井間有過濫盤剝人工倍繁物價昂費用度實屬不敷勢不能不向州縣索費州縣既須貼費勢不能不向糧戶浮收州縣既有浮收勢不能不受包戶挾制從前幫丁貼費每船不過百餘至二三百兩不等近來旗丁積累愈重需費愈繁且路費正用之外或饋遺舊債或任意花消或幫弁

需索皆所必有亦非盡由于路費不敷伊等知州縣浮收有加五六之多遂得藉口多索運弁奸丁連成一氣州縣惟恐誤兌不能不受其刁勒索竟有遞增至五六百兩七八百兩者而蘇松爲尤甚民強官懦之處僅得賈善之贏餘不足供奸丁之訛索遂致虧空挪墊固屬實情卽民情較淳之地方牧令任意賒削仍藉口於兌費繁多故作虧空亦所難免稍借民力以濟運尙屬因公又因濟運而虧挪弊將何底且州縣既多浮收則米色不能認真幫丁既多貼費則受兌亦不復深求及至通州賄買倉書經紀通挪交卸米色之潮雜不純率皆由此此官民交困彼此挾持南顧北兌流弊無窮之實在情形也漕務積弊至此豈可不加大整飭力挽頽風然弊有不可不除而又有不能盡除者臣等甫經蒞任毫無迴護已恪遵功令嚴行示禁升合不准多收幫費全行裁汰稍有不遵卽行查參原屬辦漕正理惟是幫丁長途苦累費實不資若實絲毫給津貼則勢必不能開行若責令州縣顆粒無浮亦勢必不能交兌伏思 天庾正供遲尙不可況明知必誤而聽其決裂卽懲辦亦于事無濟臣等不忍出此但清漕之說既屬窒礙難行而酌加之事又斷無明發 諭旨之理臣等與司道等反覆熟計不得不於無術萬全之中苦思酌中權宜之道謹就管見所及爲我 皇上陳之

一旗丁各船幫費應嚴定限制以杜苛索也州縣因幫費必須津貼不得不量加斛面仍係以公辦公並非准其任意多收但幫費不定限制則需索無已必至加收應請酌中定制每船除向來不及二百兩者仍應照舊外其在三百兩以上者察看該幫情形定以三百兩爲度漕臣嚴行曉諭不准絲毫多索米色則必須乾潔卽食米應給本色者亦不准違例折收候兌足時地方官將各幫米樣封呈本省各上司運

弁出具印結三張亦將米樣申報糧道陸續轉送總漕坐糧廳倉場侍郎查攷其真丁應給銀兩應令縣幫公同散給毋許伍長奸丁包領侵扣如有奸丁領出私行花費責成糧道嚴查究處所有沿途催船贖委及過淮抵通一切浮費悉行禁革如此則米色不能通融旗丁不致苦累而州縣亦無所藉口矣

一收米有限制則輿訟之糧應委員驗明上倉以防積欠也查向來包戶攬納米石爲數不少到倉時官吏稍爲查問卽抗不交納或將濕碎短少之米委之倉外一鬪而散赴上司衙門控告轉須代爲看守而漕米不准掛欠州縣官不能不買米供兌旗丁利于多折價值彼此通融遂將食米盡數折收途中又將折價用去不免以正米作口糧買補無期弊竇叢出今斛面一定遇有控案委員驗明米色押令進倉與衆花戶一律辦理其控告之是非曲直再行秉公審究則地方官可無墊兌之患不致以漕尾輾轉交代作抵日久漸歸無著亦清理虧欠之一端也

一州縣預買惡米墊倉勒收折色之弊應嚴行禁革也近年州縣因兌費既重斛面不敷不肯着稱之官吏百計張羅竟有於將次開倉收漕時藉名墊倉鋪底令漕總胥吏預買惡米私運入倉迨至開倉放米時倉中半已盈滿不過十日半月卽以米足封倉鄉僻小民往往運米至倉無處交收仍復運回勒令以重價折納鄉民不堪其累而漕糧米色之不純未必不由於此州縣轉以惡米擬交盡誘過於糧戶此弊尤應嚴行查禁現已諄切札飭藩司糧道及各該管知府實力嚴查禁革一經訪查得實立即嚴參治罪庶米色得歸純潔而小民亦免苦累矣繩樞齋集

十五年諭內閣給事中吳邦慶奏請復東省漕船春兌春開舊制一摺東省距通較近向來漕船春兌春開抵

場並不遲誤自改爲冬兌春開之後每年仍須在閘河守凍而米豆存艙日久轉不無微變之虞又運河挑工因軍船在彼停泊不能趨辦多致遲誤此外弊端尙多自應仍復舊制著照該給事中所請自本年爲始將東省閘河內外幫船照春兌春開之例辦理但該管官務當督飭旗丁等兌竣早開沿途迅速趕行無誤抵遵定

限 聖訓

又諭車機大臣等松筠在河口督催漕船俱懸立重賞每幫勒限趨渡或數百兩或一二千兩均立時賞給因此人夫踴躍本年重運得以無誤現在回空亦如此辦理松筠自係爲力趨漕運起見但此項賞銀出於何處計其爲數不少非養廉所能敷用松筠操守清廉朕所深信斷不疑其取自官民自係向人借貸但借貸銀兩將來必須完欠松筠何得不豫爲計及卽如阿克當阿近在兩淮若松筠係向伊借用則伊又豈能解囊借與勢不得不藉資商力又與取之於民何異此更不可況賞之一事非可濫施賞之得當則人皆感奮過濫則視爲泛常弁兵夫役人等始而見利爭趨人人欣悅久之視同常例勢將非賞不行且賞亦不見恩不賞卽易見怨事船淺阻地方本所時有惟在認真催趨隨時相機其得賞而可以輓渡者可見不賞亦未必停閣全在人夫之是否出力辦理之能否得法耳若專以賞項爲事則年復一年何所底止恐弁兵夫役人等邀求重賞別生不肖之心甚或於軍船可以暢行之時亦復藉稱淺阻賞重則照常輓渡賞薄則觀望不前作僞多端易生流弊松筠不可不防今歲河口阻滯伊權宜辦理亦已成事不說嗣後務當別爲相機經理期臻經久可行不得專以懸賞爲事也 聖訓

道光二年江蘇學政姚文田奏竊惟東南之大務有二曰河曰漕比年海口深通南河目前光景甚稱安穩惟

漕務法久弊生雖經督撫大吏數年以來悉心調劑然總未臻實效小民仰沐我朝聖祖神宗生成
蒙養屆今百八十年愚賤具有天良豈有不樂輸將之理誠以東南財賦甲於天下而賦額如江蘇之蘇州
松江浙江之嘉興湖州其糧重尤甲於天下竟有一縣額徵多於他處一省者乾隆三十年以前並無所謂
浮收之事是時無物不賤官民皆裕其後生齒愈繁而用度日絀於是諸弊漸生然猶不過就斛面浮收而
已未幾有折扣之法始而每石不過折扣數升繼乃五折六折不等小民終歲勤動納賦之外竟至不敷養
贍勢不能不與官吏相抗官吏所以制民之術其道有三一曰抗糧一曰包完一曰掙交醜米賦額既重民
間拖欠勢所必有然大約只係零星小戶及貧苦之家其墳墓住屋皆須照例輸納又有因災緩徵新舊并
積因而拖欠者是誠有之至如其家或有數十畝之產既自食其田之所入而竟置官賦於不問實爲事之
所絕無今之所謂抗糧者如業戶應完百石彼既如數運倉並外多齎一二十石以備折扣書吏等先以淋
尖踢腳灑散多方糜耗是其數已不敷再以折扣計算如准作七折便須再加三四十石業戶心既不甘必
至爭執不肯再交亦有因書吏刁賴復將原米運回者州縣卽以前二項指爲抗欠此其由也包完之名謂
寡弱之戶其力不能與官抗則轉結交有力者代爲輸納可以不至喫虧然官吏果甚公平此等業戶又何
用託人代納可以不煩言而自破者民間終歲作苦皆以完糧爲一年要事如運米石進倉其一家男婦老
幼無不進城守待一遇陰雨濕霧猶將百計保護恐米色受傷如官吏刻期斛收卽歸家酬神祭先以爲今
歲可以安樂過去故謂其特以醜米掙交殆非人情惟年歲有不齊則米色不能齊一亦間有之耳然官吏
非執此三者則不能制人故生監則詳請暫革齊民則輒先拘禁待其如數補交然後以悔悟請釋竟成一

定不移之辦法臣自去歲至蘇金壇吳江等縣已釀成事端其他將就了結者殆尙不乏不知踊躍輸將者皆皆良民而非莠民此民不能上達之實情也然在州縣亦有不能不如此者近來諸物昂貴所得廉俸公項卽能支領斷不敷用州縣自開倉至兌運日止其修整倉廩蔴竹木板片繩索油燭百需及幕友家人書役出納巡防一應修館工食費已不貲加以運丁需索津貼日甚一日至其署中公用自延請幕友而外無論大小公事一到面前卽須出錢料理又如辦一徒罪之犯自初詳至結案須費至百數十金案愈大則費愈多復有遞解人犯運送餉鞘事事皆須費用若將藉用民力槩行禁止謹厚者奉身而退其貪戀者非向詞訟事件生發不可而吏治更不可問矣伊等熟思他弊一破獲咎愈重不如浮收尙爲上下皆知故甘受民怨而不恤雖地方有肥瘠才具有能否其藉此以肥身家者亦不能謂其必無要之不得已而爲此者蓋亦不少臣見近日言事者動稱不肖州縣竊思州縣亦人耳何至一行作吏便至行同苛賤此又州縣不能上達之實情也州縣受培克之名而運丁陰受其益故每言及運丁無不切齒然其中亦有不能不然者運船終歲行走日用必較家居倍增從前運道深通漕諸臣只求重運如期到通一切並不苛察各丁於開運時多帶南物至通售賣復易北貨沿途銷售卽水手人等攜帶梨棗蔬菜之類亦爲歸幫時餬口之用乾隆五十年後黃河屢經倒灌未免運道受害於是漕臣等慮其船重難行不能不嚴禁多帶貨物又如從前商力充裕軍船回空過淮時往往私帶鹽斤衆意以每年不過一次不甚窮搜近因商力亦竭未免算及瑣屑而各丁之出息盡矣丁力既困加以運道之淺反增添夫撥淺之費且所過緊要關壩牽挽動需數百人使用稍省船卽慮其受傷道路既長期限復迫此項鉅費非出之州縣更無所出此又運丁不能上達之

實情也數年前因津貼日增於是定例每船只給銀三百兩然運丁實不濟用船不能開遲久不開則州縣獲戾故仍不免私自增給是所謂三百兩者乃虛名耳頃又以厚收過甚嚴禁收漕不得過八折然州縣入不敷出強者不敢與彰弱者仍肆賤削是所謂八折者亦虛名耳然民間執詞抗官官必設法箝制而事端因以滋生皆出於民心之所不服若將此不靖之民盡法懲處則既因浮收復陷法網人心恐愈不平若一味姑容隱忍則小民開犯上之端將致不必收漕而亦目無官長臣求一萬全之術而不可得既已有所見聞不敢不陳於 聖主之前或可飭令中外熟悉漕務諸臣悉心籌議以期上下相安實今之切務也遂雅

堂文集

三年諭內閣孫玉庭等會奏兌運幫船三年一調水次請量爲變通一摺江南蘇松常鎮太五府州屬漕糧定例皆就向年原兌府分三年一調以杜久戀情熟之弊乃遵行日久奸丁蠹吏勾串賣綠弊端叢出每以米色好而津貼優者爲上米色差而津貼少者爲次一縣或分兌三四幫一幫或跨兌三四縣與整幫整縣之例全不相符似此壘斷營私必致幫丁勒索日增州縣徵收無節不可不另籌妥辦茲據該督等會議具奏所有蘇松等屬漕船四十三幫除白糧江淮鎮江等七幫無須更改外其餘太松常三十六幫該督等會同藩司秉公掣定整幫餘幫分撥找補自本年掣定水次後每屆三年毋庸再掣即將上屆各幫挨次輪流受兌指明何年何幫應兌何縣漕糧造冊送部存案至上屆找補各縣之散幫下屆卽併爲整幫儘先受兌上屆在後之整幫下屆作爲散幫分撥找補遞相輪轉以免偏枯餘仍著照舊辦理該督等經此次籌計變通妥爲調劑務須嚴飭有漕各屬認真任事毋致丁胥等再有鑽營賄囑諸弊以肅漕政 聖訓

又諭內閣魏元煜等奏江西各幫兌漕縣倉請援照蘇松幫船例挨次遞推一摺江西省兌運漕倉百餘年來議拈議派屢次更張並無一定辦法未免日久滋弊茲據該漕督等查明該在情形奏懇酌量變通以期經久著照所請除饒州撫州兩幫便兌饒州府等屬漕糧都昌縣輪派尾幫兌運卽令截留滄州兵米均著仍循舊章辦理外其餘十一幫領兌四十餘廳縣漕倉著准其按照蘇松新定章程交該漕督等卽飭該司道將各屬漕倉秉公配搭分作十一籤傳齊幫弁旗丁眼同掣定縣倉自道光三年冬新運起三年一屆不必再掣由後推前挨次輪轉如船多米少以後倉米數撥補米多船少以後幫船數找兌至遇災緩搭運之年分別確查酌籌妥辦毋任丁吏等再有勾串鑽營以祛積弊而順幫情 聖訓

五年諭孫玉庭顏檢奏查看幫船盤運情形恐致遲誤請援照成案截留存貯籌辦一摺本年運道淺阻不得已借黃濟運樞宜辦理因孫玉庭熟悉江南情形特令留該處與顏檢會辦重運事宜勉贖前愆屢經飭諭詳籌妥辦據孫玉庭等覆奏敢放禦黃壩後運河水勢深暢計期可以不誤卽須剝運亦不過在後數幫追至節近夏至始據奏稱渡黃艱澀尙有軍船四十幫須盤壩接運請帑至一百二十萬之多猶復勉從所請不合掣肘乃具奏未幾卽有盤剝不能如原議悉抵高坂頭之說巧爲嘗試本日又據奏稱非不竭盡人力盤辦無如水勢短絀難以挽行愈剝愈速運價更增非但經費不敷並恐稽遲時日若照成案截留期節經費而免滋擾是孫玉庭此時方知盤運之難計及經費時日於事何濟不但形同贖贖試問良心安在且已糜帑無算累民日久尙可謂之節經費免滋擾侈言不願實出情理之外前經兩次部議革職朕曲加恩宥尙賞給編修休致乃前後籌辦情形層層貽誤坐失事機實屬瀆職孫玉庭著卽革職以示懲儆顏檢曾任督撫有年自特簡漕

督以來並不盡心通盤籌畫一味游移遷就實屬無能著降為五品銜休致東憲續錄

諭軍機大臣等據孫玉庭等奏稱見在盤運水勢短絀重船難以挽行半月來僅盤運米八九萬石此倘係停泊淮安以北之幫若淮安以南運價更增非但經費不敷並恐稽遲時日請查照成案暫截淮揚所屬州縣存貯或下年搭運北上或借給回空幫船食米及量為平糶三款辦理等語前因運道凌阻不得已借資濟運屢經飭諭孫玉庭等將能否令全漕重運渡黃北上悉心籌辦據孫玉庭等覆奏自敢放禦黃壩後運河水勢一律深暢見距夏至尙早計可不誤限期如黃水已長不過將在後三進數幫再籌接運及至奏請盤壩則有未渡之船四十幫即使盤壩之米悉數抵運已屬糜帑病民乃復據奏僅能剩運米一百萬石北上尙餘米一百萬石又請照案截留孫玉庭顏檢並不通盤籌畫行一步算一步至此時方計及經費時日天良何在可謂喪心之至魏元煜前此會同籌議一味扶同遷就已不能辭咎琦善係新任總督無所庸其回護著將見在未渡軍船究能盡力全數盤運與否抑或別有籌辦之法卽行悉心從長妥議由驛速奏若再不能詳議盡善安速辦理魏元煜自問當得何咎琦善亦責無旁貸懷之慎之東華續錄

又諭訥爾經額奏通籌軍船接運情形議請展限一摺本年東省接運南糧前經琦善奏准展至七月十五日為止儘再過期卽行原船長運抵通茲據訥爾經額查明江省剩運各幫米船見在尙有未入東境者計算程途斷不能於限內一律趕到著照所請准其再行推展半月以本年七月底為止所有江省運到之米先由豫東軍船接運隨兌隨行毋任停延其剩剩米石再交封雇民船接運仍趕緊嚴催首進幫船回空接運江廣漕糧務使本年全漕早抵通倉不許稍有遲誤至回空限期既緊歸次收兌亦關緊要著該護撫隨時察看情

形安速辦理東華續錄

七年諭軍機大臣等琦善等奏首進軍船二十四幫全數渡黃並二進等幫船隻跟船打放一摺倒塘灌放軍船原因禦黃壩復行堵閉姑聽該督等權宜辦理見雖將首進軍船全數挽渡而在後各幫陸續抵壩務須跟接催提連橋挽運不許稍有延滯據奏黃水較前又落七寸此後如能再為消落總以敢壩放行爲妥該督等當隨時察看水勢妥籌辦理固不可使漕艘脫幫亦不得使河湖淤墊受做也東華續錄

又諭琦善等奏重運軍船全數渡黃一摺本年南糧軍船先由禦黃壩挽渡四百三十餘隻因黃水斗高復堵禦黃壩倒塘灌放陸續渡黃二千一百餘隻尚有五百五十餘隻未渡適值黃水落低該督等照常敢放禦備催提趨渡於四月二十二日全數完竣未逾原限該督等前此籌辦未能周妥原有應得之咎惟念該委員等自倒塘以來催趨照料及敢閉各事尙爲迅速不得因該督等辦理不善致沒微勞著琦善等擇其尤爲出力者酌保數員奏請施恩不准冒濫見在禦壩既敢大汛未來該督等當趁此機會務令清水暢出將下游淤滯處所刷滌深通以冀河湖順軌安瀾稍贖前愆東華續錄

護理山東巡撫賀長齡奏竊查東省有濟州縣共六十九處向分開內開外在濟定張秋東昌等運河水次交兌者爲開內東昌泰安兗曹等屬三十餘州縣是也在德州臨清等衛河水次交兌者爲開外濟南武定臨清等屬三十餘州縣是也開外州縣皆係冬兌春開自九月開厥至次年二月冰泮糧船始得開行時日甚寬各州縣漕糧得以從容收足運赴水次無須買米交幫旗丁不能藉端勒索故兌費尙不甚多開內州縣因運河歲須冬挑不能不趕早運兌故向例皆係冬兌冬開自九月初糧船便須開行時

日甚迫各州縣相距水次近者二三百里遠者三四百里或因糧多收未足數或因車少趕運不及除運到水次外所有未能足額之數不能不在水次買補墊兌而旗丁因有不準買米上兌之例遂藉此多方索詐始準買補兌交並勾通米店權價居奇或勒折重價代爲買兌漁利稍不遂意輒將現米駁斥不收徑自開船出關轉以該州縣誤兌稟揭該州縣恐蹈誤漕之咎只得另雇船隻運赴關外趕兌需索日甚兌費日加而濟定前幫之任姓各丁尤爲豪橫訪聞任振標任嚴化等挾貲巨萬恣意妄爲一經簽派頭船則運官聽其指揮州縣等於魚肉若非百計刁難何由飽其慾壑此關內州縣兌漕苦累之實在情形也伏思買米墊兌原屬例不準行而向來零星小戶升合之米鄉民每以不便辱量情願折色交納該州縣亦因數太零星恐辱手斗級人等易於高下賤削鄉愚亦遂準其折交代爲買兌其距倉寫達之糧戶路途費重運送本極艱難若值陰雨連朝米石更易傷耗故鄉僻小民尤願以銀錢折納該州縣亦不能變通以宜民誠以天庾正供所重在米米若不佳卽實係糧戶之米亦準幫丁駁換令該州縣買補另交但期米粒乾潔並未嘗以買補爲必不可行也今東省關中三十餘州縣計其開廠收米以至兌運開行爲期尙不及一月是以若干至萬餘石之漕必須剋期收足於旬日之間則必所屬糧戶無一頑抗無一疲乏而後可也又必於旬日之間將數千數萬餘石之糧運送於數百里外之水次則必風雨一無阻滯車輛一無損折而後可也揆時度勢斷不能收足又萬萬趕運不及而必泥於不準買米上兌之例徒供旗丁訛索之資以苦此數十州縣若更相沿不改其勢必且日增似不可不思所變計也查蘇省漕糧因兌開期迫州縣不能不買米交幫疊經江蘇撫臣奏明在案東省事同一例自應量爲變通以速漕運而免訛索嗣後東省關內有漕各州

如屆期收未足數并趕運不及者應請 聖主恩施準令該州縣卽於各水次就近買補墊兌仍令趕緊征完交代案內不準以漕尾作抵若米石未能一律乾潔許該旗丁駁換另交亦不得恣意挑斥以供需索除一面移會漕臣檄飭糧道將濟定前幫之劣丁任姓及此外各幫不法旗丁概予斥革永不準其復充并查明該丁等有無奢縱劣迹核實辦理外所有各幫免費應責成糧道大加刪減但敷該丁辦公之用而止并飭該丁等不得於米未兌足之先徑自開船出關致累州縣雇船趕兌該州縣亦不準任意稽延有誤免限其折價名目尤應力行查禁永遠革除至沿河各米店如有勾串擾價情事立卽從嚴究辦儻該丁等膽敢仍前浮勒一經查出卽惟該糧道是問如此則旗丁無所挾制州縣得免苦累不但漕務益臻妥速而該州縣省此浮費則辦公不致掣肘所裨於地方者良非淺鮮

謝肅奏議存稿

八年諭軍機大臣等蔣攸銛奏新漕起運渡黃請將幫船所帶貨物暫行起卸一摺所奏是據稱向來漕船到淮挽過清江福興等關溜急水深未能迅速以致開壩渡黃易於脫空固由過關稽遲亦船身笨重所致見在順黃壩誌梅黃水高於清水一尺五寸節交春令能否再行暢消照常啟壩通漕勢難豫必惟渡黃必須迅速無論開壩倒塘總以船身輕便爲要本年出運幫船於每船額帶土宜之外准其再加三十石船身噸水更重將來行抵清江一仍須倒塘北渡如一船阻滯則河口停淤必致瀆放羈延更爲全漕之累等語本年新漕起運前經降旨務於四月初十日以前全數渡黃若船身笨重趨渡遲延致誤定限自應豫爲籌計該漕督等接奉此旨卽分飭各糧道將幫船所帶貨物於高坂頭地方暫行起卸俟渡黃後再將貨物歸載並令該管河員於各關多添關纜人夫俟漕船到時卽加緊催趨渡黃俾臻妥速以符定限

東華續錄

九年諭軍機大臣等張井等奏重運首幫漕船於本月二十一日相機倒塘灌放已過幫船三百九十餘隻並將銅船駁船暨放全數渡黃水高於清水尺餘尙未倒灌等語所辦好此時來源頗旺漕船抵壩守候不能不權宜灌放嗣後幫船陸續前來該督總當察看水勢相機妥辦遇有可乘之機立即啟壩放船俾得迅速起渡當不待諄諄飭諭也東華續錄

右轉運事例二

皇朝政典類纂卷五十

漕運三

漕制轉運事例三

道光十三年諭內閣恩銘奏籌畫來歲重運漕船請不論幫次先後隨時行走以期迅速一摺來年起運新漕節經降旨令有漕各省督撫早兌早開刻期渡黃銜尾前進毋許稍有延誤道光六年經琦善奏請各省漕船不論幫次提前過淮撥挽前進俟全數渡黃後於邳宿一帶仍按照原定省分次序順幫行走當降旨允准是年全漕重運於四月二十二日埽數渡黃北上爲期較早是不論幫次提前過淮辦理已屬著有成效茲據該署漕督奏不論幫次先後趕先兌開漫越前進者將該運弁等隨時存記奏請鼓勵遲滯者分別責懲將已漫之幫於渡黃後無論江浙江廣徑行前進直抵津關不必拘泥幫次等語漕船不論幫次沿途漫越不獨輕改舊章且恐丁舵水手等操越爭先至敢漫幫勒索之弊滋生事端所奏著不准行該署漕督著仍遵前降諭旨將各省漕船不論幫次提前過淮渡黃後於邳宿一帶仍照原定省分次序順幫行走並著有漕各省督撫督飭各糧道迅速兌開總令於四月初十日以前全數趕至清江刻期抵壩渡黃北上毋稍延緩不得以渡黃後各歸省分次序停讓守候未能行走迅速爲詞儻漫不經心任聽沿途逗留遲滯致逾期限必將誤漕督撫等嚴行懲處決不寬貸懷之慎之、聖訓

江蘇巡撫林則徐奏竊臣等接准部咨欽奉 上諭朱爲弼奏遵旨籌議剔弊速漕各事宜酌擬條款請旨辦理一摺如所稱新漕兌開宜竭盡人力趕早等語著有漕各督撫通飭各該糧道及所屬州縣先事預籌

提前備辦空所稱飭提浙江湖廣船隻無分省分幫次先到先進瓜洲口趕備來准盤驗等語著陶澍林則徐妥議具奏至糧艘交卸以後必須趕緊回空庶辦理新漕可期及早受兌著沿途各督撫於回空糧幫趕緊催備不准藉詞停泊庶幾以速補進尅期歸次毋得在任延逾致誤例限又稱各衛屯田應妥爲清理等語著有漕各督撫妥議具奏又稱江蘇總運丞俾應管押幫船過淮渡黃等語著林則徐妥議具奏等因欽此當經恭錄轉行欽遵辦理並將應議各條札飭江甯江蘇兩藩司江安蘇松兩糧道會同籌議一面飭令沿河文武員弁督率兵役親駐河干將各省回空幫船尅期催備臣陶澍復經委員分往北運河及山東臨清一帶加緊催提已於十月二十八日掃數渡黃完竣惟徒陽運河因冬令潮弱兼被西風刮耗水勢淺小經臣林則徐預飭該府縣將橫閘支河搶挑深通並令隨時察看如京口過淺卽飭各幫稍蓄由橫閘進口截至十一月初六日催進京口船二百四十三隻又進橫閘船一千一百一十一隻共進口船一千三百五十四隻在後幫船現仍飭令晝夜緊催總期趕早歸次不在藉口停延至新漕事宜臣等於秋末報獲之時卽飭有漕各關先事預籌趕早開倉催徵交兌能得水次早開一日則渡江過淮渡黃抵通均早收一日之效況疊奉 諭旨提前備辦不特臣等與漕臣及各糧道一體欽遵力求趕早卽有漕之州縣亦惟冀幫船早離水次如釋重負但一縣之漕糧多者逾十萬石少亦數十萬石倉廩每不敷收貯必得隨收隨兌如無積壓之虞而旗丁以米色爲停兌之藉詞以停兌爲索費之把握總因相持不下兌遲則開亦不得不遲臣林則徐於上冬幫船津貼一節循從前奏案早飭定議雖爭執刁難之處亦復不少而猛寬兼濟大概不敢以私誤公今冬漕船輪值調幫之年恐貪詐者更有所藉口惟有早爲嚴立限制確訪尖丁蠹棍懲一儆百以

杜阻撓而速兌開本屆收成之時天氣連晴與上冬無異則所收米色亦與上冬無異但幫丁之借頭挑刷久已習爲故套今惟照例責成糧道臨倉親驗並委各屬總運廳員逐層察看凡消廳驗定之米卽不許幫丁混挑妄稟少一分之挾制卽早一日之開行果其自南至北在在加意體卹使旗丁不負重累自可冀漕清運速年勝一年矣又飭提浙江湖廣船隻無分省分幫次先到先進瓜口一條臣等共查道光六年欽奉諭旨琦善奏來年各省漕船請不論幫次隨時提前過淮一摺來年起運新漕節經降旨嚴催迅速俟行若令沿途停候揆延恐致稽遲著照所請浙江幫行抵江境如在江蘇各幫之前卽將浙江幫提前插檔渡江前進江西湖廣各幫先行停泊江面者無論何省何幫卽行攬挽徑進瓜口俟全數渡黃後於邵宿一帶仍令按照原定省分次序順幫前進等因欽此欽遵在案來年浙江重運行抵江境如果在蘇松各幫之前自應欽遵前奉諭旨將浙江幫提前插檔渡江前進其江西湖廣各幫如有先行停泊江口者無論何省何幫卽行攬挽徑進瓜口俟全數渡黃後於邵宿一帶仍令按照原定省分次序順幫前進倘有水手人等爭競擁擠卽由該處文武營汛及該幫運弁嚴拏究辦俾知儆畏又各衛屯田妥爲清理一條業經分飭各府州縣衛查屯丁有無私行典賣如有典出之田卽行根查明白限一月內開冊具詳俟覆到卽由糧道會同藩司速籌回贖章程妥議詳辦又江蘇總運丞倅應管押幫船過淮渡黃一條伏查總運廳員有彈壓水手稽查盜竄之責原應督押所屬尾幫過淮渡黃北上近因守候各州措解存公銀兩以致不克隨幫起程查存公一項卽係州縣所給各幫津貼銀內扣出之款嘉慶十七年前任蘇松糧道李長森拏獲通州放債跟幫盤剝一案經前撫臣章煦奏明酌量幫情每船提存數十兩封貯俟抵通散給各丁接濟此項應解總

運收貯管帶惟漕船開行緊迫花戶米石既難概令全輸而 天庾正供不可顆粒短少各州縣墊項買米久已不得不然又開船以前幫丁水次之所用率皆取諸津貼計州縣運行給丁之數已屬不貲此項存公未能即時同解以致總運廳員羈留守候亦勢之無可如何歷年以來經臣疊檄嚴催未嘗稍予以暇僅保解交無誤未爲弼以總運本應隨幫督押不得因此久延所論亦正嗣後應責令漕州縣將扣存帶北存公銀兩於幫船開行十日內按數解交總運廳員收存倘延至所屬幫船全行渡江之時尙未清解卽先催該總運迅速起程督運一面飭令將何縣存公已解何縣未解由總運據實稟明司道責成該管府州勒令州縣將銀專差趕解總運舟次倘趕送不到竟至誤公由司會同糧道詳請將該州縣撤參以儆疲玩此外凡有可以速漕事宜臣等分飭司道次第妥辦以期漸復舊規斷不敢稍任因循貽誤 林文忠公啟書

十九年兩江總督林則徐奏竊臣承准軍機大臣字寄七月初四日奉 上諭前據金應麟奏請將漕運事宜量爲變通已有旨交兩江總督江蘇巡撫等妥議具奏矣著陳鑾裕卽將原奏內所指各情節體察情形通盤籌畫仍俟林則徐到任後再行會商務臻妥善據實具奏將此諭令知之欽此臣因奏差在粵未見金應麟原奏請俟江蘇省將原奏咨到卽當體察籌議先於八月內附片奏 聞在案嗣准署江蘇巡撫布政司臣裕祿鈔錄金應麟原奏移咨到粵臣細閱奏內所陳查辦六條處分一條皆辦漕切要之專自應大加整頓力挽積疲而其附片採訪見聞亦不得已而求變通之法惟是漕務勢成積重如醫家之治久病見證易而用藥難蓋他端政事祇求官與民兩相安而已獨漕務則糧戶輸之州縣州縣兌之旗丁而旗丁領運於南解交於北則又有沿途開闢與此倉經操其短長故弊常相因而事難獨善卽論病根所起南北亦

各執一詞以北言南則謂州縣浮收以致旗丁勒索旗丁勒索以致到處誅求而以南言北又謂旗丁既被
誅求安得不勒索而州縣既被勒索安得不浮收每以反唇相稽鮮能設身處地於是官與民競丁與官競
郵官與官亦各隨其職掌以顧考成而無不相競而凡刁生劣監訟棍包戶奸胥竊役頭伍尖丁走差謀委
之徒亦皆乘機挾制以衣食寢處於濫本圖私也而害公矣本爭利也而交病矣原奏謂近年州縣臨濫規
避挾制上言莫可誰何此亦難免之事蓋寬之固不啻教獠升木卽嚴之亦不過掩耳盜鈴各處類然而蘇
松爲尤甚蘇松之漕果治則他處當無不治臣前在蘇省雖歷五次冬漕祇求無誤正供實不敢言無弊故
奉 諭旨飭議謹憶往時所見情形與原奏互相參酌分擬四條或正本清源或補偏救弊或爲補救外之
補救或爲本源中之本源近則先計一時遠則勉圖經久不悞固陋謹逐條另繕清單恭呈 御覽伏候
聖裁

一議正本清源必使自南至北皆無例外苛求然後可以杜州縣之浮收絕旗丁之勒索要不能專禁一
處故其事極難然果法在必行則亦不敢因難而阻也臣竊擬一簡便之法曰縣督幫收緣州縣一經開
倉則逐日用度不勝枚舉不獨幫費繁重已也與其進倉出倉時日耽延耗費無算何如合收兌爲一事
就糧船爲倉廩查每年重運過後本次總有減歇及屑造之船先令依限修造一經開漕先以此船收米
回空到後速催修驗接續貯收收完一船卽取一船開結先開離次州縣於岸上搭蓋篷廠令花戶舩米
交船丁與民相授受而官監之務使平斛變換顆粒不得浮加其米色之高低胥由州縣持平不任旗丁
欺壓蓋在官既無沾染則理直氣壯卽禁止令行不但旗丁無敢刁難卽索規包抗之徒皆可執法從事

而小民胥免浮折徵收可決公平矣惟就中窒礙者有三一則春籩白糶採買糯米一切夫工折耗口錢麻繩向由州縣津貼一則逃亡絕戶廢地老荒向由州縣墊補一則票冊紙張夫役飯食鑿廠薪燭向由州縣措辦一收清漕皆無從挹注但能責州縣以潔己不能責州縣以解囊即需費不花一錢而虧漕誤運之患自若況重船不能不脛而走又人所共知者乎不得已仍仿成法而變通之溯查丁代民勞之始每石原有耗米六斗六升辦運極為充裕嗣將耗米劃出四斗起運歸公其餘二斗六升折徵銀一錢三分由糧道批解倉場衙門以充支放公用故有二六輕齋之名而丁不與焉又有籩颺耗米一款每石給二升七合有零專以貼丁嗣則奏准米歸通倉其貼丁之款由縣折銀支給復有漕贈一款正耗二米每石贈銀一錢改兌之米每石贈銀五分原由糧戶津貼旗丁故謂之贈迨後此款內每石劃出二十七文分給北場名曰箇兒錢又於雍正七年前大學士尹繼善奏准革除江蘇漕弊每米一石津貼銀六分半歸旗丁半歸州縣近聞此款專歸丁收凡此皆貼漕之大略或載全書或見部案班班可考今果力辦清漕似須統核倉場經紀以及旗丁州縣每處應得漕務款項實有若干其用度萬不可少者若干徹底查明通盤籌畫凡有可以取資之款各支各用彼此不許侵剋其實在無從設措者即不得不參酌成法仍著糧戶貼銀蓋完米既顆粒無浮則糧戶受益不少而賑辦公掣肘之虞糧戶亦無不周知從前中外條陳每有八折收漕之議事多流弊自不可行若仿尹繼善奏准章程參考歷來成案比較現在情形則每石酌貼銀三兩錢似亦不謬於正可否責令各州縣細加察看由司道議詳督撫分別奏明予以限制將大小戶一律徵收比之目下完漕定可減輕過半如縣幫再有婪索糧戶再有抗延以及後手之尖丁

白規之生監惟有儘法痛辦而已雖然疲幫軍船不得不裁汰也查江淮興武二幫因無屯田疲名久著然尙有造費貼息其最不堪者如太倉後幫滁蘇幫大河二三幫債積巨萬船壞八九不調劑不能出運卽調劑亦無完膚且孤寡廢疾之流皆其債主沿河攔索以累百計故津貼到手卽罄而開行數里卽停索債者認船不認人謂之黑帳惟船去然後債去雖定例各幫額船不許缺少然負重灑帶雇募買補與夫加一免雇亦例內所許通融者與其強留之而各幫效尤何如酌減之而米歸灑帶抑或減疲幫之額以添殷幫之船似宜責成糧道體察辦理勿以原額拘之庶可悉歸完善矣雖然開壩關纜不得不酌減也查重運挽過清江浦向稱三關五壩每船關纜夫錢不過十餘千至二十餘千爲止嗣因清江一關亦難挽放而臨黃各壩復有加添道光二年前漕臣李鴻賓所定木榜則稱四關九壩近年復加至十四壩每處關纜皆以頭二三進爲差年增一年每船渡黃銀錢百餘千至百數十千不等固由水勢湍急而夫頭之乘危勒詐委員之暗地分肥薄人於險實爲可惡欲除其弊先須大減委員留一二實心者專其責成以每日所放船數分勤惰以所放之有無失事核功過其壩座設法減少關纜夫錢悉定其數刊榜曉諭此外沿途各關亦皆照行如有訛詐立置於法似可以杜其弊雖然候補衛弁不得不甄別也捐納衛官分發到淮圖差使者無非圖規費耳從前自南而北漕委不過二十餘人迨道光七年奏定重運不得過四十員回空不得過二十八員至十六年又有不得過八十員之奏總由候補人衆難令空閒然與其調劑而累丁何如酌留而汰冗或量其膂力改補營職或按其捐數量改佐雜似亦可以疏通矣雖然通倉使費不得不核實也查通倉經紀以米爲生凡米之好醜斛之贏縮俱不難隨手改移故費足則糶稗

亦珠璣費不足則釜鍾當升合不獨旗丁惟命是聽卽各省糧道恐亦莫可如何惟賴本管官爲之裁制而已查糧船有帶北存公一款本係從幫費內劃出以爲塌費聞近年存公款銀每不敷用以致塌債愈多則累丁之故可想似宜准令各幫旗丁於抵通交米後將經紀有無勒索稟知該管糧道卽由道彙取丁結逕揭部科一次如有指出贓款准予查辦按實者賞之重典或可互相鈐制至賦出於田理宜清丈頃畝以除寄莊飛灑之弊丁起於屯理宜稽核衛地以裕貼造贍運之資此亦本源之所應治而不能期諸旦夕似當從容以理之者也

一議補偏救弊漕務已成積重若一時不能驟改亦須補救有方金應麟原奏所陳本已詳悉茲臣所議有於原奏中融會者有於原奏外推詳者在縣在幫各有六事一則核舊章以去太甚也查蘇松糧戶向分大小而收數因有短長大戶愈占便宜則小戶愈受苛刻彼此相較有數十等之差於是小戶效尤亦詭寄於大戶而辦漕愈難矣今雖未能遽令畫一斷不可過於偏枯該管府州耳目切近應令確查所屬州縣歷年收兌舊章援以爲準不及者曲在民太過者曲在官隨地隨時持平核辦至近年祠堂公產假託者多卽義產息田亦竊善舉之名以遂短漕之計應令散歸各戶照衆徵完以杜影射有挾制者罪之總以去其已甚爲圭一則治經造以除弊固也查近歲完漕不但徵新且多帶舊其中分年分限各屆完數不同民間要見由單始可照數完納而闔縣糧戶多者數十萬少亦十數萬一切完帶之數瑣碎零星官吏難以周知不得不假手於里甲莊差統名謂之經造而若輩居爲奇貨不以實徵戶冊與官不以易知由單與民私折暗包以完作欠迨至兌漕緊急硬將短數交官而加貼之多早經肥己遲誤把持莫此

爲甚應令州縣於開漕之先速將由單散給並將給單日期出示通諭各糧戶如五日內單未到手許控
經造若單到手而不完納另差查催備已由經造折收匿不稟官者一經發覺立辦重罪一則清訟米以
杜抗延也查收漕之事固少持平而許告之人總非善類無糧而上控則索規可知有糧而上控則躲避
可知控案固須審明正供豈容藉抗應將上控之糧戶由赴訴衙門押令到倉交完本名下米石始行准
理一則稽丁胥以憑懲竄也查漕書記書倉差斗級以及管倉管廩家人皆不能不用若輩莠多良少非
魚肉百姓卽侵盜本官飛串瀾米搬戶挂籌等弊難以枚舉甚且結尖丁而分肥於後手引訟棍而調處
以居間破案則逃浮蹤莫捉應先責令州縣將此等的實姓名年貫住址並其家屬親丁詳冊列內送該
管府州覆查一有弊端立卽提究如查造不實提拏不到惟該州縣是問至總運廳差亦須裁減並永禁
坐倉以免勾結滋弊一則嚴截串以杜豫虧也州縣關茸之員尙有漕前截板串或挪解下忙錢糧或
墊辦修倉鋪底其串或給書差或付錢鋪無非明虧暗損挖肉補瘡至臨漕而無所措手矣更有不肖之
員暫時署事將值交卸趕將善區美戶截串先徵此爲營私誤公之尤必須重辦一則消漕尾以實庫貯
也江蘇漕額之大有一縣而可抵湖南北一省者漕船催開緊急斷不能守待閩縣疲戶一律全完故州
縣墊漕萬不能已所謂漕尾是也惟其恃有現存未徵之串得交後任接徵而後任又以新屆錢漕爲亟
未遑兼顧一輾轉間舊串流交久之幾成廢紙應責令州縣按年分月帶徵二成徵不足者著賠則雖往
復乘除總無五年以外之漕尾而庫款庶免虛懸至有一種取巧州縣將短縮太甚之大戶故意不徵留
作漕尾移交者察出特參與大戶一同懲辦庶可示儆此在縣之六事也其在幫者亦有六事一則復冬

兌以待僱限也查漕船例應冬兌冬開嗣因節節爲難不能悉符舊制近年疊奉 諭旨統限四月初十以前全數催至清江渡請北上定須懷遵 欽限不得刻逾但冬間若不多兌春間必不能早開而旗丁慣以米色爲詞停兌議費且其意欲令米石在縣倉發熱過後始行上船故兌愈疲而費愈重漕亦愈遲嗣後冬間須儘縣中所收之米全行兌漕不得任丁刁指庶來春祇須找兌差可速漕矣一則按兌米以給津貼也幫費即不能遵裁而頻歲疊加何以爲繼惟當欽遵嘉慶二十二年九月所奉 諭旨統以米石多寡按水次蓄釐酌給津貼作爲一定限制如再格外需索即當治罪而給付之法總惟兌一石之米給一石之費如兌多給少不依州縣給多兌少不依旗丁有逐日兌單爲憑自足以昭公允至於未兌以前責在州縣既兌以後責在旗丁歷奉 諭旨嚴明定須敬謹遵守若兌竣之後勒指通關及空船先開隨後趕米皆旗丁誤漕大弊必須重治其罪一則別虛船以昭核實也查加一免雇及輪減存次之船並不受兌出運而仍給與行月苦蓋已屬格外從優豈得復爭津貼應查照從前奏案此項虛船不准混索幫費致全幫延緩開行如違卽當嚴辦一則實行月以防正虧也查旗丁行月米糧皆計口授食之需升合不容短少乃近聞縣幫串合折乾每船有折米數十石及百餘石不等獨不思沿途食米不足致虧正糧誰執其咎嗣後水次如有此弊縣幫一體治罪一則懲水手以節身工也糧船水手有額雇在船者有遊幫短絳者總之皆兇狠之徒或師傅盤踞老堂或頭船勒索影黨偶遇風水阻滯卽藉端勒加身工甚至毆丁折艙大爲幫累近年疊經嚴辦略見斂戢嗣後如有勒加身工之水手卽於所在地方儘法懲罰不稍姑息毋使旗丁被累方免誤公一則定輪開以齊跨兌也蘇松等屬向有調幫章程原使酌劑均平

而船數米數不能恰合故一縣之米有兼兌數幫者一幫之船又有跨兌數縣者與其按縣全開不如按幫爲便應飭糧道排定日期每縣先輸一幫開行周而復始其跨兌者合輪數縣送齊一幫以免參差似亦可以速漕利運此在幫之六事也

一籌補救外之補救查原奏片稱兌費斷不能減南糧恐不能來有謂宜於糧船大修時將船改小以一分二卽免剝費開費有謂宜於淮上建厥貯米卽令小船運京有謂宜令蘇松常鎮杭嘉湖等府逐年試辦海運仍將兌費提存藩庫此三者皆不得已而求變通之法也臣查中途建倉以利轉般與古之洛口倉相仿本係成法但核計一厥貯米約五六百石大者亦止千石以南漕四百萬石計之每厥貯一千石卽須厥座四千就令減半轉運二千厥亦不可少經費殊覺浩繁且淮上逼近河湖亦恐難以擇地若糧船以一分二過間既覺輕靈遇淺又免盤剝誠利運卹丁之善策然查南漕起運之船約有四千隻其中本已區分大小江廣之船最大浙次之蘇又次之緣江廣重運直下長江小船難禁風浪若江浙之船改小而江廣不改則開河磨淺起剝仍費周章且卽江浙之船所載正漕照例祇四百石此外則爲加載負重而又有例准攜帶土宜自不能強小船以受大船之載若因改船而船數驟加一倍是欲去累而累轉增矣且大修較之拆造例限尙隔三年領項亦少三分之一當大修而令其拆造丁必藉口抗延尙有未脩大修者尤不能一律勒改是一幫之船有大有小既難稽核而剝費亦所省無幾是以臣未敢輕議更張也竊謂三者之中惟海運曾經辦過尙有成案可循若接候放洋得乘南風北駛春夏二季中一船必可兩運如以涉險爲慮則沙船往來關東每歲以數千計水線風信皆所精熟祇令裝載六七分已合鬆

艙之數則風暴無虞也如慮米石出洋易滋影射查南北洋面沙船烏船各有所宜本難越駛備恐荏苒難發自應諒以舟師且每歲沙船所運關東豆石雜種不知凡幾奚獨於載米而疑之海運若行或以官運或以商運或運正供額漕或運採買米石尙當細酌情形另行從長計議惟原奏有將兌費提存濟庫以實庫項之請查道光六年辦理海運雇募沙船每石給價七錢若兌費另提則雇資安出且既明提兌費又奚能禁止浮收如謂輪年提費補虧正恐一年提存難補節年虧缺若提者自提虧者自虧於事仍恐無濟大抵海運尙屬可行而所以行之者不同設或規費漸增亦與河運奚擇惟現在河運甚形棘手未卜日後如何而海道直捷易通亦不敢不豫留地步如蒙 飭令議行容臣到兩江之任再與江蘇撫臣及司道等詳細籌商會同具奏請 旨定奪理合聲明

一議本源中之本源臣愚竊維 國家建都在北轉粟自南京倉一石之儲常糜數石之費奉行既久轉輸固自不窮而經 國遠猷務爲萬年至計竊願更有進也恭查雍正三年 命怡賢親王總理畿輔水利營田不數年墾成六千餘頃厥後功雖未竟而當時效有明徵至今論者慨想遺蹤稱道勿絕蓋近畿水田之利自宋臣何承矩元臣托克托郭守敬虞集明臣徐貞明邱濬袁黃汪應蛟左光斗董應舉輩歷歷議行皆有成績 國朝諸臣章疏文牒指陳直隸墾田利益者如李光地陸隴其朱軾徐勣湯世昌胡寶琮柴潮生藍鼎元皆詳乎其言之以臣所見南方地畝狹於北方而一畝之田中熟之歲收穀約有五石則爲米二石五斗矣蘇松等屬正耗漕糧年約一百五十萬石果使原墾之六千餘頃修而不廢其數卽足以當之又嘗統計南漕四百萬石之米如有二萬頃田卽敷所出倘恐歲功不齊再得一倍之田亦

必無虞短絀而直隸天津河間永平遵化四府州可作水田之地固頗有餘或居窪下而淪爲沮洳或納海河而延爲葦蕩若行溝洫之法似皆可作上腴臣考宋臣鄭戩鄭喬之議謂治水先治田自是確論直隸地方若俟衆水全治而後營田則無成田之日前於道光三年舉而後輟職是之故如仿雍正年間成法先於官蕩試行興功之初自須酌給工本若墾有功效則花息年增一年譬如成田千頃卽得米二十餘萬石或先酌改南漕十萬石折徵銀兩解京而疲幫九運之船便可停追十隻此後年收北米若干概令覈其一半之數折徵南漕以爲歸還原墾工本及續墾佃力之費行之十年而蘇松常鎮太杭嘉湖八府州之漕皆得取給於畿輔如能多得益則南漕折徵歲可數百萬兩而糧船既不須起運凡漕務中例給銀米所省當亦博是且河工經費因此更可大爲撙節上以裕國下以便民皆成效之可卜者至漕船由漸而減不慮驟散水手之難而漕弊不禁自除絕無調劑旗丁之苦朝廷萬年至計似在於此

可否

飭下廷臣及直隸總督籌議酌辦之處伏候

臣林文忠公啟書

二十五年諭漕糧爲天庾正供節經降旨令有漕各省督撫嚴飭所屬早兌早開尅期渡黃毋稍延誤乃近年重運漕船不能如期抵壩以致到通歸次兌受新漕節節耽延緣各該督撫不肯破除情面實力催趕所致上年軍船回空無須倒壩漕放猶未能十分迅速況本年因中河桃汛漫口繞越北行已耽延十有餘日繼又因運河淺阻剝運抵壩形勢滯若不起緊催趕及早歸次儻誤新漕受兌關礙非輕見已節屆霜降水勢漸消著漕運總督及沿途各督撫分飭所屬嚴行催趕務使連檣南下銜尾進行不准片刻停留庶幾以速補遲如期歸次來年新漕元當趕緊辦理按限兌開統限於四月初十日以前全數盡至清江尅期抵壩以伊渡黃

北上毋許稍有延誤倘意存怠玩視為具文仍致臨事周章有逾例限定將該漕督及各該督撫嚴行懲處不寬貸東華續錄

二十六年諭前據潘錫恩奏籌備空運事宜並請定松江府屬重運渡江限期一摺當交鹽昌等駁議具奏據奏稱松江重運幫船向與蘇屬各幫糧船跨兌必先蘇而後松又由吳淞黃浦泖湖運河運遞出江連年出較遲早不過數日從無延誤況渡黃例限本定於四月初十日以前果能節節提前漸歸初限所有松江重運相距不遠尤當爭先恐後一德遵速又另片詳陳松江重運實在情形惟在破除積習多方激勵各等語所自係詳加體察務協機宜所有松江重運渡江即著蘇庸另立限期以歸簡易該督等仍當先事籌度嚴切催俾早兌早開如係各幫稍形玩易立即指名參撤務較常年提前辦理以符例限而利漕行東華續錄

二十八年諭內閣訥爾經額奏籌議南糧赴壩情形一摺現在海運兌米未能計日完竣河運南糧首幫已抵津關以後各幫陸續挽入直境均已將次到津若令等待海運尾撥方准過關恐後進幫船挨次頂阻且本首幫入直之期比上年已遲六日再有耽延致誤歸次限期更於全漕大局有礙所有現抵津關各幫著該督按照舊章隨到隨放所有海運撥船插檔行走兩無滯礙即令稍滋弊混尙可將海運米石暫卸北倉先令船北上無誤回空方臻妥協豈有將重運車船暫免催提之理著倉場侍郎於海運河運兼營並收不得顧此失彼倘軍船阻止行走以致回空未能依限歸次有誤大局惟該侍郎是問懷之 聖訓

又允李星沅等奏江蘇各屬新漕仍歸河運東華續錄

二十九年諭楊殿邦奏漕船渡黃較遲請預籌緩撥一摺本年四塘漕船指日可全入東境惟節候已遲必

於安陵地方截撥轉運方可無誤回空著直隸總督倉場侍郎卽飭天津道將楊村官撥抵補船隻迅速調齊並酌量添雇民撥飛咨漕運總督詢明應否迎至安陵守候方免臨事周章東華續錄

又 諭據楊鳳邦馳奏節逾大寒回空幫船挽放仍形艱滯酌議新漕兌運事宜一摺本年回空幫船渡黃已遲加以節節套堵灌放其不能暢行無阻已可槩見至能否不誤歸次昨有旨令福濟等迅速查明具奏茲據楊鳳邦奏各省漕糧已經具報定期開兌而空船尙有二千六百八十二隻未經下閘恐致貽誤新漕酌議擬辦章程四條呈覽該漕督職司轉運其勢不得不預爲籌及豈能坐視貽誤著福濟陸建瀛會同楊鳳邦將所擬各條悉心參酌和衷辦理如有應增添者仍當會議妥籌一面駁辦一面奏聞不得草率福濟如已起程北上仍著折回東華續錄

三十年諭內閣慶祺朱嶠奏請飭催南糧幫船銜尾北上原不容片刻稽延茲據該侍郎奏稱二進幫船雖已跟接抵壩尙有六幫在後至三進江廣十六幫現不知行抵何處似此任意遲延必致有誤回空著漕運總督將二進之鳳陽常等幫並三進江廣各幫漕船趕緊督催務令跟蹤前進並著東南兩河直隸各總督山東巡撫一併督催迅速北上倘押運各員藉詞耽延及地方官催趲不力卽著嚴參毋稍寬貸

又 諭內閣大理寺卿邵燦奏漕政亟宜整頓一摺漕糧自開兌以迄驗收例有常則立法極爲周密無如奉行日久率皆視爲具文以致諸弊叢生如所奏州縣浮勒弁丁需索以致漕船捏報開行任意逗遛又江廣幫船近多全數起卸船戶得以偷盜攪雜又委員索取陋規水手訛索滋事種種弊端雖屢申諭嚴禁而相沿

已久積習迄未消除著有漕各督撫及漕運總督加意稽查認真整頓總期開行依限起卸如期裁冗員以杜需索懲水手以儆刁頑庶使弊竇不生丁胥知畏以肅漕政而裕正供 聖訓

又 諭內閣楊殿邦奏漕船在塘稽阻現今加緊催遣等語昨因南糧各幫二三塘灌放渡黃後諸形遲滯曾經降旨飭令漕運總督東河總督及沿途各督撫嚴催各幫趕緊趲行茲據該漕督奏稱各船放渡後因風水頂阻以致稍稽時日現在節候已遲水勢日消該督務當仍遵前旨設法輓運趕催北上以速補遲毋得藉口稽延回空遲誤以致趕辦新漕又形掣肘也懍之 聖訓

又 諭內閣漕糧爲天庾正供近來重運漕船不能如期抵壩以致回空歸次兌受新漕節節耽延上年空運軍船因運河淤墊阻滯直至春季始行催歸水次本年南漕減歇較多幫船起運爲數本少乃沿途並不實力催趲節次脫空遲延江廣各幫或在臨清或在途次分別起卸剝運現在節逾霜降水勢日消若不趕緊趲分歸次來年新漕受兌必致貽誤關繫甚鉅著漕運總督嚴飭起卸空船卽刻連檣南下銜尾邁行不准片刻停留並著東河河南河督兩江湖廣山東江蘇安徽江西湖北湖南各督撫分飭軍船經過地方派委委員嚴切提催及早歸次毋任稍有遲滯並嚴飭約束經由各舖及取堰灌塘役夫人等相度水勢分別善洩回空軍船一到立卽放行不得稽留阻撓再有玩延致干重咎來年新漕尤當趕緊辦理接限兌開統限於四月初十日以前全數竣至清江剋期渡河北上毋得因本年回空較晚又復藉口耽延倘將卽次所降諭旨視爲具文仍致礙事周章有逾例限定將該漕督及有漕各省督撫嚴行懲處決不寬貸懍之慎之 聖訓

又 諭內閣戶部奏籌運遲延一摺 運抵通限期例有明文本屆遲延將及一月而在後江廣各幫尙無

878 16BR

增數抵通日期該漕督奏報摺內率以無聞之年與有聞之年牽混計算實與前奉 諭旨不符楊殿邦著摘去頂帶仍星夜督催儘力趕趨不得以奏明截剝在前形疏懈總期多到一幫少截一船以節經費而免滋弊至本年漕糧爲數本少若地方河漕各督撫同心籌辦實力催攬何至渡江渡黃遲滯如此其各該省開兌遲誤及淮揚一帶運河淺阻與河水漲發瀆放稽延之處著該管各督撫逐一查明據實嚴參具奏不得因去年辦理回空遲延又因該漕督現已降旨懲處遂爾各存成見自爲推卸地步轉瞬接辦新漕亟宜先期豫籌冬兌冬開按照定限設法籌辦各州縣衛所交兌新漕後立即催令開行總以渡江渡黃無誤期限經過運河無令淺阻爲要備再藉口回空遲滯致明歲漕糧仍不能如期埭數抵壩實心任事之謂何各該督撫其能當此重咎耶懷之 聖訓

咸豐元年諭內閣慶祺朱嶠奏請飭催南糧起運幫船等語近年各省幫船受兌開行總未能趕符定限以致迎幫剝運殊費周章上年甚至將剝船凍阻河干打冰行走又復截卸北倉實屬不成事體本年辦理新漕自應提前趕辦現在江蘇浙江首幫軍船已報先後開行如各省幫船到淮在江浙等幫之先應否不拘次序隨卽盤驗放行著楊殿邦相機辦理總期跟接北上毋許一幫脫空稍形遲滯並著沿河各督撫仍遵前旨飭屬催提並遴委委員督同地方文武實力催攬以速漕行而符定限 聖訓

二年諭內閣楊殿邦奏江廣各幫陸續兌開請飭各關查驗放行不准羈留等語向來江廣幫船經過九江蕪湖龍江等關查驗納稅關書人等往往藉端刁難致稽時日該漕督所奏自係實在情形著九江蕪湖龍江各關監督一俟江廣幫船到關立即查驗放行不准羈留如各幫船於例帶土宜外尚有應繳稅銀卽酌留伍丁

令其照數完納俾幫船迅速前行毋致貽誤至各幫丁舵人等沿途售貨任意逗遛該漕督亦應嚴飭行糧道督率運弁隨時實力稽查催辦過行毋任藉詞延宕並著沿途各督撫派員一律嚴催以速漕運 聖訓

又 諭內閣朱嶧奏請飭催河運漕糧一摺本年江蘇蘇松等四府一州糧米業經由海運抵津其江安浙江江西湖南湖北各省漕糧均仍由運河轉運北上現在運河豐北漫工尙未據報合龍各省糧船已次第兌開前進南北運道設有阻隔必致節節耽延於漕務大有妨礙著陸建瀛楊以增顏以燠楊殿邦體察情形趕緊籌辦總期漕船及早催駛如限抵運毋致臨事周章倘有貽誤惟該督等是問 聖訓

又 諭內閣戶部奏遵旨速議漕運事宜一摺所有江安江廣各幫起運米石均著照該部所議分別催辦並截留備賑抵給銀款其浙江幫船本年秋間是否尙能改行海運著陸建瀛悉心酌覈如果確有把握卽責成該督妥爲辦理應用水脚剝價等銀仍由浙江巡撫覈實籌備倘因時交秋令行駛維艱該督會同浙江巡撫妥商截卸在附近上海地方存儲於今冬豫籌來歲海運毋得互相推諉致干重咎此次漕行遲誤總由豐工未能合龍所致陸建瀛楊以增著交部分別議處 聖訓

又 諭內閣陸建瀛奏出省督催幫船請旨飭催在後各幫迅速啓行一摺本年江安江廣各幫河運漕米除截留備賑外其應行運赴通州之米爲數尙多事關京倉儲備該漕河諸臣宜如何竭力籌維悉心趕辦茲據該督奏稱現在渡黃之船僅止三百七十餘隻其首先渡黃之大河前幫尙未行入山東境內湖北江西湖南各幫亦皆阻壓不前轉瞬卽交秋汛似此任意遲延必致貽誤該漕河總督及地方大吏所司何事現在陸建瀛業已督押江西尾幫提上清江屆並卽馳往蘇莊濟甯一帶督催所有在後各幫船著楊殿邦楊以增顏以

燭督飭嚴催毋許片刻稽留倘意存諉卸任聽幫丁人等藉端遷延以致誤漕誤賑該督等豈能當此重咎耶至浙江漕船現在首幫尚未行過蘇州在後各幫復不跟蹤前進該糧道惟知藉口水淺一味耽延更屬不成事體著陸建瀛仍遵前旨會同浙江巡撫體察情形妥籌辦理並將貽誤各員查明參奏 聖訓

又 諭內閣陸建瀛奏湖北督運道員等耽延阻滯請飭漕運總督速催趲行等語本年鹽工未合運道未能疏暢自與往年情形不同然漕船果能依限開行該漕督及糧道等於盛漲以前實力督催設法輓運何難跟接北上乃自有截漕變價之議朕觀諸臣會奏卽有藉詞觀望之意是以疊降諭旨令該督撫等趕緊催趲不得以截留漕米運道艱滯藉口遷延茲據陸建瀛奏稱湖北糧道龔綬及押運同知誠意自四月行抵瓜口沿途耽延兩月經該督嚴飭始肯渡河猶復節節逗遛以致江西全幫阻壓似此任意延玩不知是何居心豈視天庾正供竟可虛擲河干誘過他人耶龔綬誠意均著先行交部嚴加議處仍著楊殿邦飭令該員等督押幫船飛輓前進如再延誤惟該漕督及該糧道等是問 聖訓

又 諭內閣前據椿壽奏浙省漕糧籌辦情形一摺當交戶部速議茲據該部議奏現在江安等幫業已輓至濟甯則浙漕之跟幫北上不致阻滯自應如該署撫所奏一律催趲迅速輓運著陸建瀛楊殿邦嚴飭所屬妥速籌辦不得再有稽遲致干重咎至該省幫船至七月中旬尙未全入蘇境如此貽誤實從來所未有該漕督及該撫糧道等所司何事所有漕運總督楊殿邦前任浙江巡撫常大澐署浙江巡撫椿壽浙江糧道胡元傅均著交部分別議處以示懲儆並著吏兵二部查取浙江省經管運糧河道及總運領運各職名一併分別議

處 聖訓

又諭軍機大臣等本年江浙漕船遲誤前已諭令陸建瀛體察情形酌定辦法一面知照漕河地方各督撫趕緊照辦毋得再有異議茲據奏稱浙漕首幫既未渡黃後幫亦無過蘇確信見已節逾秋分水日消涸誠恐節節阻滯卽極力催趲北上亦恐徒託空言應如何變通辦理之處著該督仍遵前旨迅速酌量妥辦總期於公事有濟不可再涉游移東華續錄

又諭內閣慶祺朱嶠奏河水凍合亟籌截卸事宜一摺本年南漕行走遲滯現在北運河業已凍合所有在後之江安重運剝船勢難徑抵通壩著准其照道光三十年辦過成案暫行截卸天津北倉俟明春冰泮卽行運通並著派朱嶠帶同坐糧廳監督一員迅往天津驗收一切經費均查照上屆成案辦理其浙省杭嚴三等七幫已入東境現派剝船接運著山東巡撫直隸總督嚴飭迅速迎剝催趲設法打冰前進務期剋日輓抵津關一併截卸北倉毋任藉詞延宕其尙未報入東境之嘉白等幫是否尙可撥行抑須就近截卸之處著漕運總督山東巡撫酌量情形妥速籌辦 聖訓

又諭內閣漕糧爲天庾正供近來重運漕船不能如期抵壩以致回空歸次免受新漕節節耽延本年幫船北上開行已遲沿途又不實力催趲直至運河漸已凍合尙未全數抵通現將在後之江安重運剝船截卸天津北倉浙省杭嚴三等七幫由山東打冰剝運並有嘉白等幫尙未報入東境似此任意延玩實從來所未有刻下節近大雪水勢日消若不趕緊撥令歸次來年新漕受兌必致貽誤關繫非輕除浙江各幫該撫請改海運江蘇各幫明年仍分別海運外其餘各省幫船著漕運總督嚴飭起卸各幫卽日連檣南下銜尾通行不准片刻停留並著東河南河總督及有漕各督撫分飭各地方嚴切催提及早歸次來年新漕尤當迅速辦理按

期兌開統於四月初十日以前催抵清江剋期渡黃毋得因本年回空較晚又復藉口耽延儻將節次諭旨視為具文仍致臨時周章有逾例限定將該漕督及有漕各省督撫嚴行懲處決不寬貸懷之慎之 聖訓

七年諭內閣崇綸李茵奏請飭催奉天米石迅速運通一摺奉天省額運米豆並採買捐輸米石時近秋分尙未據報開行日期恐該船戶包攬載貨沿途逗遛以致裝運稽遲更恐節候過遲船隻凍阻剝運維艱著盛京將軍奉天府尹嚴飭該運員及蚤兌竣開行務於八月內全數抵京並著直隸總督委員提催卽飭天津道豫調剝船一俟海船收口迅卽剝運赴通交納毋再遲緩 聖訓

十一年諭議政王軍機大臣等嚴樹森奏豫省漕糧擬定冬兌春開請飭直隸山東督撫將沿河各匪實力掃蕩以利漕行一摺河南省本年漕糧現既定爲冬兌春開向來兌運之楚旺鎮曾經匪擾且密邇直東匪蹤遍地深慮逆捻垂涎著卽改於衛輝水次受兌分運楚旺以昭慎重其暫築土牆塔堆囤積及用剝船挽運各事宜卽著嚴樹森督飭委員及地方官妥爲辦理所有各幫名下查扣水程盤剝銀兩著卽免其查扣毋庸另行籌給盤費惟漕船受兌之後必須直東二省賊氛淨盡河道疏通方能連檣而上刻下該二省黃河運河兩岸會教各匪蟻聚蜂屯幾無完土著文煜譚廷襄飭令派出帶兵員弁實力掃蕩以利漕艘毋得仍蹈上屆故轍

致滋貽誤 聖訓

同治二年兩江總督曾國藩奏竊臣接准戶部咨開三口通商大臣崇厚籌備京倉一摺經該部議奏請 旨飭下臣與官文沈葆楨惲世臨嚴樹森等會同籌畫將鹽課漕折兩項實能籌撥若干妥籌辦理等因於同治二年七月初一日奉 旨依議欽此並鈔錄原奏咨會到臣臣查咸豐十年以來蘇浙淪陷南漕運京爲

數寥寥上年全漕竟未興辦僅賴李鴻章勸辦商捐米九萬石於夏間次第解京在上海經營甚苦而在
天庾則裨益甚微本年東南應徵之漕自應設法多解本色上供京師至急之需然江蘇淮揚通海之米已
由漕臣吳棠奏准仍徵折色撥充揚州軍餉湖北之米已由撫臣嚴樹森奏准萬難改徵本色江西之米亦
由撫臣沈葆楨具奏仍難改徵本色此三臣皆素抱公忠絕非不顧京倉根本之人其所以難於解米者蓋
爲時勢所迫成例所拘殆非一二言所能罄目下欲運江楚之米入京卽百餘年之成憲與近數年之事例
均不能不大爲變通臣請爲我 皇上縷晰陳之向來三江兩湖皆有官製漕船分製編號水次受兌各有
定所今則漕船盡壞將欲全數修復需銀約近三千萬兩既難籌此巨款又值黃河北徙運道久淤之後又
值泰西就撫海道暢行之時由江浙閩廣以達天津出入洋面如履戶庭揆之天時人事自須全廢河運概
行海運而兩湖江西安徽向未辦過海運成案江湖之遠雇船之費若非由部臣先爲定議疆臣頗難措手
自前明以屯田養衛軍以衛丁運糧船我 朝因之改爲旗丁行之既久屯戶不能耕田而鬻與平民動倚
衛官以抗糧衛軍不能使船而另募水勇動倚旗丁以滋事名實相舛既已不勝其弊矣而旗丁每次領運
需索幫費視州縣若魚肉閩粵之委員通州之倉書又視旗丁若魚肉臣歷觀道光年間諸臣之奏疏 宣
宗之諭旨言及州縣浮收旗丁幫費未嘗不深恨次骨終以積重難返莫可如何今則局勢大變日月重新
漕船既可全廢旗丁亦可全裁頃者兵部議覆嚴樹森裁兵一案飭臣等酌量辦理郭嵩燾在糧道任內因
之詳請盡裁屯兵以屯田改隸州縣以衛官改隸綠營其說甚爲詳明臣以戎事倥傯尙未據以入奏茲既
議廢漕艘自應并革衛軍臣所謂百年成憲不能不大爲變通者此也道光二十七年王大臣戶部會議以

京師之現銀太少南省之浮收太重請將南漕改徵折色以實部庫而蘇民困旋經督臣李星沅奏駁不行
文宗登極撫臣傅繩勛痛陳浮收幫費之弊民不聊生又請改徵折色旋經部科議駁不行逮咸豐三年
粵匪竄陷金陵長江梗塞不得已改收折色定爲每石一兩三錢當時銀價每兩換錢一千餘文米價每石
不過一千餘文故一兩三錢民猶病其重也今則情形迥異價值懸殊銀價每兩不過換錢千三百餘文米
價雖各省不同然大致相類李鴻章嚴樹森奏稱四兩以外係就夏間荒歉言之吳棠沈葆楨奏稱三兩上
下係就秋間收穫言之臣處目下所買之米其價亦近三兩若如崇厚原奏合米價運脚僅及二兩則近年
絕無此事米價既費三兩加以由內河而出江由江而海而津船價耗米等費計亦不下二兩是南省解到
天津之米約計需銀四兩九錢而南省所收民間之漕部價僅算一兩三錢若解米十萬石卽有三十六萬
金無著之款部臣不准銷疆臣不能賠此中窒礙情形實之彌縫之術卽以江西而論辛酉年之漕折臣與
毓科出示每石徵錢三千壬戌年之漕折臣與沈葆楨出示每石徵銀一兩九錢以一兩三錢之部價計之
則所納並不爲少以目下穀米之市價計之則所納之數斷不能購米一石而船價耗米各費更無所出以
臣愚見必求部臣奏請 特旨米價運脚均准據實報銷不拘原定一兩三錢之數庶江楚本屆之漕尙可
設法解京臣所謂近年事例不得不大爲變通者此也兩淮鹽務與漕政本不相涉然崇厚議撥鹽課以購
南米亦權宜救時之一策臣忝任鹽運三載有奇而淮饑未嘗竭力精書非敢置爲緩圖也沿江上下各軍
釐卡至十餘處之多均以鹽釐爲大宗臣若驟議變革則各軍皆向臣處索餉若全不變革則官鹽斷不能
逐卡完釐而楚岸引地久爲川私粵私侵佔西岸引地久爲浙私粵私侵佔民間藉此以免淡食鄰省藉此

以籌釐餉江路未通豈能禁鄰私之盛行且輪船拖帶流弊百出既可授洋人侵奪鹽利之權又恐啟私梟假託洋商之漸種種窒礙無處著手故吳文錫之呈詞錢寶廉之奏疏雖奉 諭旨飭辦臣尙因循未及與辦職此之由仰託 皇上威福九洲既克長江一律肅清臣始與郭嵩燾重立新章先辦江西一岸現在規模初定稍遲再行專案具奏大約緩納運卡之釐金由臣處總收而分送各處禁革餉鹽之名目以商運爲主而輔以官運庶幾收回利權漸循軌轍此又當變通近年之事例而返諸昔年之成憲者也斯二者皆當今之急務而漕糧關係尤重更張尤大相應請 旨飭下王大臣戶部悉心集議據臣愚見復南漕之舊章定海運之全規縱使軍務大順亦須俟諸同治五六年以後目下二三年內祇可作試行之局難遽爲承定之章米石不必徵諸民間民折銀而官購米亦可商捐米而官代解亦可米色不必拘守成例江廣而參用白糧亦可蘇浙而不盡粳米亦可數不必其如額全解不厭其多三四萬石不嫌其少價不必其盡同此省與彼省可以參差前批與後批可以增減但求有米到京一切不爲束縛聽東南各督撫因地制宜從容展布試行一二年後自然漸講漸精中外皆有把握惟今日之試行卽爲他日之成案如漕船應否另造屯衛應否速裁沙船應於何處受兌上游應於何處匯總何條應用歷年海運之例何條應用本年商捐之例均須由王大臣戶部預爲議定庶幾可暫久得所遵循至鹽務係 徵臣專政目下實無鹽課銀兩可以撥充漕費抱媿殊深所幸湖南撫臣惲世臨籌畫精詳擬解米十萬石進京除新舊漕折外另籌巨款以作運費將銀兩先解臣處商所以運津之法又奏派通東道黃冕察看長江剿運事宜黃冕因創爲米鹽互市之議稟請於皖省設互市局招徠湖南商賈運米至皖由皖省設法運滬運津並招淮商運鹽至皖與楚中米

商交易而退此局若成不特湖南漕米可以中途交兌即江西湖北之漕亦可酌量由皖遞運淮鹽如行起色即可清軍餉之積欠亦可補京米之不足與崇厚之原奏戶部之議覆均相符合即與華祝三請提江廣之銀交軍費買米解京之奏其用意亦復暗合實屬因勢利導兩有裨益會文正公奏議

三年諭議政王軍機大臣等吳棠奏東南軍務大定擬試辦河運等語據稱江北各屬均以河運為便惟停運有年漕艘久廢若設法雇用民船慮難鈐束並沿河一路緯隄塌塌浮送能否無虞亦難逆料現擬於清淮軍需捐款內勸銀購米二萬石解赴通倉試行河運等情具具該漕督心存大局辦事認真江北各屬距滬較遠如與蘇浙江廣糧艘一律由上海轉運由北而南殊多周折著照吳棠所請即行採買米石雇備民船由河道運送通倉所有轉運事宜並江省應行經過河道均著飭令該地方官妥速經理一俟議定章程即行具奏並著鄭敦謹將糧艘經過河路之緯隄塌塌有無應行修整挑濬即飭沿途管河官弁一體迅籌備辦用利運行如能挽行無滯來歲江北新漕即由吳棠等仿照辦理以復河運成規該督等諒能實力興辦不至徒託空言稍涉畏難也 聖訓

五年諭內閣李鴻章吳棠奏江北新漕遵辦河運將現辦章程開單呈覽一摺據稱上年試辦之船以東境汛後河乾至今未返以致人人視為畏途必須優加體恤船戶樂從方可行之久遠現擬每米一石給水脚及神福稿賞等款銀六錢仍仿照海運沙船之例准於回空時裝載貨物免交北稅並請飭倉場衙門嚴革陋規等語上年漕船回空停泊東境日久未歸若不量為變通無以廣招徠而利後運著照該署督等所請每米一石給銀六錢並照海運沙船之例回空時准裝貨物免交北稅應如何給照稽查示以限制之處由該署督等妥

議具奏所有經過山東直隸地方著各該督撫一體催趨毋任阻滯本年解運正漕運費較海運尤絀所有一切陋規自當永遠裁革恐丁胥經紀仍沿從前勒索幫丁之弊著倉場侍郎嚴行禁革隨時稽察如有需索苛求立予重懲務期漕政從此整頓河運可以暢行餘著照所議辦理 聖訓

九年諭內閣丁寶楨奏江北漕船阻滯現籌接運各摺片據稱本年江北漕糧初因兌米時水小不能進船嗣因過壩提挽頗艱遲至七月中旬方得到濟黃水消落不能前進暫在東阿縣境八里廟一帶停泊現擬抽溝戽水倒剝接運等語江北試辦漕運歷屆均無貽誤此次始則以水甚旺而船不至繼則船已到而水旋消辦理遲延已可概見該糧道及委員等貽誤情形著兩江總督江蘇巡撫漕運總督確切查明據實參奏至漕船停泊河干豈可束手坐待著丁寶楨督飭運河道等趕緊設法挑溝引水雇船轉剝以期無誤漕運 聖訓

又諭軍機大臣等丁寶楨奏漕船阻淺擬改由陸路設法挽運等語江北漕船行抵八里廟一帶節節阻滯現在水勢消涸抽溝剝運業已無及丁寶楨已籌雇民車改由陸路運至臨清再行接運自應如此變通辦理卽著魁玉丁日昌丁寶楨分飭江安糧道王大經運河道王化堂等趕將已到臨清之米一萬餘石立即裝載開行其未到漕米務當星速雇齊民車一律轉運並籌備船隻隨到隨裝不得再有遲延並著李鴻章督飭各該地方官於漕船入直境後務趁河冰未凍僅令油槽北上毋稍耽延 聖訓

又諭軍機大臣等戶部奏請飭江浙等省整頓漕務等語據稱近年來外省辦理漕運遲延由州縣舍米徵銀司消復另行委員以銀易米市僧屯積米石擡價居奇委員等遲回觀望止求糶米之減價不問受兌之逾期卽如本年夏至後東省黃水盛漲如果江北糧船先到數日早已直達通州是轉運之遲滯實由開兌之遲

延來歲新漕亟宜整頓等語漕運爲京倉要需本年轉運業已愆期亟宜豫先籌畫趕辦以免一時貽誤著會國藩魁玉張兆棟張之萬將本年江北漕糧嚴飭各該州縣就起運之數徵收本色恪遵定例冬兌冬開以期早到東境守候黃汛並將受兌開幫到東各日期隨時奏報由丁寶楨沿途催趲前進毋再遲延致蹈覆轍其江蘇浙江海運新漕並著各該督撫提前趕辦毋稍濡滯 聖訓

十年諭軍機大臣等會國藩奏江北冬漕仍辦河運一摺本年江蘇淮揚等府州屬應徵漕米及折徵採買米石並抵充運費粟米現已提前趕辦定於明年正月兌清開行北上該督因本年侯家林衝決黃流貫運請飭先堵決口次疏運道迅速辦理以免阻滯自係實在情形昨據喬松年等奏侯家林決口須俟明年冬間始能興工一摺業交該部議奏惟來年江北漕糧亟須趕運著會國藩蘇鳳文喬松年丁寶楨文彬悉心會商應如何豫爲籌畫俾漕運不至貽誤之處卽行妥速辦理一面詳細奏聞 聖訓

十一年延照奏變通制運章程從之東華續錄

光緒二十一年署兩江總督張之洞奏竊照蘇州等屬本屆冬漕照案提撥米一千萬石循行河運業經臣等於核計起運交倉約數摺內聲明 奏報在案茲據蘇州藩司鄧華熙蘇松督糧道陸元鼎會詳稱蘇省二十一年分冬漕提撥河運米石現經秉公核派有漕之長州元和吳縣吳江震澤崑山新陽華亭泰賢婁縣金山上海南匯青浦武進陽湖無錫江陰宜興荆溪丹陽金壇溧陽太倉鎮洋二十五州縣勻攤米一十萬石飭令前赴寶應等處採買和米就近撥交民船受兌惟派員驗米雇船受攬承裝事亦繁重應仍參做成案整訂章程俾有遵循所有驗兌押運事宜遴委請補蘇海防同知王用蘇會同各員督押開行催趕駛抵

山東黃水穿運之處候汛北上但運道縣長節節淤壅築壩擡蓄挑挖灌送各事宜最關緊要現經臣等札行淮揚徐州二道預爲籌款挑辦惟山東省河道淺處應由東河督臣山東撫臣嚴飭管河州縣認真挑浚務期一律深通並預雇駁船以備遇淺起駁仍由蘇糧道於赴滬查驗海運米石開運後卽馳往清江督催放關嚴飭在事各員沿途梭巡催趕該道卽徑赴天津通州辦理海運糧米交兌事宜俟河運米石行抵通州接續交倉以期兩無貽誤酌議章程十條會詳請 奏前來臣等覆核無異相應開繕清單恭呈 御覽此外如有未盡事宜容再隨時 奏明辦理 張宮保啟書

王芑孫轉般私議古之漕法四一河運一陸運一海運一轉般河運陸運隨世不同海運用之元明數十年間惟轉般自魏隋以迄唐宋幾及千年其用差久而其源始於禹貢實虞夏聖人之遺法也三代封建之世納粟止於甸服轉輸不過數百里故經傳不詳其法秦漢所漕於京師者無多故講之亦略自後魏之世經略江淮有司請於水運之次隨便置倉小平石門白馬津漳涯黑水濟州陳郡大梁凡八所各立郡關每軍國有需應機漕引此轉般倉所從朔也隋開皇三年詔於蒲陝鄭許等州水次置募運米丁又於衛洛陝華諸州各置倉轉相灌注此轉般立名之所自出也方今民困於浮收官困於幫費議者莫不欲去浮收以救民去幫費以救官然去浮收必先去幫費去幫費必先改漕法今之漕艘古所謂直達綱漕之善者也顧 國家承平百六十年法久弊生老奸宿蠹窟穴其中通倉之需索大累於幫丁幫丁之需索大累於州縣督撫以浮收暫紓州縣而州縣卒未嘗紓也漕臣以幫費暫恤疲丁而疲丁卒未嘗恤也通倉諸臣奮然欲去經紀花戶之需索而卒未嘗去也經紀花戶之盤踞於通倉者不得去則尖丁之

蠹食於州縣者不能除浮收歲甚幫費歲增幫費愈增浮收愈甚於是有書役之挾制有紳士之包攬昔之浮收利於官今之浮收又害於官岌岌乎勢且不終日而道窮矣窮則變變則通漢唐以來自轉般而之直達何不可自直達而之轉般變之所極其機自至近歲駁船之設始爲偶行繼成常例不得已隨地置倉由是而天津有倉矣臨清又有倉矣是轉般之法雖未顯立其名實已用之於北也今築禦黃壩恐誤江廣回空卽就清江增船駁運是轉般之法又已用之於南也日者 敕下諸臣別籌河漕兩利之策伏繹 詔旨似專爲河工未就而言竊以河工天事也患之偶也幫費人事也患之常也天事無往不復人事有加靡已就使一旦河流循軌漕艘暢行而幫費日增漕弊日出是上以百萬金錢治河下又以百萬金錢治漕也治河河平而費止治漕漕在而費無終窮何不酌古之制權今所宜取唐宋轉般倉成法損益之不泥其迹而師其意古稱利不百不變法轉般之在今日豈徒利百已哉今欲行之其要有五

一曰易漕艘漕艘之建造修葺一切應得分例有經常有額外所糜於 國帑者數十百萬及其出運凡所勒索於州縣者又數十百萬日行不數里催趲迎提終年勞擾近者夾帶愈多雖蘇松內河無歲不駁運夫所利於漕艘者利其直達也今不常用無數小舟自水次零星駁送抵通其駁送仍責舟於沿途甚至攔江索錢奪船毀器患苦商民抗違官長倚天庾爲口實援漕督爲護符文武吏士莫能彈壓不知漕艘亦何效於 國家而相顧咨嗟莫敢議去今行轉般之法一艘之費可得數十駁船一丁之費可供數十百夫一衙職之費足資文武官數員夫何憚而不爲或曰漕艘之受多駁船之受少未免終年僕僕是固然也然船多則不嫌其受少官有番休則雖勤而弗病奚患焉又況義糧巨額橫截

中流習慣承平第見其便設遇倉猝勢如連雞有可虞而無可恃今其不戒於火者往往一時俱燼豈非明驗乎受少則損失亦少受多則覆溺亦多吾未見龍驤萬斛之勝於蚱蜢者也然則如之何而去之曰以漸去之此時草創駁船未具姑藉其舟就近浮送嗣後應修者勿修而變其直以半酌丁官收其半以造駁船不過數年漕艘漸少駁船漸多久之漕船盡而吾船具矣

二曰建倉唐宋置倉各就所都道里遠近疎密不等今天津有倉獨臨清有倉獨臨清以南尙未建造中間層遞摺運郵程較遠宜擇河北寬平之地或濟寧台莊或別就有城郭有漕員駐劄之處更添設清江浦已設駁船然地當清黃交會不無水患未便置倉唐宋皆置倉真州今或仿其意就沿江瓜儀一帶設之近年清水泛溢五壩時開誠恐淮揚溜急江廣巨艦派流匪易置之瓜儀附近一以連江廣之回空一以便江浙之關賑

三曰造撥船江廣幫船由長江而下風帆甚利或姑可仍舊其餘置倉之處卽爲增船之處船製以及歲修年限各隨其地略用劉晏河船不入汴汴船不入渭之意往來層折遞受其船人亦各就所在募充前此漕艘水工僱之沿路皆饑寒窮困之徒爲盜賊逋逃之藪或慮漕艘不至流離無著激其爲變此又似是而非也有倉之處需人矣有船之處又需人矣猶是役也猶是途也食力者何之不可而況昔之漕艘過境僅在一時今之駁船來往轉須卒歲漕艘之所僱者暫州縣之所役者常彼其去短工而就常役較前爲樂至於盜賊逋逃則僱之旗丁者莫紀繇來役之州縣者必存名籍而又何亂之能爲哉

四曰判職掌置倉所在文武分職以典其凡役事遺滿漢科道二人莅之其體制略如巡漕汎舟之役文武分頭幹當科道必躬自檢察二人更番一人出則一人歸出者治運事部勒其程期於米之必去歸者治倉事旬稽其數導其米之過來呼吸相應首尾聯絡其下往來趨事需員孔多文職自同知武職自都司以下悉聽調發有不如指許以柱後惠文從事獨不得調府州縣印官所遣科道依督學例督撫密陳其賢否督撫有闕失亦得糾舉之三年代還錄其下幹當各官勤惰以上於吏兵二部黜陟登下之

五曰優俸稽文武吏以若府吏胥徒身家所託在於官中吾不有與之彼必有取之勢所固然而非必其人之不肖也劉晏造轉運船每一船破錢千貫實費不及五百貫或問之晏曰大國不可以小道理船場既興執事者非一必有餘剩養活衆人私用不窘則官物牢固乃於揚子縣置十船塢差專知官十人不數年皆致富贖公私兼利其後吳堯卿爲揚子縣官始勘會物料實數估給專主官十家卽時凍餒而船塢敗壞饋運莫繼今欲寬其官程恤其私計勢必萬萬不能何也假而建倉則建倉之費必咨部而部曰核實假而造船則造船之費必咨部而部又曰核實核實云者部臣又不得而主之也書辦曰可部臣莫敢曰不可書辦曰不可部臣莫敢曰可由是而若者核減若者核銷亦悉取部費而已矣州縣百方欺隱而外有上房內有部辦鹽其腦而食之往往在承欺隱之名却受賠償之實又安望餘剩顧及身家也哉我國家養廉之制原爲杜欺欺聽其隱取之不若明與之也然今之得有養廉者誰乎非惟無得而已其捐廉項下每歲追呼少或數倍多或數十倍然則陰取之者隱奪之明與

之者又明奪之官吏將不爲惡而何爲焉竊願當事者尋劉晏之餘聞感東坡之種論嚴其爲惡之禁必寬其爲善之資各按所職高下劇易爲之差次其等官則豐其燕好之頒役亦優其代耕之祿務從寬大規其久遠焉

於是則衛籍可除矣旗丁亦民耳號之爲軍在明初有屯田以贖其身家有番代以均其勞逸教之弓矢坐作以寓兵於饋饌之中良法美意皆曠之矣徒存此不農不賈之民領之於非文非武之官以爲軍冗軍也以爲民游民也奚愛而勿去也誠使轉般法行舉其籍而削之便或曰旗丁有身家故責之漕事去之又使何人應募不幸賠補將奚取諸此正不然旗丁之有身家者固未嘗出運也其出運皆奸猾耳去之又何人不可應募今各省委員之採辦其亦藉力於旗丁耶惟其責賠於丁丁主之而官無權官爲虛設矣責賠於官則官任之而官自出其精神矣或曰旗丁託業於是幾百年矣不願去奈何曰無不願其富貴者以軍籍爲恥其貧賤者以軍籍爲累一旦脫籍方且幸甚惟一二奸猾則託業焉爲彼固非託業於丁乃託業於凶橫也爲政者豈有聽民以凶橫自業者乎誠令凶橫者失業而富貴貧賤各適其常豈不快哉或曰屯田在丁久矣將歸其田乎不歸其田乎曰七省之屯田多寡不同風土亦異各就所在區處田有可歸歸之不可歸或量徵所入或別與他徭或卽用此田之人供我轉般之用不必因是以求益於國也要之丁籍去而所省已不貲矣

於是則衛官可裁矣衛守備衛千總猶之營守備營千總也今以不堪營用者昇之衛職其人自知升進無增聊復蝨於其間寄衣食焉徵糧理訟小分州縣之權裘帶肩輿略無騎射之責隸之糧道而糧

道相懸數百里也帥之漕督而漕督相懸數千里也不得已仍屬之所在知府而知府究以武職外之平時既無考核出運又藉饋營其強者與奸丁爲狼狽其弱者爲丁衆所欺凌所謂尖丁者輒倒持其柄而進退之天下冗官無過於省其職而併之州縣便

於是而漕督可省矣漕務綿亙七省漕督一人僅駐一處呼應既有不靈稽查亦所難遍居恆坐嘯雖賢者無由自異及其出運鞭長莫及故又佐之以巡漕名爲漕所總匯其實下無不由於州縣上無不歸於督撫漕之誤與不誤仍在督撫州縣總漕無能爲也督撫州縣皆非誤漕之人總漕一官設可也不設可也蓋漕督位尊閼絕衛官衛丁聽命於其衙門書辦凡衛官之出運非賂莫得也衛丁受兌之水次非賂莫得也衛官衛丁必先丐貸以得之而後取償於州縣所出之幫費半入於衛丁半分於書辦而且衛官衛丁得之勞書辦得之逸矣夫多一總漕無裨於漕猶無損於漕多一總漕之衙門非惟無裨又有大害皆此類也漕軍國重事固宜有兵將護明制所爲設立衛官衛丁也衛官皆守備千總奚爲而不教練衛丁皆軍籍奚爲而不習藝今以其人輒落弛懸又更設漕標之兵是重疊也總漕既省分其軍於建倉處所翊衛倉儲庶幾乎

於是而災賑可備也唐宋轉般之法歲歉則請停所運三之一或三之二於災荒處所減價糶之又於豐熟處所中價收之以還運額或米貴則令民折納穀賤則以其錢糶米還倉其事亦猶今之截漕也而國民兩利設有倉猝意外就近讓軍馬力省而濟用亦速

於是而懋遷可兼也京師百物仰給漕艘之夾帶其過關也憑凌關吏莫可誰何其過境也苛役州縣

代為起駁沿路包攬亦沿路脫卸故其夾帶之貨多於額裝之米今漕艘既不抵通誠恐九衢市價騰踊然唐之轉般粟帛兼運且有輕貨之齋宋六路上供東南茶布亦在其間或官為置本而收其息或聽商搭載而稅其舟然稅於舟者勿更稅於關前此漕艘水工例帶私貨今亦勿禁如此亦何患其不奔轉而闖溢矣 淵雅堂集

包世臣答桂蘇州書去年仲冬世臣備言吳中漕事之難官民與丁俱有萬下不去之勢蓋賦重之區民力本微又數十年無此賤米數百年無此貴銀漕運者米而費用皆銀不寬民力則伐 國本然不寬官力無以寬民不寬丁力無以寬官是必通盤籌畫一無窒礙而後可也且漕期甚迫澈底查明往返札商時無以及事故世臣但勸閣下稍緩抵任之期使視事在開漕後則可變被為中凡告漕止告縣而府實為被首或者上可進言下可導諭及閣下以季冬二日受篆次日開漕而常熟滋事大府與以重懲旋探用鴻議委員督辦寬民力以散其黨繼以昭文大府志平眾怒不加深究而所寬僅在常邑同城環觀焉得不生觖望惟漕棍畏威遠罪小民不及聚議是以暫得歲事轉瞬新漕不可不及閒暇預為之地松太兩屬以木棉入優稍勝蘇屬近來洋布盛行價止梭布三之一梭布市必減滯去年木棉客無不折閱年復一年亦斷難堪此駭削矣月前有自淮來者馳述漕帥新政委員之數既少又嚴禁需索以寬丁力此真足令人聞聲起舞也閣下婉白大府以漕帥之赤心為 國大府函囑其沿途細察各丁費用及抵通一切核明可省及必不能減者分別纖悉以各人皆得下去而不興大獄為度督撫漕三院並力以要倉帥必可見諸實事則丁力寬而官力亦寬官之稍解事者必可仰體德意以大寬民力民力寬則棍徒無

助不得不從官令以與小戶均戶均之法定則官可舉其職而棍徒無以持其長短是人心風俗一轉移之大關鍵也原漕弊之始官以民爲魚肉故罷任爪牙大戶不甘魚肉而非爪牙之所能箝制不得不輸漕規小民欣羨大戶不得不詭寄大戶大戶反得與爪牙比以噬小民漕艘泊在倉前習見官之噬民不得不誅求於官而通倉及沿途漕委知丁之訛索州縣甚優亦從而噬丁爪牙又密比尖丁多方恫喝歲增兌費以朋分其利此所以從前官以漕爲樂國而近反視爲畏途也洞悉弊源乃可披隙導窾以爲補救然必心誠於寬民始克有濟道光七年陶文毅爲四五六之奏似亦和盤託出然其意主於尅丁以寬官又不爲丁籌出路而絕無意及於寬民是以奏定之後竟未舉行少穆繼之兩次奏與丁爭而不勝大縣反增費歲以萬計皆由不知政本在安民之故也竊則變變則通漕事至今可謂窮矣得閣下不分畛域以廣宣大府之新政吾望其有慰乎安吳四種

孫鼎臣論漕曰海運之法善矣然至今日而情形又異運河道壞各衛軍船不可復漕之出於海無疑也然京倉待米甚急而江廣改折江浙又時奏請截留餉軍海運之米不及額不足共京師俸餉之用部庫缺銀招商採買又不能行是亦有法以處此乎曰仿明初之開中於邊以鹽法濟漕運不獨漕治而鹽亦治余觀前代權鹽之法莫善於劉晏其次則明太祖之開中開中之法壞於葉淇然亦因其行之久而敝也故淇售其術開中之善在以厚利予商故用東南之鹽實西北之儲而商不以遠爲難後人不知此意分開中爲常股存積存積價高而得鹽速商不得不中存積而常股守至老死不能支商病而鹽亦敝是司計者變法罔民之咎非其法之過也頃歲以來江南沙船履重洋如平地南北百貨由此往來故召商

漕米而易以鹽其法可行也設大臣總理鹽漕駐上海通計兩淮兩浙各場產鹽之數上戶部戶部頒引於總理衙門募商人自運米予執照赴天津倉場總督驗收後行文並執照移咨總理衙門駁銷總理衙門給引赴場支鹽聽執引隨地行銷所過關津所至州縣驗引截角如舊法定以米易鹽之則道光五年採買奉天米每石脚價計銀二兩四錢有奇二十六年招商赴津米每石價銀二兩而舊制准鹽每引課銀八錢三分及一兩一錢七分酌中定價約米一石給鹽二引歲款米貴隨時酌增秋成後先期奏請敕部定價要使商獲厚利以勸來者明初開中粟二斗五升準銀八分而給鹽一引卽此意也定行鹽之地兩淮引地如江西湖北湖南等省以淮鹽罕至雜食川粵浙鹽隨地置卡抽稅官引既行當一切罷之商人行鹽但毋許侵越他省不必多分引界使彼此可到以杜居奇而廣疏銷定引鹽之法偽造引者斬引與鹽離以私鹽論售鹽後卽所在官司繳引申總理衙門查銷報部其他影射之禁夾帶之禁皆有成法責總理督場官各舉其職定收米給鹽之法倉場總督驗照收米船隨到米隨收禁毋藉米色留難驗收後分案備文具册移照總理米隨收文隨出嚴爲之限禁毋稽延時日總理衙門予照給引鹽場驗掣禁毋婪索如是而法略具矣兩淮兩浙鹽課歲額六百三十餘萬江浙江廣歲漕三百餘萬以米每石準銀二兩核之略可相當於國家經入無失而商人以米一石得鹽二引以現行米鹽之價計之自運脚及他費外爲利尙優漕額之缺也久矣鹽利之失也亦久矣此法行鹽額可以徐復其舊一也 天庾可以漸充二也海運之費省三也南漕不徵本色改折輕實以實部庫四也酌減折漕之價以紓民困五也詳處之於事始而謹守之於其終庶而明常股存積之弊毋見利變法以困商一舉而鹽與漕兼治亦數

十百之利也然倉場之收米官司之給照給引場吏之監掣其弊不能盡去而商人之影射夾帶不能盡絕緝私之法不能盡廢欲謀遠大而計久長則必就場起稅然後化天下私鹽爲官鹽必開西北水利然後可罷東南之飛輓雖有聖人不能易斯言矣

漕運之法變運軍之費去橫徵之弊可絕而民因其自是蘇乎未也橫徵與否不繫兌費之有無也蓋漕政之弊久而彌厲運軍之免費遞增取之州縣之吏州縣之吏取之於民固相因之勢也然使吏之多取實以免費之故雖倍蓰而民猶將諒之而吏之所以自奉與所以奉其上官者無不出於其中其役於官者又仰之以爲食民一而已 國賦其一運軍賦其一吏又賦其一 朝廷無加賦之條而民被加賦之實也不可悲哉米之有耗江蘇正兌加四二五之耗歸倉一五之耗給丁改兌加三一七之耗歸倉一三之耗給丁浙江正兌與江蘇同改兌亦加四一七之耗歸倉二三之耗給丁此定制也而耗日增而無已是爲浮收然第責其米猶民之所自有也浮收濟之以勒折而民不堪命矣 國家之所需者米而吏之所徵者銀減價以糶米而增價以市銀銀益貴米益賤民之出納艱而吏之出納愈便以善化而論米一石折徵銀五兩計今日之米糶十而輸一江浙之州縣蓋又甚焉定制十月而倉開十二月而畢事今之開倉具文也民聞倉開運米至而倉輒閉漕車漕總羈而苦之折閱以償之外挽運有費胥役有費守候有費故民甘折色而憚運米異時之折出於勒今則擾之如羣羊不待痛而自服矣天下之事起於相激吏之虐民無所復入民不得不起而與抗而吏轉爲民所持貪狡之徒因其隙而攻之爲包攬爲許訟以求得所欲吏不勝其患乃借上官之力制之吏務求勝其民而民無所控訴其怨毒益深而不可解弱

者謗強者畔矣議者不深惟其故以爲其原出於免費之重漕法不能變則浮收勒折勢不得禁不得已而爲限制之說嘉慶末阿霖保蔣攸銛陳州縣免費之苦謂莫若定制許八折徵收逾制者罪 仁宗允之已而仍寢其命 宣宗初卽位首命革漕弊諸臣復申前請甫一年江蘇學政姚文田疏稱八折僅屬空言備論徵收之害御史王家相亦言事類加賦必不可行夫八折徵漕之意豈不謂陰取之多不如明爲之限而不知其益也雍正間鄂爾泰議一石收漕費銀六分毋許私增升合言者謂往者三分而止今益爲六分非制彭維新遂議一石準折爲九斗升繼善以爲避六七分之名收八九分之實必不可嗟乎準折九斗在當時苦其浮豈知其後求八折而不可得哉夫人之欲無涯非法所得而限也因與之其欲彌廣而徒藉人以口實此 仁宗 宣宗之所以毅然持之而不許也夫有識之士憫黎元之困以爲免費去則橫徵自息於是務求變漕法此知其一而未知其二也道光中行海運運軍之免費無有也當時吏之取於民者何如乎漕有運軍故有免費地丁錢糧亦嘗有運軍之免費乎吏之徵地丁又何如也吾故曰橫徵與否不繫免費之有無也亦視吏之貪廉而已雖然數十年來浮收勒折之害已徹 上聽而禁罔視前少緩故雖時時 嚴旨申戒而虛文置之不復以爲忌一歲中直省大吏所劾治以應詔書者不數見至於激民爲變乃假他事去之甚者糾舉以聞又不頌言其罪大吏視州縣之吏其但浮收勒折者猶爲奉公循法之人常曲諒而姑寬之雖有廉者出於其間亦以爲義取而安然受之不爲怪於乎吏貪而橫徵猶可言也至吏之廉者而亦不免蚩蚩之恥更何望哉余嘗議廢銀而用穀帛徐復古民賦之制今司農度支孔急以鹽漕漕之策行東南額漕不徵本色勢不得不改折輕資解京然亦宜詳

皇朝政典類纂卷五十一

漕運四

漕制禁令 按此專指載運而言至收漕禁令詳見田賦徵收事例門

一州縣旗丁兌收漕米以通關米結爲重未經受兌以前責在州縣既兌以後責在弁丁至漕船到淮盤驗米石江蘇安徽浙江三省距淮較近如查驗通幫米色俱好其中有一二船不能純淨責令弁丁將食米易換仍治以應得之罪與州縣無涉如各船之米均多灰暗潮雜霉變由總漕駁回將巡撫督徵經監兌各員奏明議處其駁回之米巡撫分賠一成糧道分賠一成監兌及領運各官分賠二成州縣分賠三成旗丁分賠三成到通盤驗米石霉變由倉場駁回將總漕押運領運各員奏明議處其駁回之米總漕分賠一成糧道分賠二成押運同知通判及領運千總分賠三成旗丁分賠四成勒限一年賠交本色補運其江西湖廣距淮較遠盤驗時如有霉變應由本省巡撫照舊分別受兌以前受兌以後辦理

一各省正耗漕糧及贈耗行月各米監兌官逐一驗明交兌官丁不許私折顆粒兌糧完日監兌官同州縣出具並無折乾扶同情弊印結申報開行時糧道親行查驗出結報部倘有州縣串通弁丁私自折給監兌等官徇隱不究漕運總督一併查明核參

一糧艘過淮總漕眼同弁丁逐船比對倘有攙雜低潮如江蘇浙江二省係監兌之員押運卽將監兌押領各員弁同經營各員一併嚴參議處仍將米石著落各該員分別立限追賠其安徽江西湖廣等省監兌官不押運赴淮只有糧道並押領各廳弁督率照料倘查有原兌本係好米中途不勤加風瞭甚或舞弊攙和

皆非監兌官所能查察止將在幫各員參處追賠至過淮驗明以後本屬好米抵通交倉或有霉暗者則係弁丁等中途不勤加風瞭所至即將押領員弁參處並將不堪米石著落追賠

一漕船艙底用蔴席鋪墊於過淮時總漕查驗取結存案如查有石灰鋪墊者無論米色曾否潮濕卽將該旗丁從重治罪該管官一併議處

一重運北上時宿遷營遊擊委駐白洋河徐州協副將委駐韓莊八開漕船提溜打開有弁兵串同人夫勒索旗丁借出工價者該員約束禁止如縱容徇庇一併參處

一空重糧船不准私載硝磺並擬載商茶偷漏關稅各該督撫令地方官弁分路嚴緝如查出私販者照私鹽例究治押運官弁亦照失察私鹽例議處

一重運回空糧船每船准帶食鹽肆拾觔遇查鹽員弁將例帶食鹽擺列船頭聽候秤驗如每船多餘止貳三觔者入官變價充公不得以私鹽混報凡經過產鹽地方文武官弁晝夜催儂不許逗遛並嚴拏旗丁私行販賣過淮船隻專聽兩江總督鹽政委員在揚州鹽廳搜查不過淮之徐州衛江北幫輪兌徐州漕糧之長淮衛三四兩幫鳳中三幫宿州衛頭二兩幫回空糧船大河衛守備搜查不過淮在夏鎮皂河等處受兌之淮安衛三幫回空糧船濟寧衛守備搜查糧船一到隨卽秤驗查畢卽行開行查出夾帶私鹽除運官降級調用外至沿途州縣文武查係產鹽地方專司稽查者一併查參

一各省漕船如有舵工人等包攬運務虧缺米石累及眾丁代完者令領運千總據實報明將包攬之人審

實發遣

一漕運諸弊於瓜洲開口儀徵江口淮安之盤糧廳濟寧臨清天津通州各口刊刻木榜永遠禁止該管官不時查察如有干犯題參究處以上並戶部則例

順治十二年題准衛軍水次承運有衛官隨幫官常例書識管家抽豐名色州縣官知府同知通判及糧道漕院各衙門吏胥班役勒索陋規並過淮攤派使費沿途需索土儀及抵通過壩交倉船規常例倉場坐糧廳書吏苛索使費飭令各該衙門盡行禁革在外責成總漕總河各該督撫在內責成倉場侍郎巡倉科道協同釐剔備有前項弊端立即題參究處以肅漕政會典事例

康熙元年諭漕船經由漕河領運官軍依限抵通回空方為盡職無罪乃有奸頑官役不守法多有夾帶私販貨物隱藏犯法人口倚勢恃力行兇害人借名阻礙河道毆打平人託言搜尋失物搶劫民船且有盜賣漕糧中途故致船壞以圖貽害地方種種姦惡督漕各官並該地方官一有見聞即行參奏務將官員嚴提治以重罪若知而徇隱不奏亦從重治罪通考

二年奏准運船交兌之初專責糧道曉諭商牙禁約運軍不許夾帶私貨漕糧兌畢未開之先專責監兌官逐船搜檢糧道隨取監兌官查明並無夾帶甘結送總漕總河倉場侍郎三處稽考如有犯者拿解糧道呈報總漕題參照律治罪會典事例

雍正元年議准漕糧交兌之時監兌官驗明實米足額面同州縣官交兌漕船如有專覓巧手製斛飛筭走騰等弊即嚴拿治罪如運軍額外勒索亦嚴拿治罪監兌領運官并不約束者總漕題參會典事例

二年諭朕惟漕運關係甚大經費本無不敷運軍恣行不法皆由官弁剝削所致如開兌之時糧道發給錢糧

任意扣剋運軍所得十止八九而僉軍之都司監兌之通判又多誅求及至開行沿途武弁借催趨爲名百計需索又過淮盤查私貨徒滋擾累究屬無益運軍浮費既多力不能支因而盜賣漕糧偷竊爲非無所不至矣嗣後各省糧道給發錢糧不許剋扣分釐沿途武弁不許借端需索運軍除包攬抗違外所帶些須貨物亦無容苛刻盤查爾部行文各督撫不時稽察如有仍前需索等弊立即指參從重治罪會典事例

三年諭大學士等天庾積粟漕運最爲緊要而通商裕國關稅亦應留心朕上年因恐糧船遲滯曾有旨船至大江不可攔阻搜查致生事端有誤漕運今聞各糧船有於兌糧起運之後卽多包攬貨物及回空時又多夾帶私鹽此皆由經過馬頭處所停留裝卸而地方官不行嚴查之故也夫窮丁裝帶些微貨物情尚可恕至私鹽乃大干法紀之事況斷無沿途零買零賣之理必有一定地方其裝卸亦必非俄頃可辦必須二三日工夫若該地方官果實力稽查自然弊絕其如何稽查如何勸懲必使裕課通漕兩得其宜並行不悖著總漕張大有安徽巡撫李成龍會同虛公詳議具奏又聞糧船中有帶火砲鳥槍火藥者伊等皆係合幫結隊而行不畏盜賊火砲爲鎗安所用之著通行嚴禁該管地方官并若虛應故事陽奉陰違一經察出決不輕貸雍正內閣

上諭

七年諭朕聞各省糧船過淮抵通之時該管衙門官吏胥役人等額外需索陋規以致繁費甚多運丁重受其累特命御史前往稽查禁革苛索等弊又查向來之例每船北上許帶土宜六十石朕思旗丁運駕辛苦若就糧艘之便順帶貨物至京貿易以藉利益亦情理可行之事著於舊例六十石之外加增四十石准每船攜帶土宜一百石永著爲例惟是運丁人等繁多素有惡習如偷盜米石掛欠官糧夾帶私貨藐視法紀此向來之

通弊也又如昔年浙江湖廣二省糧船因私忿小怨遂致操刃持戈殺傷多命又從前偶值回空守凍遂致縱容水手公然搶奪擾害居民此皆衆所共知者是以數年以來內外臣工條奏旗丁不法者不下數百紙前又有奏稱販賣私鹽之弊在糧船爲尤甚有一種積梟巨棍名爲風客慣與糧船串通搭載貨物運至淮揚託與本地奸徒令其賣貨買鹽預屯水次待至回空之時一路裝載其所售之價則風客與丁枕水手三七朋分糧船貪風客之餘利風客恃糧船爲護符於是累萬盈千直達江廣私販日多而官引日滯等語觀此則旗丁之作奸犯科誠難以悉數也朕年來屢飭該管官嚴行禁約又復念其勞苦疊沛恩膏近見伊等之惡習刁風亦漸悛改是以特頒諭旨嚴禁過淮抵通苛索之陋規復令增添攜帶土宜俾得多沾餘潤以贖家口伊等益當感戴朕恩遵守法度共爲良善以免罪愆著總督倉場侍郎漕運總督將朕此旨通行刊布每船各給一張使運丁人等觸目警心以副朕體恤訓誨之至意雍正內閣 上諭

乾隆四年奏准各省受兌開兌之時令總漕密加察訪如押運官弁以及糧道等衙門吏役有科斂陋規幫規之弊卽嚴參究處並飭該管官不時嚴查有陽奉陰違者將與受之官軍等照例詳揭備該管官徇隱不揭報一併題參會典事例

六年奏准糧道催米催船督押運船凡差役滋擾之弊定例皆經禁革惟豫省提幫出運時先發一牌繼差一役至衛提催不無滋擾嗣後嚴行禁革並飭各省一例遵行會典事例

二十四年諭聞各省糧艘北上每遇過關過壩及急流淺阻必需人力挽拽者沿河兵丁頗有把持包雇之弊不獨旗丁深爲苦累而重運濡滯未必不由於此著傳諭漕河各督臣嚴行查禁嗣後雇募絳夫應聽運弁自

爲酌辦如有兵丁藉端抑勒以老弱充數而橫索雇值者卽時擊究並將失察之該管將弁題參議處通考
嘉慶十三年諭內閣據天津巡漕給事中茅豫奏該巡漕駐劄天津每日需用飯食等項向係該縣供應請旨
永遠禁止等語所奏甚是地方官供應差使其弊多端雖日用有限而辦差長隨等卽可從中勾結任意開銷
所費不貲大爲地方之累且巡漕駐劄日久供應既繁用項無出該縣勢必藉端勒派所有此項供應著卽永
遠禁止 聖訓

十四年諭內閣御史李鴻賓奏臚陳南漕各弊請飭有漕各省督撫實力剔除一摺近來各京倉存貯米石間
有潮溼霉損難於支放雖由收貯不加詳慎而其弊源總由南省有漕各州縣及旗丁等於收兌時相率舞弊
遂致運通米石一經入倉卽有微變等事試思糧運爲天庾正供國家年來爲河務修防動費帑金數百萬以
通運道且漕項需費繁多計南來運米一石所費不下數十金豈可在米質低潮徒多耗棄自應釐剔積習以
清弊源現據該御史奏稱江西有漕各縣倉廩多設省城該縣並不將所收米石解省祇令積慣包漕之家
攜銀赴省向米舖賤價購買低潮米石攪水和糠無所不有各幫頭伍丁又從而勾串該家人等通同舞弊
慮及衆丁不肯受兌遂私議每石貼給旗丁銀三五錢不等名曰倉廩使費其實大半爲丁吞蝕懦丁不過
得其一二遂至隱忍受兌迫潮米入船日久勢不免於蒸溼霉損抵通後慮難交卸頭伍丁丁復賄商坐糧廳
經胥人等折價回漕無弊不作至重空運弁苦累旗丁則有演戲設席斂取分金等事頭伍丁丁又復從中冒
濫開銷藉端勒派扣去應領水脚銀兩或至百餘金不等名曰各衙門使費甚至粒船行抵內河提溜打關刁
丁復勾通運弁漕標批單勒取每大關向不過需錢二三千文者今每船用至二十餘千之多所奏情形均屬

切中時弊江西如此恐他省亦復不免著有漕省分各督撫嚴飭各種道將包辦倉厥私賄受兌及運弁刁丁等苛斂勒派疲苦冢丁各積弊認真釐剔務令各州縣旗丁徵收受兌米石俱一律以乾圓潔淨爲準庶運通交納及收貯倉厥不復至有潮爛等事各督撫惟當實力奉行不可視爲具文致干重戾 聖訓

又諭內閣據天津巡漕御史吳榮光奏請嚴禁盜賣漕糧一摺南糧爲天庾正供顆粒皆宜慎重豈容旗丁盜賣致滋虧短現當嚴剔漕儲積弊之際儻有盜賣情弊則交卸時勢必攙灰和水無所不至以致米石虧缺儻壞自應嚴加釐剔除南漕所轄地方米價較賤或該丁等尙無盜賣情事其山東天津通州糧艘經過及停泊地方著各該巡漕御史實力稽查毋任運丁等致有盜賣米石之事以清積弊毋存畏難之鄙貝毋存消弭之惡習各矢天良儘力追究據實具奏至該御史又稱南糧抵通未經起卸之先每幫有驗費有窩子錢起卸之時除例定箇兒錢外復有後手錢每幫每項約需制錢一百千及數十千文不等皆由幫丁湊斂交坐糧廳號房書役及經紀得受等語糧米抵通交卸該書役經紀等往往向旗丁等索得陋規遂至無弊不作祇知營私肥己罔顧倉儲正供近來查出各倉米石多有黴爛及虧短情事總由積弊未清遂至蠹害叢集著倉場侍郎於今年新糧抵通時設法嚴密稽查將從前索取陋規種種各情弊一律剔除庶漕政可就肅清 聖訓

又諭內閣朕恭閱 世宗憲皇帝實錄內載雍正二年五月欽奉 諭旨朕惟漕運關係甚大經費本無不敷而運丁恣行不法者皆由官弁剝削所致如開兌之時糧道發給錢糧任意剋扣而簽丁之都司監兌之通判又多誅求及至啟行沿途武弁借催糧爲名百計需索又過淮盤查私貨徒滋擾累運丁力不能支因而盜賣漕糧偷竊爲匪嗣後各督撫不時查察如有仍前需索等弊立即指參從重治罪庶運丁漸有起色保守身家

稟遵約束禁官吏之侵削卽所以戢旗丁之刁悍等因欽此 聖訓煌煌尋源探本可見當日漕運之弊與目前情形正同而所以整飭而釐剔之者數十年以後之措施早垂 成憲近日有漕省分諸督撫指陳漕弊無非稱旗丁等提溜打關等項費用繁多其所謂設法調劑者無非多給免費殊不知弊端之大費用之廣總由糧道之剋扣於先弁員之需索於後至提溜打關等項未嘗不稍有所費而丁力之不足實在此不在彼也旗丁等花費既多復隱有自肥之計一遇交兌之際藉端訛索毫無忌憚甚且沿途盜賣米石而州縣官既爲旗丁所苦復藉旗丁爲名當徵收之時多方浮折其實在受累者惟花戶而已是則恤民之道全在恤丁而裁弊之源必須裁費前經屢降諭旨將各衙門需索款項並糧道剋扣舊習一切禁革淨盡仍交該督撫嚴查密訪若再有隱瞞前轍者務當據實糾參從重治罪使旗丁刁悍之習不戢自除州縣苛斂之風不禁自止漕運庶日有起色也 聖訓

道光二年諭軍機大臣等李鴻賓覆奏訪查幫船積蠹覈減船場費用嚴禁陋規需索一摺漕船過廬起剋不無需費而尖丁積蠹之勒索免費剋扣散丁因得有所藉口該漕督將船場著名刁橫夫頭盡行革逐並酌定關纜人夫需費刊刻木榜通行曉諭俾衆共知所辦甚好其一切陋規使費雖經嚴行禁革恐不肯官丁吏役日久玩生該漕督總當身先倡率慎終始隨時認真查辦毋得日久視爲具文勉副委任至幫丁積蠹既有常德廣馬回子著名刁橫常德廣是否卽係其德光抑或另有昔充伍丁今已退出之常德廣並馬回子究係何名務卽訪查明確嚴拿懲辦此外如有把持盤剋之尖丁亦卽一併拏究以肅漕政 聖訓

八年諭內閣御史奇成額奏請廢禁蠹役以肅漕務一摺漕糧爲天庾正供向來承辦各衙門俱有一定章程

豈容奸胥蠹役肆行弊混若如該御史所奏糧船抵通時倉中兵丁書役及倉場侍郎坐糧廳各衙門在官人役輒向旗丁需索使費兌米時又以給費之多寡爲遷船之後先旗丁等所費既鉅勢不得不勒索州縣州縣無所取給亦卽浮收升斗以供兌費是州縣腴削民膏祇以供運丁之悉索運丁之勒措僅以飽倉中蠹役之私囊種種積弊相沿實情事之所必有且近日倉中吏役經紀竟多至數百人朋比爲奸坐享厚利若不及早釐剔其流弊伊於胡底著倉場侍郎各衙門嚴查在官書役等定額足數辦公其餘悉皆裁汰毋使冒濫滋弊其糧船抵通收兌時務須嚴加管束如稍滋事端卽行從重懲辦以除積蠹庶旗丁州縣均無所藉口儻仍蹈前轍著有漕省分各督撫隨時嚴參究辦以肅漕政而惠民生

聖訓

十二年諭內閣御史鮑文瀄奏請汰漕委冗員嚴禁需索一摺漕督衙門設立委員原爲催趲船行發盤米色乃日久弊生幫丁困於漕署之陋規需索於州縣州縣累於幫丁之加費浮取於閭閻近來幫丁領運往往藉漕署規費名目於酌給津貼外勒索幫費船數較多費盈鉅萬以致州縣兌漕時非令書吏借貸卽截串預徵地丁甚至藉口彌補或折色增價或斛收加倍民間所納糧石一經官算輒形不足藉漕尾之名肆追呼之擾是州縣因幫丁之需索不得不取償於百姓而百姓之陰受其害者不可勝言至漕船過淮盤驗標弁委員及書役長隨人等皆有陋規盤驗徒有虛名規費則爲實害甚或藉名催趲營求派差紛駐河干皆視糧艘爲利藪積習相沿該漕督不過以此爲調劑屬員之方不知漕委多用一人卽多一人之需索於漕務民生均有關係該漕督破除情面認真查察無得被人朦蔽遷就了事務使盤驗各項積弊一律肅清其標弁委員除酌留定數以資差委外餘俱概行裁汰儻仍意存見好調劑閒員不思塞弊源而蘇丁困別經發覺惟該漕督是

問並著有漕各省分督撫轉飭糧道嚴禁幫丁需索州縣浮收如不能實力奉行仍滋擾累著卽嚴行奏參毋稍寬貸

聖訓

十三年諭給事中金應麟奏漕船訛詐滯運累商一摺據稱江浙內河一帶長互七百餘里每年漕船歸次之後凡商民船隻經過小則訛詐錢文大則肆行搶奪其訛詐之法或將漕船橫截河中往來船隻非給錢不能放行名曰買渡錢或擇河道淺窄之處兩船直長並泊使南北船隻俱不能行必積至千百號之多阻滯至三四日之久有沿河地棍名曰河快向各船科斂錢文給付漕船令其抽單分泊以便各船行走名曰排幫錢迨至受兌開行又另以捉船撥米爲名如遇重載商船該水手用糧米一石傾入艙內非給費不能前行否則加以搶糧名目人船並鎖藉稱送官究治卽可得錢設遇無貨船隻卽留爲分載私貨之用並須送至清江交卸始得放回並有預結數人故與商船等露不法水手從旁搶奪船戶稍爲理論卽擲藥水中毫無顧忌商民以州縣不肯查拏未敢上控州縣以兌米畏其挑斥置若罔聞其訛詐之處如嘉興府東門外之宣公橋蘇州府胥門外之虎街澹墅關之市河常州府之東西兩埠鎮江府丹陽縣之市河丹徒縣之月河開猪婆灘都天廟大關口等處最爲受累地方其所訛錢文每幫均有總頭收掌除彙總分派各船之外領運員弁之家丁差役人等多有分肥等語江浙兩省漕船較他省爲多水手之強悍亦較別幫爲甚若如該給事中所奏漕船水手沿途訛詐擾累商民種種不法情弊必致遲誤重運爲害地方不可不嚴行懲辦著林則徐富呢揚阿嚴飭所屬於內河地方凡漕船停泊經行之處訪查積弊嚴行申禁如仍有前項弊端卽責成地方官隨時懲辦其徇縱之運弁立予參革以肅漕政而除民累

東華續錄

十四年諭內閣御史翔鳳等奏請查禁漕務積弊一摺上年江蘇江西各幫漕船抵通交卸多有虧欠共計三萬六千餘石之多總由丁力疲累各弊叢生據該御史等奏稱州縣收漕半由折色及兌漕時令積慣包漕家人向米鋪賤價買備低潮米石恐眾丁不肯受兌勾通各幫頭伍刁丁暗中議給每石津貼銀四五錢不等刁丁吞蝕大半散給懦丁者不過十之二三懦丁因開行限促勢不自由所入者少則水次各項開銷難於敷衍不得已從而折乾或數十石或百餘石不等是受兌之時已形虧短兼之潮米入船經風暎乾米粒益小交卸之時焉得不欠又各幫領運千總每船需索陋規之外或藉言生日或婚嫁等事演戲設席斂取分金頭伍刁丁又復從中冒濫開銷格外添派扣去應領水腳銀兩竟至百餘金之多去運千總其費較少然亦不免苛派擾累又漕船行抵內河提溜打關頭伍刁丁勾串運弁及漕標員弁各關夫頭虛報人數冒開夫價批定傳單向各船勒取每大關夫價用至二十餘千之多丁力因之益疲又漕船各幫皆有走差之人因水次及沿河大小衙門有與漕事相涉者其家丁書役人等無不向幫船索取使費眾丁未能認識皆倚走差之人爲耳目其人卽沿途包攬科斂分肥大爲旗丁之蠹又漕船挽入天津或於楊村河西務一帶將米寄載撥船每軍船一隻其糧須分撥船二三隻雖經旗丁派人看管無如撐駕撥船多係無賴之徒攜妻帶子乘隙偷竊繼恐米數短少則用藥水灌漲復攙以礫土又賄商經紀朦混交卸漕米之潮雜大率由此又漕米由外河撥入裏河經過五關時而用船裝載時而用夫搬扛口袋易致破損迨至二三進時破損尤甚必須勦加縫補乃撥船一隻裝至四百餘袋祇仗代役一人旣防船戶偷漏又須縫紉口袋勢難兼顧漕糧爲天庾正供顆粒不容短少若如該御史所奏種種弊端糧石之虧旗丁之累胥由於此不可不嚴行查禁著有漕各督撫及漕運總督倉場

侍郎轉飭該管各官將以上各項弊端實力稽查認真釐剔務期於倉儲丁力兩有神益以除積弊而肅漕政

聖訓

又諭內閣前據御史許球奏請杜回漕積弊當降旨交戶部議奏茲據奏稱幫丁抵通米石無故虧短定例發南追賠限次年搭運交納原不准在通州天津買米抵補況通州天津並非產米之區其幫丁虧短米石名雖收買餘米實則影射回漕弊混所滋於畿輔糧價最有關係嗣後遇有幫船米石無故虧短著倉場侍郎照例將欠糧旗丁擊交運官發南追賠限次年搭運赴通交納毋任拖欠以杜影射而符定制至漕務法久弊生近年虧短之案層見疊出既不准留通買補恐不肖旗丁恃有無庸留通勒追之條轉得僥倖苟免於目前以致任意虧短於日後尤不可不防其漸著有漕各省督撫轉飭各該管糧道於幫船受兌時如有旗丁需索折色等弊立即擊究並嚴飭押運員弁沿途加意防範毋任稍有偷漏攪雜仍責成漕運總督於幫船過淮時認真盤驗不許顆粒短少備到通後仍有虧欠除照例發南追比勒限完交外仍將旗丁從重治罪並將總運押運各員據實嚴參以重漕儲而杜積弊

聖訓

又飭查漕運虧短積弊並申禁京城私販接濟回漕東華續錄

十六年諭內閣御史萬超奏漕糧正額不足買米回漕請覈實兌收並嚴禁私運囤積一摺漕糧為天庾正供不容稍有虧缺向來漕糧起運時由各糧道驗明米色乾潔查明額數載船起運抵通時由坐糧廳驗明米色查明額數詳明倉場侍郎查驗明確劄倉分貯立法極為周備若如該御史所奏各省漕糧開徵時各州縣不親身赴倉收漕任聽漕書積壓漕糧抵通時坐糧廳未能親至漕船卸米處所眼同撥運更有奸商自漕船回

空以後屬貧民男婦升斗肩負零運出城於于家衛以南及楊村一帶沿途僻靜村莊灑散囤積各種情弊大爲漕務之害著有漕各督撫嚴飭各州縣務須親身赴倉收漕隨到隨收以免擾累並著倉場侍郎於漕船抵壩時嚴飭坐糧廳親赴卸運處所眼同撥運以杜朦混至于家衛及楊村一帶奸商囤積著順天府府尹直隸總督各派文武幹員前往查拏有犯必懲毋得視為具文以清積弊

聖訓

十七年諭內閣御史陶士霖奏請釐剔漕船耗費一摺漕糧爲天庾正供例應嚴絕弊端以肅漕政近來耗費日多以致丁力拮据如所奏漕船沿途有總押分押及漕委督委撫委河委等官陋規餽送以及行河有量水之費湖口有放水之費淮上盤糧有兵胥比對之費通州卸米有經紀驗收之費又過壩過閘在在需索奸徒放帳被誘百端該幫丁等無計補累勢必滿攬客貨致誤程期甚且挾制州縣勒增免費該地方官因而苛取病民任意賒削種種弊竇實爲漕務之害不可不嚴行禁絕著漕運總督倉場侍郎及有漕各省督撫務當破除積習實力整頓並通飭所屬文武各官嚴密訪查儼該員弁等膽敢仗倚差委肆意貪求卽行據實參辦其胥役匪徒誘耗各端尤當隨地隨時訪拏究治無稍疏縱務使幫丁不至勒索州縣州縣亦不至賒剝閭閻庶於漕政民生兩有裨益

聖訓

二十八年諭內閣戶部奏請將潮濕米石之弊船戶各犯嚴究加等治罪等語米石潮濕用藥使水其弊不可勝言以民間終歲勤苦錙銖積累徒供此輩侵漁致使乾潔漕米化爲腐朽實堪痛恨前經倉場侍郎查出潮濕米船業將該船戶代役等分起咨送刑部著該部卽嚴行審究加等治罪此後如有潮濕米石之船並著卽行送部一律懲辦以絕弊端而慎倉儲

聖訓

又諭內閣前據蘆山奏請革除漕糧積弊一摺當交戶部議奏茲據該部逐款酌覈請飭從嚴禁革漕糧爲天庾正供然自兌運以迄驗收百弊叢生日甚一日若如該侍讀學士所奏漕船每幫均有丁頭剋扣衆丁錢糧幾及十分之七又分扣各船漕糧變價苦累衆丁甚或偷糧自給種種弊端總緣州縣浮收勒折匪徒挾制營私甚至勾串冒災任意侵蝕扣費累丁相沿成習以致節節挾制若不嚴查懲辦流弊伊於胡底著漕運總督及有漕各督撫遴選委員弁明查暗訪如有前項情弊立即嚴拿重究其總運領運各員弁儻查有收受陋規隱瞞包庇情事著一併嚴參治罪毋稍瞻徇至漕糧抵通驗收經紀需索陋規有各種名目以規費之有無定米質之高下致使攙和發漲不能久貯尤堪痛恨並著倉場侍郎嚴密稽察有犯必懲不准稍涉疏縱以肅漕政而重倉儲 聖訓

同治二年諭議政王軍機大臣等御史呂序程奏山東漕弊過重請飭密查嚴辦一摺據稱山東省各州縣兌漕時與旗丁私相授受多係本色折色兼交所交本色俱係上等粟米其折色銀外又有津貼規費等項該旗丁等收米後卽全行變賣將所收折色銀在濟寧東昌安山張秋等處買麥運至天津一帶售賣於附近之蘆臺以賤價買定劣米俟賣麥後裝運赴東交納展轉之間獲利數倍又聞各幫均有積慣辦事之人名曰走差凡赴蘆臺買米及抵通時一切使費開銷皆係其人包辦並賄串倉場經紀人等抽換米樣以免查驗不符向有米袋黏貼印花近來不過虛應故事並不緘封以致百弊叢生等語漕糧爲天庾正供該旗丁等何得肆行抵換以爲興販漁利之資實屬目無法紀各運弁職司管押何以於緘封米裝並不遵照舊章辦理致令偷換變易於漕務大有關係本年新運遲延未必不由此弊著毓祿宋晉劉長佑閻敬銘按照摺內所陳嚴密訪查

如有此等情弊卽行從嚴懲辦以肅漕政而重倉儲 聖訓

三年諭內閣御史富稼奏運河一帶兩岸住戶多於院落開掘地窖藏竊銅米比戶皆然聚衆搶糧之案正犯聞擊遠避完案復歸怙惡不悛仍爲沿河之害其慣竊銅米積匪雖經擊獲多名而竊藏之銅並未搜獲今南漕尚未抵京請預除積匪以清河運等語著鍾岱宋晉遴派員役實力搜查將竊藏一律平毀並飭各該管營汛及沿河委員節節梭巡備有棍徒夥竊及攙雜浸灌等弊卽行嚴拏從重懲辦應備各役如有與賊通氣者亦卽嚴究革懲以清積蠹而重運務 聖訓

又諭內閣倉場侍郎奏來年米數加增恐復有攙雜徽變等弊請飭先事預防等語漕糧爲天庾正供例應一體乾潔沙船受雇裝運米石卽責有攸歸豈容有攙雜徽變等弊著兩江總督江蘇巡撫於來年新漕起運時多擇江浙殷實沙船裝載備有徽變較多之船或責令賠補或將船舵人等加以懲處之處均著酌定章程辦理以重漕運 聖訓

包世臣曰漕爲天下之大政又爲官吏之利藪貪吏之誅求良民奸民之挾制貪吏始而交徵繼必交誑關係政體者甚鉅說者皆謂漕弊已極然清濫實無善策或以爲州縣一年用度取給於漕故不能不縱之浮收勒折是無漕州縣其用度又將何出乎或以爲幫丁需索兌費盈千累萬裁革此項勢必誤運州縣虧空實由於此是無漕及有漕而不起運之州縣其虧空又從何來乎凡此二說皆貪贖州縣造作言語以愚弄上司以遂其腴民肥家之私而爲之上司者或受其愚而不加省察或利其賄而爲之飾詞以致浮勒日甚也誰復肯揣本齊末廣惠集益使閭閻免漁奪之苦幫丁祛賠累之病州縣無竭蹶之虞乎

查州縣收漕有例定耗米自加一四至每石八升不等以爲脩理倉廩斗級辛食車脚津貼旗丁食米之用辦漕有餘卽留爲該州縣辦公之資是清漕本不爲州縣之累也合計各衙所其無屯田者不及十分之一多者至每船千畝少亦數百畝田隨船轉至三年小脩五年大脩十年拆造所領例價雖不敷用然逐年撥節屯田租入則津貼裕如已頭舵水手有工食家口有月糧又有輕齋月贈席靈銀頭舵又許帶土宜免稅幫丁附帶客貨每船約一二千石得受水脚豈宜復有賄累哉無如十羊九牧爲人擇官多方以耗劑之各衙有本幫千總領運足矣而漕臣每歲另委押運幫官又分爲一人押重一人押空每省有糧道齊押足矣又別委同通爲總運沿途有地方文武催趲足矣又有漕委督撫委河委自瓜洲以抵淀津不下數百員各上司明知此等差委無濟公事然不得不借幫丁之脂膏以酬屬員之奔競且爲保舉私人之地淮安盤糧漕臣親查米數而委之弁兵通州上倉倉臣親驗米色而聽之花戶兩處所費數皆不貲一總運所費二三萬金一重運所費二三千金一空運一催趲所費皆浮於千金又沿途過關開夫需索每一船一關不下千文是故幫丁專言運糧其費取給於官而有餘合計陋規賄賂雖力索州縣之兌費而尙不足也善治漕者先清屯田責成衙所督課耕芸量其所入以一半給家計一半備公需停委重空責成本幫裁派總運責成糧道悉撤催趲委員責成沿途文武裁汰開夫責成關官看守繳關開板每一幫船抵關聽其通力合作提溜更速水次則嚴禁嫖賭及隨幫收帳者盤糧廳專責漕臣而使督臣稽察之通州專責倉臣督同坐糧廳革退花戶之爲積蠹者則幫丁之辦運從容無須州縣津貼而州縣無所藉口以誅求于小民奸民不能激衆以凌辱其長吏藏富於民以培元氣以尊體統否則浮收勒折

日增一日竭民財以積衆怒東南之患終必在斯矣安吳四種

皇朝政典類纂卷五十二

漕運五

漕額正兌改兌永折 隨漕款目

正兌漕糧運京倉各省原額三百三十萬石山東二十八萬石河南二十七萬石江蘇一百一十一萬三千石
 安徽三十八萬七千石江西四十萬石浙江六十萬石湖北十有二萬二千九百四十二石七斗一升有奇湖
 南十有二萬七千五百七十七石二斗八升有奇內除永折米改徵黑豆米並節年荒缺開墾報陞不足原額外以
 嘉慶十七年計之共米二百五十六萬一千二百七十八石七斗四升有奇 改兌漕糧運通州倉各省原額
 七十萬石山東九萬五千六百石河南十有一萬石江蘇九萬三千九百五十石安徽二十萬四百五十石江
 西十有七萬石浙江三萬石湖北湖南均無改兌米內除永折米改徵黑豆米並節年荒缺開墾報陞不足原
 額外以嘉慶十七年計之共米四十二萬六千五百六十二石七斗一升有奇 白糧分運京通各倉江蘇蘇
 州松江常州三府太倉一州原額十有五萬四百三十八石四斗七升除改徵漕糧外實徵六萬九千二十五
 石 白杭米六萬五千六百五十一石白糯米三千三百七十四石浙江嘉興湖州二府原額六萬六千二百石
 除改徵漕糧外實徵二萬九千九百七十五石白杭米二萬五千三百四十九石白糯米四千六百二十六石
 共實徵白糧九萬九千石 小麥運京倉山東正兌麥九千九百一十五石七斗六升耗麥二千四百七十八
 石九斗四升改兌麥九千三百九十一石七斗耗麥一主五百九十六石五斗九升各有奇河南正兌麥二萬
 四千六百五十二石七斗八升耗麥六千五百八十八石七斗一升改兌麥一萬二千七百六十六石九斗六

升耗麥二千一百七十石三斗八升各有奇共實徵正兌改兌正耗麥六萬九千五百六十一石八斗四升有奇 黑豆運京倉山東正兌豆八萬一千一百一十四石三斗一升耗豆二萬五百二十八石五斗七升有奇改兌豆三萬一千八十二石二斗四升各有奇耗豆五千二百八十三石九斗八升有奇河南正兌豆六萬七千九百三十四石三斗二升有奇耗豆一萬八千二百二十石三斗八升有奇改兌豆二萬八千二百三十五石五斗三升各有奇耗豆四千八百石四升有奇共實徵正兌改兌正耗豆二十萬八千一百九十九石三斗一升有奇山東河南二省起徵黑豆均繫粟米改徵向無定額視京倉粟米黑豆何項不敷戶部倉場侍郎酌量情形隨時奏明辦理 永折漕糧山東七萬石河南七萬石均每石折銀六錢八錢不等江蘇十萬六千四百九十二石六斗九升 每石折銀六錢七錢不等安徽七萬五千九百六十一石三斗一升每石折銀五錢六錢七錢不等湖北三萬二千五百二十石六斗湖南五千二百十有二石五升各有奇均每石折銀七錢共永折米三十六萬一千八十六石六斗六升有奇 灰石改折江蘇二萬九千四百二十四石二斗二升浙江一萬八千六百五十三石一斗八升共改折米四萬八千七十七石四斗過閩加折四千十有五石三斗每石連耗折銀一兩二錢會典事例 戶部則例

一徵收漕糧山東河南徵收粟米麥豆江南蘇松糧道屬徵收粳米糯米江安糧道屬徵收粳米稜米粟米 珠陽縣抽粟兼收 浙江徵收粳米和米糯米江西湖北湖南徵收稜米

一各省額徵漕糧運京倉者為正兌運通倉者為改兌州縣原額漕糧荒缺遇有報墾陞科按數撥補如無荒缺將陞科之糧解司充餉今按嘉慶二十五年額徵之數開載

一山東省額徵正兌正米八萬三千二百九十五石七升零改兌正米四萬二千九百一十四石零正兌正麥九千九百一十五石零改兌正麥九千三百九十一石零正兌正豆八萬二千一百一十四石零改兌正豆三萬一千八十二石零額徵備糶米二萬八千五百石

一河南省額徵正兌正米八千九百六十九石九斗八升零改兌正米九千一百九十二石零正兌正麥二萬四千六百五十二石七斗八升零改兌正麥一萬二千七百六十六石零正兌正豆六萬七千一百八十九石零改兌正豆二萬七千八百五十七石零山東河南二省額徵黑豆俱係粟米改徵視京倉粟米黑豆何項不敷或應多徵黑豆或仍徵粟米戶部暨倉場侍郎隨時酌量情形奏明辦理額徵備糶米二萬八千五百石

百石

一江南江安糧道屬額徵正兌正米二十八萬八千二百三十九石一斗四升零改兌正米一十萬二千七

十五石零

一江南蘇松糧道屬額徵正兌正米一百三萬八千一百一十一石二斗零改兌正米九萬四千八百五十

二石零額徵白糧正米六萬九千二十五石

一浙江省額徵正兌正米六十二萬一千四百六十六石六斗八升零改兌正米二萬九千三百五十三石

零額徵白糧正米二萬九千九百七十五石以上二省白糧遇有荒缺於本州縣現徵南米內通融辦足起

運

一江西省額徵正兌正米三十五萬一千三百九十四石零改兌正米一十五萬一千六百一十四石零

一湖北省額徵正兌正米九萬四千六百二十二石零

一湖南省額徵正兌正米九萬五千五百二十九石零湖北湖南二省無改兌米

一奉天省額解黑豆四萬石以上並戶部則例

康熙二十二年定漕船載運額數每船載正耗米五百石通考

乾隆二年題准江浙二省運京白糯每歲應需九千石均攤科算浙江原辦運白糯正米五千二百四石照例採買辦運江蘇常州府原辦運白糯正米九百八十八石九斗六升二合今派九百七十七石蘇州府白糯正米原辦運四千二百六十八石二斗八升四合零今派二千八百十有九石以足九千石之數餘均改徵漕糧至松江府太倉州屬偏處海濱採買艱難將白糯全改漕糧會典事例

五十一年諭軍機大臣等據毓奇覆奏本年應運漕數目一摺尙未明晰各省起運正供本年因災蠲緩難比較每年定額共短少一百八十二萬八千餘石而例應起運之正耗漕白米尙有二百七十九萬七千石零若今歲雨暘時若河水充足自當全數撥挽抵通但聞該督摺內奏稱現督飭各省糧道慎選乾潔好米受兌來准盤驗等語上年江浙等省俱被有偏災其所收米色白不能如向年之乾潔毓奇寧不知之前據福崧奏浙省海寧等州縣漕糧請紅白兼收種稟納朕以該撫所奏白係實在情形當即批允崧毓奇亦未接准福崧咨會而尙有此慎選好米之奏著傳諭該督於各省漕糧受兌及抵淮盤驗時如果有摻雜潮濕等弊自應查明辦理其米色稍減及顆粒未能純淨尙可備供支放者卽當免收盤放不必過事苛求以示朕體恤災區

至意 聖訓

五十四年議准湖北崇陽也城二縣額征漕米五千九百八十四石零改解荆州抵補南米以下游之蘄州等大州縣解荆南米就近兌交運船劃抵漕額會典事例

道光元年諭軍機大臣等據御史王家相奏收漕加米事類加賦八折收漕之議有十不可如經費尙須調劑或酌量加銀尙屬易於限制等語漕糧爲國家正供果能顆粒無浮照額兌運直達天庾誠爲盡善無如近年百弊叢生日甚一日幾於積重難返前降旨令有漕各督撫悉心籌議嗣據孫玉庭等以幫費不能盡裁陋規不能盡革浮收不能盡去議以八折收漕減半給費先去其太甚期於積弊以漸而除官民胥免於累業經降旨允行茲據該御史復力陳其不可著將原摺發交孫玉庭等閱看孫玉庭係原奏之人魏元煜李鴻賓帥承瀛則前此並未與議江浙漕務情形大略相同其各悉心體察上爲國計下爲民生如果八折之議實有窒礙難行之處不妨奏明更正不可回護前議然必須熟籌善策既不困民又不累丁使州縣無所藉口而漕運依限抵通方爲萬全無弊可以行之久遠若但博不浮收之名而貽誤全漕或仍如從前掩耳盜鈴任聽加五加大莫爲之限而外以收清漕不加賦爲名是皆可作紙上空談而非爲政以實之道該督撫虛衷商榷深思妥議具奏儻彼此意見不同伊等孰有善策卽自行具摺陳奏以憑採察 聖訓

同治二年諭議政王璽機大臣等前因潘祖蔭丁壽昌先後奏請酌減江浙等處漕額當交戶部議奏嗣據會國藩等奏請減蘇松太三屬漕額因特降諭旨宣示令會國藩李鴻章分別查明折衷議減茲據戶部奏稱江浙之蘇松常鎮太四府一州浙江之杭嘉湖三府盡遭蹂躪民不聊生見在蘇松太三屬已奉特恩准予量減常鎮漕額雖較輕於蘇松等屬而比之各省額數究形其重似應一律量加體恤其浙江杭嘉湖三府並飭左

宗棠確查稅則重輕，酌減各等語。漕糧爲天庾正供，京師仰食，東南相沿已久，必須通籌熟計，中外兼權。若竟將蘇松太三屬額賦驟減十分之六，而他屬不得均霑，於倉儲既有關係，於辦法亦欠均平。著會同藩李鴻章按照戶部酌減分數，將蘇松常鎮太等屬漕糧各按上中下賦則一體分別議減，以昭平允。並將各該州縣等田額若干，分析開列奏聞，請旨務令下恤民生而不至上虧國用，方爲妥善。至浙省粵道兵燹小民流離，失所殊堪軫念，自應將該省漕糧量予減免，以示公溥之仁。著左宗棠、通飭杭嘉湖三屬將實在應徵漕糧稅則詳細確查，各按重輕分成量減，奏明辦理。東華續錄 謹按同治初年蘇松減免浮糧一事已詳見田賦徵收事例門今錄茲條於此者以其爲運額之所從出也

四年諭內閣：前因會同藩李鴻章奏請將江蘇太倉鎮洋二州縣漕糧改徵折色，當交戶部妥議具奏。茲據該部遵議覆奏漕糧爲天庾正供，定例不准輕議改折。近來江西湖北等省雖有改徵折色之案，亦出於一時權宜，究非經久之法。況江浙所運粳米堅緻耐久，尤非江廣諸省之稂粟可比。非此不足以供儲蓄。且江浙漕額業經加恩分別酌減，計每歲減運之米已不下七十萬石，即使全漕起運，京倉所入已大減於前，自不應再議改折。致倉儲復形短絀，卽謂太倉鎮洋二州縣產米較少，而該二屬尚徵正耗米九萬餘石，今已減去賦額三分之一，止徵正耗米六萬餘石，民力已紓，自應照常起運，以符舊制。所有該督撫請將太倉鎮洋二屬改徵折漕之處，著毋庸議。聖訓

右正兌改兌承折

各省漕糧舊係軍民交兌，運軍需索多，爲民累。後改爲官收官兌，因酌定贈貼，隨漕徵給，各省名目不同，多異

不一山東河南謂之潤耗江蘇安徽謂之漕贈浙江謂之漕截江西湖北湖南謂之貼運山東河南及江安糧道所屬每米百石徵給銀五兩米五石蘇松糧道所屬每米百石徵銀十兩米五石嘉慶五年奏准均由州縣代爲售變每石以一兩九錢折給浙江每石徵銀三錢四分七釐江西每石徵銀三分徵米三升嘉慶五年奏准以十分計算內七分由州縣代爲售變每石以一兩九錢折給其餘三分留爲回空食用又徵給副耗米一斗三升湖北湖南無加贈銀米於四耗之外加耗二升隨糧徵給會典事例

每正兌米一石山東河南又徵耗米一斗六升謂之一六輕齋江蘇安徽二斗六升謂之二六輕齋江西浙江湖北湖南三斗六升謂之三六輕齋每改兌米一石又徵耗米二升謂之二升易米折銀均每升折銀五釐解倉場通濟處山東河南並江蘇徐州府屬之銅山豐沛蕭馮山五縣改兌米不徵易米折銀 會典事例

每正兌改兌漕糧二石山東河南徵長蓆一領縱六尺四寸廣三尺六寸江蘇安徽江西浙江湖北湖南徵方蓆一領縱廣皆四尺八寸其應改折色者江蘇之鎮江安徽江西浙江湖北湖南每領徵銀一分蘇松常三府太倉一州每領徵銀一分二釐應解本色者山東河南及江安糧道所屬均徵本色蓆片給運軍解交蘇松糧道所屬並江西浙江湖北湖南均徵銀給運軍辦買赴通交納江安糧道所屬之安甯池太各府蘇松糧道所屬之蘇松常鎮太倉州江西浙江湖北湖南每正兌正米二千石徵楞木一根長一丈四尺九寸圓二尺五分松板九片闊一尺三寸五分厚五寸五分共改徵折色者每楞木一根徵銀五錢至五錢五分松板一片徵銀四錢至四錢五分各不等山東河南及江安糧道所屬之廬鳳淮揚徐穎各府六安泗海通各州均不徵楞木松板江南安徽江西浙江湖北湖南糧艘到通每船帶大竹一根中竹三根蘇松糧道所屬各府州大竹長

二丈二二尺圍圓一尺二寸每根價銀二錢四分中竹長一丈一二尺圍圓六七寸每根價銀一錢二分江安糧道所屬安寧池太淮五府廣泗二州大竹長三丈五尺圍圓一尺八寸至長一丈二尺圍圓八寸每根價銀一錢五六分至五六分不等中竹長一丈六七尺圍圓一尺二寸至長一丈圍圓四寸每根價銀一錢二分至八釐不等汀靈府及海通二州毛竹向無定價悉照時價造報江西大竹長二丈中徑五寸每根價銀六分中竹長一丈二尺中徑二寸每根價銀五分湖北湖南大竹長二丈中徑五寸每根價銀湖北一錢湖南九分中竹長一丈二尺中徑二寸每根價銀湖北八分湖南六分會典事例

凡正兌米麥豆每石交倉耗米二斗五升內除運通運京共耗二斗一升二合餘給運軍回空食米三升八合改兌米麥豆每石交倉耗米一斗七升內除運通運京共耗一斗三升二合餘給運軍回空食米三升八合會典事例

各省漕船到通除山東河南路近不給贖夫銀外其江蘇安徽江西浙江湖北湖南六省漕糧按實過場正米覈算每石給贖夫銀一分又接到通漕船實數山東河南每船給羨餘銀一兩江蘇安徽每船一兩江西浙江湖北湖南每船四兩凡有掛欠漕糧者按所欠米數以通幫贖羨銀均派扣除其中途失風漂沒損壞不到通者按船扣除會典事例

山東河南領運千總於俸廩外兼支行糧二石四斗運軍每名行糧二石四斗月糧九石六斗江南蘇松糧道所屬之蘇州太倉鎮海金山松江五衛千總不支行糧運軍每名行糧三石月糧九石六斗鎮江衛千總不支行糧運軍每名行糧二石九斗七升五合月糧九石五斗四合江安糧道所屬之江淮興武泗州等衛並廬州

衛二幫三幫大河衛二幫三幫揚州衛頭幫儀徵幫領運千總於俸廩外並支行糧三石運軍每名行糧三石月糧十有二石安慶新安宣州建陽宿州鳳陽長淮淮安滁州徐州並廬州衛頭幫大河衛前幫揚州衛二幫三幫四幫領運千總於俸廩外各照本衛兼支行糧運軍每名行糧二石四斗二石六斗二石八斗三石不等月糧八石九石九斗十有二石不等浙江各衛千總於俸廩外兼支行糧三石運軍每名行糧三石月糧九石六斗以上均本折各半江西各衛千總於俸廩外兼支行糧三石運軍每名行糧三石月糧九石六斗以上均折銀徵給會典事例北湖南各衛千總於俸廩外兼支行糧三石運軍每名行糧三石月糧九石六斗以上均折銀徵給會典事例一各省漕糧徵收漕耗銀米給發官軍爲代漕雜費辦公之用山東省每徵糧一石收漕耗米一斗五升內津貼運軍運費銀三分席片銀五釐米五升五合又支給領運隨幫官盤費銀六釐其餘米石留爲州縣幫補運米不敷脚價之用河南省每正糧一石收漕耗米陽武封邱二縣一斗洪縣一斗二升溫縣一斗四升餘俱一斗五升內津貼運軍運費銀三分席片銀五釐米五升五合下剩米石再撥給旗丁一半其餘留爲州縣免漕雜費之用江安糧道所屬每正糧一石收漕耗米一斗嘉慶五年奏准全數撥出給丁由州縣代爲替變每石以一兩九錢折給蘇松糧道所屬每正糧一石收銀六分折收錢四十六文嘉慶五年奏准全數撥出給丁溧陽縣漕糧因江淮衛三六兩幫兌運每石民貼湖米三升以爲漕船赴次塢淺修船之用江西省每正糧一石津貼州縣脚耗三分九釐六毫米七勺六秒又協濟運軍銀一分三釐七毫浙江省杭州嘉興湖州三府每正糧一石收漕費錢八文至二十一文不等又杭州湖州二府屬仁和錢塘海鹽富陽餘杭安吉歸安烏程長興德清武康等一十一州縣每正糧一石加收錢二十文嘉興府屬嘉興秀水嘉善海

鹽平湖石門桐鄉七縣每正糧一石加收錢三十文以上浙江省各府州縣所收漕費錢文嘉慶五年奏准全數撥出給丁湖北省每正糧一石收漕耗米七升漕費銀七分湖南省每正糧一石收漕耗米六升漕費銀自五分至一錢三分不等爲兌漕雜費辦公之用

一各省漕糧如遇截留之年漕耗銀米照數徵收分別支解安徽江蘇二省以一半給州縣爲倉庫鋪墊之用其給丁一半耗米費錢如截留在未經兌運之前照數提解充公若已兌上船按程分別給丁如折徵之年亦照舊徵收以資辦公

一白糧耗米江蘇省每正米一石加耗三斗又正耗每石加春耗米二斗此項米石向係旗丁與州縣各半支給嘉慶五年奏准全數給丁浙江省每正米一石加耗四斗五升又正耗每石加春耗米三斗項此米石向係全給州縣嘉慶五年奏准撥出六升給丁

一各省津貼旗丁曬曬耗米江蘇省正兌改兌項下每石給丁二升七合六秒浙江江西湖廣等省正兌項下每石給丁二升七合六秒山東河南二省正兌項下每石給丁一升七合六秒永以折色給丁所給價銀粟米每石折一兩九錢稷米每石折一兩七錢粟米麥豆每石折一兩四錢於道庫存剩漕項銀內支放如兌漕月分糧價少於定價即將時價發給兌漕完竣卽行報部核銷其收回耗米運通交納

一各省隨漕各項本折錢糧總漕確查造冊送倉場查核如有參差遺漏倉場據實指參以上並戶部則例順治九年定給水脚銀江南蘇州松江安慶廬州並江西浙江等處每石自三錢至三錢五分揚州府每石二錢五分均于隨漕項內動給通考

雍正元年諭戶部江西省有漕米各州縣運糧到省又自倉庫搬上軍船故有腳耗扒夫修倉鋪墊等項編載成書歷年支給已久自康熙二十三年部中誤駁不准支給行令追還嗣後一例駁追究無完解至三十四年聖祖仁皇帝特頒諭旨將從前已經支給者俱免追賠恩至渥也至康熙三十八年部議又以腳耗與扒夫等項分晰未清仍令扣追不知腳耗乃貼運之總名扒夫等項乃支給之細數實一事非兩項也自康熙三十八年至今已二十餘載應追銀五十一萬餘兩米六十一萬餘石積累增多究無完解追比日久官民均受其累特諭爾部將從前積欠盡免追賠向後准其支給通考

雍正七年蘇州巡撫尹繼善奏竊照江省徵收漕糧積弊多端上座 聖懷特頒 諭旨聞 命之下殊深慄悚臣日夜圖維留心體訪凡民間完漕耗費州縣辦漕需用以及旗丁輓運用度細細察核務期與漕務官民均有裨益方可永遠行之無弊查鄂爾泰先任蘇州布政司時曾有每石收漕費六分之議內一半幫給旗丁每船銀二十兩一半給州縣爲辦漕之用臣通盤合計在從前旗丁抵盤過淮浮費甚多原不敷用今蒙 聖明已將旗丁一切浮費禁革伊等原有行月錢糧又加額編五米十銀再幫銀二十兩儘足用度旗丁既有定規州縣不被勒索有此三分一石亦可辦公卽民間完納漕糧每石止令交費六分一切耗米斛面盡行禁革亦不爲苛臣在清江時卽經擬定規條聞署督撫諸臣因先奉 諭旨發鈔奏摺內開有江省收漕每石應收漕費三分官吏多收六七分不等之語欲避此名色署督臣范時繹行司議詳每石止許收費三分署撫臣彭維新飭令每米一石準其折扣九斗臣查九扣收漕每石已加米一斗一升畏存六七分之名陰行八九分之實小民豈能受惠此議斷不可行若每石收費三分以一半給旗丁每船止得銀十兩

以一半給州縣每石止一分五釐一切鋪墊人工脚價實不敷用夫處事必求其當立法務在可遵若矯枉過正雖小民一時感頌而公事難行將來勢必復增况奏摺所稱既收費六七分又復加米兩項合計實在浮多如米糧不許升合加增僅收漕費六分原屬官民兩便臣隨咨會署督撫及漕臣商定畫一收費六分通飭遵行再向來隨漕收取餘米最滋弊混易於侵冒其常平社倉捐穀一項原係勸民樂輸而近來竟隨漕勒收亦一併飭禁至旗丁既經定議每船幫銀二十兩自不許仍向各州縣勒索而州縣又向有呈送各衙門徵漕陋規近年以來雖院司道府衙門已俱不收取其監兌押運等官以及吏役催漕人等仍有浮費若聽其因循則弊不除根州縣仍得藉口亦一併條分縷晰出示嚴禁今歲法令之初猶恐官吏奉行不力臣督率司道各官俱時時加意處處留心除玩法之興化縣等已經嚴參各處現在密行查訪明加儆戒務期漕弊肅清以仰副我皇上惠愛黎元至意

奉 諭辦漕一事籌計精詳識見確切洵屬允當之至即照所議定為成憲永久遵行可也雍正硃批 諭旨
乾隆元年定各省截留漕船介于起運停運之間行糧月糧應給應追向未定有成例應酌定成規以歸畫一嗣後江蘇安徽浙江截留漕船應支本折月糧三修銀準其照數全給至行糧盤耗贈銀負重等項各隨多寡分作十分自水次抵通接程途遠近亦作十分計算行一分程途給一分銀米如行一兩站未及一分者即按一兩站扣算支給贈米一項如米到州縣半月放清者按已行之程扣給其未行之程追繳半月以外每石給米一升滿一月者給米二升滿二月者給米四升滿三月者全給若幫貼截留本次或全兌全卸或數月後收清贈米亦按月計算江西漕船較大米數多每年額領三修銀不敷取辦于行月兼之水次開行逐節淺阻起

駁長江守風過淮修船一應費用較江浙不同遇有截留將原領折耗行月贈銀贈米斛面米均免扣追又每米一石微耗米四斗爲交通倉及沿途折耗之費副耗米一斗三升爲水次開行抵淮折耗如淮安以南截留者將四耗米令其隨正交納副米免其追繳如過淮截留者將四耗米內正兌米隨交二斗五升改兌米隨交一斗七升並每石別交一升贈米外餘米按由淮到通程途作爲十分計算行一分程途卽給一分耗米湖北湖南漕船灣泊岳州府濱臨洞庭風波不測截留漕船例給一半月糧之外每船酌留頭舵水手四名防護每名月給口糧一升減去水手人等每站給盤費銀三分米一升照時價折給至五年又定未兌之船截留者照停運例給與減半月糧已兌未開之船截留者減半月之糧外將三修一項照數全給各省畫一辦理七年又定截留漕船已兌開行照定例扣追運軍多有苦累每船山東河南加給銀五十兩江南浙江六十兩湖廣七十兩江西九十兩其應給之銀卽于行月折色銀內扣給所餘行月等銀仍照舊按程分別追給再江西湖廣已過長江者其所餘銀兩給與四分之三已渡河至臨德等處者全給通攷

二十四年議准各省漕船應交坐糧廳茶果銀兩山東河南二省每船額交銀七兩旗丁自行交納江浙白糧每船額交銀一十兩各糧道在於各丁應領耗贈銀內按船按數扣留封交押運廳員批解坐糧廳衙門其餘江南浙江西湖廣等省每船額交銀一十兩在於到通應領盤羨紅駿銀內照數扣抵如有餘剩仍行找給不敷銀兩於餘米折價銀內找足會典事例

五十二年諭內閣據毓奇奏江蘇省領兌華亭婁縣奉賢等三縣浙江省領兌海鹽臨安新城於潛昌化嘉興海鹽嘉善平湖秀水石門桐鄉歸安烏程等十四州縣漕米各幫米色微變不堪交納將行月耗米抵補再加

查倉贈耗行糧外不能復有餘米請將此次應交三升八合餘米俟下運分作兩年買補帶交等語各幫領運漕米例有餘米以資該丁等回空飯米之需此次抵交若再令買補餘米分年帶交恐近年丁力疲乏轉形支絀所有江蘇省華亭等三縣浙江省海鹽等十四州縣各船應交三升八合餘米均著加恩寬免以示朕體恤丁力至意 聖訓

五十三年諭內閣據毓奇奏豫省起運漕船因衛河水淺起撥稽滯所有行月糧石交補正供外不能再有餘米交倉請將豫省十幫到通應交三升八合餘米緩至下運分作兩年帶交並東省漕船稽遲亦久請飭交倉場侍郎查明如有疲累之幫將應支餘米一體緩納以紓丁力等語各省漕船到通後例有餘米交倉近年以來屢經該督奏請緩交因其爲恤丁起見是以准行但此等旗丁既屬疲乏即使准其將餘米分年帶運而年復一年自必更形拮据豈能按限交納除前此緩交餘米仍令按年帶交外此次河南漕船行走遲滯皆因河水淺阻守候耽延而該管各官於簽丁時既未能慎加遴選及開兌後又不能督飭催趲以致稽遲時日丁力疲乏不能交納所有本年兌運豫省米石各幫船應交餘米寬免其交納著落總漕巡撫糧道及府州縣衛等賠交其東省各幫有無似此疲丁不能交納餘米應行寬免著賠之處並著倉場侍郎就近查明照此辦理據寶具奏 聖訓

五十四年諭內閣向來北倉截留漕船米石所有轉運通倉水腳銀兩俱係坐糧廳墊發仍於該旗丁名下扣繳歸款但思此項腳費如係幫船行走遲延能依限赴通交兌在北倉暫行留貯者自應旗丁出資運送若漕船本可如期抵通因奉特旨截留北倉以備撥用者原與旗丁無涉即當官爲轉運從前概令旗丁繳費運通

辦理未爲允協嗣後各省糧艘有趨行未能迅速抵通遲誤恐致沿途阻凍不能及早回空在北倉截卸其運
通脚費自當照例扣繳如有似此特旨截留者著動支官項辦理以示朕體恤旗丁至意 聖訓

嘉慶四年諭內閣戶部議駁蔣兆奎請給各省幫船銀兩分年扣還等因一摺業已依議行矣現在漕務節經
降旨令有漕各督撫將旗丁疲乏情形確查妥議量加津貼並將一切陋規盡行革除自可無虞匱乏乃蔣兆
奎執拗成性總以運費不敷爲詞又請將漕項銀兩借給各丁每船自五十兩至一百兩不等試思此項借給
銀兩自不得不分年扣還但該旗丁等在初借之時自屬寬裕至次年卽須將所領行月等項坐扣已不免拮
据至逐年坐扣勢必更形竭蹶不能如數歸款實與各省積欠錢糧無異是公項既致無著而於運丁仍無裨
益殊非切實調劑之道因思向來漕船准帶土宜一百二十六石例不報稅原爲恤丁起見今著再加恩准其
多帶土宜二十四石共足一百五十石之數俾旗丁等沿途更資潤滑從此運丁一切陋規既經裁革應得之
項自可如數給發又經部議酌加津貼米石今復准其加帶土宜一切倍加寬裕自不得再有所藉口儻嗣後
總漕倉場等衙門及衛弁等或仍有需索旗丁情事准其據實首告必當嚴辦示懲 聖訓

五年諭軍機大臣等大學士九卿議駁費清等奏請將江蘇浙江應徵輕齋折色銀兩改徵本色一摺已依議
行矣此事前經蔣兆奎奏請嗣又有浙江旗丁儀洪遠等在戶部具呈俱經戶部議駁昨復據費清保岳起
阮元聯銜具奏仍請將輕齋之項以大成改徵本色四成竟予豁免費清等四人平日辦事尙屬認真所奏原
係爲公起見但先經戶部議駁而大學士九卿又以爲事屬難行朕豈肯違衆臣之公議獨准伊四人之奏乎
況此項輕齋每石原定折銀五錢本係國家薄斂愛民之意行之百有餘年相安已久豈容輕議更張者如該

督撫等所議改徵六成本色豁免四成亦似不欲累民殊不知以六成本色所值而論較之原定十成折價已不啻多至一倍有餘是小民虛受四成豁免之恩轉受六成本色之累與加賦何異朕聞近日各省漕務名爲肅清其實浮收之弊未能盡除該督撫等雖潔己自愛而於州縣收漕種種弊竇不能實力糾察嚴參大法而小不廉有清漕之名仍無清漕之實實爲近來通病比之六部京堂皆知奉公守法而司官書吏任意行私朕安用此等尙書侍郎爲耶直省大吏比古諸侯豈可不以用人爲先務乎司事者不思正本清源漸除積重難返之弊動以辦理清漕旗丁運費卽有不敷曉曉瀆請此非真爲調劑漕務起見不過聽不肖屬員慫恿仍欲顛蹈從前浮收惡習耳況本年各省漕船屆期抵通並無遲誤其運丁之辦理並無竭蹶卽此可見乃該督撫等或以本年漕運係多方設法始能無誤竟似明年漕運若不另加籌畫恐致輓運維艱豫爲站脚地步此事惟在費瀉鐵保岳起阮元等悉心籌畫認真經理總期於運務有益而不至苦累小民方爲正辦若明年漕運稍有稽遲惟伊等四人是問 聖訓

道光六年諭內閣程含章奏請給幫船行月等項銀米並將應行扣帶銀米展緩一摺本年辦理盤運浙省軍船雖止運至清江浦而河北接運一切經費較常年直運抵通並無減少且多盤剝折耗擡夫之費若照奏定章程將應給接運軍船口糧等項令原運軍丁付給其應領銀米按程扣減轉致無銀支發有誤漕運自應量爲調劑著照所請將該省上年今年兩運行月等項銀米照額全數支給免其計程劃扣其截留河北之窻前等三幫額支本折行糧並月折銀兩准其給與灑裝米石之丁俾資貼補至該丁等額支月糧本色及米價二款著照江南成案給領又上年紹前等八幫東省墊給剝船津貼食米約銀三千四十二兩零杭頭等三幫倉

場衙門墊放剩價等銀一萬四千八百九十兩零天津道借給銀一千三百二十兩共銀一萬九千餘兩均著
緩俟下年酌分年限扣還歸款又上年各幫緩交分限贖屬耗米及杭三紹後兩幫徵變分限米石並各幫積
欠米石等款共米二萬一千餘石亦著照湖南成案緩俟下運依限搭解再金衢杭頭等幫扣款較多所領銀
兩不敷辦運著准其在道庫丁借息銀項下酌量動支調劑以資利運而紓丁力 聖訓

十五年諭內閣朱爲弼奏酌議糧船經過關廟章程並請添派道員稽察一摺各省漕船北上經過清江之惠
濟通濟福興等三閘向皆設立關纜招夫拉挽其每船酌給人夫飯食錢文前經漕臣酌議條款榜示關廟本
有定額近來積習相沿一切費用逐漸加多夫頭視爲利藪員役藉以分肥頭伍尖丁影射漁利游手無賴藉
端索詐種種弊端日甚一日自應嚴加查察以利漕行現經該漕督將舊定榜示條款酌量變通並每閘派漕
委一員以專責成惟微末之弁難資得力著准其添派准場道李國瑞就近總司稽查彈壓儻有幫弁勒捐不
給工價或潛委格外需索均由該道分別情罪輕則責懲重則揭參俾知儆畏至夫工關纜銀兩卽由各該糧
道查照木榜條款酌給並交該總運各員眼同漕委分給人夫不准任意勒索亦不得拖欠短少用昭平允

聖訓

二十八年諭內閣前據彭蘊章奏裁減漕船費當交戶部議奏茲據該部駁議具奏漕糧爲天庾正供自應
裁減洋費杜絕弊端庶使小民樂於輸將州縣易於交兌源源轉輸倉儲日裕乃近來自州縣之徵收沿途之
轉運以及各倉之出納節節視爲利藪致使旗丁需索幫費每歲加增幾成積重難返之勢因而紳衿之包庇
船戶之偷竊胥役之侵漁種種弊端相沿日甚若不從嚴整頓流弊何所終極著有漕省分各督撫暨河道漕

運各總督倉場侍郎等悉心體察力清其源源之不清流從何止在督撫等則應先行出示本年徵收漕糧祇准循照舊章不得絲毫增益兼須諭旗丁不得需索州縣該州縣等禁其取之於民何能為爾輩魚肉其在漕運河道總督又應嚴禁委員開官巡漕等員告以旗丁既無所利該員等如敢詐取分毫准旗丁立卽喊訴其有藉端需索及勒不放開等弊從嚴治罪至於倉場侍郎尤應飭令坐糧廳潔已奉公禁止收受漕規並嚴查經紀人等勒索旗丁財物旗丁不取之於州縣何能為經紀等所挾持總之一氣相迫其利全散之於烏合之衆而其害則滴滴歸源皆掇克於吾民也該大臣等豈無一二見及此者特日久相沿因循滋甚又不能聯為一體互相提撕遂使天庾之供歲形短絀該大臣等若不振刷精神趁此詰誡之時狂瀾力挽將來官民交困有誤正供其將何術以補救耶悔之晚矣若有漕各督撫卽將此次諭旨徧示各州縣剴諭各村莊河道漕運各總督及倉場侍郎亦徧示官吏軍民人等一體懷遵勿干功令倘有違者迅卽懲辦務使層層去賸削之害小民有蘇息之時該州縣等尙敢藉口於兌費之日增而重斂吾民乎

聖訓

兩江總督李星沅奏江蘇辦漕浮費甫經撫臣查開數目並酌擬條款曾摺具奏旋准戶部行令會同漕督倉場聯銜具奏等因臣竊惟浮費之起始由有漕各州縣漫不加察委任丁胥賂徇民膏飽充私窠甚至官為役用亦思葳取盈餘於是漕構利藪弊端百出其先幫船之弁丁其次開壩之夫役通倉之經紀舍人遞索規費漸增漸浮至於此極故變本加厲之害實皆州縣作俑致以幫費取紛爭而截流清源之方又必幫費從輕乃為州縣資撙節凡論江蘇漕政均自裁減幫費始然一減於前撫臣岳起再減於前督臣孫玉庭非不料酌曲當究之費且日增特視奏明數目以為分所應得卽上年署撫臣程晉采漕臣楊殿邦會奏大

加裁減仍未見有實濟書所謂非知之難行之維艱也試以收漕論官與民相持花戶略爲觀望而漕誤矣以兌漕論縣與村相持弁丁故爲渙散而漕誤矣又或漕行限迫必參州縣以遲延地力累深必指漕幫爲排斥此不待過淮抵壩而已各執一詞均非無見蓋督責愈急則弊愈生指陳愈繁則弊愈雜多一防弊之法卽多一索費之門此時蘇漕重困有未敢縷述也今有人病在膏肓形同痿痺積日累月寸步爲難卽令和緩醫調尙未必無他慮若加攻伐之劑遽求旦夕之功診候各殊紛如聚訟始則以藥治病繼且以藥治藥勢將動觸危機不可救藥而後已漕務之弊如此略同臣目擊情形杞憂倍切事關國家大計稍一不慎決裂滋虞惟當防於未然去其太甚誠如戶部議奏經理漕政事本相因其中交涉弊端則以各清各弊爲主似無須再議聯銜可否請 旨飭下有漕各督撫及漕督倉場衙門務各屏除成見共矢同心勉圖整頓之宜嚴絕推諉之習庶幾人和感召年穀順成仰副我 皇上愛民裕漕之至意

李香山館集

二十九年諭內閣前據吳文鎔奏酌減漕船幫費並片奏運場用款減成給發等語當交戶部議奏茲據奏稱旗丁領運例有行月銀米等項以資運漕浙江又於例給之外每石給予津貼銀兩辦運自應裕如乃近年浮費比前增至數倍該撫請將嘉興府屬幫費減去三成杭州湖州二府屬減去二成若以每石二兩駁計則所謂減去三成二成者較之江蘇松江府最多之四百兩仍增數倍徒有裁減之名並無裁減之實江浙事同一例數目如此懸殊該部自不能歧議况幫費名目瑣屑不堪豈可任其相沿滋弊著吳文鎔將所有名目概行革除斷不准概以空言分別減三減二卽著照松江府屬部議成案每船裝米千石幫費至多不准過四百兩以昭畫一議妥之後據實具奏如幫丁等敢於藉詞需索各州縣仍藉浮收卽從嚴參辦該撫正當整頓之際

一切毫無回護若不趁此時力挽頽風尙何待耶至通壩爲方糧總匯幫丁運米交倉該處經紀以費之有無高下其手是通壩陋規實爲諸弊之歸宿此弊不除則州縣取之於民幫丁仍索之於州縣而刁難挾制經紀實不免魚肉幫丁積弊相因變本加厲著倉場侍郎悉心查察嚴飭坐糧廳於幫船抵通逐幫親驗如果米色純潔迅卽督令斛收無恃經紀等爲耳目致令任意挑斥受其愚弄而不知儻查有高下之弊立即嚴辦該坐糧廳等每多上考候簡之員豈竟坐視因循不思振作甘心爲衆流之所歸乎轉瞬新漕抵壩爾倉場侍郎等其加意懷之慎之 聖訓

咸豐二年諭內閣訥爾經額奏籌辦迎剿南漕並動用解歸原借海稅銀款發給放空口糧一摺本年南漕入東過遲前經降旨飭撥楊村船隻迅往剿運茲據奏稱遵調楊村官剿一千隻赴臨清州供剿另調官剿一百隻赴安陵一帶迎剿所需放空口糧著准其在海稅解部項下動撥銀八千二百五十兩以濟要需事竣照例扣還歸款 聖訓

三年諭內閣戶部奏截卸漕糧例外浮銷請飭查繳一摺南糧截卸北倉歷年辦有成案豈容任意浮銷致多冒濫茲據該部查明本年倉場奏借長蘆運庫銀六萬兩辦運北倉糧石所開款目多有牽混浮濫之處著倉場侍郎嚴飭坐糧廳按例覈實報銷其多借銀二萬四千兩除抵撥銀二萬兩外尙餘銀四千兩迅卽解部毋稍延緩並著該侍郎查明咸豐元年經手辦運北倉漕糧例外多銷銀兩於各該員名下勒限還繳以清庫款而昭覈實 聖訓

陸世儀漕兌揭云隨漕一項在明朝不過謂之濕潤米每百石止有三三石而已乃近年因京中交兌皆

係河收兵丁混擾苦樂不等交卸頗難是以 聖旨亦酌有五兩五石之制究竟有漕之處不能遵行馴至極弊然聞去歲交卸已復倉收之舊每船止費銀三十兩是每百石止費銀六兩又每船免米三十石官旗多當花紅本源既清下流之拯救亦易矣是在各上憲斟酌事宜或恪遵 聖旨或再量加務令軍民俱安兩不相虧定爲畫一使各縣遵守無如向年雖有奉 旨之名實有借 旨之實其官旗有爭執者須令親開一路衙門使費果係多少則其未立見矣隨漕既定卽行文各縣照依數目立櫃徵收貯足在庫兌糶之日照依定例每船五百石給隨漕多少或縣官對給運官或刑廳至水次給散或運官領米至郡刑廳領耗無不可者但務要糧長與旗軍不相見則其間爭執之弊自息矣梓事文集

右隨漕款目

漕運六

漕船

船制白糧運船附 約束水手

各省漕船原數萬四百五十五號直隸二十有九山東千五十四江南江安糧道所屬四千八百八十七蘇松糧道所屬六百四十八浙江千九百九十九江西千有二湖廣八百二十六內除漕糧折銀徵解及灰石改折並分載帶運及坍荒地應蠲漕糧裁減船數外以嘉慶十七年實運船數計之共六千二百四十二隻直隸三十七號為運河南山東八百八十七號內漕船三百六十一自備船二百八十五運本省者六百四十六為運河南者二百四十一江南江安糧道所屬二千六百九十六號內協運河南九十七蘇松糧道所屬五百二十二號浙江八百四十五號江西六百三十八號湖北一百八十號湖南一百七十八號河南無出運衛所係派撥直隸山東江南幫船就近協運江南運白船一百三十八號在通省漕船內三年抽調一次浙江百二十三號乾隆七年題定在於嘉興湖州二衛所幫內撥定長運白糧 會典事例

一造船設廠處所山東各衛所船在淮安山東廠成造徐州衛河南前幫在於臨清胡家灣成造如官地不敷用及民地每畝給賃價四錢其徐州衛河南後幫仍在臨清塢所成造江南徐州衛江北幫在夏鎮地方設廠成造凡各幫遇成造之年各糧道於歲前遴委員弁率同運丁資銀赴南購辦木料回廠興工江南江准興武廬州鳳陽滁州淮安大河揚州儀徵等衛所在江甯府及淮安清江等廠安慶新安宣州建陽金山鎮江蘇州太倉鎮海等衛併江西省各衛所漕船均在本地方設廠浙江各衛所在仁和錢塘二廠湖北湖

南各衛所武昌漢陽二廠各運丁由糧道衙門
道驗看烙印

一漕船十年滿號除驗明可以加修出運者准
原船到次卽刻興工以副兌限若未經滿號遽
處

一浙江省二十一幫船隻如屆十年不堪加修

一江蘇安徽二省泗州金山等四十八幫如屆
造免其雇募補運其淮安三揚州三宿州頭二

滿號始准存次配造如十運不堪加修仍令雇

一江蘇省白糧幫船在於通省漕船內揀選丁
年未經兌糧之先親赴水次查驗如有丁疲船

一浙江省白糧幫船均令長運永免抽調以上

順治十一年 恩詔白糧民解累民官解仍以累
十三年定貼造漕船之例凡成造漕船例子州縣

數于江甯各衛屯米每石協濟銀一錢黃快船每
錢下則二錢審定造册徵收解廠安慶衛以屯田

建陽衛于屯丁銀內加徵貼造廬鳳淮揚徐滁等衛蘇太等衛所及山東各衛均按清出丁會編徵貼造浙江按清出閑丁每丁徵銀四錢江西每丁徵銀二錢五分湖廣每丁徵銀二錢以供貼造若船多銀少儘數勻攤

通考

康熙十九年定漕船額支官銀成造其清出丁銀概飭解部

通考

二十六年定各衛所漕船照每年見運之數成造十分之一

通考

又定各省歲修漕船每出運一船給修費銀七兩五錢

通考

雍正二年諭國家設立官員分別等次俱有定分不得僭越湖北糧儲道郭維新於起程之前請訓旨時朕曾諭如有裨益地方百姓之事著令密奏郭維新洩任後奏稱該省漕船式樣寬大遇水淺之處輾運維艱請照江浙漕船式樣減小成造朕未降諭旨今伊又奏稱遵旨將船價造完工兌載漕糧於正月十七等日起程三月十六日過淮等語夫改造漕船亦屬大事郭維新理應報明該督撫如果有益題明改造今並未報明上司卽行任意改造著行文湖廣總督楊宗仁巡撫納齊喀魏廷珍此項船隻改造之時郭維新曾否報明如伊等知其實有裨益令其改造亦應奏聞然後舉行如未經報明以爲奉有諭旨改造船隻督撫係地方大吏亦應奏報著楊宗仁等將曾否報明及督撫因何不奏并有無裨益之處據實明白具奏其郭維新兩次奏摺一併發往雍正內閣 上諭

又裁船政同知先是浙江設船政同知至是罷一切修造漕船事宜歸糧道管理令運軍支領料價赴廠成造所有不敷卽于道庫減存漕項銀內動支其蕪湖淮安杭州等關額供造船銀飭令解部

通考

七年諭增漕船載運土宜四十石著爲令通考 謹按漕船裝載土宜准免納稅者詳見征權常關免稅門

八年定漕船裹料銀舊例成造新船將舊船解廠充作裹料如無交銀五十一兩 通考

又准頭工舵工人各帶土宜三石水手共二十名每船額帶土宜百二十石 通考

乾隆五十年諭各省漕運船身高大固爲慎重天庾起見但一遇暴風往往有沉溺傷損之事究因船身過於高大沉重掉挽維艱人力難施所致卽其尋常挽運加絀過開一切照料浮送亦覺甚難況幫船每隻運米不過五百餘石商販船隻載米至千百石者其船尙不及漕艘之半現在豫惠二省漕船尺寸卽較他省爲小南漕各船自可量減船身尺寸使行駛便利雖一時未能全事換造自可於各該船屆臨拆造時將高寬尺寸仿照民船量爲減損則船身便捷既可少意外之虞而行走並能迅速於漕運實有神益著傳諭漕運總督會同有漕省分各督撫將各省漕船或經行江湖或僅由內河行走酌量情形悉心籌畫酌定船式尺寸詳悉妥議具奏欽此遵 旨議定江浙漕船船身長八丈寬一丈五尺底長五丈九尺兩廂兩棧共深六尺天篷高二尺八寸江廣漕船船身長九丈五尺寬一丈六尺五寸底長七丈二尺兩廂兩棧共深六尺九寸天篷高二尺八寸大桅頭桅亦俱收低至天篷上安設牌樓樣檣欄桿等項一概除去並將吃水尺寸刊明棧板之上俾易於查驗於本年爲始將滿號船隻照新式成造每船給料價銀二百八兩零船身駁與從前舊制並無減小仍照向例支給其未滿號船隻俟十年運滿如式成造自願先行改造者一律辦理嗣後成造時監造各員出具印結道員加結送部如違式成造旗丁治罪道衛各官嚴參議處會典事例

又 諭軍機大臣等據陸載等奏會議酌定漕船尺寸事宜以利輓運一摺已批交大學士九卿詳奏矣至摺

內稱各丁隨帶土宜定例重運船隻每船許帶土宜一百二十六石免其納稅惟是近年什物價直每件增昂長途輓運用度不無拮据與其任不肖旗丁暗中舞弊不若明定成規俾可遵守請於例帶土宜一百二十六石之外加帶七十四石共成二百石該丁等得需餘利自必踊躍歡欣益加用力越輓等語殊不成話旗丁應帶土宜一百二十六石乃係歷年定例仍不免例外多帶據該督奏請此後以二百石為率可見歷來私帶明在例限之外所謂籤盤查驗者何事旗丁等既可於一百二十六石之外多帶私貨此時即加至二百石安能保其不於二百石之外又復多帶似此逐漸增加伊於何底且稱與其任不肖旗丁暗中舞弊不若明定成規俾可遵守夫此一百二十六石豈非向定成規該督等業既視為具文任憑旗丁舞弊多帶而謂加至二百石之後即能永遠遵守不加有是理乎前因漕船高大沈重吃水過深易致淺滯是以令將高寬尺寸做照民船量為減損今欲減漕船之尺寸而轉准旗丁多帶土宜則船載愈重若遇河水淺阻又須節節起駁何必多此一番更張該督等身膺重寄於漕船多帶私貨行走濡遲之處既不能嚴行查禁竟如弊書而又為此夢囈之語率行陳奏不知是何意見薩載久任封疆尚為歷練曉事何近來辦事糊塗若此豈竟衰病相乘遂爾精神昏憤耶薩載尚然如此則毓奇之初任漕務者更不足論矣薩載毓奇著傳諭嚴行申飭並著大學士九卿遵照諭旨將旗丁多帶土宜之處嚴切指駁東華續錄

嘉慶二十四年諭內閣廣惠奏糧船跨帶木植請定限制一摺江廣重運糧船向例准帶天蓬木植不得高過二尺自嘉慶十八年經湖南巡撫奏准船身兩旁均准跨帶木植未經議有定額以致各幫運丁逐年增帶較從前多至五六倍統計江廣三省糧船跨木不下六七千萬根之多既滋夾帶漏稅之弊且於釐行有礙該監

督請明定章程惟所稱每船不得過二百根木植之大小鉅細本屬不齊仍易弊混嗣後江廣出運糧船帶木植著即照天蓬竹木之例寬不得過二尺以示限制各幫運弁於未開行之前先行查禁到關時該監督隨時查驗如有違例多帶者分別參懲以杜隱漏 聖訓

道光四年諭內閣魏元煜奏糧船吃水尺寸請量為加增一摺前因重運糧船任意攬帶客貨偷漏稅課降旨令漕運總督查明各幫船吃水尺寸造冊咨會山東巡撫委員在東昌一帶照冊句水將逾制者嚴行懲辦茲據該漕督奏稱江浙江廣各幫船吃水尺寸自乾隆年間定例以來節因濶帶搭運等項吃水逐漸加重若仍照原定尺寸則逾制之船必多自應酌量增加以歸覈實著照所請嗣後江浙船身吃水以三尺八寸為度江廣船身吃水以四尺三寸為度自本年為始該漕督將各省幫船吃水尺寸移咨東省查辦並准俱用漕尺句水其承辦句水委員於糧船抵關隨到隨句毋許稍留稽緩致誤重運行走至江廣各幫例帶三百石駁船一隻有無篷艙及幫次丁名著一併於過淮時咨送山東嚴加查察不得任令額外多帶駁船以杜隱混 聖訓

二十八年諭內閣前據王植奏江廣漕船准帶竹木與舊案懸殊請敕部覈覆一摺當交該部妥議奏茲據該部覆奏著仍照前署兩江總督陸建瀛漕運總督楊殿邦前奏所有漕船天蓬竹木准其循照舊章高二尺而不計寬長總以天蓬為度兩旁跨木亦照舊章各寬二尺而不計深長總以船身為度此外如有奸商影射及例外多帶情弊著責成各該糧道督飭各幫員弁認真查驗覈實結報並飭各關監督實力查丈以杜爭執而利漕運至各關歷年科算參差未經報部有案不可不畫一辦理以杜各弊著兩江湖廣總督江蘇安徽江西湖北湖南各巡撫會同漕運總督查覈明確準情酌理迅速妥議章程連銜會奏以為永遠遵行之制再漕

船准帶土宜原爲津貼體恤起見惟例外多帶既應查驗於未經開行之先尤宜嚴防其中途裝帶之弊著湖廣江西各督撫轉飭各該糧道實力查驗並開列船口清單先期飛移各關俟糧船抵關時按單查驗認真辦理惟江西漕船抵關時每多連樁徑過不候查驗藉口於限緊溜急每多夾帶著查照兩湖漕船章程到關停或溯流迎查俾得覈實稽察無誤過行總當見船卽驗一驗卽行斷不准稍有遲延透漏以速運務而重關稅

聖訓

曾國藩復吳仲仙漕帥書承示江北各屬及皖北之由洪澤湖北達者先辦河運以免紆途運漚出洋而舊制亦不致全廢具見卓裁斟酌妥善弟雖主海運之說而亦不敢竟廢河運蓋以運河一水經數百年勞臣經營而成巨川豈宜以停運之故墮昔人莫大之功惟修造漕艘弟意不欲太驟不欲太不欲以例價責成旗丁自造太驟則無此巨款太大則難於浮送或者千里深通一節膠淺又增無數溶河之費責成旗丁自造往往一丁造船舉族斂費能趁閣下任內革此虐政爲幸曾文正公書牘

右船制 白糧運船附

雍正十三年諭朕聞南方濱江兩岸多係蘆洲民間俱將蘆葦堆貯洲上賣以度日而江楚及上江各幫漕船由江往回竟有不法水手每遇蘆柴堆積之處輒糾集多人蜂擁上岸恃強奪取洲民攔阻動輒毆罵甚至有強取鷄鴨等物者小民畏勢莫敢與校而領運弁丁不加約束民多怨言夫領運弁員卽坐本幫糧船之內水手肆行如此安得推爲不知至督運之糧漕押運之廳員雖云統轄衆幫亦當留心查察何得任其多事著漕運總督通行曉諭倘有仍蹈前轍經朕訪聞必將文武大小運官分別嚴加議處雍正內閣 上諭

嘉慶五年諭內閣續保奏漕船經過地方向有無賴棍徒勾串水手勒加身工銀兩甚至打船滋事請嚴飭地方官查辦等語此等棍徒勾串漕船水手沿途滋事皆緣漕船經過之文武地方官因循姑息兵役廢弛卽有滋事之案又復任意彌縫化大爲小以至肆無忌憚現當漕務肅清之際不可不嚴行稽察著沿途文武地方官於漕船經過時卽多派兵役認真查拏務令棍徒知所畏懼豫爲斂跡儻此後仍行疏縱致棍徒水手再有勾串滋事之處著漕運總督卽將該處文武地方官嚴參治罪決不寬貸

聖訓

二十三年諭內閣御史費丙章奏請除糧艘積弊一摺糧船水手等倚恃人衆違例裝載貨物夾帶私鹽甚至沿途糾夥尋鬪必應嚴辦示懲如該御史奏本年五月間有浙江溫後幫水手艾三等在山東虎頭灣間勒索錢文毆傷運弁幫役之事著漕運總督山東巡撫嚴飭上緊查拏審明按律治罪至漕委人數屢經飭令裁減其過關關糧人夫費用亦應確數定數又漕船收米時向有飛爬走攔等弊該御史奏請令旗丁執斛倉書行概是否行之無弊均著漕運總督會同該督撫妥議具奏

聖訓

道光四年諭內閣魏元煜奏議禁糧船水手滋事章程一摺近年漕船水手肆惡逞刁凌虐商民船隻必應嚴定章程隨時懲辦以期各知斂戢茲據該漕督酌擬具奏向例各幫船水手以本軍內諳練者充當嗣多雇用本地人夫及外來無籍之徒往往恃衆不法著責成頭舵分別雇用確知姓名籍貫保結存案毋任滋事潛逃至隨幫匪棍勾串水手互相包庇窩盜應飭令運弁將頭舵水手年貌籍貫造冊呈送每名給發腰牌俾泊時按船查驗如仍虛應故事卽行參辦其蘇州常州鎮江揚州各府城河窄狹每有攔阻商民船隻勒索滋鬧著各該營員親駐河干輪流彈壓又糧船過境地方文武應帶同兵役分查催趨著照例實力巡防毋稍疏懈該

漕督仍督率糧道備弁留心整頓嚴加禁約務俾兇悍有所儆畏以肅漕務而安行旅 聖訓

五年諭軍機大臣等御史汪世緘奏請防糧船水手設教斂錢流弊一摺據稱各幫糧船舵水設有三教一曰潘安一曰老安一曰新安所祀之神名曰羅祖每教內各有主教名曰老官每幫有老官船一隻供設羅祖入其教者投拜老官爲師各船水手聯名資助統計三教不下四五萬人沿途緣手尙不在此數水手屬值向例不過一兩二錢近年挾制旗丁每名索二三十千不等及銜尾前進忽然停泊老官傳出一紙名曰溜子紫添價值旗丁不敢不從水手滋事必送老官處治輕則責罰重則立斃沈入河中沿途招雇緣手必推會經械鬪受傷者爲頭目遇有爭鬪以紅箸爲號人卽立聚新安一教尤多匪徒此次欲在江南衆興集地方招人報復因船未渡黃而止此案水手滋事宜設法嚴辦以後遇有滋事皆當加重懲明年備暫行海運此數萬人安保不滋生事端尤宜妥爲安插等語糧船水手膽敢設立教名斂錢聚衆不法已極本年水手因爭船起釁械鬪至四日之久總由該撫等庸懦無能以致肆行無忌若不嚴行懲辦將來藐法之徒何所底止除此案在逃逸犯著程含章嚴拏務獲重辦外並著漕運總督及有漕各省督撫細心察訪應如何示以懲創分其黨與俾運官旗丁不受挾制及地方官不至規避處分有心消弭並兩岸奸民不至互相鈎結悉心籌議弭患未然固不可釀成巨案尤不可激生事端此爲至要 東華續錄

江蘇巡撫林則徐奏臣接閱邸抄欽奉 上諭各省糧船數千號水手不下數萬人必須實力稽查咸知儆畏方不致沿途滋事近日山東東昌府境內廬州幫水手聚衆械鬪一案致斃數十餘命之多且糧船所過地方時有折體斷肢漂流水面皆由水手戕害所致此等積習自宜亟加整頓嗣後糧船所過地方著沿途

各督撫遴派武職較大之營員酌帶兵丁一路接遞巡查遇有水手滋事立即嚴拏有犯必懲毋令一名漏網等因欽此伏查歷屆糧船入境本皆酌派營員會同府廳州縣督帶兵役彈壓稽查惟水手恃眾逞兇已非一日而近年爲尤甚除廬州二幫在東省殺斃多命之外其沿途糾眾圍闖經地方文武彈壓解散者探聞所在多有卽如蘇省之鎮江前後兩幫最爲著名兇悍劫殺擄搶靡惡不爲且與浙江湖州府屬八幫向有積仇各不相下而鎮江幫水次本在徒陽又爲浙船必經之路重運先後開行尙可不令遇見迨回空過鎮輒卽糾約復仇上冬臣得有風聞先期親赴鎮江催提軍船卽督率文武彈壓訪拏酌示懲儆其風始息今冬河乾水淺雖經設法灌蓄亦僅容一葦之杭若湖鎮兩幫狹路相逢定必滋事與其懲辦於事後莫如防範於未形查丹徒境內有江邊之鮎魚套地方清穰背風爲浙船不必經由之處現在鎮江前後幫船均已渡江入境經臣咨會漕臣飭令該兩幫船隻先進鮎魚套寄泊並委鎮江營參將繼倫督率備弁駐兵彈壓俟浙幫全行出境之後再歸兌糧水次以資牽絆互闖是以現在計算進口船數該兩幫並不在內其實已泊本境地面儘可油輪修船卽與歸次無異又查在東滋事之廬州二幫沿途復與鎮海前蘇白糧等幫屢圖糾闖因逐段有官兵彈壓幸未成事但廬州二幫係兌常熟縣漕糧鎮海前幫係兌昭文縣漕糧該二縣既屬同城卽糧船同一水次難保不有滋闖臣現飭糧道量爲調換毋使並在一處其蘇白糧渡黃之後廬州二幫復與接連行走現亦飭令先後挽渡務使分檔隔遠以杜其圖闖之心臣仍派委標營將領並咨會督臣提臣分委武職大員稽查催備一到水深之處卽令晝夜行駛不任一刻停留惟淺處曳纜絞關每段增雇人夫數百名仍形吃力有數刻之久始能挽過一船者前幫未克通行後幫卽皆停泊更須嚴密防

範是以臣仍駐丹徒督催彈壓一時未敢回蘇合並附片陳明伏祈 聖鑒林文忠公政書

十五年諭內閣朱爲弼奏查禁糧船水手滋事酌議章程一摺糧船水手沿途恃衆滋事必應迅速查拏嚴行懲辦茲據該漕督奏稱押運北上例隨尾幫其在各幫難於遙制所有在前各幫水手滋事著責成押運官弁會同地方文武官嚴拏務獲不獲分別嚴議拏獲之犯卽交地方官訊明按律從嚴速辦本船照舊開行前進無誤限期所犯之罪除重應正法輕應枷號外其應發遣並軍流以下罪名訊明後著先於犯事地方枷號示衆俟漕竣後再行覈辦地方官儻有疏縱情弊卽著該省督撫嚴行參辦毋稍寬貸至投充水手定例責成頭舵分別雇用確知姓名籍貫保結又有前後船十家保結有犯連坐嗣後水手有犯頭舵能查明稟報者酌給獎賞十家保稟報免其連坐仍給獎賞其頭舵十家保能將重犯縛送運官究辦者優加獎賞若知情徇隱亦著加倍治罪幫弁於雇募水手到幫及停泊時按船查驗腰牌如敢仍前虛應故事並不認真稽查卽著該漕督從嚴懲辦以儆奸徒而肅漕政 聖訓

又 諭軍機大臣等朕聞糧船水手類皆無籍匪徒性成獷悍均由習教之老管師父招雇上船各分黨與恃衆逞強以致在途互鬪殺傷劫奪行旅之案層見疊出卽如上年山東清平縣地方有廬州二幫水手王汶舉等鬪殺多命今春鎮江前後兩幫水手復敢藏匿刀械施放火器各案是水手逞兇滋事江浙幫船爲尤甚而此外各省恐亦有此惡習朕因科道陳奏屢經降旨諭令有漕省分及沿途各督撫漕運總督嚴行查察隨時懲辦不啻至再至三乃兇悍之風至今愈熾推原其故總由此等匪徒習不長法卽有重案審明後正法數人該匪徒等亦祇視爲故常毫無警畏幾成積重難返之勢現在辦理新漕若不乘此痛加振作力清其源年復

一年伊於何底釀成巨案尙復成何事體因思各省幫船爲數衆多糧道總運各員稽查有未周且運弁既慮生事端旗丁復受其挾制其沿途州縣營汛各員弁又因漕船行走不准停泊卽有械鬪搶劫各案只得將就了事無誤漕行因而化大爲小化有爲無雖奉嚴旨飭查輒以並無案據爲詞一奏塞責而居民商旅隱受其害者實不知凡幾矣又何怪該匪徒等肆行不法有恃而無恐耶似此積習相沿深堪痛恨與其懲治於事後不若防患於未然嗣後各幫漕船受兌之先如何責成旗丁募雇確有籍貫之人充當水手不由老管師交盤踞把持私相庇護至所過地方如何令幫弁旗丁認真管束毋許滋凡竊有鬪毆搶劫等案州縣營汛立卽捕檢治罪不得因屍身拋棄首告無人輒爲諱匿不究其一種竊賊名爲放散風者如何設法稽查不許隨船行走著有漕省分各督撫漕運總督接奉此旨卽將近來所有弊端虛衷商榷實力講求得其致患之源破其久沿之習通盤籌畫因地因時毋畏難而苟安毋因噎而廢食所有一切章程總期提綱挈領簡便易行俾匪徒毋敢溷跡而漕政永保肅清方爲妥善有治人而後有治法該督撫等均有兼轄漕務之責其各體察情形悉心妥議據實詳晰具奏至江廣各幫向募本籍之人充當水手惟浙江幫船係雇他省水手類多無賴之徒把持盤踞沿途往往滋事嗣後水手應如何責成該旗丁等招雇本籍之人充當著該撫一併查明妥議具

奏 聖訓

十六年諭漕船水手人等類皆無業遊民獷悍性成劫奪是其故技全在漕河及地方文武員弁認真查察嚴行懲治庶兇頑羣知斂戢而漕政得以肅清此次會議各條俱臻詳備惟是防弊之法不慮立法之不善而慮行法之無人果能實力奉行不致日久滋懈則懲一儆百自可立挽頹風著有漕各省督撫漕運總督及沿河

各督撫務當遵照奏定章程嚴飭各該糧道遇案卽辦有犯必懲並隨時查察押運員弁及地方文武備邊各員等備敢仍前玩泄虛應故事不能認真查拏卽指名嚴參從重懲處不得稍存姑息致日久又成具文經此次諄諭之後各該督撫等如再狃於積習不能從嚴從實請求整頓將來積久生玩該水手等再滋事端別經發覺惟該督撫等是問 聖訓

江蘇巡撫林則徐奏竊臣承准軍機大臣字寄欽奉 上諭糧船水手人等類皆無業游民獷悍性成慙不畏法漕河及地方文武員弁如果認真稽察遇案卽辦有犯必懲該水手人等自必聞風斂迹乃本年甫經議定章程之後屢有起獲器械及水手滋事之案此時重運經過地方沿河文武員弁節節催提嚴密彈壓水手人等尙知斂迹日後卸運回空稽查稍懈更恐不肖之徒逞兇玩法尤應先事豫防漕運總督約束水手是其專責其漕船經過地方各督撫亦屬責無旁貸著不分畛域一體通飭所屬於漕船回空加意稽查小心防範毋稍鬆懈倘稍涉寬縱或至別釀事端惟該督撫等是問將此各諭知之欽此遵查南漕約計一百幫其船數在四千左右無一不由江南經過而渡黃渡江灌放催提尤貴機宜悉協是以江南文武無不以漕事爲兢兢加以水手獷悍性成無惡不作近年來其風愈熾惟有嚴拿懲辦庶可斂戢地頑前臣等議立章程仰荷 聖明勅部覆准辦理計本年滋事之水手已經拿獲者如王七韓老闊大漢丁朋鈴等俱問擬斬梟恭請 王命先行正法劉汝馨王老劉沈太汪詠順張四高蘇城等俱問擬斬決王富貴問擬絞決徐得生張興名吳俊彭瑞安張富倉吳啟等俱問擬外遣徐贊龍錢占元繆永幅倪啟祥等俱問擬充軍張正奎王桂戴忠林陳兆奎李繼泰張德山吳朝雲侯二薛瑞康侯深義張永林永祥吳金貴胡鼎義王太富

等間擬流徒又拿獲疊次搶劫之夏明輝段添喜歐派發及馬九小沙四馬炳源張萬發楊開泰沈二卽小朱子徐小趙跪兒李成信卽李老李兆華陳八劉三李萬春孫大肚孫四王三朱老等二十犯亦已審訊得實卽儘法分別懲辦以故本年糧船自水次開行以及渡江渡黃凡在江南境上較之往年頗覺安靜惟自東省開河以及北壩水路尤長人數既多難保別無滋事如一船之中在冊水手以十名爲率合全漕而計卽不下四萬人此在船之短絀短檝在岸隨行覓食者更不啻倍蓰所謂青皮散風之類亦卽雜處其間難以數計且回空比之重運更易滋生事端一則帶回棗梨等貨分合售賣計少爭多再則搬攬次年出運之頭篙頭絳如不遂意卽相殘殺謂之爭篙若遇徒陽水淺江面多行數里則又加索旗丁腳費別立名目曰性命錢不特此也積仇之幫每相遇則不相下重運先後開行尙有幫阻隔若回空則此幫泊船之水次卽彼幫過路所經由糾約復仇多在此際且於近數年來均將到次在前之鎮江前後兩幫奏明先泊江邊點魚套俟漸船過完再令歸次以免互擄生事此次仍當循案辦理其自宿遷入境以至黃河北岸之楊莊已派參遊都守帶兵四隊分駐催提自南岸至清江迤下之平和橋又駐四隊淮城高寶以至揚州酌駐三隊揚州城外分設南北兩廳搜鹽價放派員較多及出瓜洲則一路由長江西上一路入京口南行又皆逐段分駐文武委員與府縣營汛相爲犄角如此星羅棋布似足以敷彈壓而免空虛如有水手滋事會合兜擒聲勢亦皆聯絡仍將新定嚴辦章程刊刷簡明告示委員齎往前途按船實貼俾相觸目警心至水手私帶器械原貨搜查然不敢謂一搜之後便無餘贖卽如著名強悍之鎮江前後兩幫前歲回空經臣親駐鎮江於其進口時逐船搜獲大小刀械不下數百件曾經奏蒙 聖鑒而此後續經購製者仍難保其必無

竊謂搜查器械若預定其時其地則若輩先有準備無難寄頓隱藏追時過境遷仍不免礙其鋒刃現擬劃切示諭以軍船無論何處停泊皆准該處文武會合搜查一經搜出卽照新例重辦則無一定之時地而有一定之刑章凡在催償之員皆有搜查之責匿之不勝其匿購之亦不勝其購其勢卽不敢停留既不停泊卽無滋事此亦理之相因而見者也總之水手之逞強在於恃眾而官員之畏葸實恐誤漕今自嚴定新章以來果皆有犯必懲有懲必重當未有不畏法紀者現據稟報入江南境之船約有二十餘幫臣已函商河臣麟慶相度機宜早籌釋放一得啟壩之期臣卽赴清江督催償渡務期迅速南下安靜小心以仰副 聖主諄諄誥誡至意 林文忠公啟書

咸豐元年諭內閣糧船各幫水手獷悍性成往往尋釁鬪毆甚至戕害人命道光十四年曾欽奉 諭旨嚴飭查辦隨時整頓屢經嚴加懲創而積習相沿愆不畏法現據顏以燠奏鎮江後幫漕船行至棗林舖地方該幫後所水手聚集多人與前所水手挾嫌械鬪致斃多命經官兵捕役往擊尙敢拒捕傷人不法已極漕船行走運河督運員弁有約束水手之責豈容任聽恃眾藐法沿途滋事著楊殿邦卽速查明失察之該管員弁分別嚴參仍責成各省糧道嚴飭各幫押運之委員幫弁等於所屬水手嚴加彈壓一路督押進行不准片刻停留擁泊致生事端並著沿途各督撫遴派文武各員分段巡查遇有水手滋事卽嚴拏究辦此案現獲各犯著交陳慶楨親提嚴訊並緝拏逸犯務獲歸案從重懲辦毋任一名漏網以肅漕政而儆兇頑 聖訓

又 諭內閣楊殿邦奏請稽查回空糧船水手一摺江浙各幫糧船水手素稱強悍動輒聚眾勒索停船滋事必須地方文武認真彈壓庶不至滋生事端本年江南豐北廳境黃河漫溢以致東省運河緹道被淹現在回

空糧船均改由獨山湖及坡河行走尤當妥速催趕無任藉詞延誤著沿河各督撫暨各鎮總兵分飭所屬文武營縣督帶兵役不分畛域實力稽查彈壓催令迅速前進以期及早歸次如水手等藉端勒索停船滋事立即會同幫弁嚴拏務獲從重懲辦以戢兇暴而速運行

聖訓

右約東水手

漕運七

漕船 回空事例 各項船隻章程

一回空糧船准帶食米燒煤自通州至宿遷淮安揚州等處逐關查驗扣除免稅放行不得越數多帶

一回空糧船每船准帶梨棗瓜豆等四項食物並土宜共八十四石免其過關輸稅如有多帶各關照例徵

稅

一各省回空漕船行抵關口遇重運尾幫未經出口即在關外停讓如有滿號趕造船隻糧道驗明於船尾

粉書赴廠打造字樣備查先期詳明漕運總督轉飭河員於每幫出口後乘空分塘卽令越幫進關每起不

得過五隻其餘回空漕船俱於重運尾幫出口後再行挨次價進如河內重運連橋行走回空船隻卽於寬

處停讓該管廳員駐宿河干專司彈壓道員往來稽查如有搶關並開官留難勒指該督撫卽指參

一回空糧船除日用盤費錢文准其攜帶外如有將制錢數十百串成捆包挾担稱壓船希圖販賣者卽行

拿究胥役人等亦不得借端需索違者究治

一回空船隻該管運員及軍丁等如有意存怠玩或者惜雇價將熟熟水性之頭舵水手散遣祇留不諳

船水手數人遇有緩急全不足恃並押船員弁未奉上司飭調無故違離不在船督率致有失風等事沿途

督撫查出卽嚴行參辦以上並戶部則例

康熙四年定漕船回空期限漕船抵通州限十日回空倉場侍郎定立限單責成押幫官依限到淮通考

三十四年恩准嗣後漕船回空應令通判管押如徑從陸路回南照差遣官枉道例議處押空過淮遲誤照重
運過淮違限例議處會典事例

乾隆元年定回空漕船所帶食米燒煤江西米四十五石煤四十石湖南米三十六石煤三十二石湖北米三
十三石七斗五升煤三十石江南浙江米三十石煤二十五石各關驗放除其稅三年定回空船舵水人等准
帶梨棗六十石十年又定首進漕船回空時未及梨棗准帶核桃柿餅抵梨棗之數通考

二年定山東自備船回空之例山東自備船令於交糧之日除留頭船一二人通候領鹽羨完呈等項外其
餘各軍給與空身限單勒令回次抵次將軍呈繳各衛所察驗仍將限單填明到次日期彙送糧道考察留通
運軍事竣回次亦如之通考

嘉慶十年諭軍機大臣等前因回空幫船阻滯山東境內居多諭令鐵保前往照料酌給旗丁等銀兩以資接
濟茲據覆奏全漕尾幫於初二日均可掃數出境所有接濟事宜應歸江省辦理並據稱請令江西附近州縣
無論大米小米每船籌撥三兩石又河口現在築壩挑淤需人甚多應令該千總每船雇覓三二人赴工應役
等語旗丁等守泊多時食用自形拮据前據吉綸奏請將江浙安徽各幫船每船酌借銀三十兩二十兩不等
業已降旨准行但思回空幫船食米已盡此事繫給銀兩不特舵水人等支領以後易於花用並恐買米紛紛
致散市價屆奇之弊著以大文會同吉綸體察情形如各幫船食米短缺卽於借給銀兩內酌扣二三成將米
抵給俾資餬口備該地方官存米無多不敷支發現已諭令汪志伊豫爲籌備該督等需用時卽飛咨該撫運
撥散放其江廣幫船現已陸續行抵江境江口卽日通順自可以次過行儻尙需停候亦著一體查明辦理至

築壩挑淤等工需用人夫本多鐵保所稱雇覓水手應役事亦可行泊船之日舵水等一無事事游手好閒尤須防範莫如雇募赴工得受夫價既可倣以工代賑之法亦不致滋生弊端並著姜晟等酌量辦理現在黃水大落河口卽日暢順其各幫船之在途次者並著該督等嚴飭弁丁協同趕緊催駛渡黃總以多得一幫歸次卽得一幫之用不可再有稽滯爲要 聖訓

道光十三年諭內閣貴慶奏籌議回空軍船速歸水次一摺本年重運抵通時日太遲節經降旨嚴催俾得迅速回空毋誤歸次茲據該漕督奏稱近年新定章程沿途添派漕屬備弁搜查私鹽爲向來所未有糧船經過查鹽處所各幫停候搜緝卽遇風色順利之際亦不能不守候稽延自天津至山東于家堡等處漕屬備弁共十八員添設以來報獲私鹽寥寥有名無實且隨帶跟役難免滋擾似此滯運累丁轉滋流弊自當仍照舊章辦理著該漕督卽將近年添設查私各備弁全行撤回各幫丁舵人等既無可藉詞延宕務令迅速通行毋許稍有遲滯 聖訓

又 諭內閣前據貴慶奏籌議江廣回空軍船酌增食鹽給票交課章程五條調劑旗丁當降旨交陶澍體察情形悉心妥議該督於接到該漕督咨文卽力陳誤鹽且致誤漕議駁明晰特降旨令直隸總督等仍嚴飭沿河營汛州縣查拏梟匪窩囤堵截私鹽透上漕船其已撤摻查漕弁仍行添設不准帶私停留茲復據陶澍奏旗丁得項不爲不厚揆其苦累之由多緣旗丁任意銷糜且受兌開行以至通倉交卸均不免受人勒索如果禁絕諸弊漕務少消耗之數則丁力自舒不但淮鹽藉免充塞卽弁丁挑斥米色橫索幫規亦可斂戢備旗丁中有刁玩之徒敢於侵蝕正糧拆賣船器必當執法嚴懲豈可慮有此弊而豫爲調劑事請益時時議加不

但國家無此政體必致不肯旗丁特有調劑不知止足是除弊而轉益滋弊現在回空船陸續抵入江境該督卽遵委道將帶同廉幹員弁沿途堵緝糧私並於揚州以至蕪湖九江等處實力查拏有犯必懲著漕運總督督同各糧道通計每年經費量入爲出自准送通確查積弊嚴禁弁委胥役之勒索並著倉場侍郎通飭各倉監督嚴查經紀人等捐勒苛求務期弊端淨絕不使旗丁有所藉口以肅漕政而杜糧私 聖訓

又 諭軍機大臣等據御史許球奏本年九月初三日前任漕運總督貴慶奏江廣回空軍船請每船准帶鹽四十包每包百斤給票至揚交課貴慶一面具摺一面卽鈔摺行文通幫無不知曉各幫丁久不沾帶私之利自有撤回幫弁之奏已有躍躍欲試之心及奏請帶鹽遂敢公然售買並聞每船捆運竟有不止四十包者現奉旨堵截其隨幫風客一經查出自應嚴辦若實係旗丁水手正身與自行起意販私者究有區別幫丁均係愚民甚至多方借貸冀露餘潤現在照舊摺查伊等購買之資均歸烏有利未獲而轉觸科條法既行而全虧資本兩江總督原以緝私爲重但新漕全局亦宜熟計通籌若一味濟之以猛是貴慶籌議卹丁非徒無益而又害之殊不足折服幫丁之心江廣幫船人數衆多萬一鋌而走險另起釁端必致大費周章貽誤歸次請飭總督陶澍署漕督恩銘妥速籌商務令鹽漕兩利等語前據貴慶奏江廣回空軍船請每船准帶鹽四十包並未降旨准行何以通幫均行知曉是否貴慶一面具摺一面鈔摺行文並擅行出示曉諭各幫抑或該幫丁見貴慶八月中撤回查私幫弁之奏竊疑禁令稍弛卽公然私自攜帶著陶澍恩銘秉公確切查明據實覆奏其隨幫風客及出資附和梟匪一經查出自當從嚴懲辦各幫丁實有多方借貸冀露餘潤貼補長途轉運實情該督等應如何妥行設法相機辦理固不可任蕭牆占礙准綱尤不可令幫丁滋事致誤新漕兌運

江蘇巡撫林則徐奏竊照本年回空南下較遲鎮江運河潮枯水淺京口沙灘涸露難以通舟當經查照成案改由橫閘行走旋據府縣稟報十一月初八日以後西風大發江潮消落異常閘口露出之沙反高於江面之水並橫閘亦難進船臣得信後卽馳赴丹徒鎮駐劄親率常鎮道李彥章暨鎮江府縣設法攔蓄並於附近運河各處尋覓積水引灌濟送一面分段派員多雇人夫拉船撈淺催提各幫陸續進口業將辦理緣由並催過船數先後具奏欽奉 硃批務要竭力盡人事以理之不可藉口諉爲天時水勢也勉之欽此臣跪誦之下倍當竭誠盡慎將幫船速挽歸次以慰 宸懷臘月以來雨雪疊霑正喜運河得以長水而連值北風狂大江中數日未有船行軍艘尤不宜冒險加以雪後嚴寒內河凍結後飭署鎮江府王用賓署丹徒縣張寬培多備敲冰船隻晝夜開鑿十二月十二日河道始通亟令署京口協副將張成龍察看風色稍平卽親帶幫船折餞渡江常鎮道李彥章與鎮江營參將繼倫來往江干互相策應每當阻淺阻潮阻風阻凍之際在事文武各員倍加焦思竭慮設法籌催不敢稍遺餘力除提前之浙江幫船先經過竣其江廣幫船亦已全數出江外茲截至十二月十九日將先泊鮎魚套之鎮江前後幫船作爲尾幫亦令進關歸次統計江浙兩省回空共六十二幫計船二千二百零四隻掃數由橫閘跟蹤南下各歸水次查軍船自道光八年以後歷由橫閘進口然少者僅數百隻卽多者亦止一千餘隻從未有江浙兩省回空之船全由橫閘行走者今冬河水至乾而經由橫閘之船較之歷屆多至兩三倍臣惟恐回空不能全進致如從前留在外江過年則新漕幾難提前催辦幸荷 聖主洪福自進口以迄竣事計三十五日各幫到次修驗均在歲前可期

連爲開兌且於連旬風暴之中各將領往來江上提帶二千二百餘艘並無一船疏失臣恭釋竭盡人事之旨下忱感幸悚惕彌深在事出力文武各員本係分內應辦之事惟此次辛勞繁費實與常年催餉迥不相同伏查道光八年橫關催船一千一百餘隻仰蒙 恩旨量加鼓勵此次船數加倍可否循照八年成案准予酌獎之處出自 聖主鴻慈如蒙 恩允容臣會同督臣擇其尤爲出力之員覈實具奏林文忠公政

書

二十九年諭軍機大臣等福濟陸建瀛奏接奉前旨籌辦回空情形一摺覽奏已悉本年因敢放吳城六堡以致運道淤淺前已有人陳奏嗣據楊殿邦奏參誤運工員並稱淤墊情形較重軍船阻滯堪虞疊經降旨令福濟陸建瀛悉心籌畫安速辦理茲據奏稱由高郵寶應湖流而上逐段測探水勢尙非甚淺沿途軍船與載貨船俱暢行無阻見在頭二塘業已灑放亟應趕灑三塘所籌將太平河存船暫移太平江騰出河身之處見既勘明事屬可行該漕督亦無異詞延宕著福濟陸建瀛會同楊殿邦楊以增迅即催提放渡務令回空各船剋期歸次庶可以速補遲仍飭將淤淺處所責成楊以增督員與挑或築壩留溜刷沙非但攻淤並堪濟運方爲妥善如河員稍有延玩立即嚴參治罪備運弁旗丁藉口刁難有意稽遲亦著楊殿邦隨時重懲事關軍船回空兼籌明歲新漕重運諒福濟等必能星速籌辦以慰朕廑也東華續錄

又 諭軍機大臣等福濟陸建瀛奏回空軍船掃數渡黃並催越歸次情形一摺又片奏勘明引河淤墊酌擬疏挑並繪圖呈覽等語覽奏均悉本年節候已晚回空軍船見雖掃數渡黃惟摺內於各幫歸入運河陸續歸次並未議及若止就淤蓄之水引渠宣洩則是涓滴一止仍形淺闊豈能無誤著福濟陸建瀛接奉此旨迅即

設法疏通淤墊將各漕船催提南下務令各幫剋期歸次東業續錄

咸豐元年諭內閣漕糧爲天庾正供近來重運漕船不能如期抵壩以致回空歸次兌收新漕節節耽延本年幫船北上疊據該漕督稱運河水勢充盈行走較爲順利惟南河豐北漫口黃流下注屢經降旨飭令東南兩河總督妥籌宣洩諒可無礙漕行現在節近霜降亟應嚴催回空幫船趕趨歸次庶於來年受兌新漕不致有誤著漕運總督嚴飭起卸空船卽日連橋南下不准片刻停留並著東河南河總督及有漕各督撫分飭地方官嚴切催提及早歸次來年新漕尤當趕緊辦理按限兌開於四月初十日以前催抵清江剋期渡黃無許稍有延誤儻意存怠玩仍於例限有逾定將該漕督及各省督撫嚴行懲處決不寬貸

聖訓

又諭內閣顏以燠奏湖河漲漫籌辦回空漕船一摺山西省徽山等湖因江南豐北漫口黃流下注蕩漫隄頂一片汪洋當此回空軍船銜尾南下之時急應妥籌宣洩著東南兩河總督各就地方情形督飭該道廳趕緊設法疏通俾下游暢達漫水漸退庶回空可以無誤其運道湖河相連處所據顏以燠奏設立水站多屬縲船插標導引漕船當可一律暢行不至誤入歧途轉多周折若能迅籌分洩清出緯道更爲穩妥

聖訓

又諭內閣顏以燠奏南糧回空幫船全數催出東境請將出力員弁量予鼓勵一摺糧船回空催趲出境本係歷年地方應辦之事惟念今年係南河豐北漫口水溢幫船改由湖坡行走輓運維艱與往年催趲情形不同著該河督擇其尤爲出力者酌保數員候朕施恩毋許冒濫嗣後不得援以爲例

聖訓

同治十一年諭軍機大臣等何璟奏江北河運漕船全抵臨清請飭築壩以備回空一摺十年分江北河運各起漕船已於八月初間全抵臨清卽用原船徑赴通壩交界惟八里廟一帶黃水長落不時此次各船於五月

間行抵該處節築壩蓄留破水始克暢行無滯直達臨清將來漕船回空時仍須預爲籌畫著丁寶楨文彬廣飭沿河各州縣俟漕船回空過境時認真築壩蓄水設法濟運俾得迅速遍歸何璟一而飭令王大經留派妥幹員弁會同東省各員速爲辦理以免臨時遲誤東華續錄

右回空事例

康熙三十四年題准各省升糧既多停其帶運總漕將升科糧數預先題明撥船載運會典事例

乾隆四年定重運遇淺駁運例凡重運漕船所經過淺起駁漕運河道總督奏明卽飭所在有司官具民船駁運有司官將駁過各幫運軍名船米貨物及駁船屬直各數呈報漕河督撫並巡漕御史其駁船屬直憑有司酌給如有扣剋勒索者罪之通考

十一年增設空船 國初以漕船至天津起撥分運至通設紅撥船六百隻每船給田十頃養贍免其徵科至康熙三十九年裁革紅撥船接原給田所收租額分派各省於漕糧項內徵給運軍雇船撥淺乾隆二年定每船給

紅撥銀二兩至是北河增設空船六十號祇夫百八十八名淺夫三百名隨時疏濬以免丁累其置造修葺器具夫工等費于紅撥銀內動支餘銀仍照數分給運軍以備撥淺之用 通考

五十年議准官備駁船一千二百隻交附近沿河之天津靜海青縣滄州南皮交河東光吳橋通州武清香河文安大成任邱雄縣新安肅州安州等十八州縣每船募船戶一名每名給腰牌一面填註姓名年貌住址船隻號數造具花名清冊以杜頂冒舵工水手聽船戶自行雇覓每船以四五名爲率其空閒時按派定州縣發回收管如有商貨鹽斤均准攬載四月以後不得攬載遠行聽天津道行文調赴水次應用儼臨期遲誤該管

州縣照例參處備有銅船及奉天麥豆與南漕同時開駁即將駁船撥給一百號發交天津縣分別駁運其餘一千一百號專駁漕糧除駁運銅鉛麥豆等項令運員照舊給發工食其駁運漕糧自楊村至通州每百石給船戶飯米一石二斗駁價制錢六千文酌以三千文給船戶二千文給還旗丁一千文扣存道庫爲歲修油艙之用並令副丁親身押運如運船至蔡村河西務一帶起駁其應給飯米水脚按照水程遞減此後應須油艙每歲酌給銀五兩每屆三年酌給小修銀二十兩在於天津道扣存駁價內動用由各州縣轉發並令總漕將運船幫數遠近預行咨報直隸總督徑行天津道預調駁船備用起駁時委楊村通判務關同知親詣點驗挨次輪駁如頭進漕船起駁則調至六百號爲止俟二進將到再行增調若有一船過期不到著地方官查拏其駁船到通限五日內免收責成通永道查辦至駁船十年排造即將滿號軍船應行拆變者照例給價買留爲改造駁船之用至拆造船隻應於第十年擇其損傷過甚者分作三次每年拆造四百隻每船給料價銀二百五十兩除動用節年存剩駁價外不敷銀兩在商捐項下動給如次年已屆拆造則本年止准油艙其小修銀兩停其給發以節糜費會典事例

五十一年諭現在駁船一千二百隻尙不敷用添造駁船三百隻交江西湖廣動項趕造於漕運事宜更爲有濟著照上年辦運駁船之例就近動項趕辦運送至津備用會典事例

嘉慶十一年諭軍機大臣等奏行簡奏雇用民船頂補官駁情形一摺據稱直隸省雇用民船抵補官駁每船一隻給發雇值銀十七兩又每裝米一百石各旗丁給與船戶食米一石二斗水脚制錢三千文向俱如此辦理嗣因各州縣經理不善任聽胥役妄行封貼以致船戶等行賄投充冀免差使而州縣又規避處分是以案

無發覺現在密速查拏並熟籌妥議等語各船戶受雇營生惟利是視既有官給雇值銀兩及食米水腳錢文如果寬然有餘焉有不踴躍從事何以多方規避不願受雇轉紛紛納賄投充希圖倖免且本日召見瑚素通阿據稱連日訊問各船戶納賄之數有一船用銀二十五兩者是該船戶等畏避差使不但不願得官府雇銀十七兩及食米水腳等項轉又自出銀至二十五兩之多試思船戶等皆係貧民並無多餘貲本若非官吏逼迫太甚焉肯花費如此其故皆緣地方官雇用駁船毫無限制每州每縣應雇船數隻十餘隻則將沿河所有船隻一概封雇以便勒索實放而每年四五月間應需船隻早於上年冬間預爲封禁直至次年九十月始准放行時日既多費用亦夥况官給之項大抵被胥吏等層層剋扣未必照數給收州縣等規避處分卽有見聞未必查辦甚或有藉端派累之事均未可知若不明定章程弊將何所底止嗣後雇用船隻皆當有一定數目卽欲預備稍寬亦須酌定限制約計每實需船一百隻著多雇船二十隻準此增減不得浮多至雇船之期不得太早卽恐臨期遲誤亦祇可早十日預備仍按日給予守候之費迨一經用過卽當隨時飭放不准留梢再當體察船戶情形如每船給雇值銀十七兩裝米百石給食米一石二斗以及另給水腳錢三千文之處是否實在敷用儻尙不敷亦當酌量籌款奏請加增不可稍令苦累仍於給發時留心稽察毋許剋扣如此妥協經理則船戶等孰不情願趨赴更何躲避之有儻再有規避執法重懲亦不爲枉矣

聖訓

十六年諭內閣倉場侍郎會同巡漕兩御史議奏李亨特請將南糧全數自楊村起駁到壩一摺所駁甚是南糧軍船例應到通起卸偶因楊村水淺不得已始用駁船原非定制駁船除官設一千五百隻之外其由直隸派戶者卽不能及官設之數軍船遇水大之時起四存六遇水小之時起六存四向係輪轉應用惟三進軍船

末後數幫因恐回空太遲間或全數起駁亦緣三進之後更無幫船始可將駁船儘用今若照李亨特所奏頭二三各進幫船於行抵楊村之時俱令全數起駁則所需駁船過多何由敷用勢必前後積壓欲速轉遲重運回空豈不兩有耽誤所請斷不可行李亨特曾任坐糧廳乃不能諳悉情形率爲此奏殊屬冒昧著交部議處

聖訓

道光十四年諭內閣鐵麟等奏請預籌三進駁運無誤以速回空一摺本年南漕到場較上年爲尤遲必須迎駁起卸以速補運方不誤回空例限茲據該侍郎等奏稱本年除起駁二進漕糧毋庸添雇民駁船外其三進漕糧全數在津迎駁共計四十幫米數一百六十六萬餘石較之上年寄駁之米多至一倍有餘自應寬爲雇備民駁船隻以資轉運而速回空著該侍郎等卽預飭天津道分飭沿河州縣多備民船妥爲經理並著直隸總督一體轉飭預備以期漕運無誤 聖訓

十六年諭內閣前據御史王藻奏運河官駁船隻請覈實查驗當交琦善覈議具奏茲據該督查明直隸舊設官駁船一千五百隻添造船一千隻均於漕船未到之先調集楊村驗明備用各省軍船果能按限早來此項船隻原足敷撥運之需近年因渡黃逾限以致沿途阻滯首進前幫既因運河水小全行起撥其二三進幫船又因行走脫空河水未長不得不預籌添雇民船是駁船之不敷不在船數之短少而在撥運之擁擠等語各省漕船北上屢經降旨飭令冬兌冬開限於四月初十日以前全數趲至清江剋期抵場跟接渡黃前進如果依限趨行則沿途不致稽延入關可期迅速又何至抵津逾限迫欲回空在後各幫全數起撥致令船數不敷勢須添雇其臨事周章均由渡黃遲延所致著有漕各省督撫暨漕運總督通飭各該糧道等本年回空以後

趕辦新漕務當欽遵定限冬兌冬開總於四月初十日以前全數抵壩候渡不得節節耽延稍逾例限致天津以北屆期擁擠起運專賴駁船兼有封雇民船別滋擾累之事經此次諄諭之後毋得仍前玩泄不能迅速遵行致誤全漕期限自干咎戾 聖訓

三十年諭內閣戶部遵議楊殿邦奏官駁油船錢文請照舊例等語駁船修費向於旗丁例給駁價內扣存制錢作為歲修之用如再將不敷銀兩責令攤出丁力未免拮据且修船銀兩改發制錢所發外尚有贏餘儘可充添補不敷之費著照該漕督所奏仍遵舊例妥為辦理毋庸另議更張至天津道庫每年收各省油船銀兩除動支外留存若干著諭爾經額速飭分晰查明造冊報部以憑查覈毋任延宕 聖訓

又諭內閣諭爾經額奏籌辦迎駁南糧情形一摺本年南糧重運因在途節節耽延現抵山東境內節候已晚自應籌辦截駁以免回空遲誤惟此次楊村駁船除已分遣迎駁外餘船一千五百隻已儘數解赴臨清若在連鎮安陵一帶截駁又須添雇民船難期應手著漕運總督山東巡撫仍照倉場侍郎原奏在於臨清截駁迅調東省小米軍船並官民駁船將江西後六幫湖南三幫糧米裝運抵通毋得互相推諉致誤回空期限 聖訓

咸豐二年諭內閣前因李德奏請預籌駁運曾經降旨令倉場侍郎直隸總督卽飭將楊村駁船調集一千五百隻迅赴臨清插挨次駁運毋致稽延該侍郎等接奉諭旨卽當飭令該道迅催駁船前往迎駁卽駁船不敷亦當酌撥數百隻迅速轉運本日慶祺朱嶠奏接據天津道張起鵬稟稱計駁船趕到臨清河水恐已凝凍且口糧需費甚鉅道庫無款可墊又恐有誤來春供撥請將浙省各幫於臨清德州等倉暫行截卸俟來年再為

轉運等語似此推諉空言止憑該道一稟率行入奏全未籌畫倉儲急需及鄰省辦理難易情形概置不問豈
竟諉之山東但以一奏了事邪本年南糧遲滯固由河道阻礙而浙江幫船開兌遲延亦從來所未有如果漕
運總督並沿途各督撫同心協力及早設法催撥何至如此貽誤乃江南漕船以勉強催至山東境爲卸責迨
至山東需用直隸駁船又不趕緊籌撥觀該道張起鵬所稟名爲實在情形實則推諉不辦且既知撥運周章
豈不思截卸有無窒礙邪見在浙江嘉杭等幫米石如能撥船趕運當仍遵前旨酌撥楊村船隻趁此天氣晴
和迅往撥運設或沿途必須截卸臨清德州等倉是否足資容納著倉場侍郎直隸總督漕運總督山東巡撫
各將見在應辦急務迅速妥爲辦理毋得任聽屬員推諉照習各分畛域再致貽誤懷之東華續錄

同治九年諭軍機大臣等李鴻章奏漕運駁船不敷周轉請及時籌備一摺因天津駁船不敷曾國藩請由直
隸分年排造九百隻經戶部奏請仍由江西湖南湖北等省排造解赴直隸應用當經降旨允准茲據李鴻章
奏稱來歲南漕抵津若待江西等省駁船趕到誠恐緩不濟急請先行撥款趕辦等語漕糧爲天庾正供關係
甚重李鴻章豫籌各節自係實在情形著戶部先行撥借銀十二萬兩解赴直隸交李鴻章收納該督接到此
項銀兩卽責成天津道就地趕造駁船一百隻一面招商由海道赴南購運木料到津續造二百隻務於明歲
漕前造齊以備應用此項撥借銀兩著李鴻章郭柏蔭劉坤一劉崐於江西湖北湖南三省照數攤解戶部歸
款其餘應造駁船六百隻並著李瀚章等飭令各該省承辦各員勒定期限趕緊分造務於明年夏初黃運水
漲時解送直隸毋得稍有遲誤

聖訓

右各項船隻章程

皇朝政典類纂卷五十五

漕運八

運軍會選 優恤運丁 考核功罪

一各省屯丁例應備僉責成糧道概按四年一次編審屆期造具細冊彙送總漕核實題報江南江淮興武二衛之黃快丁湖廣岳州荊州荊左荊右沔陽五衛之操軍赤軍俱與運丁一體編查勿令軍民相混藉詞晚漏凡隸軍籍之丁遇應行僉補時隸文學生員專攻舉業者准其優免外無論紳宦富戶准令子姪家人代辦並貢監武生武生遇歲試之年呈明學政准俟運回補考以及大小衙門書吏官承准令子弟承領出運俱一律僉選

一軍丁不許混入民籍如有捐納並中式官生於四年編審冊內註明不得冒填民籍違者參處

一湖北省隸江南徐州衛之什軍屆編審之年徐州衛詳委千總一員赴楚會同編審如所住之村落未滿百戶附入民戶編查仍免當差以上並戶部則例

順治九年覆准舊例用黃快船以運貨物設運船以載漕糧邇年運軍苦於運糧每多竄入黃快丁該管官嚴行清勾會典事例

十二年覆准軍丁勿許竄入民籍責令該管糧道分別造冊五年一編審倘有朦混不清及受賄擾民者指名題參會典事例

康熙四年題准衛所內倘有不法強徒強索民間富戶與遠年絕軍同姓者幫貼運費總漕督撫嚴查究治會

典事例

二十二年題准運軍不許投竄別差倘有避運投旗隱漏不報者總漕卽行題參會典事例

二十五年議准各省衛所運軍舊例每船自十名至十一二名不等今酌定每船額設十名各省一例僉差會

典事例

四十一年題准江南江淮興武二衛無贖運屯田原減駕車二名准其照舊增設會典事例

四十五年覆准全漕杜欠務在僉軍須用殷實誠厚之人僉軍之例親僉責在糧道舉報責在衛守備用會責

在運弁保結責在通幫衆軍一軍無保不准僉運一軍有欠衆軍同賠會典事例

五十一年題准僉差運軍必須千總保結呈報衛備府佐等官驗看加具印結如有欠賬者將各官一併參處

會典事例

五十二年題准湖廣僉軍責成衛備其道府府佐貳官照舊驗看加結會典事例

五十三年題准江西屯田悉歸州縣管理其僉差運軍卽責令州縣保結會典事例

六十一年題准糧船回空額設副軍務令親身押空其雇募頭舵工及水手取具互保各結報明該管官存案

會典事例

雍正三年題准各省幫船雇募水手及頭工舵工責成衛備及領運千總令前後十船互相稽查並取本軍甘

結十船連環保結一船生事十船連坐糧道及押運等官沿途稽查並許地方官會同查訊倘有隱匿不報者

總漕查出一併題參若總漕不題參別經發覺者將總漕一併交部嚴加議處會典事例

六年奏准舊制凡軍籍內身家殷實堪充運者概行勾兌並以十名爲率會二軍八著爲定額其各衙門書吏承差及生員餘丁皆在兌運之內嗣後除文學生員專攻舉業者准其優免外其掇納之俊秀貢監及武生均一例兌運會典事例

又題准各省衙所於糧船未經抵次之先務選殷實運軍驗看註冊俟糧船回空如領運之軍有犯事故者卽將註冊軍名兌補倘有兌選不實或賣官差貧將經兌看驗各官照例題參會典事例

乾隆八年題准江淮興武二衛運軍每有竄入黃快船內躲避兌運之弊嗣後黃快船丁仍歸民賦項下辦理將現運及備兌餘軍逐一勾考每戶下將子孫兄弟及兄弟之子若干並住居州縣都圖鄉鎮逐一開註五年一次造冊送部稽察如有隱匿查出將該軍按律懲究該管官照例參處會典事例

二十三年奏准凡隸軍籍富戶紳宦如本幫有人駕運原可暫緩兌運如丁力已疲實應另兌者卽富戶紳宦徑行報兌敢有捏控狡辯按律治罪會典事例

又議准江淮興武二衛運餘各丁逃竄入快嗣後遇幫缺丁一快一運挨次輪兌每遇兌快之時州縣舉報殷實正副二人具結送道驗明發幫領運會典事例

二十六年議准凡軍丁值兌選之年無論衙門書吏官承一體均兌如己身在公卽令子弟承運不得藉詞抗拒如有以衛籍冒稱民籍圖避兌運州縣官朦混出結照例議處會典事例

二十七年題准凡兌選新丁祇令千總結報衛備知府驗看加結詳道定兌其同知通判點驗之例永行停止

會典事例

二十九年漕運總督楊錫紱奏竊查江南江蘇等府每年起運漕糧一百五十餘萬石內除蘇松等四衛船五百餘隻外其餘一千七百餘隻均係江安所屬十衛船隻協運本年四月間江蘇按察使胡文伯以江安十衛去蘇松水道里遙遠每歲兌運回空遇有應行更換之丁運官赴衛查驗往返需時以致受兌之時官丁俱難按期齊集請令協運蘇松漕米之江安十衛將各幫家道殷實聞丁預行查選大幫三十中幫十五小幫十名造冊呈送糧道點驗之後轉送總漕存案每年於糧船抵通後查有應行更換之丁乘總漕押運抵津時幫弁就近報明卽查預備丁冊按名次點定某丁派管某船飛行各衛傳齊新點各丁限令十月初間在鎮江守候船一渡江卽押船離赴水次候兌則官丁俱得如期到次不致受兌遲延等因具奏經戶部議覆定例糧船未經抵次之先原有預選殷丁註冊之例日久法弛或有臨時高下其手亦未可定至大中小幫酌定名數之處原例未經議及應併行令漕運總督量照情形酌定辦理移咨到臣臣查原任按察使胡文伯之條奏因江安十衛道途遙遠臨期更換恐或遲延而未計及預簽聞丁之無益而滋擾部臣議准蓋因原有預簽殷丁定例故不但江安十衛而并令推行各省而不知各衛幫丁今昔情形之不同卽定例亦難膠執若以部議已定卽勉強奉行轉非所以仰體我皇上政求實濟之意所有預簽聞丁其不必者有二不便者有二謹爲我皇上陳之各省衛幫貧富原有不同殷富之幫年年長運且有子孫世守者每歲原無需換丁卽間有一二應行另覓者幫弁隨覓隨得亦無俟於聞丁之預備其貧疲之幫或地處瘠薄或本無屯田或自來人丁稀少每歲遇有應換之丁卽卽計搜查求一二殷丁而不可得又安有數十名殷富聞丁可以預選其不必一也又軍丁俱屬草野小民所謂殷實不過有田能耕有屋可住計其生業較

勝窮人耳非真有千金萬金之富也此等軍丁或遇收成歉薄一二年後卽轉爲貧乏者有之今採數十名之多預行註冊設需用之時而名次在前者已經貧乏將舍之而僉其次則人人得以有詞將據册以定僉則仍屬以疲丁應選其不必二也又原奏令衛所選定殷實聞丁送道點驗此無論通行各省徒多紛擾卽江安一道所轄十衛計船五十二幫無故而驅每幫數十聞丁僕僕赴省點驗或加以吏胥阻抑時日稽延豈非徒令小民廢時失業乎其不便一也又衛所州縣書吏多喜於有事每年幫弁或需一二換丁臣與各道嚴行申飭猶恐此輩不無滋擾今一幫而忽僉報數十名聞丁則若輩因一報十於中取利究之富者賄脫貧者勉強受僉其不便二也臣查各省需丁俱於回空後更換並無遲誤卽江安十衛協運蘇松各幫臣辦理已經七年每當受兌之期官丁俱趕赴水次重運北上一體開行並無遲緩可知兌運遲速總在各道之實心經理並不在聞丁之預僉應請將預選聞丁註冊之處停止庶各省軍丁不致擾累而於漕運亦爲有益四知堂集

三十七年奏准軍丁一項除向未歸運不在僉派之例者與民丁一體停其編審其各省運漕軍丁四年編審一次會典事例

三十八年議准湖南岳州荆左沔陽三衛操軍與運赤二軍一例勾僉而荆州荆右二衛操軍祇幫運費並不

出運嗣後應照岳州等衛之例一體僉運會典事例
四十一年定僉選運丁責成衛備每十船中擇有身家者立爲什長自領兌至抵場皆令監管十船無欠糧道獎賞如有不肖軍丁許令出首免罪通同作弊一體究處會典事例

又議准江夏武昌嘉魚咸寧蒲圻崇陽通城興國大冶通山漢陽漢川沔陽黃岡麻城京山十六州縣共清出徐州衛什軍七百七戶卽令徐州衛詳委千總一員赴楚會同編審如各軍所住村落未滿百戶附入民戶編查其民戶雜差仍一體寬免會典事例

四十二年議准倉軍賣令伍長公報將昔貧今貧昔貧今富字樣於四年編審冊內註冊送部倘有不實將伍長究治經倉州縣一併查議又快運二丁接頂疲丁船隻如有舊丁積欠勒令新丁接受立卽查明究治又快丁新倉到幫應領錢糧統歸經管旗丁支領糧道將銀米確數按款刊單給快丁照數支領又江淮興武二衛運船應令運快劈半分認運丁之船以運戶更倉快丁之船以快籍倉補其快丁未經倉足仍照向例輪倉俟倉足之日照此辦理如應換之船高下不等應責糧道秉公覈明如應大造者兩隻卽一運一快分掣一隻則先運後快其非輪大造者無論年分遠近運快各半均分又快丁或係商販農工新倉到幫不善駕運情願捐貼運丁亦情願受貼者准令快丁貼費銀一百三十兩於漕糧未兌之先預報糧道給丁代運逢大造之年再貼造費銀三百兩快丁之名仍留軍冊沿途風火事故著代運之丁辦理又疲丁最少之江淮頭幫興武三幫准其循照什軍之例一丁倉運九丁幫貼責成伍長據實查明公議倘查辦不實伍長從重究治至快丁規避出費者卽令倍加貼費以濟貧丁並令州縣於倉報快丁時隨報什軍備案糧道秉公察覈會典事例

四十八年議准各省州縣衛幫承倉運快各丁均以奉文倉派之日起限兩箇月倉解詳報道府查驗後發幫管運並令該管道府查明該丁田地房產造具細冊送總漕衙門存案設有虧短掛欠查明賠補若倉派之後實係實富差貧誤公滋事或棄船脫逃或將已革之丁重倉或將軍丁改入民籍者將承倉之員實降二級調

用不准抵銷並將該管上司議處會典事例

又議准江西兪丁令州縣會同在次衛弁秉公兪解仍照例聽府道查驗倘有遲延脫逃等事該州縣與衛弁一體嚴加議處會典事例

五十二年議准江淮興武二衛快丁幫貼運費及造費銀兩責成該管州縣定限催徵解道轉解淮安散給各丁限內未完將經散各州縣按照分數指名查參會典事例

五十三年諭嗣後江以南各省運丁竟當專交總漕會同地方官慎選兪派江以北各省運丁卽交該督撫慎選兪派以專責成不得仍前將疲乏之丁湊數充補著該部妥議具奏欽此遵 旨議定江以南之江蘇安徽浙江等省專交總漕江西湖北湖南並江以北之直隸山東等省交該督撫管理如州縣衛備以疲報股兪資賣富道府徇隱故縱責成專管之總漕督撫查辦其專歸總漕管理之省分仍准各督撫查參交督撫管理之省分仍准總漕查參會典事例

五十四年議准各省編審軍丁如四年之內家產稍有消乏隨時另兪接運令糧道同各道府督率衛所實力查察會典事例

又議准各省編造軍丁倘有故縱殷富及竄入民籍等弊將營謀之本丁發往黑龍江給兵丁爲奴該丁之弟兄子孫仍編軍籍兪派辦運會典事例

右敘選

康熙二十年議准漕船凍阻將通濟庫銀借給仍令總漕將應給漕贈銀照數扣解補還原項會典事例

雍正四年諭總督倉場侍郎旗丁載運天儲每歲勤勞朕屢降諭旨加恩優恤欲其俯仰充足不至匱乏近聞糧船抵通石壩經紀勒索料費每船至三十金在從前旗丁多帶貨物射利營私所過地方不無需索煩擾故抵通之後有此陋規今各幫旗丁遵守法度押運官弁約束亦嚴所帶貨物有一定額數不敢多攜除所給行月糧外安有餘貲以爲斛資爾倉場總督可嚴飭坐糧廳申飭經紀嗣後糧船抵通除應加耗米外不得借斛費名色索取銀兩亦不得淋尖踢斛以致正糧虧缺苦累旗丁倘有違者必嚴加治罪若該管各官失於覺察經朕訪聞亦必從重議處雍正內閣 上諭

六年諭浙江原任糧道江國英奏內旗丁名下應扣借支銀一十三萬四千餘兩朕已開恩准作八年扣補今查浙省旗丁名下又有造就帆船案內應扣銀二萬八千六百餘兩當於兩年內扣清完項朕念旗丁運糧辛苦若於兩年內扣還虧欠二萬餘兩恐伊等力量不足稍覺艱難著開恩寬作五年勻扣以示朕優恤運丁之至意雍正內閣 上諭

十一年諭漕船停運之年該運丁等向來給與一半月糧以資養贍蓋伊等全賴漕船出運將月糧等項贍養家口並可順帶貨物以取利益若遇停運則養贍無資所給一半月糧正不可少之經費也本年江南停運漕船朕尙軫念運丁艱苦於一半月糧之外將應支各項悉行賞給今阿林乃請將停運漕船之應支一半月糧停其支給甚屬卑鄙不堪著交部察議具奏雍正內閣 上諭

乾隆十三 諭本年四月初間湖南江西運船於桃源宿遷地方遭風沉溺重船五十隻所有虧折米數例應運軍買補其船亦應賠造但念窮軍力量艱難若令一時賠補難免拮据著加恩軫卹其船已滿年限者照例

給價成造未滿年限者於道庫內借給令其及早成造限以三年陸續還款以紓軍力至此次失風實非人力疎忽所致運官及汛地各官均著免其處分會典事例

五十四年諭軍機大臣等本日召見管幹珍據奏江西漕船開幫遲延皆由旗丁等應領新漕項下銀兩扣抵較多日見疲累因守領借項未能依限開行等語漕糧爲天庾正供從前立法之始一切應給正項及軍田運費俱有一定章程本爲充裕旗丁等足資用度輓運不致拮据行之日久從未聞有疲累難行之事何以江西漕船必待領借官項始行開幫況此項借給之銀如本年借銀二百兩來年即應於所領項下扣還大半其現年所餘之項自較上年更少勢必所借愈多如此年復一年展轉扣抵各旗丁應領之項所存無幾將來不但運費不敷卽船內應用篷纜等物亦必無貲置買疲乏日甚長此安窮卽云旗丁等應領運費不敷使用致逾開幫定限則向來又如何辦理並無遲誤設此時竟不准借給豈該省漕船遂不開行輓運耶江西一省如此他省漕船若俱藉借項開幫國家經費有常似此紛紛效尤於天庾正供豈不皆有遲誤亦復成何事體從前鳳陽幫船因旗丁貧乏官爲籌項贖回軍田俾得租項充裕以資運費迄今總無遲誤今江西幫船如此疲累必係該旗丁等將衛地軍田私行典售租息無出不能藉以幫貼運費以致日形竭蹶該督撫等所司何事豈遂束手無策任其坐困耽延且該省可以動支款項甚多何致一時未能籌辦使旗丁等得以藉口不行及早開幫此事必需通盤籌畫設法辦理俾旗丁等日見起色不致仍前延誤方爲妥善現在管幹珍押催回空到淮省請時日著傳諭書麟何裕城先行悉心籌酌妥議章程俟管幹珍到淮後再行會同詳議據實具奏

訓

嘉慶五年諭江西各幫旗丁向於額領公款之外每向糧道衙門借領銀兩以資辦公現在按款清查歷年共欠銀八千六百六十兩零俱係歷任糧道自行挪借以該丁等積年拖欠追繳無著歷任糧道本有應得之咎惟閱年已久官非一任姑免深究所有各幫船積欠銀兩俱著加恩豁免現在漕政肅清各幫船均經調劑經費已屬裕如且各旗丁負欠一清自可毋須再借倘此後尚有應須酌借之處該撫等亦當察看情形將應何借給如何扣繳奏明請旨不得因此次邀恩援以為例也會典事例

二十二年兩江總督孫玉庭奏竊惟江南為漕糧重地若非辦理得宜必致百弊叢集而欲期官民胥免受累必使縣丁日久相安是以欲禁州縣之浮收必先杜旗丁之苛索而欲減幫船之浮費必先卹丁力之積疲伏查漕船有例給漕贈月糧又奉 恩旨准其加帶南北土宜並在通變賣餘米優恤固已周渥而丁力仍不免疲乏臣詳加體察尚有應行體恤者兩端一在無屯之賠墊一在漕委之滋累而弁丁因之刁難州縣者亦有兩端一在無故停兌開行一在勒新通關米結臣請備陳其故查各幫大造船隻物料飯食日益增昂例價實有不敷其有屯田津貼之丁均勻貼造力尙可支至江淮興武等幫並無屯田津貼輪屆大造重利借貸價實糾纏日甚一日迨至兌漕藉詞橫索勢所不免臣思惟有仿照浙江辦法請於糧道藩司兩庫酌籌閒款發典生息量於例價之外增給造運俾丁力不致拮据庶辦公稍知自愛如此雖無屯津可免賠墊矣其漕務委員一節嘉慶十二年欽奉 上諭漕督不得多派委員並禁止該弁等收受餽送嗣于十四年間又經巡漕御史奏請大加減省在案臣查沿途督價本係沿河衙門備專責屬今運道通行惟有開多水溜之處自須酌委數員迎提糧艘過關此外概從減省臣現在移會撫臣河臣漕臣一體酌裁如此量減委

員不致滋累矣至旗丁勒索州縣必借米色爲刁制各州縣開倉旬日各廠卽已滿貯各丁深知米多廠少必須先兌每藉看米色爲由逐廠挑剔不肯受兌致使糧戶無廠輸納往往因此滋事旗丁卽乘機恣索州縣不敢不應其求或所索未遂卽藉稱米色未純停兌喧擾及至委員催兌開行各丁不俟米之兌足卽便開船冀累州縣以隨幫交兌之苦此旗丁於受兌前刁制州縣之弊也漕米兌竣運弁應給通關而通關出自尖丁尖丁者積年辦事旗丁也衆丁及運弁皆聽指揮尖丁索費必先議定私費再議通幫公費故有尖丁後手及程儀等項名色州縣不遂其慾則通關勒靳不交至使州縣枉罹遲延處分此弁丁於既兌後刁制州縣之弊也臣思漕糧首重米色米色純潔總以糧道運官看定爲憑臨兌之時既經驗明米好卽令公同封取樣米通送定期開兌令將每日交兌米數按五日一次通報仍填晴雨日期備查如有無故停兌及未兌足而開船者許州縣稟明立拏倡首之丁究處並將幫弁撤回如縣幫有以米色爭執者亦應卽稟糧道親驗如果米色潮雜責令篩淨交兌仍將州縣處分倘係弁丁捏稟挾制立將幫弁撤回參究幫丁從嚴懲辦卽令依限兌收所有尖丁私費永遠革除如此則旗丁臨兌前之弊可除矣幫丁兌米本有日給兌單既已受兌給單卽不得卸過州縣伏查雍正年間定例漕糧未受兌以前一切責之州縣既兌以後責之弁丁又例截兌漕糧應令該兌官秉公查驗兌完出具通關米結不得勒捐推諉是漕糧一經受兌弁丁卽應將該漕糧運往開行後仍以米色潮雜爲詞勒靳通關也應請嗣後於兌數報竣幫船離次日卽令該幫將兌單呈糧道飭令該幫頭伍交出米結不得過五日限如逾限不呈許州縣通稟委員持令箭提取仍將頭伍枷示水次另委運弁其過淮盤驗如有米色霉變等情幫丁既已受兌給單於先卽應照嘉慶

十七年定例州縣與弁丁一體參處分賠不得以通融未付爲詞藉免參賠如此則弁丁既免後之弊可除矣再臣於前奏內曾將每漕船每年需費若干附片陳明奉 硃批查明會議具奏今據蘇松糧道稟稱松江幫船丁力最疲需費較蘇州太倉次之常鎮又次之鎮江之丹徒丹陽兩屬最少大約松江府幫船不敷銀四百餘兩蘇州太倉不敷銀三百餘兩常州不敷銀二百餘兩鎮江府之徒陽二屬不敷銀一百餘兩尙須津貼等情臣查旗丁長途領運例得銀米內有扣解剩價及解淮解通之款且協運之江興各幫並無屯田貼費幫丁疲乏勢不能不量予津貼惟各船行走遲速不同道路遠近不一卽各丁經理亦有善與不善之分斷不能以一年一幫之用度定爲各幫永需之數目而向來津貼之議實啟爭執之端溯查江蘇省嘉慶五年會議松太等屬每船貼銀三百兩十五年復議每船五百兩而幫丁不惟不遵反視此數爲額給之項仍欲另議津貼以致逐漸加增流弊無所底止又幫船有加一免僱存次配造船隻每幫自五七隻至十餘隻不等因其出運滿號例得輪減停運將應裝之米灑帶通幫謂之虛船該船停歇在次仍准照舊支給月糧且有墊蓋錢糧足資養贍夫州縣給費專爲濟運船既輪減存次豈得復予免費而近來刁丁勒索必欲併計在內以致縣幫爭執遲延不惟苦累州縣且誤兌開日期其弊尤應亟除臣思與其每船給費不如計米津貼之爲核實嗣後毋論正兌改本灑帶應統以米石多寡爲斷每米一石各按水次舊章酌給津貼總不得逾該道所稟需費之數庶立法較爲簡捷幫承免爭執惟按米津貼之中仍應分別正耗以昭覈實查領運正供有加四耗米有改本加三耗米既屬耗米卽不應再予貼費惟此項耗米亦有交官備用之分若概議裁費不足以昭體恤所有加四耗米內計一斗五升改本加三耗米內計一斗五升均係交

官之項應照仍依正米計石米津貼其餘耗一斗五升係備該丁等沿途折耗之用查每米一石折耗未必至此自己已有盈無絀應同行月等米一概不准津貼庶於隨時調劑之中仍予以一定限制幫丁既不能格外多求而地方官亦不致藉口浮勒方於丁民兩有裨益經世文編

諭內閣孫玉庭奏恤丁除弊一摺漕船每歲領運於例給漕贈月糧外復優准加帶土宜並於通州變賣餘米所以體恤丁力者甚至而江省各幫船仍有勒索州縣兌費之事總藉口於賠墊積疲不能不資津貼幫船津貼日多則州縣浮收日甚伊何底止茲據該督奏請恤丁兩條其減省委員禁止餽送全在該督撫漕督實力奉行嚴加查察勿爲空言其酌籌生息增給造運卽著該督等詳議續奏至所指弁兵等刁難州縣有無故停兌開行勒捐通關米結兩端尤爲切中情事總之漕糧未兌以前責在州縣既兌以後責在弁丁其受兌之時如有米色潮濕攪和者准其稟報該糧道查驗參辦若米色純潔該弁丁等仍敢停兌吵鬧及捐不出結者立卽從嚴懲辦以杜刁制至另片所奏蘇松常鎮各幫統以米石多寡按水次舊章酌給津貼禁止每船給費均著照所奏辦理如此酌中調劑卽作爲一定限制如幫丁再敢格外需索州縣藉口浮收俱著嚴參治罪以肅漕政而塞弊端

聖訓

二十四年諭內閣孫玉庭參奏李奕疇濫派漕委多人滋累幫丁州縣一摺漕委一項前經鐵保等奏明節次刪減迨李奕疇任內逐漸加增派委至一百四十餘人之多該漕督曾向孫玉庭言及漕標候補人多窮苦堪憐不得不概行差委以資調劑李奕疇多派漕委並以調劑爲詞是明令該漕委等需索旗丁以致大幫每幫出銀三百餘兩小幫每幫出銀二百餘兩旗丁費何由出悉皆取之州縣州縣費何由出悉皆取之糧戶浮收

之弊日甚一日漕委之擾累實敷其端該漕督辦理不善咎無可辭李奕燭著交部嚴加議處 聖訓

道光十六年諭內閣陶澍等奏請將幫丁應賠船米分年辦理一摺上年三月間長淮三幫已革幫丁劉長清船隻不戒於火延燒各船焚燬米石當經朱為弼等奏請分別參賠以示懲儆茲據該督等查明各該幫丁苦累情形懇請多分年限照數賠補朕思此項漕船被焚事起倉卒人力難施且被劫幫延燒與本船失事者有間所有該旗丁等應行買補米二萬五千二百十三石零著加恩全行寬免其賠造船數較多之廬州頭淮安二揚州頭等三幫著准其援照分年帶造成案從本年冬季起分限四年辦理以示體恤 聖訓

右優卹運丁

運弁脫幫遲誤查參議處仍令戴罪督運如未經部議以前有能依限完糧者准其扣除免議已經題結後總漕題請開復戶部則例

康熙四十六年議准各省領運運軍限內過淮抵通照數全完者令總漕賞給花紅以示鼓勵如抵通交糧於額糧之外有領運三年陸續多交米至百石者倉場咨部註冊領運六年多交米至二百石者給以九品頂戴榮身如有運軍運米至二十年雖無多交之米並無掛欠及過犯事故者倉場侍郎咨部亦給以九品頂戴榮身會典事例

雍正二年諭漕運總督及直隸山東河南巡撫各省旗丁運糧進京沿途水次理應奉公守法乃數年前浙江湖廣糧船因懷挾私忿彼此爭鬪持戈放箭殺傷者多逞其兇頑肆行無忌又聞前歲之冬糧船守凍在山東地方竟行搶奪擾害居民去歲回空又聞強取百姓衣物此等皆大干法紀嗣後總漕若不嚴加約束禁止

行仍然寬縱直隸山東河南巡撫卽著轉飭沿河官弁不時稽察倘犯法爲非卽分別輕重按律治罪不得稍
有徇縱推諉以長刁風若有如從前爭鬪傷人及搶奪擾民之事該督撫卽行奏聞請旨於彼地立刻正法決
不寬貸可預行曉諭各省運丁知之雍正內閣 上諭

又 諭一部朕惟河運關係甚大經費本無不敷而運丁恣行不法者皆由官弁剝削所致如開兌之時糧道
發給錢糧任意扣剋運丁所得十止八九而倉丁之都司監兌之通判又多誅求及至啟行沿途武弁借催糧
爲名百計需索又過淮盤查私貨徒滋擾累究屬無益運丁浮費既多力不能支因而盜賣漕糧偷竊爲非無
所不至矣嗣後各省糧道給發錢糧不許扣剋分賄沿途武弁不許借端需索運丁除包攬抗違外所帶些須
貨物亦無庸苛刻盤查至江浙船政同知經管修造糧船侵漁尤甚此官於漕政毫無裨益著卽裁去爾部行
文各督撫不時查察如有仍前需索等弊立即指參從重治罪庶運丁漸有喜色自必保守身家凜遵約束禁
官弁之侵削卽所以戢旗丁之刁悍也雍正內閣 上諭

乾隆二年題准山東自備船於交糧之日除留頭船一二人任通候領覽竣完呈等項外其餘各軍令倉場侍
郎給與空身限單勒令回次將限單繳送各衛所查驗如有違逾分別責懲仍將限單填明到次日期彙送糧
道考察倘有違誤不到別詳敘補仍將運軍嚴究如有沿途生事騷擾該衙門詳報究治留運軍事竣回次
如有違誤一例究治會典事例

嘉慶二十四年諭內閣御史吳杰奏陳近日南漕積弊一摺江蘇漕務向以丁力疲乏節經調劑津貼該旗丁
運費已屬敷餘何得復行藉端需索茲據該御史奏稱該省幫丁除各項幫費支足外另向州縣勒索有鋪船

禮米色銀通關費盤驗費各名目每船自數十兩至百餘兩不等旗丁如此需索州縣州縣費將安出不過仍取之於百姓若不嚴行禁止大為地方之害著孫玉庭李奕疇陳桂生據實確查如運丁等果有前項苛索情節即將該丁嚴拿治罪並將縱容之幫弁總運督運官一併嚴參重懲勿稍姑息以肅漕政而裕民生 聖訓

道光八年諭內閣各衛所守備千總等官辦理漕運事務雖與綠營專事操防者不同但究係武職平日自當練習弓馬不惟該管上司例應考驗其引見赴部時該部亦必先行堂考於綠頭牌內填註遇有技藝生疏者應即扣除昨兵部將選補江蘇興武衛五幫領運千總崔廷蘭帶領引見該弁一經開弓即將箭放落地實由平時全不演習本應即行斥革念其年力正強著降為把總交直隸總督留營學習當差此次兵部考驗之堂官著查取職名交吏部照例議處嗣後該部每遇堂考務宜認真校閱詳加甄別毋得虛應故事稍涉姑容 聖訓

十八年諭內閣御史蔡瓊奏運河沿途營員藉端需索請飭查辦一摺每年軍船北上沿途添派弁兵催趨防範立法極為周密該御史奏稱近年沿途營員自備弁以至總兵副將靡不需索幫丁而總兵副將為甚於重運過境時藉催船隻查驗水手為名每幫索制錢三四千至五六千不等得錢者免其查驗否則故為刁難以致軍船阻滯幫丁資斧匱乏即難免偷漏米石虧短額數情事等語各省漕船抵通向皆派員催趨沿途營員查驗水手懲治兇惡原期行走迅速無誤限期若如所奏是該員弁等藉查驗之名為誅求之計以致苦累幫丁種種滋弊不可不嚴加懲究嗣後著漕運總督江蘇山東直隸各督撫嚴飭各員弁等務於所轄境內實力催趨認真查驗如有怠玩情事立即參處有藉端勒索者亦即嚴行參辦毋稍姑容 聖訓

二十二年諭內閣本日御史孫起端奏請將軍船水手乘時勵用一摺據稱糧船水手人等編入行伍按名給餉可爲紀律之師等語此等烏合之衆平時既未練習安能望其深明紀律卽使乘時勵用事平之後人數甚多又將作何安置且恐愈滋流弊所奏著毋庸議惟摺內所稱各幫俱有頭目凡遇幫船爭鬪得頭目一言水手無不應從現雖不敢設立會首名目而各幫暗甲自有推尊之人著朱樹麟慶李湘棻密諭總運千總分幫詢訪頭目諭以各就各幫約束水手俾共安本分或自行團練保護船隻勿被逆夷勾結貪一時之重利致清白良民頓爲叛逆日後身家俱喪倘賊船逼近糧艘如能奮勇抵禦殺賊立功自當立予重賞如此剴切曉諭俾共聞知咸感奮庶幾該水手等不爲賊用而爲我用亦安內攘外之一道也

聖訓

孫鼎臣論漕曰國家歲漕東南之粟四百萬以實京師行之二百餘年軍之役者久而益罷民之輸者久而益困吏之姦者久而益深上下交受其病夫器雖良有時而敗法雖良有時而敝至於其敝欲無變通之不可得已 本朝用前明之制漕以衛軍民無牽挽之勞國無轉般之費視唐宋之緣水置倉遞相委輸難易迥絕故長運之法不可議也然而漕由運軍其利害亦嘗在運軍漕之與倉相表裏也吏倚倉爲姦而多方以苦運軍於是運軍依船爲難而多方以苦州縣之吏州縣之吏倚漕爲暴而多方以苦民知漕之爲害而言恤民言恤軍皆無益也夫運軍一船按屯田數百畝有行糧月糧有贍耗漕百石而給米五給銀十又許載南北之土物爲市漕畢而餘米又使糶於通州恤軍不可謂不優猶不足用州縣之吏復私遺以兌糶雍正初一船纜銀二十兩及嘉慶五年議增至三百矣十五年復增之爲五百遞增至道光初乃七八百前後數十年多寡相懸如此而閭閻之徵斂可知矣然而運軍固未嘗受其利也轉運軍

者有各衛各幫之守備千總有押運之幫官有總運之同知通判有督運之糧儲道有漕運之總督有倉場之總督有坐糧廳之監督自開幫以至回空又有漕督河督及所在之督撫所遣迎提催辦盤驗之官官多而費益廣卽揚州衛二三兩幫計之領運千總規費銀八百兩空運千總損四之三衛守備損三之一坐糧廳驗米之費二百有八十倉場經紀之費一千五百有奇其他不與焉欲運軍之不罷其可得與吏之累軍如是而居閒者又有尖丁尖丁一幫之魁也州縣橫徵而輸於尖丁尖丁輸於在事之吏胥從而攘其利故州縣之兌米無美惡以尖丁之言爲美惡而已倉場之收米無美惡以尖丁之賂爲美惡而已州縣之吏畏之如虎而運軍疾之如仇而皆莫敢與爲難也是故漕一也而蠹之所穴有大徵漕之州縣一司漕之官一領運之官一催運之官一倉場一尖丁一穴而蠹常數十百出其中於歲漕之弊尙可言哉且夫漕之利病在河河不治則漕不通以利漕之故治河河益難治 國家治河之費歲五六百萬而河無數年不決決輒糜帑千百萬故漕之病不獨在民而兼在國議者欲裁長運之衛官衛軍更其法爲官運官交北輪臨德二倉而南建淮倉受之江船不逾淮淮船不逾濟濟船不逾衛衛船直達通州此古之支運亦劉晏之遺法也然吏倚倉爲姦通州之倉一而已不勝其敝況益之爲四哉且節節而轉之程程而遞之一不應不容不督催是又迎提催撥之所爲滋擾也此海運之法所以自道光初至今屢行之而不易也 蒼霞文集

馮桂芬裁衛屯議夫子論漕國曰節用孟子曰無政事則財用不足所謂政事者用所當用節所不當用而已比者軍興十餘歲常賦不供雖 上方服御所需亦多停罷不可謂不節矣而各路徵兵召勇餉

之數日增月益在事者相與旁皇憂念不知爲計當此艱難支絀之秋豈有以 國家自有之財轉棄之
充散無辜之地黃金虛擲數累鉅萬而不少加愛惜哉竊於漕運弁丁支款以及屯田租息而不能無疑
也衛所之制創自前明今之運丁卽前明之軍始以有罪遣戍籍防守月給軍糧非爲漕運設也厥後
各軍墾墾荒田令輸籽粒於月糧內扣抵遂編爲屯軍與營軍爲二無事則資挽運有事則資調遣亦非
專辦漕運 國朝屯軍次第裁汰屯田歸并州縣承佃辦賦惟有漕運之地隸衛所如故謂之贖運屯田
於是乎衛弁運丁屯田始專爲漕運而設當時 國用充盈體大物博但資其飛挽之力卽亦不苛細微
迨後日久弊生習焉不覺至今日而害斯衆著約而言之可疑者迨非一端運丁於田租養贖之外每屆
兌運行月耗贈銀米列入正款者每船幾及米二百石銀二百兩之多而猶以爲未足輒向州縣勒索
費遠過於商賈陸運貨物之值州縣藉口浮收勒折以給之司倉人等復利其厚獲還相魚肉悖入悖出
皆運丁爲之副鑰坐令漕務敗壞決裂此可疑者一也守備千總亦武職不令之操演不令之管帶漕糧
各兵乃令守備徵糧理訟參錯州縣之間以分其權又令千總押運而運事轉以丁爲主王氏芭孫有云
其強者與丁爲狼狽其弱者受丁之指揮屬之漕督而漕督相懸數千里屬之糧道而糧道相懸數百里
屬之所在知府而知府又以武職外之既無考核又無鼓勵此可疑者二也運丁之始卽水手也康熙三
十五年定倉軍之法特以爲水手之長耳何以既有運丁又別雇築甌無賴習教之徒充當頭舵水手擾
害民間嘉慶道光中疊釀巨案猶幸江浙停運在先金陵失守在後不與賊合然資遣未盡者猶以千計
吳民苦之數年始息此可疑者三也糧艘所容不過數百石與中號江船等而船身之重滯行走之艱歷

無出其右此可疑者四也因思舊制以衛領軍以屯養軍而以軍挽運法非不善今則漕事專責之運丁安用樁爲費用盡取之州縣安用屯爲挽運別付之水手安用丁爲名實全乖舉非其舊以不文不武之官領不賈不買之民別樹一幟天下冗員游手莫甚於是蓋不待今日而論者莫不謂欲清漕務首革衛弁運丁矣蘇省自道光二十七年停運以來不特衛弁薪俸按年支領卽苦蓋月糧初亦照例減半發給屯租更如常徵收在有司例與之而不以爲嫌在若輩例取之而不以爲感馴至粵匪難作而後已竊計數年中弁丁安坐無事糜費國帑殆不止千萬之數卽以上下兩江屯田租息一項言之江淮衛等凡二十三衛額定六十餘幫船三千八百餘隻惟江淮興武二幫坐資津貼並無屯田著名瘠苦此外江蘇之蘇州衛等安徽之新宣衛等共二十一衛計屯田二百三十餘萬畝此項田畝康熙八年湖廣有清釐之案二十三年江西有清釐之案皆輾轉典賣或贖回或助費分別辦理似已有彌縫補苴之意迄今年代更遠弊必益甚嘉慶間松江府志稱裁并典田頭緒繁多而坐落鄉圖具在足爲運丁身家之一助卽現在蘇省各屬多有屯田散布境內各衛時因催租之案與州縣交涉是屯田非盡無著之據湖廣江西情形想亦無異但將已無者概免究追現有者盡數交納或召變或徵租十得三四尙不失爲巨款於度支不無小補現在海運行之十餘年尙爲利濟自難或議更張卽使肅清之後謂海運非久長之策重議河運或招商或採辦或轉駁或改造駁船或雇用民船以所省漕項銀兩給丁各米益以屯租何事不可辦斷不議重造前此笨滯船隻重招前此曠頑水手重任前此不諳轉輸專爲姦利之弁丁此可以理決者旣已不可復用似宜早爲之所蘇省被難以來弁丁輾轉流離無復生計一經克復勢且環求調劑安

得聞款給此聞人若不及今裁汰直 國家一大累矣夫使經費足支存之無損於毫末不裁可也而經費如此其絀又使爲數無幾去之無關於重輕不減可也而爲數如此其鉅又使弁丁於漕運雖不能無費尙有不可無之一說不裁可也而弁丁於漕運非但可無直不可有然則爲今日計惟有請將江南湖廣江西各衛裁撤其守備千總各官調營序補銷除屯丁冊籍查明現有之屯田儘數歸官俾帑藏不致虛糜綜核名實之道實在於是至漕督亦在可省之數惟考漕營始於明隆慶間漕撫方廉爲備倭患而設今情事正同淮安一帶距省會率二千里自須督撫大員坐鎮俟南北肅清再議歸并督撫爲便校

邠虛抗疏

右考核功罪

皇朝政典類纂卷五十六

漕運九

海運開辦事例

康熙十年都察院左副都御史姚文然奏臣惟淮揚地方爲漕運咽喉南北要地與別處不同屢年被災蒙
皇上破格蠲賑恩大而仁盡矣然而水災未退復旱且蝗米價較昔漲貴臣聞人一日不再食則饑而糧之
爲物近則生長于地待成于時遠則轉運于四方未可旦夕得也故備荒不在于臨時而在于豫蓄今淮揚
本地之米既少又聞湖廣江西及上江等處亦多苦秋旱米貴卽臣郡安慶米價較之往年亦增數倍計今
年上流米艘到淮揚者較往年必少此後米價亦必日貴乃一定之理必至之勢也臣思備荒需糧別無奇
策惟在相道路之遠近就便轉輸以通米糧之有無而已近年浙撫臣范承謨行之已有成效臣聞山東東
府地方所產大小米麥黃黑豆等項舊日多至膠州等處舟運至淮安之商灣口沿海過而行風順二三日
可達商船往來終年絡繹自禁海以後糧食陳積應多聞其斗較淮爲大價較淮爲賤若動官帑採買轉運
以備賑饑之用則糴本省而得糧多國帑不致甚虧民可活多命所格者多板不許下海之嚴禁耳年來有
言開禁者皆蒙 嚴綸切責臣何敢多言妄言但臣思禁者禁一切軍民人等私出海口者也凡物民間不
敢用獨 朝廷用之者名曰禁物今 朝廷以備荒之故用地方職官押官艘運官糧出口船若干入口照
舊亦船若干往返有期稽察甚易間行數次糧足則止此豈可謂開海禁乎若以此爲開海禁則如近日福
建發船下海搜近島遊賊亦可謂之開海禁耶但其中有宜詳察確議者一曰船支之通融二曰水程之遠

近三日淮齊兩地斗斛大小時價低昂之大概此非可以耳信非可以理斷必身在地方久諳風土者方能洞悉倘荷 睿裁請 臣言無必不可行之處乞 勅部酌議行江南總督總漕該撫及東撫諸臣詳察熟計以爲應止則止以爲可行則行之亦豫備淮揚救荒之一策也 皇清奏議

嘉慶十五年諭軍機大臣等本日章煦覆奏試辦海運一事據稱蘇省惟有大號沙船尙可灑帶米石約計裝運之費每一百石卽需費三百兩且商船與軍船不同不能安設氣筒易滋微變等語海運一事流弊本多原非必欲如此辦理但年來河道阻滯重空船隻行走諸多不便萬一漕運稍有貽誤自不得不設法籌辦今據章煦查奏海運礙難辦理蘇省如此浙省大略相同此時竟可無庸試辦然漕糧關繫重大籌辦不可不周現據漕督等奏報本年漕船渡黃較上年遲至四十餘日萬一大汛經臨再有阻滯勢必復議截留米石既多一切拋撒微變俱不能免而天庾正供歲有短絀成何事體在河臣經理不善固當重治其罪而該督撫等身任地方亦豈有坐視漕糧貽誤不行設法運京之理該督撫務當未雨綢繆除海運外尙有何法詳加籌畫妥議章程豫行陳奏以期有備無患 聖訓

道光五年諭內閣琦善等奏請將蘇松常鎮太四府一州應徵道光五年分漕糧全由海運並議定運送兌收各章程一摺海運事宜前據琦善於抵任後飭令藩司賀長齡赴上海查勘情形會同妥議嗣該撫陶澍於查勘水利之便亦至上海傳集商船面加曉諭商情頗形踴躍茲據奏現雇有沙船一千餘隻三不俟船數十隻計春夏兩次可以運米一百五十餘萬石著照所請將蘇松常鎮太四府一州新漕並緩帶漕糧由海運抵津其所議酌給沙船耗米一欸著卽於例給旗丁耗米十八萬餘石內勸放所有節省耗米六萬餘石並令隨同

起運正耗米石一體運送抵津又海運漕糧無故短少微變一款著查明如有礙稅船傷斃人口情事自應
奏明免其賠繳並照例優卹若無故短少微變卽於儲備耗米內補足如再不敷勒令買補以專責成又驗米
交米專派大員經理一款著於兌運時派委道府大員等逐一盤驗將米樣貯桶黏貼印花交沙船帶津以備
欵派驗米大臣查對並著戶部將沙船到津在東門外交兌限幾日收竣放行卽行定議具奏其須用剝船並
著直隸總督飭屬先期多爲預備隨到隨剝俾沙船不致羈累 審訓

陳文述海運議道光五年二月日兩江總督漕運總督江蘇浙江兩巡撫奉廷寄以上年江南高堰漫口
清水官洩過多於本年重運漕船有妨經欵差會同總督及河漕諸臣商辦以重運瞬卽前進未便停待
請引黃入運藉其浮送此固不得已權宜之計雖添築閘壩鈔束盛漲自可無虞泛溢第黃水挾沙而行
過後必致淤墊恐目前俾黃漕運日久貽患滋深終非善策漕運爲天庾正供設將來運道淤滯幫船遲
誤自應未雨綢繆另籌妥辦江浙各府瀕臨大海商船裝運貨物駛至北洋一歲之中往來數次似海運
尙非必不可行若雇大號沙船分起裝運飭舵水旗丁人等小心管駕伊等熟習水性定能履險如夷所
有風濤盜賊亦可無虞惟事係創始辦理不易然不可畏難坐視漠不相關著各就所屬地方情形廣諮
博採通盤經畫悉心計議勿存成見籌議具奏余適以事至袁浦同人以嘉慶十五年會應 詔議海運
可行稍知涯略殷諮詢乃復作爲此篇備採擇焉

客問陳子曰海運之議言之十有六年矣今河口阻滯糧艘不能暢行全漕能否渡黃事無把握 皇
上發明詔飭令議行而子在浦曾無一言之獻納豈機宜已盡於前議無可再事增損耶陳子曰前議未

足以盡今日之機宜也前議米未交幫則以上海之船運蘇松之糧其勢甚便今則糧艘載米業已離次則受兌之地應另議也前議費未給丁則以給幫之費轉而雇船足以敷用今則公私之費均已全給運丁疲多股少非還舊欠卽置新貸不能按數追繳則海運之費應另籌也前議試行不過數十萬石今則本年漕米之外加以經漕漕帶不下五百萬石此五百萬石非全行抵北不可則全漕之數應通計也無已則請先就河運計之夫海運之水脚每米一石以八錢計則每千石須八百兩糧船所載以每船八百石計則多過一船卽省海運六百四十兩過百船卽省六萬四千兩過千船卽省六十四萬兩以六八串錢計省錢四十三萬五千二百千卽省銀四十餘萬也宜先籌款四五萬金存貯河口以爲築隄束水關盤節蠲率挽費犒之需多過一幫不特運丁受一幫之益卽北場亦受一幫之益截至夏至堵閉禦黃壩爲止作兩月計每日過船以五十隻計約可過三千隻蓋夏至後將屆伏汛黃水盛漲運河兩岸不能容受淮揚兩郡在在可危故夏至節近禦黃壩必須堵閉也是壩一經堵閉運河水無來源勢必停淤阻淺到淮之船令其退回江口以就海運勢必不能則宜先籌內河駁運之法應請儘調江廣山東江南糧駁船停泊黃河南岸除修備用以一千隻計每船裝米三百石約可裝米三十萬石於全漕不過二十分之一不日濟事則請調豫東回空糧船或雇河南西河牛船隻四五百隻以每船裝米一千五百石計可裝米七十萬石合之駁船約可裝米百萬石自彭家馬頭過河不過二里許用麻袋小車裝運其勢尙便仍自楊家莊進中河自運河行走足抵北場此種船隻駁船水手祇須給與飯食西河牛船運腳與駁船率算每石水脚三錢約須三十萬兩此與內河駁船無異卽令運丁自行押送北場交兌亦與糧船抵通無

異或可儘運江浙兩省之米其江廣之米大約不得不議海運矣則泊船之地宜薄也江廣係屬尾幫停泊多在瓜儀宜於上海雇船駛赴瓜儀受兌上自儀徵之黃連港下至江都之三江營沿江空闊足敷停泊船過船無需脚費惟海運之事郵海船之舵水先須郵糧艘之運丁蓋糧艘雖省北行牽挽之勞實非本願一則自置貨物不能帶北消售覓利二則帶運之客貨不能到北交代三則北場回貨不能帶攜轉運四則舵水身工已給不能追回五則回空過早閒空之日水手口食無資不能不為周卹再追其實得津貼以為海運水脚不特有名無實於事無濟且恐情極生變別滋事端或不便竟置不論則或由該本省分年扣繳宜責成各該省糧道議詳核辦至北場交兌則旗丁積習相沿包與舵工並不親身赴北至北場者不過辦事旗丁數人漕船係屬官物必須責令原來舵水管駕回次以為下年新運地步則江廣之米既經海運仍責令旗丁赴北交兌乘坐海船既恐不諳令其陸行途次避匿孰為管理即令至北推諉規避之弊不可勝言而商船祇能運米不能交管祇能抵津不能抵壩祇能交米不能貼費若吏胥花戶仍照糧船之例需索挑斥於事實多隔礙則在北如何兌收存貯何處作何駁運必需 欽派公正大員及御史監察嚴禁需索一破向年積習俾免羈累之處應請籌議具奏請 旨遵行至大小沙船江南沿海州縣皆有殷實之商有一家數十號者會於上海牙行船埠及該處豆行熟悉情形就彼屬幕事有歸宿特恐辦理不善船戶人等不知公平交易與民間買賣無異稍為驚惶即行避匿推諉或書差牙行藉端播弄堅實之船得錢賣放朽壞之船封雇充數甚或勾通丁屬蒙蔽官府增昂價值把持分肥種種流弊皆不可知必得遴委妥員並延訪老成熟悉之人到彼訪明現在中等通行之價關擔較蘇擔實

在多寡之數向船埠商人等剴切曉諭參酌交易情形明定水脚妥議章程仿照糧船之意五船互保十船立一船頭五十船立一總船頭祇責以辨認人船到津聚泊一處不問其餘水脚何處先付若干由何衙門給與執照船戶如何出具認領由何衙門會報應否給與較準漕斛及樣米桶袋每船准帶餘米若干貨物若干免稅若干所免之稅奏明於關稅盈餘項下核實減免到北執照呈繳何衙門會收查銷辦理妥協如何給與獎勵及執照款式領狀款式商人與官交接究多異意在南在北應如何設立總局皆宜預爲議及者也至此項船隻擬運江廣二省之米約及一百萬石以每石八錢折實六八串錢計約及五十萬金既不能追繳旗丁又不便請用正項錢糧應如何設法之處亦應預籌此皆前議之所未備者也前議何足以盡今日之機宜也客曰然則何以不言也曰是不易言也譬如行軍之事在於命將爲將之道在於治心將必心定而後臂指相應也必謀出萬全而後心乃定也心定而後識定識定而後志定不易言也不定之故約有數端一則通州倉儲積貯情形未盡悉也二則糧船海船聚則人衆恐滋事也三則萬一失事經辦之員恐賠累也故不得不鄭重出之也大約倉儲之積足支十年者雀鼠之耗變幻百出去其二成不過七八年矣七八年者氣頭厥底之米蒸濕朽壞去其二成不過五六年矣而況不及十年者畿輔之地百官軍民皆仰給南漕必衆人之心安而後 皇上之心安也今倉儲未必無數年之積而人不盡知河運阻滯惶惶之情定煩 聖慮則今日海運似當急籌也糧船水手易於滋事此誠應有之慮故議中先議兩船兼卸而尤於糧船丁舵水手加之意今擬以糧船之事實成各該糧道海船之事實成上海道撥派委員帶同老成船埠同至瓜洲照應地方之事則有揚州府及駐劄瓜洲之京口

副將足資彈壓再遴委委員幫同辦理似亦可以無患至分賠代賠貽累子孫爲屬長所畏上官體卹恩至重也風濤盜賊雖可無虞然意外之事亦難逆料此則在精選堅實船隻壯健舵水分派水師護送巡緝萬一適遇致有損失試行之初似當預爲奏明核實邀 恩寬免蓋於不測之區行船見之事必明定賞罰且必俯賞重罰輕而後人始用命也近人謂海運必不可者其說有二曰費無所出曰人無所歸不知此乃海運難行之處而非必不可行也譬若人身受病必思所以治之萬不能因其病而束手以待也論海運於平日則以糧船之費作海運之費費有所出而人無所歸宜籌所以安緝之上年江浙水災停運者十八九人無所歸亦十八九較之今日何止數倍籌其口食陸續散遣亦未見滋事也論海運於今日則水手身工已於水次領足仍須駕駛回空口食不憂無著所苦者所帶私貨不能銷售及不能帶北場回貨覓利耳然此究有餘之病而非不足之病也且其貨不過磁器夏布竹木之類沿途皆可售賣沿途之貨均可轉販河渠通利新濬曠屆則人不患無所歸也所難者費無所出竊謂 明詔飭行爲畿輔籌民食 國家斷不惜此鉅費而經費有常不能不多方籌費則兩淮商人素屬急公現聞奉 旨傳諭請加鹽價以江廣口岸方在減價敵私不便議加稔知工用繁多願籌報效五六百萬分年帶繳則或遂其報效之誠作爲現在海運之費不過十分之一即可足用萬一運庫現銀不能足數則就近藩關各庫先爲撥用由運庫陸續解還歸款此似可籌商體使詢問商情具奏請 旨遵行者也此不宜遷延親望坐誤事機也籌經費以運糧艘備駁船以資駁運雇沙船以資海運三者並行以期全漕抵通以安畿輔之人心卽以慰宵旰之 聖心實爲目前之急務若夫 國家如天之福河伯效靈兩月之間開口通順

刻期渡黃不特無事海運並無事駁運則二者所費水脚飯食之資或歸通省攤捐於事亦非甚難此則前議所未備而今日所當議及者也若風汛之順逆水程之遠近前議已略及之其未備者則有高培源之海運備採謝占壬之海運提要黃國華之海運事略齊彥槐之海運南漕議孫義均之乙酉海運議師崑采之瀛槎答問沈濤之滙濱客談錢軾之海運蠶測魏源之膠萊海運議皆足以備採擇虛懷採納實心措置知人善任和衷共濟勿多顧慮勿惑浮言靖人心於不覺消隱患於無形上爲 國家立恆久之規下爲畿輔兆豐盈之象慰 九重之宵旰而一己之功名亦懋焉勳載史成福延後嗣是在秉鈞當軸之賢者卓遠見而堅定識矣

海運水脚謝占壬之蘇斛每石八百十文是以極貴之價每石三兩每兩折實錢六百七十大文關摺合蘇斛二百五十斗零也齊彥槐之蘇斛每石四錢有零是關摺九三兌銀一兩二錢合蘇斛二石四斗二升也與現在牙戶所開之關摺合蘇斛二石每擔水脚一兩四錢蘇石每石合漕紋七錢者不同與鄙人所議每石八錢折實六八串錢亦不同大約船戶所得水脚每兩皆六八串錢而價之低昂則視船隻貨物之多寡與爲消長今擬每蘇斛水脚給以漕紋五錢再加免稅二百擔其妥協出力之船商船戶仍加以優獎民間屆載論貨之多寡不論船之大小是以有裝土壓鈔之事今則儘船裝載卽論平價較之民庖已有盈餘足資牙戶人等沾潤其應如何酌提行用聽其自便官不與聞若輩貪毛踐土具有天良當無不踴躍從事卽胥吏牙行人等擇其馴謹誠實者開誠布公與共斯事當不致居奇貨而肆侵漁致掣肘而償事若駁船麻袋本屬無所用之詳於復齊彥槐書茲不具載及今爲之船則

七八百艘尙可得賑財五六兩月亦正可行若過此以往則僅可存此說以待將來矣隨進奏文鈔

六年諭軍機大臣等寄諭欽差尙書穆彰阿等陶澍奏海船初運兌竣仍接續趕辦一摺本年初次試行海運據該撫奏截至二月二十一日止共兌過正耗米一百一十二萬二千餘石事機極爲順利惟海運米石除正耗漕白等米尙有給船耗米通計米數有一百六十三萬三千餘石各船不敷裝載不能不分兩次運送一過春夏之交南風司令北船回滬較難自應令初運沙船迅速回糧俾二運得資趕辦本日據天津鎮總兵克什德奏報長洲縣第十三號船一隻於二十九日早潮引進天津海口日內諒已陸續前來穆彰阿等接奉此旨卽飭該鎮道等遇有海運抵津隨到隨卸不准片刻延滯並嚴飭坐糧廳稽查吏胥經紀人等如有刁難需索立卽重懲毋稍姑息總令沙船卸米前往奉天買豆迅速回南以便趕辦二運 聖訓

七年諭軍機大臣等據穆彰阿奏海運章程八條朕詳加披閱如各州縣津貼既從減省其徵收民間漕糧不得藉口增益如有不肖官吏任意加折浮徵應由江督等隨時參懲米數既多雇用民船剝運胥役等難保無勒索需索情事亦令江省按照市價計日給費嚴禁胥吏刁難尅扣此次雇募沙船水手人等應由江省查明或於運脚內撥出若干或於到津收買餘米內每石劃出若干作爲水手賞項或諭該商等加給身工總令一律踴躍其兌米時按船全數給予耗米咨明直省將來到津收米時除有事故以耗米抵補無存查詢屬實外如商船耗米無故短少卽嚴追懲辦其緣夫應由江省按每米一石津貼緣費若干給予沙船自行雇募若土棍把持攪價訪擊嚴懲船到最多之時剝運不及酌分剝船載至北倉暫卸輪轉起運俟沙船全數起竣再將北倉暫貯之米陸續起運總令一律運通完竣方爲畢事民船既可少雇國費仍不多糜所有米石既於沙船

起卸時由經紀等眼同斛兌剝船應由倉場侍郎轉飭坐糧廳責令經紀等承運承交如稍推諉卽行懲革其
剝船運脚應由直督轉飭地方官全數發給水脚如有攙和盜賣潮溼短少官剝將船戶嚴懲民剝一體治罪
仍令按數賠補沙船挽至上國起米完竣必須容土壓載方能出口應由直督飭地方官撥撥官地准容若土
棍把持嚴拏究辦所奏均屬可行著蔣攸銛那彥成訥爾經額陶澍凱音布朱桂楨等詳查妥議辦理總期在
南不致以津貼病官以徵收擾民在北不致以刁難累商以剝運傷米方爲妥善又御史吳敬恆奏本年搭放
海運米色不堪查海運自十漉出口直抵天津爲期不過一月海船寬深堅厚並無潮濕亦不至蒸受海氣抵
津時曾經大員驗看一律乾潔何至入倉卽難久貯况商船每年裝販麥豆攜帶茶葉未聞海氣蒸變顯係剝
船竈役朋謀舞弊蓋剝船至運不能不落花戶經紀之手聞上年竈役需索每剝船一隻約京錢二十千至三
四十千不等稍不遂意故爲刁難該官剝及添雇船戶等領有剝費斷無餘費不得不取給於現剝之米攙和
藥末浸泡熱水每百石卽可漲多十餘石經紀等明知貯倉必定微變顯預驗收等語所奏不爲無見著該侍
郎密查前項情弊從重究辦並著直隸總督轉飭沿途押送剝船晝夜巡查儻再有攙和等弊查出重究以杜
弊端而重倉庾

聖訓

又 諭蔣攸銛等奏遵旨議覆海運事宜一摺各商船運米應給水脚等項及一切經費除天津通州用款按
照上屆章程應動漕項銀兩湊撥濟用外其在南經費仍由各州縣將向來辦漕貼費照舊支用如有不肖官
吏借端浮勒著卽嚴參懲辦毋稍姑容州縣運米前赴上海雇用民間剝船著按照市價計日給發毋許胥役
人等封捉剝扣並著出示嚴禁有犯必懲其水手人等著各船自行分給津貼俾船商與舵工水手相安無庸

官爲限制船商得受耗米原以備盤量折耗及到津補償短絀之用著嚴禁私行折價以杜短交兌米時務擇令將耗米全數上船方准開行其商船到津由海口挽至上圍需雇絙夫見經該督等詳定各州縣於兌米時每米一石給船戶制錢四文作爲該船到津雇夫工價並著直隸嚴飭地方官禁止絙夫擅價把持毋許延誤其商船卸米空土壓載著直隸地方官豫撥官地若干畝准令空土如有地棍把持情事立即嚴鞫究辦其自津運通令經紀親押一節前已降旨仍由直隸派委員弁分撥押運實力巡查毋許經紀等訛索滋弊東憲謹

又諭內閣那彥成奏議覆穆彰阿條陳海運未盡事宜各款如剝船水脚毋庸扣留三成及沙船壓載取土應指定官地不准稍越界限二條具著照所奏辦理至來年沙船定爲一次起運到津連檣抵次之時必致剝運不及分運北倉暫貯原爲慎重倉儲起見惟據該督查明北倉廠座祇能貯米四十萬石若沙船紛紛猝至剝運而外北倉廠座恐不敷用著臨時派往驗米之大臣察看情形酌辦所需鋪倉磨片等項飭令天津縣先期購備仍於上圍水口勘定高阜寬敞地面築牆挑溝墊成馬頭土道備用其漕糧到津起卸以後應歸經紀一手承運一條前經倉場侍郎等駁議請仍由直隸委員押運茲據該督以該省派委文武員弁有彈壓催辦之任並無交米之責上年通塌收米經紀誤以委員爲伊等卸責之人復向剝船請索難免不取給於米石亦係必有之弊前已降旨令該侍郎等嚴行查禁著查照上屆章程每剝船一百六十隻爲一起俟兌足米四萬石由經紀自撥親信委人分起押送仍每起派委文武員弁各一員隨帶役兵督同船頭彈壓催趲一俟運抵通塌聽經紀自行交倉押運各員役即趕回押送後起剝船如沿途有偷盜情事該經紀人役立即稟知

擇運員弁交所在州縣按律究辦以專責成而免諉卸 書訓

江蘇巡撫陶澍進呈海運圖疏竊照蘇松常鎮太五府州額漕因河運阻滯改由上海沙船運赴天津現已辦有成局依次開行臣伏思海運與河道原相表裏萬貫載揚州貢賦沿海達淮冀州夾右碣石入海卽海運之始秦唐雖亦偶行其道難稽明則由膠萊內河轉搬登州實爲勞費惟元代海運最久然至元十九年初次運米僅止四萬三千石明年始抵直沽行之六七年猶歲祇運米三四十萬不等旋因其路險惡勇開生道運米漸多蓋海船畏淺不畏深畏風而畏淺尤甚於曉明人沿颯求道非曉卽淺無怪其難自不若元代所開生道卽今沙船所行爲最善查元明入海之道或由劉河轉膠角沙或由黃河口至鷹游門今俱壅塞惟吳淞口至十激一路爲宜而由此運米入海實稱自今年臣因初次試行卽須裝米一百五六十萬倍蓰從前不敢不倍加慎重每遇熟習海洋之人詳加詢問證以紀載得其徑道至於大洋浩瀚本無畔岸雖舟人定之以更香驗之以水色格之以針盤究難確指其道里數目惟有就西岸對出之州縣汛地比照核計不相運歷其小島微嶼亦難盡載謹摘敘大凡略分段落併繪圖貼說恭呈 御覽

第一段海船自上海順黃浦口岸東行五十里出吳淞口入洋繞行寶山縣之復寶沙迤至崇明縣之新開河計一百一十里又七十里至十激是爲內洋十激可泊船爲候風放洋之所崇明縣地

第二段自十激開行卽屬外洋東迤一百八十里至佘山一名蛇山又名南槎山係荒礁上無居民不可泊但能寄碇爲東山大洋之標準蘇松鎮所轄

第三段自佘山駛入大洋向正北微偏東行至通州呂泗場對出之洋面約二百餘里水深十丈可寄碇

從此以北入黑水大洋至大洋橋對出之洋面約一百四十里係狼山鎮水營所轄又北如舉縣對出之洋面起至黃沙洋港對出之洋面約二百六十里又北泰州對出之洋面起至黃家港對出之洋面約一百二十里係狼山鎮水營所轄又北至關龍港對出之洋面約一百里又北至射陽湖對出之洋面約一百二十里係鹽城營所轄又北至黃河口對出之洋面約一百二十里係廟灣營所轄黃河口稍南有沙腰五條船行遇東風則慮淺擱宜避之又北至安東縣灌河口對出之洋面約九十里係佃湖營所轄又北至海州贛榆縣鷹游門對出之洋面約一百八十里係東海營所轄計自余山大學以北起至鷹游門對出之洋面止約共一千五百里統歸狼山鎮汛地凡舟行過余山四顧汪洋無島嶼可依行船用羅盤格定方向轉針向北略東行如東南風則針頭偏東一個字如西南風則針用子午查江尚余山與山東鐵棧山南北遙對謂之南槎北槎行船應用子午正針因江境雲梯關外迤東有大沙一道自西向東接漲甚遠暗伏海中恐東風過旺船行落西是以針頭必須偏東一個字避過暗沙再換正針此沙徑東北積為沙埂舟人呼為沙頭山若船行過於偏東一直上北便見高麗諸山故將近大沙時仍須偏西始能對成山一帶也

第四段行過鷹游門對出之洋面往北卽山東日照縣界山東水師南洋汛所轄又北至文登縣之鐵棧山一名北槎山自余山至此始見島嶼又北至文登縣之馬頭嘴入東洋汛界經由蘇山島靖海衛及榮城縣之石島養魚池石島居民稠密可泊惟島門東南向春時乘風易入難出鷹游門至石島約六百餘里大洋中雖舵工以針盤定方向猶須常用水托水托者以鉛爲墜用繩繫之探水取則也每五尺爲一

托查十激開船試水自十托至二十托上下行過余山試水均在三十托上下順風二日餘均係試至十托上下卽知船到大沙洋面行過大沙試水漸深至五十托上下視水綠色則係山東洋再一日試水二十托上下水仍綠色遙望北棧及石島一帶山頭隱隱可見再行半日卽至石洋商船赴北一定針路也

第五段自石島至俚島洋面約一百六十里俚島至成山洋面約一百四十里俱榮成縣地爲南之所可泊水綠色針盤仍用子午略偏東從成山轉頭改針向西略北入北洋汎界至文登縣之約一百餘里又西至威海衛一百餘里又西至福山縣之之梁島一百餘里又北至蓬萊縣之廟餘里以上自石島起至廟島止約共九百餘里之梁島西北一帶有暗礁船行偏東以避之又廟有常山頭淺灘宜避試水在十五大托至二十托不等船至廟島以東南風爲大順計東省洋面五島中有二十五島爲海道要地而廟島尤大可以停泊

第六段自廟島過掖縣小石島卽入直隸天津海口約九百里針對大西偏北沿途試水在十四試水至六托上下水黃色水底軟泥卽可拋錨候潮進口約計天津海口逆流挽棹一百八十餘天津東關外

以上海程計自吳淞口出十激東向大津至余山北向鐵棧山歷成山西轉之梁島稍北抵天津程四千餘里伏查我朝自康熙年間開海禁以來商船往還關東天津等處習以爲常凡駕駛向之方靡不漸推漸進愈久愈精是海運雖屬試行海船實所習慣而春夏之時東南風多行走

利臣謹就見聞所及臚陳大概伏祈 皇上聖鑒 齒文藝全集

二十六年諭軍機大臣等給事中安詩奏江蘇招商海運米石抵津請嚴禁關口留難需索并役藉端擾累等語本年招商運米事屬創始自應曲加體恤嚴防流弊方於商民均有裨益若如所奏天津一路關口俱索使費並有將船扣留不准進口情事該商等寄碇外洋米石蒸變必致大形虧折以後裹足不前於民食大有關係著訥爾經額飭知長蘆鹽政及天津道查明此項米石現在已否進口儘取沽萬沽等處俱有前項情弊立即嚴參懲辦毋許稍有擾累至進口後或一時不能銷售應由地方官按數收買亦著籌議章程迅速具奏

聖訓

又諭軍機大臣等御史劉良駒奏江蘇海運商米已抵天津請飭妥為收買等語此項米石抵津之後自應亟為銷售俾得迅速轉運聞風踵至昨已降旨令該督等督飭嚴禁需索留難等弊惟現在天津道府同時更換難保關胥兵役人等不通同市僧乘機舞弊著訥爾經額揀派廉幹大員速往該處專司其事如該商自行售賣不許市僧把持跌價如由地方官為收買亦即速行籌款妥為辦理不准任意減價致令虧折備查有勒索使費各弊端立即嚴行懲辦務使該商等無守候稽時之慮以後自可源源而來庶於民食倉儲兩有裨益

聖訓

二十七年准江蘇蘇州等三府州明年漕白糧米改由海運 東華續錄

三十年諭內閣陸建瀛傳繩勛奏請將白糧照案海運一摺江蘇蘇州松江常州三府及太倉州應徵道光三十年白糧正耗米七萬二千石零著准其援照二十六年成案由海運赴天津以期迅速其天津剝船等費及

沙船水脚耗米運費仍照成案由各津貼款內支用 聖訓

魏源上江蘇巡撫陸公論海漕書前日面陳江蘇漕弊非海運不能除京倉缺額非海運不能補請將蘇松常鎮太倉江寧五府一州之漕酌行海運竊維 國家建都西北仰給南漕如使年年全漕北上則除支放俸餉外尙有餘糧三年餘一九年餘三是以乾隆中每遇太倉之粟陳陳相因屢有普免南漕之詔但患有餘何患不足近日京倉缺米支放不足皆由南漕歲缺額而南漕所以缺額之故則由於歲歲報災所以報災之故則由於兌費歲增所以虧短之故亦由於兌費歲增此其情形從來不敢上達若不徹底直陳於 聖主之前則受病之源與救病之方終日依違疑似之間無以破浮議而堅 乾斷請約略陳之查江蘇漕船兌漕之費卽以道光初年較之近年相去已至一倍道光初年江蘇兌費在蘇松每船尙不過洋錢五六百圓江北每船不過制錢四五百緡一加於道光三年水災普蠲之後丁船以停運爲苦累再加於道光四五年高堰潰決之後丁船以盤壩剝運爲苦累三加於道光六年減壩未合之時空船截留河北爲苦累此數年中丁船藉口一次卽加費一次今歲所加明歲成例則復於例外求加其時漕河梗隔上游嚴檄督催州縣惟恐誤運於是數載中蘇松已加至洋錢千圓繼以道光十一十二年蘇松糧道陶廷杰苛挑米色驕縱旗丁於是三載中蘇州遂加至洋錢千二百圓松江千四百圓而白糧則每船三千圓矣而江北刁丁亦效尤遞加不等今日已成積重難返之勢然道光八九年間幣費雖大而銀價尙未大長每兩兌錢千二三百洋錢每圓兌錢九百零使銀價如常猶可勉強支應近日則文銀日貴一日卽幣費又歲長一歲是暗中又幾增一倍誠爲從來所無然而每年不致驟漕者

何哉則報災爲之也每幫費加一次則漕米減收一次緣州縣收漕折色不能與之俱加不得不聽小民籲求報災以其數分緩漕之米貼補數分浮折之米於是每大縣額漕十萬石者止可辦六萬石是以連歲豐收而全漕決不敢辦非獨州縣免費無所出卽旗丁年年減運船亦久已變價烏有計江浙兩省每歲緩漕不下百萬歲復一歲 天庾安得不空此京倉缺米所由來也而議者尙以江蘇州縣漕爲不實試思漕果有利則州縣惟恐不辦全漕何反甘心減少況民風較刁之元和常熟華亭婁縣丹陽丹徒金壇句容上元江寧等處百姓所完本色折色不及免費之半則州縣全係賠墊且不但完漕如此卽地丁錢糧亦不肯隨銀價增長則州縣又係賠墊錢漕皆賠如此然而上下忙不致誤奏銷者何哉則漕項爲之也向例藩司地丁每年奏銷而糧道漕項則兩年始奏銷如及兩年而州縣離任他處者則又可免處分州縣雖挪移墊公然不敢虧地丁而僅敢虧漕項是以江蘇州縣幾無二載不調之缺而漕項虧空遂至二三百萬之多此清查所由來也漕弊既如此極而謂海運卽可除弊者何哉軍船行數千里之運河剝淺有費過准有費屯官催價有費通倉交米有費故上既出數百萬漕項以治其公下復出數百萬幫費以治其私海運則不由內河不經層飽故道光五年運米百六十餘萬石而費止百四十萬金其內尙有可節省二十萬金計蘇松太倉一府一州之粟可用糧道漕項銀米辦之而無不足可不取絲毫之幫費既無幫費則州縣無可藉口以浮取於民民無可藉口以報災於官年年可收清漕卽年年可辦全漕每年藏富於民者數百萬金藏富於國者數百萬石而太倉永無缺貯之虞矣既無幫費則州縣無藉口挪墊但將地丁正雜稅課收錢收銀酌加火耗以資申解辦公之費民既喜驟脫於漕困必不刁難於

上下忙銀備州縣再有浮勒於民虧空於官者上司執法而行坦然無復顧慮吏治民風國計一舉三善而清查後永無虧空之患矣是惟海運可再造東南之民力惟海運可培 國家之元氣且二府一州不過南漕一隅其江北及浙江湖廣安徽之漕仍由運河行走於大局並無變更此外尚有漕務極難三縣如鎮江之丹陽金壇江甯府之句容或可提出附歸海運亦救民生之急策合並附陳其條款別陳於左

一回空船仍令照常歸次不必援上年截留河北舊案也查四府一州額糧百五六十萬石額設漕船二千數百隻自連年報災疊次減運不過存一千餘船其水手有二種一係沿途隨雇之短絛回空時照重船約少一半且隨雇隨遣不煩安插惟有常年在船之頭舵篙工等每船不過數名冬月分歸各次合計不過萬餘人道光六年試行海運時減船尙未合龍故將空船截留河北以爲接運來齊江廣重船之地然第七年仍行河運丁船卽以截留苦累藉口增費今再行海運與上年河道梗塞情形不同亦若截留河北則事出無名且漕運衙門必預防地方官有常行河運永停河運之意先持異議甚或阻撓水手滋事鋪張入告恐嚇阻撓勢所必至不如照常歸次不露形迹既免漕幫藉口且歸次以後則權在地方官總可設法辦理較之截留中途全由漕運衙門專政者主客攸殊以千餘船分泊二十餘處其勢既分彈壓亦易且受兌蘇松常鎮各幫均有尖丁殷實居其大半無難責令暫行約束卽如現在各縣均有減歇之船每船不過留一二人看守並無別煩安插之事至其全局散遣之議應俟本年夏季海運平安抵通交兌全竣明效大驗之後再奏請劃出四府一州永行海運無難別籌散遣如此時卽奏籌散遣漕船水手之議是爲千金之裘而與狐謀皮不惟無益而反有礙也至其章程與道光丙戌所行宜隨時變通

謹條陳於左

一海運全漕宜一次運津不必撥舊案分兩次也

一海運北倉交米除存津倉五十萬石外其餘亦應以到津收驗為竣不能再赴通州也

一海運船價經費今昔銀價懸殊應查照上年銀價作錢不能照今春揭米之例也

一漕項銀款僅敷海船水脚其南北二局經費將漕項米款半解折色以資辦公也

一海運全漕外尚有海船耗米十二萬石到津應聽其自行變賣毋庸官為收買也

一海運經費但用漕項銀米即敷辦漕毋庸再提幫費以滋流弊也古微堂集

魏源復大學士蔣公論南漕書承諭以濶塘濟運事難經久明歲當海運撥運兼行以分濟吳楚各漕誠

籌國萬全之慮竊謂明歲重辦海運與前歲情事迥殊前歲創始試行章程未定不得不照常籌費以為

河運復舊之地止以海運通河運之變究無救於漕務之窮非經久盡善之計反本還原之策也道光五

年舉海運蘇松常鎮太倉百六十萬餘石南北開銷皆出州縣幫費共百四十萬金其中尚可節省一二

十萬較之河運幫費每石幾一兩有餘者已大有省便州縣亦尚有贏餘然尚謂權宜非正策暫行非永

逸者蓋江蘇糧道所屬四府一州歲給旗丁漕項銀米較他省最為寬裕即使絲毫不提州縣幫費亦足

以濟全漕計漕項銀三十六萬九千九百兩行月米四十有一萬有一千八百九十三石計米折價直銀

九十二萬六千七百五十九兩共計給丁銀米二項為銀百有二十九萬五千七百五十八兩屯丁既不

運漕則以漕項作海運之費綽有餘裕何必更留幫費之名使州縣藉口以浮收於民小民藉口以挾持

於官不爲一勞永逸之計然必將此四府一州永行海運方可舉行如僅試行一二年仍歸河運則有所不可卽或常鎮二府不歸海運而蘇松太倉三屬則合此莫再生一籌夫永行海運之議人不敢主持者一則軍船之丁役難散二則津通之收兌難必三則海商之經久難恃不知軍船之難安置者不在旗丁而在水手蓋旗丁自有屯田多以運糧爲累軍籍爲苦如今其不出運正其所禱祀而求計江蘇通省各衛共若干幫每年各有例造之船改簽之丁但先將漕務最困之蘇松太倉三屬改歸海運卽以三屬之丁船移派於通省以補他府改造改簽之數不過二年而派畢旣免造船之費又免簽丁之擾事旣兩便情必欣然至水手隨船去留旣省出他屬造船修船之費兼可拆材變價以津貼安置資本營生此可無慮者一天津前歲收兌全賴 欽差大臣主持全局自後永行海運安能常有此實心稽察之大臣且由天津抵通州二百餘里撥船難免濕耗反以海糧需變爲詞受倉胥之挾制尤非口舌所能操勝惟有仿明陳暄議建百萬倉於天津以受海糧之法船至直沽倉場侍郎驗米交倉卽與商船無涉俟通州漕米由倉場隨時撥解其出納稽核則由江蘇奏委同知二員專司其事三載更代由本省出考語送部引見庶可永免倉胥之挾制今天津已有四百萬石之倉再建百萬倉以五十金建倉一間受糧三百石之爲費不過十五六萬金足受三府之糧其可無慮者二 國家嚴防海賊曾禁商船出洋自康熙中年開禁以來沿海之民始有起色其船由海關給執照稽出入南北通行四時獲利百餘載來共沐清晏承平之澤况 朝廷優給運價視民履有加是以各商聞風鼓舞爭效子來去秋上海增造沙船三百餘艘以備今歲海運之用且大洋瞬息千里侵漏無由沿島文武稽催淹留不敢加慮事久弊生官刻價值商情阻

畏此則人在政舉乃地方大吏力能整肅之事有治人無治法不得預以將來廢目前此可無慮者三昔人論河海並運比於富室別闢旁門然必行之有素相習爲常而後船數之多少價值之低昂收兌之遲速雖有不便已私之人不得陰撓巧阻今以蘇松三屬常行海運卽一旦浙江湖廣各省之漕或梗於河患或憚於陸撥欲假道於海運咄嗟立辦 國家永無誤運之憂是所利在國計軍艘行二千餘里之運河層層有費丁不得不索之官官不得不索之民致官與丁相持民與官相持已成百餘年痼疾今以海運易開河以漕項省幫費州縣既收清漕吳民咸登樂國但奏明將夏秋地丁錢糧改錢收銀酌加火耗紳民一律以復乾隆錢價之舊以資火耗申解一切辦公之費視收漕淨勒相去僣民與吏必皆懼從可免挾制賠累之積弊儻再有藉詞額外浮加者上司執法而行坦然無復絲毫顧慮之私使每年藏富於民者百餘萬省訟於官者百千案省虧空於官者數十萬上下懽然一體視周文襄湯文正之裁減浮糧功且逾倍是所益在吏治在民生故今言蘇松海運而但爲變通河運之窮此河臣知河而不知有漕者也抑漕臣但知慮江楚之漕而不知慮蘇松之漕者也蘇松太倉運船輕抵淮甬汎前尙可籌渡非江楚運重程遲之比卽使漕不由河河未必因此而治卽使河不梗漕漕未必因此而清兩不相謀各爲一事惟以錢糧最重之地值漕務極困之時議八折議卹丁禁浮收禁開費舌傲骨焦花無寸效仰值 聖主聖相勸求民莫天時人事窮極變通會海運別無事半功倍之術爲救弊補偏則不足爲一勞永逸則有餘如蒙上達 聖聰仰邀俞允所有織悉事宜尙須與督漕諸公會籌奏辦從此東南民實永受其賜

古微堂集

包世臣海運議曰駁海運之說者三一日洋氛方警適資盜糧二曰重稅
造船水須另招事非巨夕費更不貲然三者皆書生迂陣請得一折
運南由浙及閩粵皆爲南洋運北由通海山東直隸及關東皆爲北洋
行北洋多沙礮水淺礁硬非沙船不行小島船亦吃水丈餘沙船大者
斷不能越吳淞而北以爭南糧也沙船聚于上海約三千五六百號其
六百石船主皆崇明通州海門南匯寶山上海土著之富民每造一船
船四五十號故名曰船商自康熙廿四年開海禁關東豆麥每年至上
山東直隸關東亦由沙船載而北行沙船有會館立董事以總之予
分之一而遇颶風鬻倉在其中鬻倉者巨浪入倉豆見水輒脹大至倍
之也今南糧由運河每年失風殆數倍於此上海人往關東天津一歲
天津之信由海船到者無虛日此不得以古人之已事爲說也秦漢唐
有寬估之說諒亦雜僱民船 國家除南糧之外百貨皆由採辦採辦
米糧以民船運通之事而山東江南撥船皆由僱備是僱船未嘗非政
哉沙船以北行爲放空南行爲正載凡客商在關東立莊者上海皆有
寫載先給水脚合官斛每石不過三四百文船中主事者名耆耆持行
押載從不聞有欺騙又沙船順帶南貨不能滿載皆在吳淞口買人挖

明白曉諭無論其船赴天津卸赴關東皆先載南糧至七分其餘准帶南貨至天津卸于撥船每南糧一石給水脚銀四錢上載時每石加耗米五升卸載時以平斛收津丁之加二五米俱成正供以增倉儲合計南糧四百萬石不過費水脚百六十萬會不及漕項十之三四此合州縣津丁免費而言非專指糧道庫項也而陸續開行二月初江浙之糧即可抵淀往返三次全漕入倉矣船商以放空之船反得重價而官費之省倉米之增者無數又使州縣不得以兌錢津貼旗稅名目藉詞浮勒一舉而眾善備焉先期咨會浙江提鎮哨招寶錢陳江南提鎮哨余山及大小洋山會於馬跡山東鎮臣哨成山十島會於鷹游門以資彈壓護送而淀津有撥船數千號足數過載由淀津抵通二百里無糧艘阻滯挽行順速唯裝卸及發水脚之時若使吏胥剋扣需索則船商或畏怯不前耳然悉心籌畫專意了此一節亦非甚難之事也至行之有效然後籌裁撤糧艘安插枕水清屯田其事皆有條理可循茲未及具論安吳四種

咸豐二年諭內閣朱嶠奏遵旨查明海運米石起卸情形一摺此次海運米石由天津剝運抵通較之豫東漕糧起卸尤宜迅速據該侍郎查明坐糧廳等向無有意積壓情事惟當大雨時行之際若每日起卸不足三萬石之數必致輪轉不及且易啟偷漏需索等弊著朱嶠嚴飭廳員迅速催卸不得藉詞推諉有誤正供備經紀人等故意刁難卽著嚴拏懲辦其石壩轉運並著督飭趕辦如有遲延一併參奏東華錄續

又諭內閣前因朱嶠回奏海運米石短少情形與戶部原奏兩歧特派恩華彭蘊章前往查辦茲據奏稱查驗坐糧廳公文清冊此項米石在天津不過蒸熟到通州始見潮濕通州坐糧廳仍加風晾始行驗收與該侍郎原奏據經紀供稱河干未能挑晾以致轉運後米身收縮之語不符其經紀在天津出結係屬向例該侍郎

不得疑爲不知等語此次海運原爲倉儲緊要權宜辦理若任聽經紀藉端挑斥必致遲延貽誤該倉場侍郎
自應通盤籌畫以濟倉儲乃於倉米短少並不虛心引咎輒以天津收驗爲詞曉曉置辯殊屬不合朱麟著交
部議處其未收米石仍著責成坐糧廳及大通橋監督認真查驗迅速轉運如有潮濕短少情弊著卽嚴究懲
辦東華續錄

又諭內閣黃宗漢奏籌議浙省海運章程開單呈覽一摺據稱目前辦理之法以催提銀米雇備船隻爲要
務現經該撫委員趕辦其單開各款如裝載漕糧船隻兩次接運委員分辦以專責成天津刺船多爲豫備巡
哨防護宜加周密各條款並查照江蘇成案章程均著照所議辦理並著兩江江蘇直隸各督撫於上海天津
等處遴員妥爲經理江蘇按察使倪良燿著仍遵前旨總司江浙海運事宜務期籌辦妥速毋稍延誤
三年驗軍機大臣等戶部奏豫籌海運事宜等語江蘇海運漕糧向於上海設立總局現在該縣尙未收復有
漕各屬曾否開徵運米沙船曾否封屆該處總局應行移設何處未據該督撫豫籌奏報至浙省漕米前經部
咨今由乍浦海口兌裝上船放洋北上亦未據黃宗漢咨覆到部漕糧爲天庾正供關係緊要此時上海尙未
收復明年海運事宜必應及早籌畫設法轉運著怡良詳乃劄黃宗漢迅卽妥籌具奏不得藉詞軍務紛繁以
致臨時貽誤 嘉訓

又諭軍機大臣等黃宗漢奏籌議來歲海運事宜一摺據稱蘇省寶山縣所屬之蘊草濱及太倉州所屬之
劉河口等處地方均堪起運漕糧業經咨商蘇省迅將出運地方及早勘定並咨奉天直隸山東豫備封釐
變各等語南漕爲天庾正供豈容稍有貽誤現在上海尙未收復既據該撫將變通辦理各情分別咨商自應

及早改移會同妥辦著怡良許乃釗迅即於劉河口及蘊草濱兩處海口委員勘定起運漕米地方一面奏聞
即一面知照浙江會同辦理並著直隸山東各督撫速派幹員封備衛船奉天府府尹及各督撫確查各處海
口如有盜波商船停泊押令迅速回浙聽候封雇裝運漕糧斷不准胥役人等需索滋擾致生事端 聖訓

四年諭內閣戶部奏籌議浙江海運章程一摺本年浙江省辦理海運改由劉河口受兌放送一切經理事宜
業經浙江巡撫黃宗漢派員妥辦惟該處海口係江蘇所轄若專令浙江委員催辦尙恐呼應不靈致有貽誤
著怡良許乃釗立即派委大員並熟諳海運之員駐劉河會同浙江委員設局妥速籌辦不得稍分畛域至
海船駛抵天津以後應用剝船著桂良督飭天津道府寬爲豫備以濟剝運其江蘇省海運事宜仍著該督撫
迅籌具奏毋許藉口軍務因循延宕致誤本供 聖訓

又 諭邵燦奏請飭催海船裝運漕糧等語見在江浙兩省新漕均由劉河海口起運北上所有載運船隻亟
應寬爲屆備以免貽誤著盛京將軍直隸總督山東巡撫迅飭所屬將沿海各口停泊之上海寧波沙船疊船
並東衛各項船隻飭令剝日駕赴劉河海口以便收載新漕及早開洋北運備該商船等屆奇勒捐或中道還
留卽著查照舊章懲辦東華續錄

五年戶部議覆兩江總督怡良等奏本年蘇省起運交倉漕米以河運錢糧作爲海運開銷自應就數運京無
庸籌補足額惟查本屆江浙海運漕米合計兩省不及一百二十萬石京倉支放攸關應令該督撫等按照福
建捐米章程辦理捐輸附搭正漕由海運京其所稱剝船食耗等米仍備帶本色作正開銷沙船食米抵運後
如有盈餘應由驗米大臣給價收買均應如所奏辦理從之東華續錄

十年諭軍機大臣等陳孚恩成琦奏江浙海運商船陸續抵津請飭該省糧道迅速赴津辦理一摺江浙兩省抵津米船現已有二百三十餘隻正在驗收喫緊之時各該糧道既未抵津亦未據報啟程日期此後米船連檣北上辦理乏人經費又無所出著何桂清徐有壬王有齡卽飭各該糧道迅速兼程前赴天津毋任稽留致誤運務前據羅遵殿奏截留附省各縣漕米數萬石運赴省城此項米石有無被賊焚劫著王有齡查明具奏浙江三批以後漕船應否卽行放洋著何桂清查看上海情形知照該撫與蘇省一律辦理 聖訓

十一年諭內閣戶部奏請飭催運米船隻等語奉天額運米石上年因直隸船隻遲延以致未能起運實屬延玩著直隸總督嚴飭押船委員刻卽押催船隻赴奉天領運毋得再有遲誤至本年應需船隻並著該督嚴飭天津寧河二縣剋期屆備務於四月內齊抵奉天口岸守候裝運並著該將軍等嚴飭經徵各員認真經理一俟津船到日卽行趕緊裝兌於六七月間赴通交納備再遲延逾限卽著嚴參懲辦以肅運務而儆玩泄 聖訓

同治二年諭議政王軍機大臣等李鴻章奏減成酌徵冬漕統共起運漕白正耗等米十二萬二百餘石隨給沙船耗米九千八百三十餘石飭令一律收齊仍議由海運津以資便捷等語李鴻章於新復地方卽能酌量情形籌畫天庾正供具見辦事認真深堪嘉尚 聖訓

四年浙江巡撫馬新貽奏竊照浙省杭嘉湖三府漕糧米石前奉 恩旨減免額徵經臣等查明應減成數奏奉 諭旨各按科則輕重分別上中下則一律永遠減免以紓民力等因欽此欽遵刊刻謄黃徧行曉諭在案所有議籌運費一款先經督臣左宗棠具 奏接准部覆內開查浙省海運向只支銷漕截銀兩其不敷

之數皆由州縣酌提津貼並不動用庫款是以准免報銷今該督以正額浮收概行覈減請將津貼一項裁革自係爲整剔漕弊起見但所需運費總宜於漕務項下寬爲籌備俾敷應用不得於漕項之外再動別項正款至一切支銷如有應裁應減者亦宜分別裁減力求撙節不得即以八錢作爲定額應令該督從長計議量入爲出將籌備款項及應用數目再行據實覆奏由臣部覈定後方准照數動支如有盈餘報部候撥准免造冊報銷以歸簡便等因當經轉飭藩司糧道通籌妥議詳辦去後茲據該司道等詳稱查浙西漕米除照額覈減外共存正耗米七十萬三千餘石內海運新章每石給商船耗米八升以全漕起運而論應扣去五萬餘石無須運費所有起運需費之米祇六十五萬餘石每石以八錢覈計約需銀五十二萬兩按漕截一款例應給幫改行海運以後業經 奏准提解每石三錢四分六絲今擬全數動用計正銀二十六萬一千一百四十九兩零隨耗五千三百二十九兩零又白糧經費項下查出漕截銀一萬三千一百零二兩零此外自應遵照部議 奏准之案於漕糧項下酌提不敢動用別項正款如減存之行月等米既不給幫自應變價擬照經費食米定價每石作銀一兩五錢現除減免外仍應共收米二萬四千二百五十四石零計銀五萬一千三百八十一兩零又查南月米一項此時亦不給幫共收正米七千一百石每石作銀二兩計銀一萬四千二百兩杭嘉湖三府行糧折徵項下共銀一萬一千四百五十二兩零隨耗五百三十八兩零月糧折徵項下共銀五百四十八兩零隨耗二十七兩零經費食米折徵項下共銀三千八百四十一兩零隨耗一百八十一兩零以及靈紹等府本色月糧項下共銀五萬九千七百三十一兩零又耗三千六百四十二兩零折色月糧項下共銀六萬八千七百二十四兩零又耗三千九百四十五兩零合之漕截銀兩已共

銀四十九萬七千六百八十九兩零以全漕起運之年約需銀五十二萬兩計之所絀無幾如有不敷之處再於漕務項下設法撥補所提各款皆係河運年間給幫之款今河運易為海運酌量籌抵仍係以清辦漕未動正款等情詳請具 奏前來臣等伏查從前海運經費不敷皆由各州縣酌提津貼每石自七錢至四錢不等此項津貼銀兩該州縣豈能自捐廉俸無非取自民間雖欲不浮收而不可得矣今正額既蒙 恩減浮收更應禁絕所有海運經費一項除動支漕截而外斷不可再令州縣津貼以致重累吾民惟有遵照部議於漕務項下寬為籌備今據該司道等議請以減存行月南月各米分別變價以及杭嘉湖三府行月食米折徵之款寧紹等府本折月糧等款抵備海運經費以昔年給丁之項為今日運米之用以公辦公不勳別項正款尙屬妥協此外漕務項下尙有一二未提之款萬一經費不敷亦可隨時撥補固不必另提正款亦毋庸再議津貼也其部議每石運費不准拘定八錢之數查原奏所為八錢者不過約計之詞以示限制之意原難作為定額惟海運自滬及津僱船設局用費浩繁不得不寬為籌備以免臨時掣肘臣等仍當督飭該司道等力求撙節覈實支銷如有盈餘存於道庫聽候撥用並將動用數目按年 奏給免其造冊報銷以歸簡易至從前辦理河運用款尤多將來如果復行以此八錢之款作為給幫之用是否相當尙難懸揣今但就海運而言辦理自可裕如矣 經世文續編

五年諭內閣馬新貽奏海運商船賠累請酌加水脚並請飭產船地方雇船協濟一摺近年海運糧石均係借資商船該商等承運官糧往返動逾半年費用加增每多賠累自應優加體恤以感招徠謹照准馬新貽所請此次海運封雇各商船於例給水脚之外每石酌增銀一錢五分以資津貼浙江本屆新漕米數較增尤應多

備船隻俾敷裝運著直隸總督山東巡撫卽飭產船各地方官儘數挑選堅實取銜等船趕緊駛赴上海協運
俾免貽誤 聖訓

九年浙江巡撫楊昌濬奏浙省來歲新漕酌擬海運章程十四條一委員分辦以專責成一新漕仍由上海受
兌放洋白糧仍循案裝盛麻袋首先運滬一寬備海運商船並由蘇多撥沙船移浙濟用一經耗等米仍照數
支給商耗飭帶本色並餘耗申糧等米搭運交倉一增給天津剝船耗米以彌虧欠一律通經費照案備帶釐
費等款仍按數抵解一商船准帶礮械並由商捐輪船護運仍責成沿海水師實力巡防一天津交米之後備
舊責成經紀續到米船仍由天津道驗收一循案加增海運經費一米船到津應多添排數寬備剝船一商船
水脚等項照案發給並二成免稅酌定賞罰一商船二成免稅之貨仍以米石計斤並船案跨帶竹木照案免
稅一商船回空裝貨仍照向章免稅一米船抵津交卸嚴禁經紀斛斗剝船需索浮費下部知之東華續錄
又 諭內閣前因戶部奏變通驗收海運漕糧及海運仿照河運章程辦理當經諭令李鴻章等分別會議具
奏茲據李鴻章會同倉場侍郎酌議具奏據稱直隸總督每年於春融後移紮天津所有天津驗米自可遵照
部議就近經理毋庸另請派員驗收惟近年海運米石較多總督事務繁重未能專顧一端請仍照向章酌議
倉場侍郎一員赴津會同查驗其通州收米事宜可由留通州倉場侍郎經理毋庸另請派員等語明春江蘇
海運漕船抵津著戶部先行奏派倉場侍郎一員早行赴津會同直隸總督妥籌辦理其通州驗收漕運事宜
由留通倉場侍郎一手經理毋庸另請派員以專責成 聖訓

兩江總督曾國藩奏竊臣等承准軍機大臣字寄同治九年十一月二十日奉 上諭海運交卸一節該部

擬請按照河運章程改由糧道赴通徑交係為掃除積弊起見著會國藩李鴻章英
溶斟酌情形詳細妥商會同覈議具奏原摺片均著分別抄給閱看等因欽此臣等
英機曾同藩司核議詳覆臣昌濬亦即飭飭浙江糧道如山會同司道核議詳覆旋
詳稱海運章程始自道光六年由滬運轉賣成南省委員由津運通賣成北省委員
責奉行既久法非不善而弊即叢生今欲大改章程不外除弊節二事然運通之
道委員押運以隔省人地生疎之委員稽察隔省積慣作弊之船戶恐呼應不靈其
按照米數備帶赴津力求撙節方可敷用向來北省押米員弁多至一百數十員今
薪水既多川資更鉅卽此一項已形糜費其餘各款亦必驟增恐於事未必有濟而
以起釁為重通壩以交卸為里糧道專駐津局則交米之事無所專責先赴通壩則
抄船在津等候太久耗費更多尤慮畏累遠避有礙於下次之招雇種種窒礙未敢
溶資商臣國藩察核所陳各節均係切中事理並非意存推諉卽據詳會奏矣適又
邇來海運弊不在商船之運津而在剝船之運通剝船弊固由積習之相沿亦由
虧累於平時復需用於臨事偷漏攙和無弊不作致令乾圓潔淨之米一交剝船米
力矯前失惟有遵照部議由南省糧道徑運交通自津過剝以後慎選委員以押運
嚴定偷漏罪名以鈐制之節省經紀等費以優恤之或可一洗剝船之弊至封僱彈
官妥為照料南北通籌恩威並用漕務當有起色現已草創章程十四條雖不能十

語臣國藩以該糧道英樸在浙江辦理海運二次調任江蘇又辦九年分一次一切情形久爲熟習既肯力爲其難勇於任事果能除漕米攪水潮雜之弊豈非大有裨益復經函商臣之萬臣昌溶酌核辦理臣昌溶旋又覆函以爲運通之弊果能改絃更張實爲中外所共願惟改章而仍用額設之經紀向有之剝船則從前錮習牢不可破若欲立新章另行僱船另行派人則事屬創始必須通盤籌畫確有把握方可試辦接准閩浙督臣英樸來函亦深慮驟然改章諸多窒礙現在米船將次放洋爲期已迫糧道如山議請俟下屆再行試辦與其倉猝改章不如從容集議臣之萬覆函亦稱直隸督臣李鴻章覆奏海運事宜摺內業已聲明今年新漕只能照章在津驗收 諭旨允派倉場侍郎一員赴津會辦若改爲徑運赴通驗收則南北辦理兩歧奏咨商改多費周章殊覺不便臣國藩參考衆論酌度時勢本年海運應仍在天津驗收江蘇糧道英樸既有創辦徑運赴通之志浙江糧道如山續行覈議亦有下屆試辦之請臣等公同定議檄飭英樸如山於馳抵天津後將本年糧米查照向章辦理再將下屆糧米運通改章之處面稟李鴻章應將經紀若何更換剝船若何整頓各項經費若何覈實動用一一籌度不厭精詳俟下屆漕糧海運由臣等先期議定新章奏明辦理以昭慎重 會文正公奏議

十年諭軍機大臣等李鴻章奏請酌增官剝船脚價及民船守候口糧一摺江浙海運漕糧由津運通年來剝船苦累弊竇叢生其民船守候口糧於長蘆鹽捐加貼運費及津沽各項不裝糧之民船派捐津貼歷年以來商民均屬困苦李鴻章擬請自同治十一年爲始無海運正供籌備剝船每裝米一百石加給脚價銀五兩並另籌接運白糧民船守候口糧銀一萬二千兩此銀兩先儘蘇浙糧道庫清項內撥解如有不敷卽由各該

省司庫通融借撥等語卽著會國藩張之萬楊昌濬按照李鴻章所擬妥爲籌辦以利轉輸此項銀兩准其作正開銷該船戶等經此次體恤周至嗣後海運糧糧到津時該督當嚴飭押運各委員實力稽查毋任再有攪和偷竊等弊 聖訓

江蘇巡撫張樹聲奏竊臣准戶部咨江北來年起運新漕應飭江安糧道循案辦理河運務將起運米數設法多籌冬兌冬開乘來年伏汛趕赴張秋渡黃北上奏奉 諭旨恭錄抄片飛咨到臣卽經轉飭江安糧道王大經欽遵辦理去後旋據該道稟稱運河年久失修本年漕運繞坡走險待汛未通勢已竭蹶萬狀若來年再辦河運約舉其端蓋有三慮黃水散漫多從衝缺之口分趨大清河勢愈分則力愈弱運道間段淤墊日多可慮者一經年繞行之坡河內八里莊一帶忽又淤塞不能再行可慮者二大汛之水偶藉天雨灌引未可習以爲常可慮者三如果冒昧循辦必致徘徊中道欲進無由辦理殊形掣肘查上海現議購造輪船招商轉運以之派裝江北新漕兩有裨益請將同治十一年江北法試行俾一縷咽喉隨時疏通源源不絕方能規復承平舊制何敢避難趨易率議更張惟漕運河工相爲表裏未有運道艱蹇而漕船得以暢行卽未有黃水漫流而運道可無梗阻自豐工清決黃河北徙之後始因軍務孔亟繼因工費鉅繁年復一年修防久廢故道幾不可復辦同治四年部臣建議規復河運行令江北漕糧雇船試辦閱今四次不得已而爲借黃濟運之計業已節節阻滯艱險備嘗近則黃水日益泛濫運道愈形淤塞由安山至張秋八里廟河流穿運缺口分歧水落沙停漸成平陸本年漕船繞行坡河竭力磨淺起剝以達八里廟復由八里廟築壩搶蓄以達臨清沿途奇險百出尙賴天雨浮送僅而獲濟實未可恃以爲常且坡水無源八里莊一帶又

已乾涸來歲漕行卽八里廟亦不能到何況臨清該道所請暫歸海運之處揆時度勢實非獲已查東河督臣喬松年覆奏黃運兩河摺片內稱黃水至張秋八里廟僅一股來源故難分流入運借黃濟運固非善策將來欲求借黃而不可得恐坡河亦難試行等語誠爲洞悉利害之言原奏議請先堵霍家橋等口並於南北兩岸築隄東黃奉旨敕議至今能否興辦尙無把握現已十一月中旬新漕開兌爲日無多若不速議變通實未敢以天庾正供再行嘗試通盤籌畫不得不將迫切情形縷陳聖主之前所有同治十一年江北淮揚通三屬新漕相應仰懇天恩俯准查照同治六年成案暫行歸併海運以免貽悞卽乘此停運一年專力治河庶幾運道疏通一勞永逸是否有當伏候聖明訓示遵行經世文續編

十二年諭內閣李鴻章延照畢道達奏江浙漕糧海運抵津擬請改令糧道自行運遞一摺向來江浙漕糧海運到津用官剝船運遞交納乃行之既久滋生弊端本年海運白糧及輪船所載漕糧改由糧道自雇民船運遞較用官剝船運送米色尙爲乾潔李鴻章等請將嗣後南糧變通辦理係爲剔除弊端起見著照所議所有來歲江浙漕糧卽著改由糧道運遞交納毋庸在津驗收並著戶部兩江總督江蘇浙江各巡撫一體遵照辦理其應行變通章程著李鴻章延照畢道達悉心妥議具奏

聖訓

直隸總督李鴻章奏目今黃河北徙河運一廢不可再復凡識時務者皆知之任事諸臣或謂應復淮徐故道或謂宜就東境東水濟運皆於無可如何之中作萬有一然之想寔與神禹治水行所無事之大有相悖旣不免於鑿必爲之無成臣正摺內已言之詳矣部臣奏令江北漕糧每年由運河試解赴遞亦欲羈縻運道使不遽廢起見無如年復一年自安山至張秋臨清三百里間情形日變險阻迭出近歲黃漲入運可資

浮送爲時極暫同治九年十一年黃汛始終並未灌運遂改用陸運與搶蓄雨水二策艱難危險之狀概可想見卽能運通亦僅十萬石內外究於倉儲漕政何裨久之試辦者必至不能辦而止臣於覆疏內請仍推廣海運蓋就其易且大者言之而議者又不免驚詫其實自道光六年創辦海運以濟河運之窮咸豐以後無年不由海運無年不兼采辦京倉命脈賴以維繫顧習焉不察耳今南北官商往來率以海舶爲通衢捷徑獨至運糧則有戒心將謂夷情巨測豈肯舍各口通商而無端開畔將謂沙船短缺何難借官商輪船而自顧本根就中國洋面運中國官糧外人斷不敢欺侮卽有他變我停運而彼亦須停貿易洋人不若是愚也若慮緩急之間京儲匱乏似應於無事時多籌起運多方采買使數年中得有一年之蓄內顧可以無虞查嘉慶年間大學士劉權之奏言南漕運抵京倉綜計公私費用每石需銀十八兩積弊相沿實爲稅政今人皆欲復河運殊不知河運之病 國病民至此海運費大減而運極速因倍省於河運矣至江浙采買成案每石連水脚剝價銀不過二兩七八錢視海運正漕尤省昨與輪船招商局紳董籌議除每年搭運蘇浙正漕外若遵照采買定價領銀赴南省產米地方購運若干石於正供完後逕解赴通交收不至貽誤如奉 允行再飭議章程咨部駁辦 國家但移河運費爲之節省其餘以併力於海防斯本末並治富強可

馴致矣 李文忠奏議

光緒二年兩江總督沈葆楨奏竊臣等接准部咨江北各州縣漕米仍飭辦理河運等因本年七月二十五日奉 旨依議欽此查江浙冬漕及江西兩湖採辦京米均係海運獨江北十餘萬石部臣堅持定見以爲漕運不應河道賴以長存且有借黃濟運之方但使黃汛不至斷流則漕運終無窘步所籌至深且遠苟非迫

於時勢之萬不得已臣何敢不殫思竭力共濟時艱惟本年河運困阻情形迥非昔比不敢不以干慮所及爲皇太后 皇上縷哲陳之從前河運愆期中途改而陸運曰開兌遲延致誤黃汛耳本屆漕米於正月起至二月初十日止暫記水次一律開行是月二十八日悉數挽過三閘催趲不爲不速乃楊莊以北淺不盈尺非特無水濟運且須蓄水養船嗣得甘霖又經上游啟壩逐層套送隨地起剝其淤處雖剝船亦僅半裝方能浮送挑河之費打壩之費灌塘之費雇剝之費車絞之費所虛糜者不知凡幾然黃汛之期固未誤也乃渡黃後察看運河之底高與大河水面相埒黃流無從灌入遂議築壩興挑自口門至張秋九百餘丈挑闊三丈挑深三尺縱能暢行無阻兩省所費蓋不貲矣夫運河之底何以高至於是則歷屆借黃濟運所淤者也借終日之力以濟之價累月之力以挑之猶可言也乃秋汛一到漕船銜尾爭進未及半而運口壅則昨日所挑者又爲今日黃流所淤餘船欲不出於陸運不可得矣借黃既不足以濟運徒使山東河道年年受淤是河道未嘗賴漕運而存且將因漕運而廢水失其本然之性商賈之舟楫農田之灌溉從此交病而愚臣鯁過慮竊以爲無形之患又有甚於此者何則就下者水之性也大河挾泥沙而行停則淤淤則決故治河者有逼隄束黃之法又有借清刷黃之法蓋益其湍悍之性使挾泥沙疾趨不稍停留庶不致潰而旁出今黃汛方苦微弱未嘗逼隄以束之借清以刷之轉復導之旁行舒其湍悍之性上游愈舒則下游愈緩所挾泥沙無力東注中道淤積數年之後河身高與隄等北潰則畿輔受其虐南潰則淮徐罹其殃而東省之首當其衝者無論也臣愚以爲水宜順其性政貴因乎時合無仰懇 天恩准將江北漕糧暫辦數年海運俟山東運道一律通暢再議酌復舊章沈文肅公政書

朱其昂海河並運論光緒四年

竊案論漕運者非主復河運卽主仍海運復河運者恪守舊章而未善復之之法仍海運者董收近效而未睹仍之之害雖言皆有本其實非萬全之策也夫海河形勢今昔迥殊控制機宜關繫尤大惟因時以制宜乃變通而盡善在歷代海河興廢惟利弊是論在當今變置措施直安危攸繫與其臨渴而掘井何如未雨而綢繆職道濫竿飛輓二十二年比來勸辦招商局務粗觀成效幸免隕越之虞與負委任之意茲以歷年承辦運務見聞所及而有得者著爲海河並運製機器治河道小輪船承運之說不揣愚昧敬謹錄呈惟執事者采擇焉主復河運者其意良是但運河節節淤塞運船片板靡存處不能驟復之時而持不可不復之議於是藉賈窳不齊之民船爲軍船湊各處無源之水運通道曠日持久而得主於通州尙屬幸事若張秋一帶淤塞成陸之處糧船至其地待水渡黃而伏汛不發雨水不多迨至七八月河底依然枯涸不得已而換船陸運輾轉遞剝費盡無窮之力而運至靜海天津等處運河已凍米色已霽起國無倉回空無日如同治十年之河運不特疲民傷財且幾貽誤正供此所謂未善復之之法一之爲甚不可再試者也主仍海運者謂自道光六年咸豐三年江浙漕糧相繼改歸海運以來抵津早而交倉速腳費省折耗輕公私稱便雖比年沙甯船生意衰船隻漸少往往不敷承運且船身較遜米色亦間有蒸變之虞然有招商局輪船協運以補沙甯船之不足而利便過之海防日有起色擇面尙屬安靖循而行之足以持久何必去易就難舍便捷之海運復艱難之河運哉不知天下事無遠慮必有近憂患須防於未形機須見於先事今海防雖備洋面雖安萬一洋面不靖海防戒嚴縱不至防無可防靖終不靖而

嘗不靖之時嚴防之際京倉豈可一日空虛茲因百年未必有之事而一日不可無斯慮者此所謂未睹仍之之害規小利而忘大患者也竊意爲今之計趁洋面安靖暢行海運之時試行河運辦有成效或以十分之五或以三分之二撥歸河運無事則海河並運有事則專歸河運此爲最便但欲行河運宜先治河欲治河宜先講治河之法治河之難非狃於成見卽誤於因循今河運雖多阻滯究不至全行淤塞若再耽延必至無從下手現在淤塞成陸之處如張秋至臨濟南北數百里乾見河底尙可用人工挑挖惟淺阻有水之處河身較長既不能屏水開濬又不能帶水疏通見效殊非易易至軍船既已無存自應用民船轉運然米數少尙可招雇米數一多萬難應手勢不能不由官添造糧船若舊例是循不但花銷太大費用浩繁而且夙昔之弊端百出可考而知又往返稽延不能備緩急之用故狃於成見無濟也惟有製機器以治河造小輪船以承運智力兼施河漕並治經費省而閱時速似爲勸說實可程功河道既通輪船既備卽從江北以試其端江北有漕州縣半濱運河如高郵邵伯寶應汜水仙女廟一帶類皆產米之區邇年江北運漕均在該處買米兌裝起運視江浙等省尤爲便捷俟江北漕糧全歸河運然後繼之以湖廣分之以江浙由近及遠自少至多南北脈絡貫通江河周流無滯將見運河商賈漸集兩岸居民日增如是則河運日益多海運日益少河運多則內地盛海運少則海口衰海口衰則外人無可希冀海防亦由是固矣惟是治河造船在在需費值此餉項支絀勢難二者兼籌而治河造船相爲表裏既不能一氣呵成又不可二者偏舉惟有於有漕省分按漕數先行借墊或於各新關二成洋稅項下借撥若干通融濬用其河運規模仿照招商局協運章程先造兵商兼用新式小輪船十隻每船力勝二百墩喫水

三四尺堪裝米二千石一日夜行五百里一月運二次每年自二月至九月可運米三四十萬石回空貨物以北方煤鐵爲主運漕之暇協助防務卽以水脚爲澆裹奏派委員予了事權俾資展布不數年必能船米遞增若造船至百號則米可運三四百萬石轉輸運棧縱巡防南北數省若身之使臂臂之使指內防愈密外防愈堅且江海往來貨物已有招商局大輪船以分其勢又設小輪船以攬其全不獨海防有事有備無患且洋商生意不難使之徒手而返矣至有漕省分起運之處有通州交米之處均應設立公局由小輪船往運赴通一杜攬水之弊端一省轉刺之周折較現在海運由津轉運者更爲利便或謂此事不難於造船起運而難於治河利運運河綿亙二千九百餘里既限於地軸高低淺深不一復梗以黃河險阻泛順靡常又運河自臨清州南牆門重疊啟閉有時而輪船往來利於迅速若節節等牆則耽延時日若隨到隨啟則水源不敷且下水而放牆猶易上水而盤牆更難此皆老生常談世俗泛論實未嘗深長思也夫自清江至臨清爲牆六十有一拚以三日耽延便可過却牆雖多何礙於運至於河淺之處可濬以深之來源不敷之處可引支流以足之黃河水涸之際可開渠以通之汛漲之際其勢洶湧在他船不能截流而過以輪船機器之猛烈船身之堅固行動之靈便又何難一二時辰剋期飛渡耶第河以北地形卑下勢處下流若開濬運河之口而不爲隄防一旦黃流陡漲橫注北趨則自陽谷在平而下其患不可勝言然亦有以制其患者開利津鐵門關外四十里淤塞之海口以暢其下流而高其北岸堤塍堅其運河插壩則桃花之浪竹箭之流俱無慮矣或又謂復河運而用輪船能保外人不因端藉口啟其通商運道之心乎不知彼族惟利是圖從前各口之利權爲其佔去者內無輪船以制其先遂致爲其

所奪現在與內地之利先有輪船以制之即使欲爭而我以運漕爲名明杜其爭之口以防江爲義強
戢其爭之之心斯外人初則不可爭繼則不敢爭者也聞東洋內地皆設有小輪船故西人火輪船至東
洋通商止於海口往來不入內河駕駛非若入我中國既得通商江漢又欲馳驟川滇也此其明證或又
謂外人窺伺邊境如雲貴四川等省或駕輪船或開鐵路彼方狡焉思逞日出不窮而我徒沾沾於小輪
船殊非當務之急不知事有似緩而實急似小而實大者彼族之窺我邊境其志固不在邊境也按沿海
各口久非淨土所恃者內地耳然自漢口通商以後天塹之雄已爲穿破若雲貴四川再開鐵路衣帶之
勢全歸無用表裏山河大半爲其牽制一朝有事防不勝防守不勝守矣今設小輪船以通河運使東南
財賦可以由運河輸至京師固其根本然後設版於海江要隘寓兵瀛嶺咽喉南北無隔閡之虞飛挽有
自如之勢聲色不動而形勢已成夫豈非當務之急者哉或又謂設小輪船恐礙招商局大輪船生意是
知其一而不知其二者夫大輪船儘有海運可支即使他日盡改河運尙可赴南洋各埠爭復利權況招
商局以攬載爲大宗未嘗專恃運漕爲生活亦復何礙或又謂海運改則沙甯船生意絕河運用輪船則
運河民船失業皆有關於華商元氣殊不知沙甯船倚藉運漕原近年來不得不然之計若各口輪船漸
少則沙甯船生意漸復運漕之利有限貿易之利無窮何至於絕小輪船往來裝載貨物以漕米煤鐵爲
宗本非運河民船生意卽稍有侵佔通運道之支河別港口岸甚多亦足以爲生計又何至失業乎或又
謂如是恐新關稅項減色然新關減色一分常關起色二分但須改常關平時完納之條從新關見百抽
五之例截長補短並無損益於公家苟能挹彼注茲固不必因噎而廢食也洋商之入中華也由南及北

串入長江追原其故未始非河運廢弛內地巨商大賈懋遷海口於是各口漸旺而洋商乘機漸入置金帛於門外使竊兒生心此慢藏誨盜之所由來而前代海禁之嚴亦有見及於此也誠能復內地之利卽分海口之利分海口之利卽分洋商之利自北及南漸漸利皆歸我得瀉子補母之法行見熙熙攘攘盡我得也 國勢由是而強元氣由是而復而數十年外來之患亦可消弭於無形矣總之外人以通商爲名窺我中土我卽以運漕爲名制其叵測此中樞紐不待明言但非常之舉卽大難之端若任用非人則罕有成效是惟任人不疑疑人莫任專其職事假其便宜不以一嘗見噴不以羣言轉念儻號令朝更而暮改等築室於道旁則經權所繫成敗攸關不可或忽者也治河運漕章程十條附例於左

一治河宜總計全河形勢分別辦理也按運河北自通州石壩起南至揚州瓜州口止長二千八百八十二里四分河形曲直不一河道通塞不一地勢起伏不一水流順逆不一隄位險夷不一橋座完廢不一須節節勘視處處丈量洞達全河形勢然後繪圖估工畫清段落酌定期限或用人工挑築或用機器開濬派員分途辦理同時並舉庶冀剋期蒞事工費不致虛糜

一治運河宜兼治黃河以免沖決之患也按運河自戴家廟橋至安山橋穿黃河而過當河水安流船隻固可利濟卽水枯之際尙可開通支河引汶水以渡惟汛漲之時奔流洶湧北岸輒有泛濫沖決之虞若僅高隄堅牖捍禦是論雖爲不可少之工程尙非治本之計查黃流泛濫皆由下流淤塞不能容納消導所致是宜開濬東河以下黃河淤淺之區與利津鐵門關外四十里淤阻之海口以暢其入海之流則順軌可期自不至爲患矣

一小輪船式樣要兵商兼用以期適用也將來製造小輪船宜雙輪鐵殼兵商兼用式樣以期無事
運河有事調用並擬每船兼造有機噐跟制一隻查海江遼關行制大小皆宜運河則河面窄狹船底
較多船門僅闊二丈二尺船身本小便於兵商兼用然裝米之外不能多載客貨多趁
搭客而運河一通輪船南北貨物沿途搭客勢必應接不暇故宜兼造跟制多設客位以便裝載平時
無須拖帶以省煤費若遇江湖觸水溜之處亦可生火開輪或拖或刺相輔而行免有阻滯如是則
造船之資本既輕又適於用運河輪船法制略盡於此矣舵工水手概用華人不准雇用洋人一免駭
內地之見聞別開鮮味一以杜外人之經歷致敢講張至船上起貨起旋及往來盤膳俱用機器轉移
取其省力而利便事半功倍也

一製造機器物料格外靈巧也運河狹淺船壩較多若機器大而河身小則不但有難容之勢
抑且多轉折之礙必須相度河灣濶深船門闊狹向外洋定造開挖內河之靈小機器議立合同如不
合於用說明包退包換以期利器善事不浪擲也

一擬請添設運河常關照新關例權稅以補新關之絀也運河既通輪船南北搭裝貨物必多內河
貨多則海口貨少海口貨少洋關稅項必減而現在軍國要需半資關稅一朝減色窒礙殊多是以必
須添設運河常關以補新關之絀然常關稅則所征甚輕若照常關稅則抽收仍復無幾故又須撥新
關見百抽五之條照章完納以期關市之征有益無損惟輪船運漕北上裝載貨物仍須遵照舊章免
予二成輪稅如二成以外及回空裝載之貨槩令納稅不准遺漏絲毫其所收稅項亦應照新關章程

以八成解部二成留存以備不虞之用

一治河造船宜先籌款也治河之費擬請於各新闢二成洋稅項下陸續借墊或於有漕省分按漕數先行撥借以便將河道設法疏濬一面製造小輪船稟請振濬試運以觀厥成

一海運漸歸河運擬請將所省運餉費撥為治河經費也查海運米石由天津轉運通州每米一石需刺船水腳銀一錢六七分毛米八合食米一升一合五勺合計每萬石應需水腳銀一千六七百兩米一百九十五石若用小輪船徑運赴通前二項俱可節省若小輪船承運至百萬石則年可節省銀十六七萬兩米一萬九千五百石應請將此項節省經費撥歸治河項下以摺借墊之款其銀即與承運水腳銀兩一并按數支發無須另文領解以歸簡便而省繁文

一擬籌歲修運河經費以垂久遠也河運復河道通必須設有常經籌定歲修經費以便隨時疏濬修築河道無淤塞之虞隄隔無倒塌之慮查海江輪船裝運貨物之外尙可搭趁客位此項小輪船舉行既可通內地數省之商賈又可免外洋艱險之風波貨物搭客自必日見興旺擬於裝貨搭客水腳項下由局照九五扣例扣提河道經費其河工厝塌一切夫役歲修經費皆由此項開支儻有要大工程經費不敷再行稟請於二成稅項之下動撥庶費有所出永無廢弛之患

一試辦河運宜除去從前河運積習也查河運經費名目甚多現擬用小輪船則在南受兌在北交兌並承運水腳二成免稅一切均應照近年招商局協運蘇浙漕糧章程辦理即辦漕省分通壩正雜各項均須奏咨立案仿照海運成案辦理以歸畫一而杜弊端

一小輪船裝卸漕米地方擬請設立公局也輪船承運漕糧一切交兌事宜頭緒紛繁內應派人照料擬請於輪船受兌之處與通州交米之處設立公局專派員董經理其事以昭慎重而有責成經世文

續編

五年兩江總督沈葆楨奏竊臣准戶部咨會議倉場侍郎桂清畢道遠修治運河一摺請旨飭下該督撫體察情形核實妥籌恭錄諭旨並覆奏原摺行令欽遵辦理前來竊以因轉漕而治河因治河而籌費沿流溯源意至善也國家軫念河務原爲漕務起見從前修費不惜歲數百萬金良以天庾正供非河運不行航海風濤難測故也今則國帑艱難萬非昔比不得已而取資於漕項又合數省之款以濟之設爲各省力所能逮亦必有一勞永逸之計而後費不虛糜若歲歲修河以供歲歲辦運無論費無從出也竊慮受病日甚有求如目下之河形而不可得者故將原奏交議各節爲我皇上分晰陳之原奏有漕省分應酌提撥項若干一節查甯屬起運光緒元年分冬漕以漕項開發運費因沿途起剝沿途挑濬處處周折各短數萬金數千金不等惟光緒三年極力節省二萬金撥充晉豫賑需則恩准暫行海運之所致也蘇省運費亦遞年不敷甚鉅全賴藩庫挪款墊用若再令分撥數成無論河運海運均將束手河未修而漕先廢矣安徽係折漕省分宜有漕項贏餘而京餉出其中協餉出其中本省軍餉出其中以贏補絀尙難相抵並非有提存的款以待不時之需今若取之於民民不堪命若將京餉協餉停解參處隨之摺彼注茲計惟有裁勇之一法夫設防如故又值年數順成伏莽尙不時伺隙而起儻一旦籬籬盡撤良懦無所依附宵小因而生心雖智者不知所以善其後也原奏江浙兩省能否將海運糧石各分出十數萬石辦理河運安徽省下

屆漕糧能否起運本色若干並運米船隻能否多雇一節查蘇省辦理海運已苦經費不敷再令舍易趨難更從何處挪款安徽之窘甚於江蘇力不從心不言而喻徵本色猶可運本色甚難本屆江北漕船六月尙未儘數渡黃回空更不知何日卽事竣催令內返盤壩守凍鈔朽過半或冒險求速飄沒散失各船戶前鑿具在下屆欲勉符舊額勢須多方勸勉招集方得成行更於此外求多恐百呼而無一應者矣原奏運河宜如何設法修濬將全河形勢一并詳細查明議覆一節查全河詳細情形臣未親履其地無由臆斷但以大勢揣之前人之於河運皆萬不得已而後出此者也漢唐都長安宋都汴梁舍河運別無他策然歷經險阻官民交困卒以中道建倉伺便轉餽而後疏失差少元則專行海運故終元之世無河患焉有明而後汲汲於河運遂不得不汲汲於河防運方定章河忽改道河流不時遷徙漕政亦隨爲轉移我朝因之費既贖事而增而曠悍游食之徒萌孽其間所謂青皮黨安清道友者引類呼羣恃眾把持成固結不可解之勢前兩江督臣陶澍憂之乃創爲海運之說明以節省經費貽以消患無形蒙宣宗成皇帝允行而漕政於窮無復之之時藉得維持不敝迨髮捻事起此輩潛入其中南北蕩平消磨殆盡雖閩粵市鎮尙有此等名目然無大淵藪以容之偶或什伍成羣良有司足以治之矣是河運所可慮者又不僅在經費也原奏運河貫通南北漕艘藉資轉運兼以保衛民田意謂運道存則水利亦存運道廢則水利俱廢然無漕省分水利亦關民田命脈未嘗敢任其廢臣竊以爲舍運道而籌水利易兼運道而籌水利難何卽就下者水之性也必使貫通南北不能復聽其就下矣不聽其就下則事事皆以人力爲之費固不貲利亦大減且民田之與運道尤勢不兩立者也無旬不雨民欲啟涵洞以灌溉官則必閉涵洞以養船於是而挖堤之案起至於河流

斷絕且必奪他處泉源引之入河以解燃眉之急而民田自有之水利且輸之於河農事益不可問矣運河勢將漫溢官不得不開減水壩以保堤婦孺橫臥爛頭哀呼求緩官不得已於深夜開之而堤下民田立成巨浸矣東境河道經撫臣隨時飭屬挑濬地方官何必全無天良其所以旋濬旋淤者則借黃濟運之害爲尤烈前淤尙未盡去下屆之運已連樁接軸而來高下懸殊勢難飛渡於是明知借黃之非計而舍此無以蘇淨送又百計逆水之性強令就我範圍敷前修之款皆空本屆之淤復積部臣所謂歷年興修均以隨時挑挖運段疏濬爲權宜補苴之計者誠洞鑿癥結之論不可不思慮豫防者也議者太息於經費之無措舳舻之不備致此舉之不成臣竊以爲使道光年間歲修之銀與道光年間官造之船至今一一俱存以行全漕於借黃濟運之河未見其能通也蓋江北所雇船隻其大不及從前糧艘之半然必俟黃流泛漲且竭千百勇夫之力以挖之過數十船而淤復積今日所淤必甚於去日而今朝所費無益於明朝若使船大且多有所施其技乎且懷乎其不可犯者大河之性也近因西北連年苦旱來源不旺遂乃狎而玩之物極必反設令因濬運而奪溜北趨則畿輔受其害南趨則淮徐受其害如民生何如 國計何伏願 朝廷師元人創行海運之成法體 宣宗成皇帝試辦海運之深心以收近日輪船自然之利並念時局孔艱萬不容作無益害有益實事求是以濟艱難臣自知蠶測管窺無當萬一第旣奉 旨飭令核實籌議愚慮所及萬不敢強不知爲知以自欺於 君父之前也 沈文嘉奏啟

六年由隸總督李鴻章詳覆梅啟照條陳摺第五條請添設海運總督查運河爲黃河梗阻每歲止能運十萬石而百萬石斷不能運誠如梅啟照所言然往時河運費多弊重以有倉場有漕督上下各衙門層層鈐制

也今海運百萬石招商局與沙船分運毫無貽誤經費較省流弊尙少若於煙台添設總督多一衙門卽多一重胥吏丁役需索之繁恐經費漸難撙節弊端仍難淨除如慮海上有事固非空設一大員所能爲力如令其節制沿海水師則既有南北洋大臣及各省督撫又有添設外海水師提督又設漕督未免號令紛歧事權不一應請無庸置議李文忠奏議

二十二年署兩江總督張之洞奏竊照蘇州等五府州屬光緒二十二年起運二十一年分徵收漕白二糧業經臣等查明河海並運交倉約數專摺奏報在案茲臣等督同藩司糧道暨海運局員逐細鈎稽核實釐剔實該起運漕白正耗米八十萬三千一百八十四石零除提撥河運米一十萬石外實計海運交倉漕白正耗米七十萬三千一百八十四石零隨運天津通州經制食耗及支給船耗等款米七萬六千六百六十九石零核之奏報交倉約數計增米三十餘石查前項米石運抵天津轉運通州事務繁重應仍派委蘇松督糧道陸元鼎酌帶委員先期趕赴天津地方預行設局俟米船運至卽行驗卸過滬押運前赴通州交兌並請勅下倉場侍郎早蒞通州驗收以昭鄭重此外稽核起運兌給銀米等事力爲整頓核實選派委員紳董仍在蘇州上海分設省滬二局各專責成應需沙衛各船並飭趕緊招雇立攬修脩排泊浦江廳候兌裝並分撥米石交招商局輪船協同裝運一面嚴催各屬將應運漕糧及陸續水脚等銀趕速運解提前放洋不准稍有延誤至今屆循辦徑運通州過剩斛兌及嚴禁官餉積弊各事宜照案仍由南省自行經理惟南兌北交頭緒紛繁自應參酌時宜詳加釐定剔除弊端節減浮濫總期盡善可行以重漕政茲據蘇州布政使鄧爾熙會同蘇松督糧道陸元鼎督飭局員酌議海運章程十條具詳請奏前來臣等復核無異理合開

續清單恭呈 御覽擬請 勅部照准施行此外如有未盡事宜或續有變通之處容隨時核明另行奏報
張宮保啟

皇朝政典類纂卷五十七

漕運十

海運輪船載運 防護事宜 改折附

江蘇巡撫丁日昌札據商號吳南記等稟呈現據集資購買輪船四隻試行漕運以補沙船之不足其水脚一切悉照海運定章無須加增稟乞核示祇遵等情到本部院據此查沙船如果足敷裝運自應先儘沙船惟將來楚皖等省河運難復恐均不能不酌改海運米數日多船數日少亦斷不可不未雨綢繆急圖補救本部院前此本有輪船分運之議事關重大必應詳慎妥籌期於大局有裨合行鈔稟札飭札到該司即便遵照會同蘇藩司江藩司悉心參酌核議稟復察奪毋違

加函

海運兼用輪船言之似駭聽聞然目前沙船日少勢不能不圖變法況現議在滬製造輪船若不爲代籌生計試問將來養船之費出在何處杜摯有言曰利不百不變法工不十不易器易曰窮則變變則通目前正是窮極而通之時多辦輪船一可收回利權一可精習水戰斷斷不可拘牽時論致失事機某昨與緣仲熟商不過藉商辦以爲嚆矢較無痕迹並將事宜急辦實情劃切函達翁相伯帥以期堅持此議俾獲速籌務祈尊處接膺後迅爲議復徹慮擬上加廉併餉封事亦卽順爲陳明也撫吳公履同治十年江蘇巡撫張樹聲奏海運以雇船爲先務上海新購輪船能否試裝米石有無窒礙卽經飭據蘇松太道沈秉成查復並據招商局委員朱其昂等稟奉委購辦輪船配運漕糧以補沙船之不足業經稟由

直隸督臣李鴻章附片奏明此項輪船現已購定三隻自明年正月至六月約可裝運三十餘萬石除承裝浙江漕米二十萬石外兼運江北新漕不致臨時延誤各等語是履船一項業已無虞缺乏可期迅速抵通飭將起運米數寬為籌備妥議章程另行會詳核奏 仰鈔

十一年直隸總督李鴻章奏竊查本年五月間臣於議覆製造輪船未可裁撤摺內籌及閩滬現造輪船皆不合商船之用將來間造商船招令華商領雇必准其兼運漕糧嗣准總理衙門奏覆以間造商船華商領雇一節李鴻章沈葆楨俱以為可行應由該督撫隨時察看情形妥籌辦理等因奉 旨依議欽此旋准總理衙門函屬遵諭有心時事之員妥議章程俟官船工竣成規具在承租者自爭先恐後誠為力求實濟起見臣反覆籌維現尚無船可領徒議章程未即試行仍屬空言無補因思同治六七年間曾國藩丁日昌在江蘇督撫任內迭據道員許道身同知容闈創議華商置造洋船章程分運漕米兼攬客貨曾經寄請總理衙門核准飭由江海關道曉諭各口試辦日久因循未有成局僅於同治七年借用夾板船運米一次旋又中止本年夏間臣於驗收海運之暇遵照總理衙門函示商令浙局總辦海運委員候補知府朱其昂等酌擬輪船招商章程嗣又據稱現在官造輪船內並無商船可領該員等繕錄松滬稔知各省在滬股商或置輪船或挾資本向各口裝載貿易向俱依附洋商名下若由官設立商局招徠則各商所有輪船股本必漸歸併官局似足順商情而張 國體擬請先行試辦招商為官商浹洽地步俟機器局商船造成即可隨時添入推廣通行又江浙沙甯船隻日少海運米石日增本屆因沙船不敷諸形棘手應請以商局輪船分裝海運米石以補沙甯船之不足將來雖米數愈增亦可無缺船之患等情臣飭據津海關道陳欽天津道丁壽

昌等覆核皆以該府朱其昂所議爲然請照戶部核准練餉制錢借給蘇浙典商章程准該商等借領二十萬串以作設局商本而示信於衆商仍預繳息錢助賑所有盈虧全歸商認與官無涉朱其昂承辦海運已十餘年於商情極爲熟悉人亦明幹當即飭派回滬設局招商迭據稟稱會集素習商業殷富正派之道員胡光燿李振玉等公同籌商意見相同各幫商人紛紛入股現已購集堅捷輪船三隻所有津滬應需棧房碼頭及保險股分專宜海運米數等項均辦有頭緒並稟經臣咨商江浙督撫臣飭撥明年海運漕米二十萬石由招商輪船運津其水脚耗米等項悉照沙甯船定章辦理至攬載貨物報關納稅仍照新開章程辦理以免藉口昨據浙江糧道如山詳稱該省新漕米數較增正患沙船不敷撥用請令朱其昂等招商輪船分運浙漕較爲便捷又准署兩江督臣張樹聲函覆以海運難在雇船今有招商輪船以濟沙衛之乏不但無礙漕行實於海運大有裨益當嚴飭江海關道等和衷協力勿致善舉中輟等語是南北合力籌辦華商輪船可期就緒目前海運固不致竭蹶若從此中國輪船暢行閩滬各廠造成商船亦得隨時租領庶使我內江外海之利不致爲洋人佔盡其關係於國計民生者實非淺鮮除由臣隨時會同南洋通商大臣督飭各口關道妥商照料並切諭該員紳等體察商情秉公試辦勿得把持滋弊李文忠奏議

諭軍機大臣等張樹聲恩錫奏蘇省本屆海運正漕現提出十萬石由招商局輪船承運赴津請飭直隸總督備船刺運等語輪船轉運甚速必須趕緊刺運方免國棧延滯之虞除該省白糧仍遵本月十六日諭旨辦理外著李鴻章即飭天津道縣多備船隻趕緊刺運並查照上屆福建採買米石之案會同倉場侍郎臨棧查驗隨收隨刺毋使久儲棧房以致蒸變

聖訓

十三年戶部奏竊查京師例給俸甲米石向賴東南各省歲輸漕糧數百萬石儲之京倉以供支放自咸豐年間南漕停運倉庾久虛同治四年以後河海並運歷屆循案經理尙無貽誤然海運祇江浙二省河運惟江北各屬每年進倉米數自數十萬石及百萬石不等僅足數俸甲米石減成開放之數若新糧進倉稍遲恆有青黃不接之慮其江西湖北湖南三省歷年辦理折色以致倉存米石毫無盈餘俸甲領款驟難酌復臣部於歷屆奏催新漕案內行令江廣等省規運本色各該省總以暫辦折徵爲請上年臣等酌議河運海運採買各事宜摺內請令江廣各督撫督飭藩司糧道等將同治十二年分新漕先期謀畫本折兼籌務須分成起運本色仿照江浙海運章程沙甯海舶及商局輪船均可裝載船隻自無慮不敷奏准行知遵照嗣准江西巡撫劉坤一以酌辦本色實有難行湖廣總督李瀚章湖北巡撫郭柏蔭湖南巡撫王文韶等以驟難本折兼籌先後奏請照舊折徵奉 旨允准照辦在案臣等伏查額徵漕糧本色乃經久之良法折色係權辦之章程現當京倉需米孔殷江浙漕糧徵運尙未足額江西省漕額最多湖北湖南兩省米穀充盈價值較賤如酌辦本色由海運津於倉儲餉稍均有裨益惟據該督撫奏陳分成徵收之難及倉厥尙未修建各節自係實情臣等查閱上年李瀚章等原奏內聲稱酌提漕折採買雇裝輪船至滬海運其漕折一石之價不敷買米或請以現今解通之款酌量通挪俾資周轉等語查江浙採買成案或動用額漕抵徵錢文或酌提漕項銀兩買米搭運所以彌補正供之不足除輕齋等項照章起解外仍係以漕辦漕不動別項正款與尋常採買不同其買米價值連運脚在內每石合銀二兩三錢至二兩五六錢不等江廣係產米省分且係稜米與粳米體質大相懸殊米價出留更可節省辦理自不致爲難至轉運事宜江廣各省皆以軍船未復

江湖遠隔爲辦查近年江浙海運案內因沙船短少於起運漕糧內分撥米石交招商局輪船分裝運津業已辦有成效各該省如能仿照辦理江西或於九江裝兌兩湖或於漢口鎮裝兌由江入海直達天津最爲便捷再查江北漕糧歷辦河運抵運日期年早一年如江廣援案照辦亦有成迹可循應請 飭下兩江湖廣各總督江西湖北湖南各巡撫體察情形竭力籌畫或酌徵本色若干或試辦採買若干無論海運河運均由各督撫酌定妥善辦法總以明年春間有米起運爲斷以固根本而實倉儲一俟辦有端緒卽行詳議章程迅速馳奏以憑覆覈

經世文續編

光緒三年兩江總督沈葆楨奏竊臣接准部咨本年江北冬漕飭令仍辦河運務將米數設法多籌船隻寬爲豫備乘來年伏汛以前趕赴張秋一帶渡黃北上等因當經嚴飭遵行去後茲據江甯布政使孫衣言江安糧道松椿詳稱江北歷辦河運全賴雇用民船近因道阻且艱沿途起剝折耗賠累無不視爲畏途上年回空漕船大半阻於張秋生計無資悉將篷桅典售並有變賣船隻者雖蒙籌款撫卹而所得不償所失怨讟滋深其幸得南旋者亦不願再裝漕米今春經委員等多方勸導許以早令回空不似上屆之遲滯始肯勉強承運乃開行後自邳宿以至夏鎮節節盤剝拖泥磨淺大費周章及由戴廟開出口挽入黃河因大溜南趨其北注八里廟灌入張秋運河者不過十之一二而晉城吳家壩史家橋等處黃流湍急險惡煎分每挽一船集百數十人之力稍有不慎傾覆隨之至八里廟又因山陝亢旱黃汛漲發不大且口門背溜水落則漕緩溜緩則沙淤百計經營始將漕船十起先後挽入運河全抵臨清以爲可幸無事矣不料運河遞年爲黃流所灌停沙愈積愈高如高屋建瓴俯瞰衛水又值衛水十分微弱無從仰承高下懸殊萬難出口原

擬辦理接運無如北船寥寥委無可雇而南船節節磨鈍益憚北行開導再三並加優卹仍令原船拖壩入衛運送通倉於八月到衛交卸後即令趕緊回空旋據東昌府知府程繩武稟稱張秋至臨清箱口壩二百二十餘里運河乾涸過半為歷年所未有倘空船勉強入運必致乾擱河內進退為難請飭暫泊衛河籌給守凍經費春融再令南下免滋事端雖經東省沿河各州縣暨承修河道委員趕緊挑浚一面勸飭押空委員酌帶經費會商東省各員妥速設法引水浮送究竟年內能否南下殊未易知其奉撥河南賑米又令原船運赴道口交兌該船戶自知回空必誤而藉此往返可圖經月口食亦曠且解燃眉之急此本年漕船礙難回空之實在情形也伏查江南年來行商肅索民船本不甚多而歷屆河運朽壞拆賣者亦復不少現在阻於張秋空船又四百數十號守株以待雖悔可追謹即分派委員先行四出雇募優予價值設法招徠旬日以來迄無應者即間有一二不甚整齊船隻與商修理一間裝運漕米亦皆裹足不前刻已十月中旬開兌新漕計期不遠舊船既不能南下新船又無可雇若不迅圖變計勢必臨時貽誤關繫匪輕用特據實繕祈詳明擬請援案暫由招商局輪船裝運赴津交兌以實倉儲來年回空漕船乘此機緣修船堅固張秋河道山東亦可從容實力開濬下屆仍循向章辦理河運斷不敢畏難推諉詳請具奏前來臣查以江北之運存山東之河都巨然費苦心疆吏敢分畛域惟辦運首以雇船為急不容及早紆籌舊船既難回空新船又無從招雇與其抑勒驅擾何如偶示權宜合無仰懇 天恩俯准暫由招商局輪船裝運一年明歲再復舊章以免遲誤 沈文意 奏

摘錄招商局章程三條

一兌漕交漕請分任以資熟手也查交收漕糧向來朱守其昂經理多年情形熟悉茲輪船運糧所有在滬收米在津交米各事仍歸朱守一手辦理擬將運糧所得水脚每百兩提出五兩專爲朱守辦公之用似此交收糧米之事係朱守其昂專司而輪船各務凡局內船內之事係唐丞廷樞專司各盡厥職庶免轉轉而專責成

一棧房輪船均宜保險以重資本也棧房原爲輪船利於裝卸起見所存漕糧一時未能運竣萬一失火關係匪輕應由商局向保險行保火險至海面水險一層保費較重雖經入奏有案併未奉准應請仿照沙甯船定例遇風沈沒准商局稟請豁免

一海運局交收漕糧擬請仍照沙船向章辦理以免歧異也查沙船領運漕糧在上海則由滬局交米到船及船抵天津由津局收米過駁是沙船祇管運米之事不管交米收米之事今漕糧酌撥輪船領運自應仍照沙船向章凡漕糧在滬時由滬局交至上海棧房碼頭迨輪船抵津則由津局在津棧房碼頭驗收過駁輪船專責亦係祇管運米倘糧米在船在棧未經海運局驗收遇有短缺自應惟輪船商局是問至運糧水脚以及耗米蘇袋並准免成稅均請仿照沙甯各船向章辦理俾示體恤省鈔

右輪船載運 按此與市易各省商局門參看

道光五年諭內閣琦善等奏請將蘇松常鎮太四府一州應徵道光五年分漕糧全由海運並議定運送章程一摺沿海水師會哨巡防一款除由該督隨時移行該提鎮將備統巡分巡外著山東直隸各督撫轉飭沿海水師提鎮各按汛地多撥哨船分派將弁兵丁巡防護送並著該督屆期奏派武職大員二人押坐商船赴津

以資稽考其商船宜分別獎敘及蘇松等府州軍船酌加調劑二款俱著照所議辦理 聖訓

七年護理山東巡撫賀長齡奏竊奉 諭旨江蘇省來年新漕除江甯揚州淮安徐州通州海州等四府二州

照舊各歸本幫免收轉運外其蘇州松江常州鎮江太倉等四府一州仍雇用海船運赴天津一切海運事宜除成案可循外此內如須量為變通著漕運總督直隸總督山東巡撫江蘇巡撫通盤籌畫定議俟奏到再降諭旨等因欽此遵查上年南糧由海運行經過東省洋面巡防護送具有成規辦理均無貽誤來年海運到東其舊章之可循者自應仍循其舊有必須變通者亦應參酌盡善以期辦理益臻周妥除移行遵照外所有現在查辦及臨時應行變通各條敬為我 皇上陳之

一在途商船應催令回南受兌也查南漕十月開徵自必趕為一運赴津而江浙商船多已於春夏之間攬載放洋歸期莫必現在籌辦海運在途船戶無由得悉若任到處逗遛或再裝運客貨前往別省設江蘇存船不敷即致有誤運兌自應預為籌畫臣已飭沿海州縣各於所轄口岸多貼告示剴切曉諭并令不時親往稽查如有南回船隻即令趕緊南駛其自南省來者應赴何處卸載亦即飭令迅速前往卸竣即回俾免以米待船

一最要島嶼應令該管將官親督彈壓也查南糧經由東省洋面凡可寄錨收泊者二十五處惟榮成之石島俚島文登之威海福山之罟蓬萊之廟島大概總須收泊而廟島孤懸海外距岸將及百里巡防尤為緊要江南之沙船舵水尙屬安靜守分其浙江之蟹船三不像船水手人等率皆强悍不馴不受弁兵約束每致登岸滋事居民深受其累臣前在江蘇藩司任內即所深悉來年海運屆期應令各該管將

官常川赴島稽查藉資彈壓仍先咨會江蘇預爲曉諭如敢在途生事卽由所在官員照例嚴懲俾知警

懼

一陸路委員應行酌減以免派擾也查東省登州一帶向無驛站多派委員卽須多用夫馬難免不派之
里下致開索擾之端查沿海礮台礮卡均有該管文武督率兵役巡防再派佐雜數員幫同稽查卽已周
密應毋庸另議總巡徒煩供帳其派出之佐雜亦不得多取夫馬以免擾及閭閻

一收入津口船數日期應統歸直省奏報也查東省洋面南自鷹遊門爲入境北至直隸大沽河爲出境
其實自天津南江沙以南二百四十里已爲天津鎮水師所轄而南船自吳淞江出口須避五道大沙均
越過鷹遊門交界徑由東大洋行駛乘風破浪晝夜不息非如內河接站駐泊可比其入出境日期勢
難逐船分晰東省自應卽就收島船數稽查奏報上屆派員設撥於天津海口查探船數及至報到總在
天津鎮具奏之後轉涉虛文此次應行裁減以節糜費而歸核實

一收島船隻應相風催令開行也查江省原議相風開行應聽耆舵之便固屬慎重之意但漕糧攸關正
供亦未便在洋久滯經過沿海口岸若竟漫不加察舵水藉口風信任意逗遛甚或娼賭滋事均所不免
上年稽查雖密不無耽延來歲漕船收泊應令巡島員弁隨到隨卽驗明船號察看風色順利卽令開行
不得稍有留難更不容舵水故意延宕附近海口如有窩娼窩賭之徒責成地方官預爲查拏隨時嚴禁
以靖地方而速漕運耐庵奏議

諭軍機大臣等賀長齡奏籌議海運巡防事宜前據蔣攸銛等奏來年新漕請仍由海運當經降旨將江蘇省

蘇州松江常州鎮江太倉四府一州新漕准其仍屆海船運赴天津一切事宜如須量為變通著各該督撫籌議具奏茲據該護撫將現在查辦及臨時應行變通各章程逐條覆奏所稱在途商船應催令回南受兌一節南漕十月開徵應趕為一運赴津商船於春夏間攬載放洋歸期莫必若不先行曉示恐致誤運著即飭沿海州縣各於所轄口岸多貼告示曉諭並不時親往稽查如有南回船隻即令趕緊南駛其自南省駛來者即飭迅速前往卸竣回南以備兌運其最要島嶼應令該管將官親督彈壓一節南糧經由東省洋面可寄錨收泊者二十五處其廟島孤懸海外巡防尤為緊要江南沙船舵水尙屬安靜浙江帶船三不係船水手人等率皆強悍不馴每致登岸滋事屆時著飭各該管將官常川赴島督查彈壓仍先咨會江蘇預為曉諭如敢在途生事即由所在官員照例嚴行懲辦其陸路委員應行酌減一節所奏甚是沿海礙要墩卡均有該管文武督率兵役巡防再派佐雜數員幫同稽察果能實力巡香已屬周密若另設總巡徒煩供張致擾閭閻著即照議酌減至派出之佐雜各員亦毋許多取夫馬以免擾累其收入津口船數日期應歸直隸奏報一節南船自吳淞江出口須避五道大沙均越過鷹遊門交界經由東大洋行駛其入出東境日期勢難逐船分晰著即就收島船數稽查奏報若該省派員設撥於天津海口查探船數具報較天津鎮奏報轉遲著即裁減以節糜費其收島船隻應相風催令開行一節漕糧正供攸關未便在洋久滯若聽舵水藉口風信任意逗留不免耽延著飭巡島員弁隨到隨驗明船號察看風色順利即令開行毋得稍有留難並毋許舵水故意延宕其附近口岸如有窩賭滋事之徒實成地方官拿獲隨時嚴禁該護撫惟當認真經理嚴飭各員弁實力稽查俾船行迅速糧運無誤是為至要

咸豐二年諭軍機大臣等劉源灝奏籌辦海防情形一摺本年海運山東省水師將弁不敷巡防自係實在情形惟請飭江蘇遴派武職大員北來防衛一節業據陸建瀛等奏定章程並分咨山東直隸等省沿途接護又據稱飭令江蘇在籍員外郎王承基安徽候補知縣沈譽來等雇募水勇分爲頭尾兩幫督押糧米起運是江蘇已有勇船防護不致漫無約束況米船現經陸續開洋若此時始令派委大員轉恐遷延時日緩不濟急該署撫仍照現定章程妥爲辦理毋庸再議更張 聖訓

四年諭軍機大臣等據黃宗漢奏海運漕糧將次受兌放洋一摺本年浙省海運糧米經黃宗漢議由江蘇太倉州屬之劉河口受兌起運現在業經收有成數剋日即可放洋北上所有經過各該處洋面海口自應嚴飭水陸文武員弁帶領兵役加意防衛以期妥速狼山鎮總兵泊承陞現帶水師在上海勦匪著怡良許乃釗卽飭令該鎮於漕米放洋時督帶兵船妥爲護送並著張亮基迅速揀派熟悉洋面之員於漕艘經由地方及收泊口岸節節防護毋任疏虞至駛抵天津海口時卽著桂良派委文武各員妥籌起剿仍遵前旨寬爲豫備船以濟剿運至前踞獨流之賊現已潰竄河間屬境距天津較遠所有浙江派赴天津會同收米各委員仍卽照舊馳赴該處隨同驗收毋稍遲誤 聖訓

又諭軍機大臣等據桂良奏稱上屆海運江浙兩省僅派文員來津不足以資彈壓天庾正供關繫至重且天津靜海一帶賊氛甫退一切稽查彈壓均不可稍涉疏虞昨經降旨令怡良等派令狼山鎮總兵泊承陞督帶師船於海運沙船放洋時護送出口惟天津進口時仍須有江浙武職大員會同稽查更爲得力著怡良許乃釗黃宗漢於江浙兩省水師內迅速揀派武職大員酌帶兵丁隨同海運沙船頭起先來天津與所派文員

稽查彈壓其沙船駛抵天津以後應行查驗人數收繳器械卽責成該員弁等會同各該委員一體查辦 聖訓

五年諭軍機大臣等前據崇恩奏報海運防衛事宜聲明內洋口岸責成登州府汪承燾親歷各島稽查彈壓外洋巡哨責成登州鎮田浩然親督師船節節迎護是該總兵卽應剋日出洋探明來船妥爲防護乃據全慶文彩奏江蘇運船孫德茂浙江運船盛寶安均於二月二十五日在石島以南洋面被匪搶去銀米貨物江蘇運船宋源昌張協隆二號先被搶劫復於二十九日被匪截入島內勒銀贖船且有裝豆術船數十餘隻同被擄困等語覽奏殊堪駭異石島爲榮城縣所屬地方商船往來必經之路卽無海運船隻亦應認真巡哨以安行旅況海運爲天庾正供甫入東境卽被搶擄並未見有該省師船爲之防護任令艇匪肆行無忌殊堪痛恨該總兵田浩然於所轄洋面漫無防範著先行摘去頂帶責令將洋面艇匪盡數搜剿不准稍事耽延儻此後續過海運漕船再有疏失朕必將該總兵從重治罪卽崇恩亦不能辭咎至石島海上煙臺卽石島等處均係海口要路並著崇恩嚴飭派出員弁實力搜捕其石島以南失事地方員弁並著查明參奏 聖訓

又諭軍機大臣等前因江浙海運米船在東省洋面被劫曾諭令直隸江蘇山東各督撫嚴密防護本日據全慶文彩奏續到米船安穩抵津又據怡良邵燦奏江浙海運新漕接續放洋各摺片覽奏俱悉現在海運米船源源北上洋面盜船仍恐未能淨盡著兩江漕運江蘇浙江各督撫飭令承辦各員諄諭放洋各船務須同幫行走彼此聲勢聯絡俾免疏失 聖訓

又諭據何桂清奏江浙海運船商稟陳來年護漕事宜一摺本年盜匪嘯聚北洋劫掠漕船沿海村莊並多

撥累疊經諭令各督撫認真兜剿茲據何桂清奏稱浙省甯商購買火輪船節次在洋捕盜實爲得力見在上
海商人亦買火輪船一隻請與甯商火輪船來年在東南洋面巡緝一以截南來盜艇一以護北運漕艘此項
火輪船隻與夷船相似是以不令駛至北洋既據樺買自粵東並非買自西洋又係商捐商辦與夷人毫無牽
涉且在東南洋面緝護並不向北洋開駛著卽照所議辦理來年漕船北上時以一火輪船帶同勇船駐泊江
南余山以一火輪船在南洋梭織巡護以清洋面而利漕行並著照江海師船式樣書寫記號不與夷船相混
是爲至要浙江新漕已定於十月開局江蘇省亦應趕緊遴辦著怡良邵燦吉爾杭阿嚴飭局員迅速封雇沙
衛各船務於十月內一律齊全以期年內趕緊受兌俟東南風至卽可開行毋稍遲誤東華續錄

又諭軍機大臣等邵燦奏請嚴扼北洋島嶼並雇船捕盜漕一摺以余山石島爲寄碇之所以牛莊爲裝
卸貨物之地盜艇伺劫多在該三處口岸必須嚴行扼守始能保護新漕前據何桂清奏甯波上海商人各屬
用火輪船一隻以一隻駐泊余山以一隻在南洋梭織巡護本日復據邵燦奏由商捐雇網稍船二十隻與浙
江商船合力駐守余山是南洋盜艇當可絕其來源其北洋牛莊石島等處亦應豫籌扼堵著英隆書元崇恩
嚴飭水師將弁實力巡哨認真剿捕務使匪船無從窺伺以利漕行至海船沙運自十激放洋後向派武職大
員長途押護據該漕督奏稱徒滋糜費實則虛應故事自係實情此次海運卽毋庸專派水師大員著怡良吉
爾杭阿何桂清崇恩責成沿海水師逐程遞護何處見有盜踪卽將何處水師員弁參辦不得互相推諉致有
疏失再浙江新漕業於十月內開局江蘇漕務情形尙未據該督撫奏報前經催令趕辦於年內一律受兌著
怡良等迅速遵辦並將開局日期及起運米數先行奏報毋任再延東華續錄

七年諭軍機大臣等前據崇恩奏派委總兵王鵬年登州府知府汪承鏞等護新漕並據怡良等奏稱雇募勇船會同水師巡緝當經諭知怡良遵照成案令護漕師船至東省石島洋面交替明白再行南下俾南北水師各專責成本日據端華等奏江浙運糧莊合順等沙船四隻在山東蘇山養馬島各洋面被盜劫去漕米多寡不等並劫去經費銀二千三百餘兩等語漕糧為天庾正供數日之間四船先後被劫該水師將弁所司何事實非尋常疏忽可比著趙德轍崇恩速即查明所有蘇山等洋面如在石島迤北著崇恩將東省所派鎮將等從嚴參辦若在石島迤南則江省將弁無可辭咎即著趙德轍參懲辦續來漕船尚有百餘隻之多應如何嚴密巡護並著趙德轍崇恩嚴督各該水師將弁實力經理毋許再有疏失被劫沙船內除王鱸鄉一船係在養馬島失事其餘三船均在蘇山被劫恐該處海島內必有匪巢屯踞並著崇恩督飭將弁密速搜捕以清盜藪此次劫案務須人贓並獲毋令漏網儻或竄入津沽等處著譚廷襄飭令各該海口員弁先事嚴防不准稍涉疏懈致令闖入東省藉端

八年諭軍機大臣等崇恩奏豫籌東洋防護漕船事宜一摺據稱東省海口如蓬萊之廟島福山之之罘文登之威海榮城之石島俚島均係漕船往來必經之地防護最關緊要該撫現飭令登州鎮督帶舟師於漕船入境時在洋面嚴密巡緝惟近年閩廣艇匪往往隨漕北上尤須格外慎重東省在粵新造廣船一時恐難趕到請飭令江南商局所置輪船隨漕北上等語現在江浙兩省漕船業已開行洋面恐有疏虞必須妥為護送山東師船不敷分布著何桂清趙德轍即飭令前派輪勇各船於漕船北上時跟蹤護送並令到山東洋面巡緝以壯聲威至江省護漕師船著遵照舊章飭令送至石島洋面交替明白方准南旋以重漕運

聖訓

九年諭軍機大臣等崇恩奏豫東防護海運事宜一摺江浙起運新漕經由東洋如廟島之罘威海石島俚島各口均係往來收泊要隘處所該撫已派登州鎮總兵曾逢年親督舟師巡歷迎護並責成知府汪承鏞巡防催趲惟該省新造廣艇一時尙未能到水師存船無多未可深恃請飭江浙督撫將火輪船護送北上自係爲慎重漕行起見此項輪船原不能隨漕北上著何桂清徐有壬胡興仁於漕船放洋時卽照歷屆章程飭令勇船在洋巡緝火輪船分別住泊於余山一帶扼守闔閩廣匪船不使乘間窺伺其護漕師船並著送至山東石島洋面交替毋得稍有疏忽 聖訓

右防護事宜

順治九年題准各省因旱災改折其江南江西浙江每石折銀一兩五錢山東河南每石折銀一兩二錢食兵事例

康熙八年題准河南漕糧遵賦役全書每石折銀八錢會典事例

九年題准浙省嘉湖二府被災每米一石折徵銀一兩會典事例

十二年浙江巡撫范承謨奏爲浙西連年水旱民不聊生仰荷 皇恩允折得免流離今歲自夏徂秋旱蝗驚擾於前大水淹沒於後百方補救將慶有成而八月初雷雨一宵異處遍野攬禾敵稻變奇荒被災情形巨與督臣先後題報見在確勘另疏具請外惟是各府漕白南糧統計一百餘萬受災者固無粒米可穫薄收者又皆青腰糶糶九月將半開徵在邇各項本色無從措辦三府百姓籲請全蠲號哭情狀慘難殫述荒歉至此 臣誠不能遽責之輸納也竊計漕糧爲軍國重務白糧係 天庾玉粒何敢擅爲請蠲但本

地既受重災鄰省亦多歉歲欲辦本色勢有萬萬不能者臣既不敢虧國賦以誤餉又不敢置民困而弗恤夙夜躊躇審求至當方敢備陳 皇上之前查杭屬之仁錢二縣嘉屬之嘉秀等七縣湖屬之安吉歸烏等六州縣自被災五分以至十分約計應徵漕糧正米三十二萬四千餘石惟有改折可以稍救民命仰祈 皇上軫念災甚於前歲准援康熙九年之例改折徵銀其漕截耗贈亦循九年之例除豁在小民可免耗米一十二萬九千餘石漕截銀一十四萬餘兩其輕齋等銀仍照額解部又應減存漕船六百六十隻可省造船銀三萬九千六百餘兩脩船損具銀四千餘兩行月安家等銀三萬七千餘兩運軍行月米四萬五千餘石統計捐存銀米一十二萬有奇不惟歲額無虧又可節縮如許以佐 國用一轉移間遂得民甦而國裕也再查康熙九年折漕每石一兩此因地方初次受災尙可勉爲輸納今已三年大稔民力耗竭斷不能如九年之價備查漕運議單災荒改折每石折銀五錢至七錢又順治九年戶部議請遇災改折例止五錢極多不過七錢奉有 諭旨欽遵在案今已府漕糧臣不敢於議單之外再議減少自五分至十分不論正兌改兌每石一例改折銀七錢脚費另徵較之舊例頗有贏餘而與市價不甚相遠特懇 皇上大沛鴻慈照每石七錢之例折銀徵解以救倒懸內歸烏德清地處最窪民尤至困三縣漕折倘蒙 皇恩概准蠲免三邑之民庶可得免遁逃若萬不可免臣倣照江南舊例寬以兩年帶徵則 朝廷額賦不過稍遲而災民得以從容設處至於被災三四分者例不蠲折然所收之稻水浸蟲傷不能盡照當年米色其應輸漕南二項請以江楚秬米隨便交兌方可勉完臣因目擊災傷無能挽救請蠲請賑更請緩徵而尤萬不容已者首在漕運不得不急籲改折祇以頭緒繁多累筆難盡兼以憂慮成疾瀝誠之下情詞失次然從 國計

民生起見不敢不冒昧陳請惟望 睿慈鑒此徵兌期迫特沛 皇仁立允所請俾 諭旨早到浙省一日則百萬災民危而復安死而復生矣 吾庸存案

三十七年江南建平縣漕糧改折秬米從民便也 通考

雍正元年諭戶部浙省偶值秋旱其被災地方已降諭旨蠲免錢糧令有司加意撫綏查杭嘉湖所屬被災十四州縣應額徵漕米三十二萬石朕思荒歉之歲民間納米爲難著令徵收一半改折一半俾地方多存正米十六萬石又有耗米若干既可以濟民之食又可以紓民之力於閭閻大有裨益其改折之價著照康熙九年例每米一石折銀一兩按限解部雍正內閣 上諭

乾隆二十年議准江蘇被災州縣粳米每石折銀一兩粟米每石折銀七錢五分各州縣衛本折細數造冊送部會典事例

二十三年諭豫省乾隆二十二年緩徵漕項米麥豆石均予折徵以示體卹會典事例

二十四年諭浙江杭屬之仁和錢塘湖屬之烏程歸安長興德清武康等處應徵乾隆二十年及二十三年緩漕正耗米七萬一千餘石准其改徵折色會典事例

嘉慶八年奏准江蘇省泰興縣地不產米且漕倉遠設泰州不通舟楫將該縣額徵漕糧兵月等米照阜寧清河桃源宿遷沐陽五縣之例改爲民折官辦秋成時探明鄰境價平米多之處赴司領價採買兌運用過價脚等項據實報銷照數徵解還款會典事例

道光五年諭軍機大臣等前飭令各該督撫籌議海運折漕事宜原爲來年疏治河道之計現據陸續覆奏海

運一事惟江蘇可以試辦然亦不過運米一百六十萬石其餘各省漕米既不能概由海運而折漕亦多窒礙紛擾是浙江江廣額漕及江蘇海運餘贖漕米皆須籌畫河運惟本年高堰石工竣後將來收蓄清水情形若何尙難豫定設蓄清丈尺仍不能敵黃明年重運經臨若仍開放禦黃壩復有頂阻倒灌之虞豈不是一誤再誤朕思海運而外惟盤壩接運既可使漕糧悉數抵通而禦黃壩不開亦可免湖河受病黃水不倒灌入運卽可並力東驅以收刷沙之益彼時河漕亦當充裕俾專刷運河之淤以濟漕行明年若能如此辦理庶河漕兩有神益至道光七年可以仍復舊制豈不較折漕漕工停運治河爲得計耶第盤壩經費應如何籌畫不致多糜接運船隻應如何調撥可以敷用均須通盤計慮周妥琦善等接奉此旨後會同體察情形悉心覈議據實具奏不可因係朕特交籌議稍存成見總期計出萬全庶不致一誤再誤也 聖訓

二十八年江蘇巡撫陸建瀛奏南漕改徵折色諸多未便敬謹瀝陳一原議改收折色卽以其銀分於河南陝西奉天豐收地方購買米麥或招商由海運津等語查定例折米一石納銀一兩其多者亦不過一兩四五錢無論河南等省豐歉不可爲常卽以招商海運而論二十七年成案每米一石給銀二兩四錢或六錢不等統計大局入不敷出當此國用支絀之時何能更爲買米籌款一原議改收折色不惟經費有補且可以應東南官民之困等語查招商採買例價不敷勢必酌增折價過重民何以堪民力不支必多積欠民欠未完必責官墊官墊無償必添那移江蘇數十年來均以墊漕而致虧今又加以折漕將另開一虧空之門恐民困未甦而於國帑大局有礙一原議南漕全折京城米價必昂請酌折成數等語查酌折成數辦理參差幸而年數豐登折收三成兩成尙徵七八成本色萬一歲事不齊則減米一石卽少米一石減折色一分卽短採買一分而不

尙官吏又多不可思議之處久之銀短而米更短於京師民食關繫匪淺得有原議王大臣會同該部議奏東
董續錄

二十九年兩江總督李星沅奏南漕改折戶部例定價值爲數甚輕州縣私收折色多則徵收不易少則採買
不足且銀價時有長落年景時有不齊不肖州縣顯開浮勒之端不法吏胥暗取訛索之漸種種窒礙變而難
通得有原議王大臣等會同戶部議奏東董續錄

又 諭內閣前據李星沅陸建瀛先後具奏南漕改折流弊易滋諸多窒礙各等語當交原議王大臣等會部
議奏茲據悉心駁議具奏應如該督撫所請毋庸議折本日適據耆英奏到南漕暫緩改折一摺朕詳加披閱
折漕之議原因外省州縣折色過重徒充私窠轉細正供因力求變通令各就往年徵糧實數酌減徵收期於
興利除弊既據該督等以種種格礙難行分晰陳奏惟恐不肖州縣藉折色之名抑勒倍取是便民之舉轉致
病民亦不可不防其漸所有各省漕糧著准其仍照舊章辦理毋庸分成議折但變通既恐滋弊守舊宜復成
規漕糧爲天庾正供不容顆粒短絀封疆大吏尤當激發天良隨時整頓嗣後務須實力徵收全漕免運儻各
屬有捏災註荒及官吏私徵中飽州縣浮收勒折等弊必應嚴加釐剔其不肖州縣肆無忌憚如敢浮收勒折
病民肥己一經查出卽著指名嚴參治罪毋稍姑容該管上司儻有意存徇庇者著一併從嚴參辦經此次申
諭之後如該督撫等仍漫不經心諉之於弊難周察相率因循或不竭力思辦全漕任聽屬員捏報災歉朕惟
有執法從事恐該督撫等不能當此重咎也懷之慎之 聖訓

三十年諭陸建瀛奏覆南漕改折會議需時請仍照舊章辦理一摺又另片奏改折窒礙情形請免再議等語

前因傅繩勛陳請蘇松太倉三屬改折漕糧給事中曹楫堅極言其難行經部議指出各情節諭令陸建瀛會同傅繩勛妥議茲據該督奏稱以辦漕見已屆期倉卒既虞貽誤復以折漕必致缺米更張更屬非宜在傅繩勛因收漕棘手欲為變通自係為裕國均戶起見而陸建瀛從本計深籌慮多窒礙亦係實在情形著如所請江蘇折漕仍照舊章辦理無庸會議東華續錄

咸豐三年諭內閣給事中雷維翰奏江廣新漕部議由官折價請旨遵辦一摺前據戶部議奏江廣等省咸豐三年應徵漕糧由官折價解京民間完納悉仍其舊不許以折銀之議向民間更改舊章藉口浮收勒折已降旨依議行矣第恐戶部原奏閩未能周知各屬州縣或藉口折價愚弄小民以為科斂地步致生事端著湖南湖北江西各督撫按照部議剴切出示曉諭俾窮鄉僻壤皆知此次新漕仍照舊章完納由地方官自行變價解京與民無涉儻不肖官吏有藉詞私改章程及浮收勒折等弊即行嚴參懲辦並著各督撫將此旨及戶部原奏一併刊刻徧行宣示咸使聞知 聖訓

四年諭軍機大臣等戶部奏遵議蘇松等屬漕米一摺蘇省漕糧為京倉支放大宗原不准改行折色既據該督等遞陳辦漕棘手情形不能不量為變通惟折漕銀兩專為採買米糧之用現在京倉存米無多若不急籌買補餉精憑何支發該省為產米之區本年停運數十萬石地方即多數十萬石之米如果實力妥籌不難即時足額漕糧為天庾正供該督撫身任封疆既已貽誤於前若再不急籌補苴置京倉於不顧自問當得何罪怡良許乃鈞接奉此旨著即派委幹員如數採辦迅速由海船運赴天津務於五月以前放洋不准稍有遲誤除採買米石若干外所有折色銀兩仍即迅解部庫不得以軍餉藉詞截留並將現在辦理情形由驛先行馳

奏此時京倉於盛京各處採買米石
作速解京朕惟有將該督撫等治以貽
同治元年諭議政王軍機大臣等前據
部奏稱張之萬所陳折漕銀數與河南
益應照所請辦理惟本年漕折據稱可
辦糧共計三十餘萬石前據劉元善奏
撫於抵豫後卽能將歷年漕弊不避嫌
自能深悉著卽照戶部所議督率各屬
有關涉國計民生務宜隨時體察情形
二年江西巡撫沈葆楨奏竊臣接准戶
御史丁壽昌奏籌備京倉各摺議令
稱現在九嶽洲業經克復奏令將本
礙難借運輪船及採辦米石運京諸
總何敢拘泥前奏藉詞推諉伏念漕
浮收者或二三石以上勒折者或至
需一物必有一物之費踵事逐增遂

丁才得不取之州縣州縣乃以旗丁所索並上兌以前一切需費責之于民當時物力之豐民情之厚迥非今日可比然爾漕之案已層見叠出矣咸豐三年後運道中梗變價充餉較兌運年分輕減已多自是兵燹連年農民失業花戶不堪差擾以抗納為常規官吏求免處分以報災為長策始而官民交困繼而官民相讐窮則變變則通湖北因有折徵之議江省踵而行之固緣民氣未蘇不得不因時制宜姑就力之所及而利導之也今歲春夏陽雨偶愆災不甚重而各屬米價驟貴至四五兩有奇饒廣以東並無米可購蓋連年之兵燹耗之水旱耗之蘇皖浙軍營之採辦輪船之販運又耗之無力者朝不謀夕有力者稍能蓄積既慮資賊又苦題捐雖素稱產米之區絕無蓋藏有事則立匱日來秋稻已穫米價尚三兩上下按漕徵米浮於原折之數已多焉能令其再完運費平海運雖較省於河運據署九江道蔡錦青稟稱海船水脚每石約銀一兩江省地非濱海其由內河出江由江達海由天津入京並製備口袋下河過船入倉挑脚官吏夫役飯食等費必一二倍不止限以成例官無可賠准其實銷費無從出且各縣倉廩悉燬於賊修復尤難未能隨兌隨收輸將必增苦累分微本折驟葛滋多滑吏奸胥藉以上下其手此臣與各司道再四商酌總緣瘡痍未起運難規復舊章誠恐無益京倉轉慮貽誤京餉合無仰懇 天恩俯准將本年分新漕仍徵折色源源委辦以備餉需沈文肅公政書

四年直隸總督李鴻章奏竊臣等承准軍機大臣字寄同治四年八月二十五日奉 上諭戶部奏江浙來年漕運請飭儘趕辦一摺江北久經肅清各屬本年新漕應即徵收本色掃數起運惟本年河運係封屬民船驟熟米數太多不無壅肘如江北全漕不能概由河運即由該商酌量情形劃分成數河海並運一切章程

趕緊妥議奏明辦理等因欽此遵經轉飭代理江寧藩司勒方鐸署江安糧道李鴻裔妥議籌辦茲據會詳前來伏查江北淮揚徐通四府州屬額徵起運漕米十六萬餘石本年淮揚等處夏旱秋澇被災較重尙未勘定分數約計可徵米九萬餘石竊自咸豐三年以來運道不通漕船壅壞應徵漕米均經 奏明飭屬變價分解揚徐各糧臺充餉各州縣因徵米既須變價卽按逐年米價折收錢文易銀解臺臣案於試辦河運時將各省漕糧因軍需孔亟先後改徵折色之處附片陳明在案今年揚防盡撤欠餉已清臣鴻章曾預飭司道本年漕價必應全數解京雖有急需不得援例截留以資部庫惟江北漕價部定每石折銀一兩四錢嗣糧臺因米價日增軍餉日絀歷年飭令加增各州縣以收錢盈餘並節省幫費等項全數捐解充餉每米一石解銀二兩四錢當軍務緊急之時民間咸知爲 天庾正供竭力報効官民相安十餘年來從無鬧漕抗糧之案今若改徵本色民間完米既虞弊端百出而以米運京之費一無所措本年試辦河運每米一石所用船價耗米運腳經費扁挽緯纜席片及通倉經運倉經紀箇兒錢等項約共需銀二兩數錢民間完納漕糧既不能違例加收運費州縣徵米起運亦不能勒令賠貼解資則此每石運費二兩數錢臣等實無從挪墊至本年蘇松起運漕米可較上屆加增海運沙船無多正虞不敷裝運勢不能加入江北漕米則江北之漕仍須另籌河運臣等往返函商並督飭司道各員再四熟籌惟有仿淮徐等屬民折官辦章程變通辦理運本屆江北全漕約米九萬餘石擬請令各州縣照舊每米一石折收銀二兩四錢全數解司以一半按部定例價每石作銀一兩四錢先行解京其餘一半派員於米糧著萃之區分投採買江北粳米無多米色不能一律仍照試行章程紅白兼收種糶並買約計價每石需銀二兩有餘以一半解部例價外之節存銀一

兩又益以例支漕項行月贈五給丁等銀作為一半河運之費計尙不敷再由外設法籌補事竣分別報銷
此次雇用民船並起運事宜容臣等參酌上屆試辦河運章程續行妥議具奏李文忠奏議

又直隸總督李鴻章片再查此次籌辦江北新漕採買運京權宜試行尙未知能否應奉南漕停運已久大
亂之後亟應與民休養一旦改議徵收起運各有為難謹為 皇上瀝陳之漕弊積久愈深大略不外於丁
胥遞事誅求幫兌互相魚肉究其受害最切厥惟小民道光間諸臣章疏 宣宗諭旨言及州縣浮收旗丁
幫費未嘗不深恨次骨終以積重難返無可如何道光二十七年王大臣戶部議將南漕改徵折色以實部
庫而甦民困為前督臣李星沅奏駁未行咸豐元年江蘇撫臣傅繩勛力陳浮收幫費弊端請收折色又經
部科議駁蓋以數百萬之米易銀則銀必貴以數百萬之銀易米則米亦必貴皆不敢輕為嘗試迨至時勢
所迫改為折色數十年鋼弊不期除而自除彫瘵之民於以少得休息今若重收糧米必致諸弊復萌夫小
民之情減則順而加則逆稍有抑勒勢將難堪軍興十有餘年閭閻瑣尾流離不忍徧視雖有完善之處而
官捐私借畝費抽釐幾無一歲能寬亦無一家得免困苦至此非大培元氣不特瘡痍莫起兼愈鉅險生端
旁觀者謂完米完錢並無二致何以折色易而本色難不知徵收折色照部定每石折銀一兩四錢必不敷
買米之數州縣所收縱有增益民間以部價相衡斷不能加至倍蓰即如江北近年折至二兩四錢已較江
楚各省為多然照市價亦僅能買米一石耳民間輸納較易力量較省若令備米交倉則向所謂別斛淋尖
風篩打樣以及併合包勺各種苛勒乘機而來紳士包漕棍徒攬抗亦聞風自起民間以米上兌有一石完
至數石者更有由單鋪藉掛號抽釐等項訛取錢文米色與銀錢不同明屬潔淨乾圓何難指為醜米格外

需索更屬防不勝防是完收本色糶現在折收之數有增無減近日民力實有不逮江北尙屬一隅之地既收本色將來須推及兩楚江西而江楚漕折較江北爲減收米必更掣肘似應寬以數年之力俟各省軍務大定防軍全撤次第籌酌舉行驟議改徵恐滋事故此所謂徵收之難也至於起運南糧唐代用轉般法沿水置倉由江而淮而汴遞輸於官宋崇甯中改爲直達明季置屯衛我朝因之今漕船盡廢欲全數修復約需銀三十萬兩若轉般之法必先建倉南漕正耗四百餘萬石以一倉儲萬石計之須四百餘倉一時均無此鉅款浙蘇海運歷屆幸安乃近年北口通商各貨爲洋船攬載沙船生意淡薄減歇之後勢朽過多本屆蘇浙之漕尙慮不敷裝運斷不能益以江北之米卽原運之數亦恐此後海船日少不能不預爲熟籌則惟有仿直達之策以民船代漕艘較爲近便臣棠本年試行河運原欲爲先事之導以濟海運之窮雖已挽運抵通而運費不貲雇船亦極艱苦卸米之後尙無回空日期聞山東戴村壩復決河水洩枯濟甯已上乾涸已多前船年內不歸則來年需用之船必致無人受雇且近來剿擒各軍皆由運河轉運軍裝餉米兵差日多民船日少雇價日重沿途之偷竊運道之阻滯在在堪虞只可強試一行而米數必不能多遲速必不能定此所謂起運之難也有此二難若欲解運本色漸復舊規固非咄嗟可辦卽采買雇船耗費滋多亦非經久之策臣等籌思至再力爲其難本年江北之米仍擬照上年試行河運章程再行試辦而以半折半運通融用費冀稍彌補而免貽誤若半銀之數不以例價解京則少每石一兩之節存半米更不能起運近時捻蹤飄忽往來運河左右蹤迹靡常內河船隻愈見稀少屆期能否雇寬齊全及運行無阻之處當隨時察看情形奏明辦理抑臣等更有請者此次漕米運至通州連米價及運腳雜費每石總須合銀四兩數

錢無可再省本屆蘇浙海運稍多京倉儲備亦稍裕似不爭此四五萬石之米且因此修理沿途廂塌挑溶長河耗費更鉅尤爲不值莫若全數解折省出運費每石可省折銀二兩四錢在津通買米填倉既可有益無絀卽以之抵放俸甲亦得實惠均霑似於國計不無裨益並請 敕下部臣迅速通籌妥議核覆飭遵李文忠奏議

馮桂芬折南漕額萬貢百里賦納總二百里納銓三百里納積服四百里粟五百里米此古聖人轉輸之法也宋人詩有云自古有良法一州食一州誠哉是言蓋不顧仰給於數千里之外而無百一之問阻者然則求裕京倉莫若興西北稻田而稻田非可計年奏績也惟有於天津通州京倉三處招商販運米麥雜糧而令東南諸省折解銀兩俟有成效並停東豫糧運最爲簡法京倉支用以甲米爲大宗官俸特十之一耳八旗兵丁不慣食米往往有牛泉草京領米易錢折給兵丁買雜糧充食每石京錢若干台銀一兩有奇相沿既久習而安之咸豐九年有以某牛泉扣米勒折控部者以歷年已然各旗皆然某牛泉得從薄譴惟官俸亦然三品以上多親領其餘崇輒賣給米鋪石亦一兩有奇赴倉親領者百不得一然則南漕自耕種微呼駁運經時累月數千里竭多少脂膏招多少蠹蟲冒多少艱難險阻僅而得達京倉者其歸宿爲每石易銀一兩之用此可爲長太息者也且也嘉慶中協辦大學士劉權之疏有云南漕每石費銀十八金不曰二十金而曰十八金必確有所見魏氏源駁之謂止四金其說甚謬魏氏云每石受米六百石幫費洋千元不過每石一兩有奇不知六百石內交倉止耗米僅四百餘石六百石幫費皆應在四百石內通漕魏氏誤會一謬也彼時松白糧幫費有多至二千六七百元者魏氏不知一謬也又云漕

順運行月米每石一兩玖行月等一切米價幾及一兩銀倘在外魏氏誤算舛錯三誤也所駁無一是處以今計之浮收其費或海運經費皆在內漕項也給丁苦蓋各費在內漕項之浮收也給丁耗米行月米五米貼運米給運米等也繕軍田租也漕河工費也漕督糧道以下員弁兵丁公私費用也雖不能得其確數大約去劉說不遠乃其歸宿爲每石易銀一兩之用此又可爲長太惠者也則何如援照成案每石折銀一兩四錢解京發餉直截了當有增無減兵心必大喜惟是領折買食可以相安者仍以歲有南糧二百餘萬石流通市中之故若市中驟少此二百萬石實米則一切雜糧贖費兵丁領折之後何從買食計二百萬石可食六七十萬人是六七十萬人無所得食矣此宜爲之地者也今議京通天津三處招商運糧宜於免門關稅外撥糧船帶免他稅之例定爲運糧若干石准免他稅若干著爲令仍以時查報糧數務合近年南漕糧白米之數不足則設法招徠或用鹽務倡導故事以足之諺云價高招遠客都門百貨所集卽川滇閩廣之產尙可咄嗟立辦一旦南漕不來米價貴卽雜糧隨之而貴又有帶免他稅之例近畿雜糧連櫛擊穀不待言人特不可一日不飽米麥雜糧同歸一飽且玉田豐潤等縣產米不少近更有牛莊米南運上海者本不患無米況近來商賈路窄一聞北地價貴必趨之若鶩更不患無米但令市中有米卽不必官中有米更宜官中多籌一年之蓄按年糶陳糶新爲有備無患之計則轉勝於從前之年銷年款而成萬全之策矣如是則南民所完之數卽北兵所得之數 國家無毫釐之損閭閻節齋送之資而且所謂漕項以下款目一切可省合計之奚啻千萬兩大利民大利國何憚而不爲哉或曰海運行之十餘年有效盍仍舊貫不知一行海運不特多出運費且上倉運漚一交涉於官吏之手百端折耗

雖簡於河運仍復不少兩湖江安尤鉅雖出自民間而其歸宿爲每石易銀一兩之用又何苦令萬家膏血多擲虛耗耶至於前議稻田利興則數年之後無事南米更善之善者矣若河運一廢不可復稍有識者卽知之而咸豐九年樞臣猶請復河運噫尙何言哉 文廟聖明得寢其議意外之幸也按邠廬抗議光緒二十一年廣西按察使胡燏棻奏查京倉支用以甲米爲大宗官俸僅十之一八旗兵丁不慣食米往往由牛泉章京領米易錢折給兵丁買食雜糧約南米一石僅合銀一兩有奇官俸亦然四品以上尙多親領其餘領米粟以轉賣米鋪每石亦一兩有奇夫南漕自催科征調督運驗收經時五六月行路數千里竭百姓無數之脂膏聚吏胥無數之誦賊耗 國家無數之開銷運至京倉至每石之值通扯或十兩或五六兩不等而及其歸宿乃爲易銀一兩之用此實絕大漏卮徒以冗官蠹吏中飽所在積習不改此真可爲長太息者也推原其故 朝廷深思遠慮以爲歲無南漕二百萬石流通市中則一切雜糧必牽掣而驟貴兵民有受其飢者故不惜繁費而爲此然自輪船暢行以後商米北來源源不絕利之所在人爭趨之市中有米與官中有米同則少米之患在今時可以無慮謂宜通行各省改征折色其耗費一概帶征並歸藩庫起解至旗丁京官應領俸米或援照成案則每石折銀一兩四錢或按照市價則每石折銀亦不過一兩有奇而一切漕河之工程海運之經費漕督糧道以下之員弁兵丁倉場侍郎監督糧廳以下之胥吏差役皆可一律裁汰蠲除是 國家歲省數百萬開銷反多數百萬盈羨而官兵兩項所領實銀且較增於從前領票轉賣之值公私兩途一舉而均得大利有益於國無損於民亦何憚而不爲哉卽使慮及歲饑乏食則每年提出盈餘銀數十萬兩在津兌買南米存儲通倉新陳互易以爲有備無患之計其事亦輕而易舉如慮海疆

有事運道或至梗阻恐將來官商兩病則更不然蓋名爲官米則敵船可以捕拿名爲商米雖仇國亦不能阻截公法具有有例可援是可不必顧慮也邱鈔

二十四年諭侍講學士瑞洵奏南漕改折有益無損請飭妥議施行及每年預提折價於津通一律購米以實倉庾並將屯田裁併改由地方官徵租各摺片著派奕劻孫家鼐會同戶部妥議具奏邱鈔

二十七年江督劉坤一鄂督張之洞會奏查全漕改折計省出耗折兌運局棧員紳修河開場駁船倉庫各費可歲贏二百餘萬數十年來言者多已議及戶部屢經咨詢查江浙漕糧皆係臨起運時購買海運則於上海漕米交商輪船河運則於汜水鎮購米交船戶在民久已折徵在官並不折解則船有換水需變之弊花戶有盜賣回漕之弊暗虧尤多旗兵得米盡以易錢京官食米皆買北稻然則漕運一事種種有名無實亟應設法變通邱鈔

論漕政日久弊生層層剝蝕上耗國帑下賤民生當此時勢艱難財用匱乏亟宜力除糜費切實整頓著自本年爲始各直省河運海運一律改徵折色責成該督撫等認真清釐將節省局費運費等項悉數提存聽候戶部指撥並查明各州縣向來徵收浮費責令和盤托出全數歸公以期彙成巨款仍由該督撫將提存歸公各數目先行具奏至倉場關係緊要全漕既經改折自應按時籌備詳定辦法所有採買運解收存儲備各章程及到倉後應如何嚴責成防流弊之處著漕運總督倉場侍郎分別妥議統限於兩月內覆奏毋稍遲誤邱鈔

右改折附

皇朝政典類纂卷五十七終

皇朝政典類纂卷五十七終